

M V N D I N I

*Dupl*

M V N D I N I I

V I N C E N T I N I

D I S P U T A T I O I N T R E S P A R T E S D I V I S A ;

*In qua ea, quæ de semine sunt controuersa inter Peripateticos, &  
Veteres Medicos, & doctissimos quosdam Neotericos  
accuratissime discutuntur.*

Ad Illustrissimos atque Excellentiss. Academiae  
Patauinae Moderatores Vigilantissimos.

M. A N T O N I V M M E M M V M D I V I M A R C I  
P R O C V R A T O R E M.

A N T O N I V M P R I O L V M E Q V I T E M, E T D I V I  
M A R C I P R O C V R A T O R E M.

A N D R Æ A M M A V R O C E N V M S E N A T O R E M  
A M P L I S S I M V M.



T A R V I S I I.


Apud Aurelium Reghettinum. M. DCIX.

*Superiorum permisso.*



BRITISH MUSEUM  
SALE DUPLICATE  
I 7 8 7





*Illustrissimis atque Excellentiss.*

# ACADEMIAE PATAVINAE

*Moderatoribus Vigilantissimis.*

M. ANTONIO MEMMO D. MARCI  
PROCVRATORI.

ANTONIO PRIOLO EQVITI, ET  
D. MARCI PROCVRATORI.

ANDRAEAE MAVRO CENO  
SENATORI AMPLISSIMO.

*Mundinus Mundinius . S. P. D.*



VI frugum primitias Dijs offeren-  
das censuerunt, ij mihi posteros do-  
cere voluisse videntur, primos ijs  
fructus deberi, quorum prouiden-  
tia nati atque ad maturitatem de-  
ducti essent. Quo si æquius nihil fingi potest, vo-  
bis, Illustrissimi atque Excellentissimi Academiae



ais Neotericis hucusque eruditioribus Medicis tentatam,  
sed minimè ad perfectionem perductam. Tantum ta-  
men in me potuit desiderium Medicinæ artem, quam pro-  
fiteor, defendendi, & studiosos iuvandi, ut omnem timo-  
rem abiecerim. Accipiant igitur hilari fronte Studiose  
hanc meam de semine disputationem, accipiant libenter  
hos meos primos conatus. quibus si aliquid contra aduer-  
sarios me præstitisse iudicabunt, ad perficiendam à me iam  
inceptam questionem de sede animæ, cum dabitur aliquid  
otij à medendi munere, & à gravioribus studijs, non  
exiguos mihi animos addent.





# OMNIVM CAPITVM

## HVIUS DISPVATIONIS.

### *Primæ Partis Capitula.*

<b>P</b> ropositio atque diuifio tractandorum. Cap. 1.	pag. 1
Sententia Ar. an foemina semen generet. Cap. 2.	2
Sententia Ar. rationes. Cap. 3.	3
Gal. sententia. Prima illius ratio. Solutiones Peripat. Cap. 4.	4
Confutatio solutionum allatarum. Cap. 5	5
Rationes, quibus demonstratur testes à natura propter feminis generationem factos fuisse. Cap. 6.	8
Quæ pro solutione primi Argumenti Galeni excogitauit Costæus, eorumque confutatio Cap. 7.	9
Aliæ, Gal. & Medicorum rationes probantes foeminam semen generare. Responsiones Peripat. & illarum confutationes. Cap. 8.	11
Quintum Gal. argumentum. Peripat. responsio. Eius confutatio. Cap. 9.	14
Sextum, & septimum Medicorum argumentum. Peripat. responsiones. Illarum euerfiones. Cap. 10.	17
Foeminæ semen principium in se agendi, & formandi habere probatur. Cap. 11.	19
Afferuntur duæ rationes ex Ar. probantes semen foeminarum generantem, & formantem in se facultatem habere. Cap. 12.	20
Dubitatur aduersus duas allatas rationes, & dubitatio secundum Ar. doctrinam remouetur cum nonnullis alijs instantijs. Cap. 13.	22
Soluitur dubitatio proposita in super: cap. secundum Gal. doctrinam, & remouentur instantiæ, quæ contra solutionem possunt afferri. & respondetur quibusdam quæsitis. Cap. 14.	23
Francisci Valesij dubitatio, & alię grauiiores contra determinata, atque earum solutiones. Cap. 15.	31
Ex principijs Ar. & Auer. probatur semen foeminæ formatricem in se facultatem habere. Tolluntur quædam fugæ Sueffani. Afferitur quædam alia Costæi responsio ad Argumentum Gal. desumptum ex similitudine natorum, eaque euertitur, atque ad examen reuocatur quædam Fernelij ratio contra Ar. Cap. 16.	34
Quibusdam obseruationibus ostenditur in foeminæ femine facultatem formatricem contineri. Quæ sit facultas formatrix. Cap. 17.	46
Soluuntur rationes Peripat. quibus conabantur ostendere foeminam semen non generare. Cap. 18.	51
Redditur ratio secundum iam stabilita principia de multis, quæ quæri solent circa foetus generationem. Cap. 19.	54



## *Secundæ Partis Capitula.*

<b>A</b> R. sententia de semine maris. Cap. 1.	62
Sententiæ Ar. & sectatorum rationes. Cap. 2.	63
Hipp. & Gal. sententia. Gal. rationes pro illius probatione. Peripat. respon- siones. Illarum euerfiones. Cap. 3.	64
Altera Gal. ratio. Responfiones Peripat. Illarum confutationes. Cap. 4.	73
Afferuntur duæ aliæ Gal. rationes contra Ar. & vna Costæi, atque ostenditur eas contra Ar. non concludere. Cap. 5.	76
Afferuntur quædam propriæ rationes ostendentes semen maris pro materia fœtus inseruire. & nonnulla difficilia dubia remouentur. Cap. 6.	79
Quæ in contrarium allatæ fuerunt Ar. & sectatorum rationes euer- tuntur. Cap. 7.	82

## *Tertiæ Partis Capitula.*

<b>P</b> Ropositio, & ordo dicendorum. Cap. 1.	89
Rationes, quibus Neoterici probant semina vtriusque sexus vi ef- ficiente carere. Solutiones earum, & quarundam Fernelij interro- gationum. Cap. 2.	90
Sententia Neotericorum de efficientia in generatione fœtus solius fe- minæ. eorum rationes. Sententiæ, & rationum euerfiones. Cap. 3.	96



# NOMINA AVTHORVM. QVIBVS AVTHOR IN HOC

OPERE VSVS EST.

**A**ccorombonus.  
Albertus Magnus.  
Alex. Aphrodisæus.  
Alex. Massaria.  
Andræas Vesalius.  
Andræas Laurentius.  
Argenterius.  
Aristoteles.  
Auerroes.  
Avicenna.  
Bottonus.  
Buccaferreus.  
Cardanus.  
Casalpinus.  
Cornarius olim damnatus.  
Costæus.  
D. Augustinus.  
Fallopins.  
Fernelius.  
Fracastorius.  
Galenus.  
Hippocrates.  
Heliodorus.  
Hieronymus Fabricius Aquapendens.

Jo. Baptista Syluaticus.  
Io. Baptista Porta.  
Io. Grammaticus.  
Iulius Alexandrinus.  
Iulius Castellanius.  
Mercenarius.  
Mercurialis.  
Oddus.  
Nicolaus Leonicens.  
Petrus Aponensis.  
Piccolomineus.  
Plato.  
Plinius.  
Pomponatius.  
Realdus columbus.  
Rudius.  
Saluus Sclanus.  
Scotus.  
Suessanus.  
Teophrastus.  
Valesius.  
Valuerdus.  
Zabarella.  
Zimara.



I N  
MUNDINI MUNDINII  
PHILOSOPHI,

Ac Medici perspicaciss. Librum de vtriusque ho-  
minis Genituræ facultatibus, ac effectibus.

*Bartholomæi Burchelati Physici Elegidion.*

**I**am liceat mihi vera loqui: taceas modò tincte  
Liuore: & rancos inuide pone tuos.  
Mundinus mundo Naturæ arcana recludit:  
Abdita quæ fuerant denique clara nitent.  
Vsq; adeo ut Medicis dubium, physicisque relictum  
Nullum: nam ratio quæque soluta manet.  
Vicerunt Medici: vicit modò iurè Galenus:  
Iam Peripatetici dent Medicisque manus.  
Iam iam centenis Mundinus protulit annis  
Anatomen, Mando quam publicauit ouans.  
Nunc ex Anatome illustrat Mundinus in omni  
Tempore Naturæ viscera testis sciens.  
Eiaculare simul Mulierem semen, & vnde,  
Ut vir agit, quorsum, quomodo, quæque via:  
Perfectum monstratque animal quodcunque parente  
Vtroque actiuum semen habere suo:  
Tum formatricem vim, ut masculcum tenet ipse  
Semen famineum sic retinere docet.  
Tollit hic interea dubia alta Neotericorum:  
Arcana vnde alijs colligi omisa notat.  
Denique cuncta id opus spectantia comprobat, atque  
Monstrat Mundinus, doctus in arte nimis.  
Nulla meis verbis: operi præstetur ab omni:  
Omnis & his verbis sic erit ampla fides.  
Mundinus Mundo Modò Mittit Munera Magna:  
Mox Mittet Mirus Maxima, Mira Magis.



# Typographus Benigno Lectori.

*Rogamus humiliter Lectorem, ut, ubicunque inter legendum illi aut mendum aliquod occurrerit, aut etiam aliquod uerbum in sententijs deficere illi uidebitur, non dedignetur ad hanc pagellam recurrere, in qua errata graniora castigata reperiet, numerus indicabit paginam, A primam faciem, B secundam.*

## Errata

- 1 B doctissime aliqui  
4 B retracti. n. testes subsident  
5 A quod lac ipsum  
ibid. quod penitus  
6 A unde ergo habet spiritus  
7 A à causis præparantibus  
9 B demonstrans semen gignere  
ibid. iestes  
12 B non accurreret?  
13 A celeres confertim facta  
14 B illis permixtio  
15 A celebratione  
ibid. cum omnes agens  
15 B quam alias in coitu  
20 B patet in quibus  
24 B legus  
26 B aide crassa  
27 B proindeque nullum  
29 A quare ut perfectorum animalium  
29 B ad ceruicem  
32 A si semen feminae & fortius  
33 A in fine  
ibidem non coincidit sententia  
ibid. B Hæc vero talis  
35 A filius oriatur penes hæc  
      filius similis  
ibid. B quando coquit, & mouet  
36 A in se ipso continent  
ibid. an verè  
37 A unde malum sibi  
38 B aut absolute filios  
39 A quod spectat ad alterum  
39 B ab illis sustinerent  
40 A liceat mihi augere  
43 B qui plantarum mares

## Correctiones.

- doctissimi aliqui  
retracti. n. subsident  
qui lac ipsum  
qui penitus  
Unde ergo habent &c.  
à vasis præparantibus  
demonstrans foeminam semen &c.  
testes  
non accurrent?  
celeris, & confertim facta  
cum illis permixtio  
elaboratione  
cum omne agens  
quam alias in coitu  
patet in auibus  
legas  
valdè crassa  
proindeque nullam  
quare ne perfectorum &c.  
ad ceruicem  
si semen foeminæ est fortius  
in fine  
non coincidit sententia  
Nec vero talis  
filius oriatur penès hæc  
      similis  
quæ coquit, & mouet  
in se ipso contineat  
an vero  
unde malam sibi  
aut absolutè fatendum filios  
quod spectat ad alteram  
ab illis sustineret  
liceat mihi arguere  
qui plantarum mores



## Errata

ibid. quod mores lequantur  
 45 A in amantibus  
 50 A ad imaginationes  
 50 B hoc hoc esse  
 52 A quo modo ò Ar.  
 ibid. quod concedat  
 54 A tribuit ille  
 55 A frigidius gignitur  
 60 A & foemina tradidit.  
 63 B sententiæ Ar. sectatorum  
 65 B vulua vingitur  
 67 A ibi philosophos  
 70 B quod eum ad aures  
 ibid. sine strepitu  
 ibid. membranamque circumdari  
 72 B promptam habet semen  
 73 B transmutatines  
 76 A exhibebat  
 80 A saluus selanus  
 ibid. quis vetat?  
 80 B aut primam formationem  
 82 A saluum selanum  
 90 A oppositione priuata  
 ibid. B prima paria  
 ibid. anima Vegetalis anima  
         vermiculi  
 93 B eadani  
 98 B membrum, & rotundum  
 99 A partium intra se  
 100 A Hipp. de genit,  
 101 B & hos deducat  
 102 B per arteriales nuper  
 103 A quem recipit  
 ibid. B probabilia vobis  
 104 A statim autem contra

## Correctiones.

quod mores lequantur  
 in animantibus  
 ad imaginationis  
 hoc esse  
 quomodo o Auer.  
 quod concedit  
 tribuit illi  
 frigidior gignitur  
 & foeminæ tradidit  
 sententiæ Ar. & sectatorum  
 vulua iungitur  
 ibi philosophus  
 quod cum ad aures  
 sine strepitu  
 membranaque circumdari  
 promptum habet semen  
 transmutationes  
 exhibeat  
 saluus selanus  
 quid vetat?  
 aut post primam formationem  
 saluum selanum  
 oppositione priuatiua  
 prima parte  
 anima Vegetalis vermiculi  
  
 eadem  
 rubrum, & rotundum  
 partium inter se  
 Hipp. de genitura  
 & hos deducant  
 per arteriolas nuper  
 quem recipiat  
 probabilia nobis  
 statui autem contra



# MVNDINI MVNDINII VINCENTINI

## DISPUTATIONIS.

In qua ea, quæ de semine sunt controuersa inter Perip:  
& Veteres Medicos, & doctissimos quosdam  
Neotericos, discutiantur.

### PARS PRIMA.

Propositio, atque diuision tractandorum.  
Cap. Primum.



CONTEMPLATIO de principijs est adeò  
sublimis, ut nulla dignior reperiri possit. Ve-  
runtamen semper parem cum dignitate difficul-  
tatem coniunctam habet; adeò autem iucunda  
est, ut nil in ea difficile, nil laboriosum esse vi-  
deatur. Disputationem ego de principio insti-  
tuturus, non disputabo, de supremo rerum omnium principio:  
non de prima materia, de qua tot lites sunt excitatæ, utrum ha-  
bent actum entitatum; utrum formam corporeitatis sibi coe-  
ternam. Non de quatuor rerum sublunarium principijs, voca-  
tis elementis, de quorum qualitatibus tam multæ extant con-  
trouersia. Hæc sunt merè philosophica, & à nobis remota. Di-  
sputabo de proximo nostræ, & perfectorum animalium genera-  
tionis principio, nempe semine. Neque differam utrum sit excre-  
mentum, vel colliquamentum; & alia multa, quæ iam rectè, &  
exactè à diuersis determinata sunt; unde non opus est, ut actum  
agendo, volumina de his conficiam, atque alijs propriam gloriam  
eripere quæram. Disputabo ea, quæ sunt controuersa, inter Ar.



# Mundini Mundinij

& sectatores ex una parte, Galenum, & Medicos ex alia; ut  
pote quæ, neque exactè, neque pro dignitate (si hæc mea cum alio-  
rum scriptis studiosi conferent) ab alijs hucusque tractata fuere.  
Utrum femina semen emittat, quod verum sit semen, & efficien-  
te facultate præditum. Utrum maris semen principium in se  
efficiens tantummodo habeat, an & materiale. Tertiò tanquam  
per appendicem, utrum sit verum, quod nuper doctissimè aliqui  
viri existimarunt, semina utriusque sexus generationi pro ma-  
teria solummodo inservire, efficiens vero esse calorem uteri, nec  
non calorem, qui unà cum quadam vi à matris corpore per ve-  
nas, & arterias in fætum dispensatur. Speculatio enim vero su-  
blimis, difficillima, pulcherrima, & iucundissima. Ad sublimem  
ergo, & pulcherrimam hanc contemplationem, sublimia, & pul-  
cherrima ingenia sua studiosi conuertant. Rerum enim tractan-  
darum difficultatem, & obscuritatem, mihi credant, iucunditas,  
quæ ex illis percipietur, superabit. Divido disputationem iux-  
ta tria à me quæsita proposita in tres partes. In prima disputa-  
bo primum quæsitum, utrum femina semen generet. In secunda,  
secundum, utrum semen maris habeat in se principium tantum  
effectivum, non passivum. In tertia doctissimorum Neoterico-  
rum placitum recensebo. In prima parte primo loco sententiam  
Ar. declarabo: deinde illius, & sectatorum fundamenta ad-  
ducam. Postea asseram sententiam Gal. & Medicorum cum  
proprijs rationibus, & singulis semper subnectam, si quæ erunt,  
Peripateticorum responsiones, & responsionum illarum confu-  
tationes, aliquas pro sententia Medicorum à me excogitatas ratio-  
nes subiungendo: Mox fundamentis Arist. & sectatorum respon-  
debo. Ultimò iuxta sententiam Medicorum rationem  
reddam de multis, quæ circa fætuum ge-  
nerationem quæri solent.

Quod, vel teste ip-

so Ar.

doctrinæ rectè traditæ signum

certissimum

est.



## Sententiâ Ar. an foemina semen generet .

## Cap. 11.

**E**xistimavit Ad. ad generationem perfectorum animalium (quæ, ut ipse statuit secundo de gen. an. primo, & quarto, sunt ea, quæ intra se animal generant, & innexum gerunt) mater tantum semen, foeminam verò tantum menstruum præbere. Semen concurrere ut efficiens, menstruum autem tanquam materiam. Unde primo de gen. an. 19. statuit idem esse menstruum in feminis, ac semen in maribus. Menstruum verò, ut ex doctrina sparsim ab ipso tradita elici potest, diuiditur dupliciter, in purum, & impurum, siue dicas in partem puram, & impuram. Impurum est, quod singulis quibusque mensibus excernitur, & si supprimatur, tot molestias in mulieribus parit, & ex hoc conceptus non fit. Nam tempore, quo fluit, virile semen retineri non potest, ob lubricitatem, quam tunc interna uteri superficies acquirit, aut si retineatur, elephantici fetus euadunt. Purum est, quod ad conceptionem concurrat, & ex eo, tanquam ex materia, partes fetus formantur. Hoc vocatur ab Ar. primo de gen. an. 20. semen non purum, sed indigens confectionis. Quod si in coitu obseruatur, mulieres quendam humorem album emittere, dicit Ar. loco iam citato, hunc non esse semen, non menstruum, sed humiditatem quandam uteri propriam, & in alijs mulieribus emitti, ut candidioribus, & frigidioribus; in alijs non; ut fuscis, calidioribus, & uiraginibus. Adeo quod, tantum abest secundum Ar. ut humor ille sit ad conceptionem necessarius, quod quinimo, neque etiam, ut aliqui imaginati fuerant, ad uoluptatem, quam percipiunt mulieres in coitu, quicquam conferat. Porro iuxta Ar. effusio illius humiditatis albæ sequitur potius ad uoluptatem, non aliter, inquit Suesanus, ac tempore gaudij lachrymæ ab oculis emanant. Accidit enim uoluptas, teste Ar. loco citato, & expositore Suesano, in coitu mulieri propter motum titillatiuum spirituum ad partes genitales mulieris irruentium, non propter effusionem illius humiditatis. Sicuti etiam euenit in pueris, qui,



## Mundini Mundinij

dum manibus genitale contrectant, persentiunt voluptatem quandam, etsi nil effundant, ob solam titillationem factam in radice membri à spiritibus illuc confluentibus. quemadmodum ergo cum spiritus calidi sint, tangendo meatus genitales, in eis titillationem efficiunt, atque eos dilatant, unde in coitu scaturit humiditas dicta: sic in gaudio, cum spiritus omnes ad exteriores partes confluant, & præcipuè ad oculos, ut ad partes, quæ multos spiritus pro sua obeunda operatione requirunt, & admodum sunt porosæ, ab ipsis spiritibus calidis plus solito dilatatis meatibus, & poris, emanant lachrymæ. Humiditatem illam Auer. quoque secundo collig. 10. comparavit salivæ, quæ effluit ex ore alicuius famelici, quando videt aliquem comedentem. Fœmina ergo secundum Ar. effundit menstruum impurum per certas periodos; in conceptione menstruum purum, in coitu humiditatem quandam albam uteri propriam, nullo modo semen. Menstruum impurum, & humiditas alba non concurrunt ad conceptionem, sed solum menstruum purum, quod est idem in fœminis, ac in maribus semen, & est materia, ex qua conceptus fit. semen vero maris efficiens est, formans conceptum.

Quod si quis hic in primo disputationis limine pulchram moveret dubitationem, dicendo non esse verum, fœminas perfectorum animalium, ut viuipara sunt, menstruum illud impurum emittere, cum præter quàm in mulieribus, ad sensum non appareat, & ut etiam Excellentissimus meus Præceptor, & concivis Alexander Massaria lib. de morb. mul. cap. 1. videtur affirmare. Respondeo ego pro Ar. & primo dico. Ar. voluisse viuipara omnia menstruas habere purgationes, sed omnium maximè mulieres. & hoc clarè explicat Ar. 6. de hist. an. 18. & confirmat 7. eiusdem cap. 2. & primo de gen. an. 19. & 20. & 2. cap. 4. & 3. cap. 1. fmò primo de gen. an. 20. reddit rationem, cur, maximè omnium viuiparorum mulieres menstruas illas purgationes patiantur. Secundò dico, cætera præter mulieres animalia viuipara habere ex sententia Ar. has purgationes manifestè, quando coitum appetunt. Tertiò dico ex Ar. 6. de hist. 18. difficile admodum esse in brutis perfectis, præter tempus coitus, observare an menstruas purgationes habeant, nisi quis iamdudum sequutus



sequutus ea sit, & admodum assuetus; & hinc factum esse d. Ar. ut sint multi, inter quos se ipsum reponit *Missaria*, qui menses in omnibus viviparis negent. Retulit vero mihi Reuerendissimus Abbas Franciscus Ciconia, (quem propter eius de rebus naturalibus scientiam, admirabilesque ceteras illius virtutes, atque meæ erga illum observantiæ gratia nominatum volo) se in quadam eius simia, singulis mensibus menstruas purgationes per spatium trium, & plurium dierum observasse. Vnde si quis in cæteris viviparis diligenter animum adhiberet, idē in ipsis, ut Ar. voluit, observaret. Hæc autem ad istam dubitationem sufficiant.

### Sententiæ Ar. rationes. Cap. III.

**D**Eclarata sententia Ar. videamus quibus rationibus, & Ar. ipse, & eius sectatores, feminam semen non generare, probarunt. Primò ergo ex primo gen. an. 19. huiusmodi argumentum elicitur. Si fœmina semen generaret, illud, dum concipit, intra se emitteret: at multæ mulieres fatentur sine vllâ emissionē, atque sine vllâ voluptate concepisse. Ergo fœmina semen non generat. Et Auer. 2. collig. 10. narrat historiam de quadam sua vicina, quæ in anima sua iurauerat, & de cuius sacramento confidebat multum, se, absque vllâ voluptate, & seminis emissionē, concepisse in balneo, in quo mali homines semen proiecerant.

Secundò ex 2. de gen. an. 4. arguitur sic. Si fœmina semen, ut mas, generaret, ex se ipsa absque maris congressu conciperet. consequens est falsum. Ergo & antecedens. Probatur consequentia. Nam ubi duo necessaria principia generationis, agens, & patiens, ac præterea locus, & tempus conveniunt, tunc, ut conceptio fiat necesse est. Agente enim, & patiente bene dispositis, & non impeditis necessario sequitur actio. Sed hæc omnia in fœmina adsunt, si semen emittat. Ergo absque maris congressu fœmina concipere poterit.

Tertiò ex secundo de gen. an. 4. & secundo coll. 10. arguitur sic. si humiditas alba, quæ in coitu ab aliquibus fœminis emitti-



## Mundini Mundinij

tur, esset semen, & in generatione fœtus partem haberet, vulua  
feminæ illam non proijceret, & traheret ad se maris semen.  
Nam credere, ut suum proijciat semen, & postea alienum attra-  
hat, inconueniens est. id enim frustra esset. Cum ergo propriam  
humiditatem expellat, maris autem semen attrahat, & retineat,  
signum est humiditatem illam ad generationem nil facere, &  
esse superfluitatem quandam (inquit Auer.) discurrentem pro-  
pter delectationem, ut superius etiam diximus, sicuti ex ore sa-  
melici, quando videt aliquem comedentem, discurrit salina.

Quarto ex primo de gen. an. 19. si mulieres semen produce-  
rent, tunc haberent duas naturales euacuationes inter se contra-  
rias. alteram materiæ coctæ, idest seminis, alteram materiæ cru-  
dæ, idest sanguinis menstrui, quod fieri nullo modo potest. coctum  
enim à caliditate, crudum verò à frigiditate provenit, itaque fe-  
mina vno, & eodem tempore esset temperamenti calidi, & frigi-  
di. quod est absurdissimum. quare cum mulieres menstruis re-  
dundent, necesse est, ut semine careant.

Quinto ex Auer. primo de gen. an. 20. Unius effectus natura-  
lis vnica est materia, vnicum agens; at si femina semen genera-  
ret, atque illud ad generationem animalis concurreret, tunc vnus  
effectus naturalis duo principia efficientia, & duo materialia fo-  
rent, semen maris, & feminæ; quod naturæ instituto repu-  
gnat.

Sexto ex primo de gen. an. 20. Mulieres, & voce, & pilis,  
& corporis habitu similes sunt pueris; at hi semen non emittunt.  
ergo neque mulieres.

Septimo ex eodem loco, & secundo de gen. an. tertio, & quarto  
cap. 3. Feminae sunt mares quidam imperfecti, & defectus qui-  
dam naturæ; ergo nullam efficiendi, sed patiendi tantummodo  
vim habent: ergo semen, ut mares, non generant; cum hoc  
efficientis rationem habeat. essent enim eiusdem cum maribus  
perfectiōis.

Octauo Ar. primo de gen. an. 19. signum affert, feminas in  
generatione fœtus non semen, sed sanguinem menstruum præ-  
bere. Nam mulieres, quæ nondum menstrua expertæ sunt,  
aut ijs carent, non possunt concipere; & cum conceperunt, statim  
menstrua



menstrua cessant. ergo non semen feminarum, sed sanguis menstruus ad generationem concurrit. neque ergo semen emittunt.

Confirmat hoc idem eodem, & sequenti cap. Ar. Quia, quo tempore in uiris semen generari incipit, in feminis menstrua innotescunt, ergo quod est in feminis menstruum, in maribus semen est, & ita femina semen non habent, sed loco illius menstruum. Hæ sunt rationes Ar. & sectatorum.

## Galenī sententia. Prima illius ratio. solutiones Peripateticorum. Cap IV.

**G**alenus, contra Ar. lib. secundo de sem. i. opinatus est, feminam semen generare; & inter cæteros usus, quos illi tribuit, Hipp. sequutus in lib. de gen. & de diata, & de natura pueri, hic præcipuus est; ut simul cum semine maris in utero mixtum, non solum concurrat pro materia ad generationem fætus, sed etiam, ut efficiens. Quæ quidem Gal. sententia, cum ex progressu huius disputationis semper clarior fieri debeat, statim fundamenta, quibus innititur, subiungam.

Primo ergo secundum Gal. arguitur sic. Natura nil frustra agit, & ubi eadem organa ab illa instituta sunt, ob eandem operationem instituta sunt; sed organa omnia, quæ à natura in maribus semini procreando, excoquendo, & eiaculando dicata sunt, in feminis reperiuntur. ergo ad semen excoquendum, procreandum, & eiaculandum in feminis à natura facta sunt. Maior una cum consequentia clara est. Minor per dissectiones anatomicas verissima inuenitur. Nem, & vasa præparantia, quæ sunt duæ venæ, & duæ arteriæ, utrimque scilicet una vena, & una arteria, & testes, qui sunt excoquentia organa, & vasa duo deferentia, utrimque scilicet unum, in feminis conspiciuntur, ut in maribus.

Respondent Peripatetici, ut superius visum est, in vasis dictis reperiri quendam humorem serosum, & aquosum, quem aliqui etiam guttam albam appellant, sed nil excoctum, eundemque  
usum



## Mundini Mundinij

*Usus testes in feminis habent, inquit Auer. primo de gen. an. 20. & secundo collig. 10. quem mammae in maribus habent. Nam & in maribus visuntur mammae, nemo tamen dixerit eas lac generare. Neque inquit Auer. quem deinde sequutus est Suesanus super primum de gen. an. in fine, ex eo, quod testes, & vasa sint eiusdem figurae in maribus, & in feminis, sequitur, quod huiusmodi partes easdem, ac in maribus, operationes perficiant. Nam figura inquit Suesanus non agit: sed si organa in feminis essent eiusdem caloris, cuius sunt in maribus, tunc sequeretur, quod essent eiusdem operationis. Calor enim est causa seminis, non figura.*

*Alij cum Ar. tertio de hist. an. primo adiungunt, testes ad seminis generationem nil facere, neque ad hunc usum à natura factos esse. Vult enim Ar. testes propter tres alios usus à natura factos esse, ut colligitur ex primo de gen. an. 4. & 5. cap. 7. Primus usus est, ut reuolutionem in meatibus seminalibus seruent. Ad hoc enim, ne quaedam animalia multum essent ad Venerem propensa, natura in vasis seminarijs fecit multas reuolutiones, ut per multum tempus semen in eis posset seruari, & non sic citò effluere; quemadmodum multas fecit reuolutiones in intestinis, ad hoc, ut quaedam animalia non essent adeò voracia. Secundum usum Ar. testibus ascribit, ut impedian, ne meatus seminales à pene retrahantur, & eorum cavitates occludantur. Retracti enim testes subsident in se, & conuient. Ita textrices pondera telis adhibent, ne tela contrahantur. Tertium usum praestant secundum Ar. quod suo pondere cum corde causantur quandam contentionem, & distensionem, per quam robur cordi additur. quare ipsis exectis redditur corpus debile, effeminatum, contingitque mutatio vocis. Cum enim testes meatibus seminalibus appensi sint, & meatus ex vena pendeant, cuius origo è corde est, ipsis exectis mutatio fit in corde, & robur, quod ex contentione habebat, amittit. parua autem in principio mutatio, magnarum mutationum in causa est. principia enim, quamuis magnitudine parua, virtute tamen magna sunt. Hi ergo, ut communiter tenent Peripat. sunt usus, quos testes habent. Dicuntque, in vasis, quae ad testes feruntur, nos dicimus preparantia vasa, semen generari. Testes vero*  
ad



ad generationem non esse necessarios. Nam si verum hoc esset, ex Ar. primo de gen. an. 4. in omnibus animalibus reperirentur, quæ generant, at multa sunt animalia, quæ generant, testibus carentia, ut pisces, & serpentes. Præterea scribit Ar. tertio de hist. an. primo, & primo de gen. an. 4. observatum fuisse taurum statim à castratione coivisse, & generasse, & tamen testibus carebat. Quamvis ergo testes in fœminis, ut in maribus sint, non tamen ex hoc inferendum est fœminas semen generare.

## Confutatio solutionum allatarum.

### Cap. V.

**A**rgumentum Galeni meo quidem iudicio est demonstrativum; ideo contra singulam ex allatis responsionibus insurgo, & dico. Rem aliter se se habere, ò Auer. in testibus mulierum, & mammis virorum. siquidem in mammis virorum non reperiuntur glandosa corpora, ut in fœminarum mammis. E converso testes fœminarum non solum glandosi, ut virorum testes sunt, verum etiam copioso albo, & crasso humore referti. adeo quod, si mulierem aliquam, quæ morbo non extenuata fuerit, sed violenta morte interierit, dissecueris, in vasis præparantibus semen albescere, & circumfluere conspicias, æquè ac in vasis virorum, in ipsis vero testibus crassius, & perfectius. Quemadmodum ergo, si in omnibus maribus mammæ glandosæ essent, humoreque albo, quod lac ipsum representaret, plenæ conspicerentur, non opus foret ratione inæstigare, an mares lac generarent; ita cum videamus in fœminarum testibus, & vasis seminalibus humorem album, & crassum, quod penitus substantiam seminis nobis representat, testesque fœminarum, & marium eiusdem substantiæ esse, quid opus est rationibus quærere, an fœmina semen generet? Sed quæso ostendat mihi Auer. aliquem locum, in doctrina Ar. in quo mentionem aliquam de fœminarum testibus fecerit? quomodo ergo potest ipse Auer. concedere iuxta doctrinam Ar. fœminas testes habere, & postea diuersum illis usum ab usu testium ipsorum marium assignare? Afferam equidem



## Mundini Mundinij

ego Auer. locum, in quo Ar. fœminas testibus penitus privat. Primo de gen. an. 2. docens Ar. marem, & fœminam quadam virtute, & sui parte marem dici, & fœminam, & partes has adducens, inquit. Partes vero huiusmodi sunt, fœminæ uteri, & vulvæ; mari testes, & coles. In alijs quoque locis hoc idem scribit. Cum ergo mas à fœmina, testibus, ut parte propria, differat, quomodo potest concedere fœminas testes habere? proprium est, quod alteri non convenit. Omnino observabunt studiosi, quod ubique ab Ar. de testibus sermo habetur, semper testibus uteros, vulvas opponit. Hoc clarè cernent, tertio de hist. an. primo, & primo de gen. an. 3. Idem Ar. assignans cap. 4. primi de gen. an. testibus proprium usum, solius maris testium usum attulit, ut potest observare quilibet in littera. Quod si existimasset fœminas testes habere, non ne tacendo illorum usum diminutus fuisset? Imò confusus fuisset, & nos decepisset? si Ar. testes fœminarum cognovisset, nescio, an illas semen generare negasset, an potius id asserere coactus fuisset, ut testes marium semen genitale perficere fateri coactus fuit, quemadmodum in sequenti cap. ostendam.

Contra verò id, quod dicunt in vasis fœminarum, quæ circa testes sunt, contineri humorem quendam serosum, & aqueum, non autem semen. Iam, ut nunc dictum est, & cumulativè infra cap. 9. dicetur, hoc experientiæ repugnat, ut quilibet potest periculum facere. Deinde peto; si serosum, & crudeum humorem solum continent, quorsum vasa illa tot revolutionibus, tot intricatis gyris intorta fuere? forsàn, ut emissionem crebram, & velocem seminis retardarent, & castiores fœminæ essent? Hunc usum fictitium esse paulò infra in hoc eodem cap. ostendam. At amplius. Natura nunquam plexus formavit, nisi ad novam elaborationem, & perfectam coctionem, ut etiam in plexu choroidei apparet. Præterea cur in plexibus illorum vasorum vena arteriam, arteria venam ingreditur, ut etiam in maribus contingit, & fit præclara illa, & tantopere celebrata anastomosis? Hæc certè anastomosis nullam aliam ob causam fit in maribus, nisi, ut ex spiritu, qui defertur per arterias, & sanguine, qui defertur per venas unicum corpus fiat, quod est semen. Permixto enim simul

multo



multo spiritu cum sanguine, simulque excoctis, tum in vasis præparantibus, & plexibus illis, tum in testibus, corpus album, crassumque, quod est semen, generatur. Cum ergo anastomosis vasorum seminalium, quæ in maribus reperitur, in fæminis quoque reperiatur, non ne propter eundem usum erit? Tot ergo plexibus labyrintheis, tanto artificio, tot spiritibus, ad crudi humoris generationem est opus?

Sed dicet forsitan aliquis, opus fuisse magno artificio ad crudi illius humoris generationem. Nam ob illius emissionem fæmina voluptatem percipit, & sic appetit coitum, quem aliter non appeteret. Scio optime Galenum secundo lib. de sem. primo, & quarto, & 14. de usu part. 11. hunc alium usum, à superius assignato de eiusdem Gal. sententia, semini fæminæ assignasse: sed quod Ar. hunc illi usum ascripserit, aut possit ascribere neque scio, neque credo. Iam enim supra in secundo cap. demonstraui ex ipso Ar. in primo de gen. an. cap. 20. humorem illum qui in coitu à muliere emittitur, non esse in causa voluptatis, sed esse in causa motum titillatium factum à spiritibus, & ad hoc probandum assumere in exemplum puerorum experimentum, qui, cum nil emittant, scalpendo tamen membrum voluptatem percipiunt. Deinde stantibus ijs, quæ iam attulimus, quomodo imaginari aliquis potest, ut humor, qui à fæminis emittitur, sit crudus, & aquosus, & tamen tantorum spirituum cum eo permixtio facta sit? Quid ergo eadem organa, eodem modo fabricata nonne erunt ad eundem usum? nonne erunt eiusdem operationis? Sed dicit Auer. & Sueßanus, ita quidem si essent eiusdem caloris. nam figura non est principium agendi, sed calor. Fugitis atramento sparso veluti sapiæ, sed non ita fugietis, quin vos, ut credo, non capiam. Hæccine est responsio Peripatetica? Calor, & spiritus sunt commune instrumentum, secundum Ar. & operationes omnes tam naturales, quam animales perficiunt. Unde ergo habet spiritus, ut in oculo visionem, in ventriculo chylicationem, in corde sanguificationem efficiant? Cur indeterminate in quavis parte, hæ operationes non exercentur. Cur pes non videt? Cur manus non sanguificat? An quod spiritus, & calor, qui in eo fundatur, in vna parte vnam operationem, in alia



## Mundini Mundinij

aliam obeat, in causa est, non solum diuersitas graduum illius, quæ in diuersis partibus reperiuntur, verum etiam diuersa partium organizatio? An sola partis temperies ad promendam actionem requiritur, an multo magis operationes à partium propria substantia proueniunt, quæ non in proportionem qualitatum elementorum, sed in proportionem substantiarum elementorum, ex quibus conflata est aliqua pars, consistit? Cum ergo testes feminarum, quantum ad eorum substantiam pertinet, assimilentur semini concreto, ut etiam testes marium, non ne etiam dicendum est ad eosdem usus esse factos, easdemque operationes exercere, quas marium testes obeunt? Quid? non ne ad actionem necessaria est, & conueniens magnitudo partis, & decens figura, & cavitates, & positus? Figura ergo, licet in quantum figura, & geometricè loquendo, nil agat, quatenus tamen talis figura ad actionem facit, licet sola ad actionem haud sufficiat. An si oculus esset in pede, dubitares pedem videre? Sed dicit Sueffanus non est idem calor in femina, & in mare. Concedo, & ob id dico, quod femina non ita perfectum, ut mas, semen generat, maiorque in semine maris calor est; semen tamen generat, & verum semen. Magis, & minus non variant speciem. Quamuis ergo minus calidum, & minus perfectum semen femina, quam mas, generet, attamen semen est.

At ultimo confugis ad illud, quod non ob generationem seminis testes facti à natura sunt, sed propter tres alios usus. Sed demus propter quot uis alios usus à natura factos esse, cum saltem meatus seminales in feminis, ut in maribus, reperiuntur, meatusque hi per Ar. non testes ad generationem seminis facti sint, sequitur, ut femina, veluti mares, semen generent. At ostendo illos usus testium ab Ar. excogitados, non esse admittendos. Primus ergo usus testium ab Ar. inuentus non uidetur recipiendus. Nam imaginatur philosophus, meatus seminales antequam testes attingant rectos esse, in testibus vero reuolutiones illas, plexus illos facere; quod clarè expressit tertio de hist. primo, & Sueffanus sic Ar. in primo de gen. an. 4. interpretatur. At hoc non est verum. Nā per anatonem videmus meatus seminales, qui sunt duæ venæ, & duæ arteriæ, utrinque scilicet una vena, & una arteria, & à



*Medicis præparantia vasa dicuntur, antequam ad testes perue-  
niant multis gyris intorqueri, & degenerare in varicosum quod-  
dam corpus, simulque vniri, ita ut arteria venam, vena arteriam  
ingrediatur; Hæc autem vasa sic intorta aliqui pampiniformia,  
aliqui hæderiformia vocant; quia sic intorta capreolis vitium,  
hæderæue assimilantur. In his vasis semen præparatur, & in-  
cipit dealbari; fertur deinde ita præparatum ad quoddam corpus  
longum, candidumque utrique testî adhærens, epididimida vo-  
catum, ubi maiorem adhuc elaborationem suscipit, mox pro ulti-  
ma elaboratione, & perfectione, per exiles, & complures quos-  
dam meatus, & quasi fistulas à causis præparantibus derivan-  
tes, atque ab epididimide ad testes tendentes in testium ipsorum  
substantiam corruatur, mox ad vasa deferentia dicta extrudi-  
tur, illinc ad variciformes parastatas, quæ sunt complures quæ-  
dam vesiculæ, ab his per meatus quosdam insensibiles in penis ca-  
nalem, in ea regione, in qua quædam glandulæ reperiuntur, glan-  
dosi præsides vocatæ, de quarum usu video aliquo modo anato-  
micos inter se diuersos esse. Ex quibus patet testes non seruare,  
ut dicit Ar. replicationem meatuum, quandoquidem antequam  
illi ad testes perueniant, replicationem illam faciunt, & exilio-  
res, & strictiores etiam euadunt. Deinde ostendo ego usum re-  
uolutionum vasorum præparantium ab Ar. assignatum ficti-  
tium esse. Si etenim reuolutiones illæ à natura institutæ sunt, ut  
semen remorentur, remorentur vero, non ut perfecte possit exco-  
qui, ut dicunt Medici, sed ut dicit Ar. ne ita crebro, & veloci-  
ter emittatur, tantum abest, ut propter illas crebro, & velociter  
non debeat emitti, quod quinimo creberrime, & velocissime emit-  
ti deberet. Cur? quia per anastomoses spiritus semini commi-  
scentur, quo magis ergo impeditur ne possit effluere, eo maior  
multitudo spirituum cum eo commiscebitur, & sic maiorem tur-  
gentiam, & ob hanc, maiorem impetum acquireret, atque ideo  
cum maiori vi exitum quæret, & sic crebrius, & vehe-  
mentius animal ad coitum stimulabit.*

*Melius ergo fuisset, ut, si aliqua animalia castiora esse  
decebat, natura ad coctionem seminis anastomoses tantum  
fecisset, non autem præter illas, etiam reuolutiones. Nam per has  
impe-*



## Mundini Mundinij

impediendo semini exitum, impetum illi adiectura erat. Natura ergo reuolutiones, siue replicationes illas fecit, ut per moram, quam trahit sanguis, qui in semen debet commutari, perfectè coquatur, & perfectum semen euadat, non ut simpliciter retardetur, ad hoc, ut animalia non ita crebrò, & velociter ad coitum excitentur, & castiora sint. In piscibus autem, & serpentibus illas reuolutiones natura non fecit, quia sunt animalia imperfectiora, & ideo non tam perfectum semen generare debebant.

Sed quid dicam de secundo testium usu? Mehercle mihi videtur ille usus purum figmentum. Quam enim tensionem efficere possunt testes, siue postea per hanc prohibeatur ne meatus seminales retrahantur, ut ex tertio de hist. primo, & primo de gen. an. 4. elicitur, siue robur cordi addatur, ut patet quinto de gen. an. septimo? Perexigui sunt ponderis testes, pendent ex corde per arterias, non rectas, sed obliquas, easque haerentes, alligatas proximis partibus; quomodo ergo tensionem facere possunt? Quae pondus habent, substantia densa constant, at testes spongiosi sunt. Quomodo pondere suo tensionem efficiendo, pampiniformes plexus, qui illis superiores sunt, non distendunt? Si debebant etiam contentionem facere, oportebat vasa, quibus sunt appensi, esse directa, non reuoluta. quorum enim in medio reuolutio aliqua est, ea nullo modo ab altera parte in alteram usque, nisi dirigantur, intensionem admittunt. Quartò tanta est ante testes vasorum replicatio, ut, si dirigerentur (sicuti iam conclusimus debere dirigi, si contentionem debent efficere) ad media usque femora pertingerent. unde sequeretur, quòd nullis alijs hominibus vires inessent, praterquam illis, quibus testes admodum laxi, & pensiles sunt; atque ita senes decrepiti, quibus haec affectio contingit, iuuenibus essent validiores, quibus nil tale accidit, quod est absurdissimum. Vltèrius quibusdam animalibus, ut pennigeris, testes intus sunt dorso alligati, neque ullo modo penduli; non ergo in eum usum sunt constructi, ut, tanquam pondera textricum, contentionem in corde causentur, & impedian, ne vasa seminalia retrahantur. Vltimò, & fortiùs. Si Ar. existimat testes, quia annexuntur vasis ab aorta descendentibus, tensionem in corde efficere, cur quaso non est dicendum renes, lienem multò magis hoc




præstare, cum sint cordi viciniore, & rami ab aorta ad eos spargantur magni sine vlla media reuolutione? Cur non adhuc istorum melius hepar? non ne sui magnitudine, vicinitate, firmitate, rectitudine cor ipsum tendere quam maxime potest?

Restat soluere rationes, quibus Peripatetici testes ad generationem seminis necessarios non esse probabant. Non valet igitur, quod si testes ad generationem necessarij essent, & semen generarent, tunc animalia cuncta, quæ generant, testes haberent. Nam dicunt Medici, in omnibus animalibus testes habentibus necessarios testes ad generationem esse, non autem in omnibus animalibus generantibus. Deinde potest responderi, vt Ar. ipse de corde respondet, quod quæ generant, vel testes habent, vel aliquid proportionale. Quod dicitur de Tauro, qui statim à castratione coiuit, & vaccam impleuit. Credo ego certissimè, quod, si alicui hoc credenti testes exciderentur, quoduis aliud, non coitum appeteret. Sunt aniles fabulæ istæ. At dato, sed non concessso, quod taurus coire potuerit, quis obseruauit vaccam post coitionem cum tauro castrato, alium taurum non admisisse, & grauidam factam fuisse? Sed dato etiam quod taurus castratus eam implere potuerit, dico id contigisse, quia semen iam vi testium

elaboratum, & in vasis parastatis, non in meatibus seminalibus, reseruaturn emisit.

Quibus omnibus hunc in modum confutatis, patet primum Galeni argumentum demonstratiuum esse.





Rationes, quibus demonstratur testes à natura propter seminis generationem factos fuisse. Cap. VI.

**S**ed postquam confutauimus vsus, quos *Ar.* testibus tribuit, pro integra *Gal.* argumenti firmitate, operæ precium est demonstrare, testes propter seminis generationem à natura factos fuisse, ut *Gal.* ipse existimauit, & in adducto argumento supposuit. An vero præter seminis generationem, alia quoque vi poleant, per quam mas masculitatem, fœmina fœmineitatem (quæ so ne nobis Ciceroniani irascantur) habeat, alterius est instituti querere. Institui ego de semine, non de testium vi disputare. Testes ergo semen generare hac ratione primo docemur. Causa alicuius effectus illud dicendum est, quo posito, ponitur, & quo ablato, effectus ille aufertur, sed positis testibus in testes habentibus, & illis ablati, ponitur, & tollitur semen, ut experientia notissimum est. Ergo testes semen generare dicendum est. Quid dicet hic Peripateticus? Illud esse causam alicuius effectus dicet, ad cuius positionem, & remotionem primo, & per se effectus vel ponitur, vel aufertur, & negabit postea ad positionem, & remotionem testium primo, & per se semen poni, & tolli, & cum *Ar.* affirmabit, poni semen positis testibus; quia testes sunt in causa, ut vasa seminalia distendantur, & aperta maneant, & illis ablati, tolli semen, quia eadem vasa retrahuntur, & conuident? Hanc equidem responsionem innuit *Auer.* primo de gen. an. septimo. Non potest ad hæc recurrere *Auer.* Hæc omnia iam sunt reprobata. Confutauimus iam vsus illos testium. Quare sequitur, quod, positis testibus in testes habentibus, primo, & per se ponatur semen, & illis ablati primo, & per se semen auferatur.

Secundò arguitur sic. Illa membra semen generare putandum est, quibuscum semen maiorem, quàm cum reliquis, similitudinem habet; at maiorem similitudinem habet cum testibus, quàm cum alijs membris. ergo testes semen generare dicendum



*dum est. Maior de se clara est. Minor probatur. Nam si testium substantiam optimè considerabis, tibi videbitur ipsam veluti semen concretum esse, odorem seminis referet; quod de nullo alio membro contingit. Ergo semen maiorem cum testibus, quam cum alijs membris, similitudinem habet. Simili argumento Gal. 6. de plac. Hipp. & Plat. cap. 8. probabat iecur sanguinem generare. Dicebat enim sanguinem maiorem cum illo, quam cum alijs membris, similitudinem habere. Audiant studiosi Auer. ipsum secundo collig. cap. 10. Membrorum generationis, quædam sunt, quæ sunt propria fœmina, sicuti vulua, & mamilla, quædam sunt propria mari, sicuti testiculi, & virga. Sed testiculæ fuerunt ordinati ad faciendum sperma, & ideo fuit caro eorum alba, & spongiosa, sicuti caro mamillarum; & ideo quando conuertitur sanguis, conuertitur ad similitudinem eorum, & faciunt ipsum album, sicuti hæpar conuertit chilum propter suam rubedinem ad ruborem, quia vis est agentis assimilare sibi patiens suum.*

*Tertiò particula, cui nulla alia similis in toto corpore reperitur, semper est causa ratione propria, & peculiaris constitutionis, & substantiæ alicuius peculiaris operationis. Renes habent propriam substantiam, habent & propriam operationem. Sic iecur, sic lien, sic cor, sic cerebrum, sic omnia organa alicui actioni dicata. Testes habent propriam constitutionem, & substantiam diuersam ab omnibus alijs membris. ergo habent & propriam operationem, Talis operatio non est tensio cordis, non conseruatio reuolutionum, non meatuum reseratio, vt iam per rationes adductas visum est; & quia hæc tria à sola mole, & magnitudine testium, quacunque constitutione, & substantia præditi essent, effici possent, si attentè animaduerneris, & essent eius magnitudinis, cuius per positionem Ar. esse deberent. Ergo propria actio testium est seminis generatio.*

*Quartò idem hac altera inductione licet comprobare. Si enim omnes corporis coctiones mente percurras, videbis præparationem in uasis tantummodo fieri, coctionem uero, & elaborationem perfectam à partis substantia peculiari. Incipiamus à sanguine. sanguis in mesenterij uenis rudimentum aliquod adipiscitur, ru-*  
*borem*



## Mundini Mundinij

bores uerò, & formam sanguinis in solo parenchymate hepatis sibi conciliat. In exiguis cuiusque particulae uenis tertiae coctionis fit preparatio, sed à sola partis substantia perficitur assimilatio. Lac in uenis preparatur, in substantia glandosa mammarum dealbatur. Cum ergo seminis generatio fiat per ulteriorem coctionem, & perfectam elaborationem, teste etiam ipso Ar. primo de gen. an. 19. quæro qualis esse possit in hac coctione peculiaris alicuius partis substantia? Considera diligenter. Nam haud aliam inuenies peculiarem substantiam, quam testium. A testibus ergo semen excoquetur, perficietur, elaborabitur, à uasis autem, quæ sunt supra testes, & habent substantiam communem cum reliquis uenis, & arterijs, preparabitur.

Sed quid? Ar. ipse ueritate coactus in primo de gen. an. 12. confessus est testes semen perficere. Testes (inquit) alijs intus, alijs extra, propterea quod ijs quoque operimento, & uelamine opus est, tum ut seruentur, tum ut semen genitale perficere possint. Patet ergo quod iestes ad generationem seminis à natura procreati sunt, & quomodo Peripat. responsiones ad primum Gal. argumentum demonstrans semen gignere, nullæ sint. Cum ergo ad seminis generationem uasa preparantia, & pampiniformes plexus, & testes à natura facti sint, hæc autem omnia in fæminis reperiuntur, necessario sequitur contra Perip. fæminas semen generare.

Quæ pro solutione primi argumenti Galeni excogitauit Costæus, eorumque confutatio. Cap. VII.

Conatus est alio modo uim allati argumenti infringere Ioannes Costæus lib. 5. physiolog. disq. Admittit ergo fæminas, & preparantia uasa, & testes habere, ut mares, uerum inquit tantam esse harum partium in fæminis, & in maribus diuersitatem, ut nulla huius diuersitatis alia causa possit afferri, quam uariis illarum in fæminis, & in maribus usus. Sunt in mulieribus



ueribus quoque testes, sed non extimi, ut in maribus, sed intimi, inquit Costæus. Sed quid tum? In auiibus sunt intimi. ergo in auiibus semen non generant? Sunt intimi in mulieribus, quia non oportebat illas extra, ut mares, sed intra semen effundere: & quia cum feminarum testes frigidi essent, occultari debuerant. Sunt inquit Costæus in maribus testes grandes, spongiosa substantia, qua pressa semen exprimitur. In mulieribus sunt multo minores, substantia autem dura; ex quibus compressis aqueus, tenuisque humor exit: concedo quod sint minores: nam & minus calidi; calidi autem est extendere, & uniuersaliter omnia membra feminarum minora membris marium sunt, & femina ipso mare minor, quia frigidior. Scribebat Ar. secundo de gen. an. i. Quod enim maius est, id à facultate ampliori moueri necesse est, mouere autem calor potest; Nego autem quod testes feminarum sint substantia dura; imò dico quod sunt molles, quamuis non ita, ut marium, quemadmodum experientia patet. ueluti eadem apparet non tam tenuem, & aqueum humorem ab illis exprimi, ut sibi finxit Costæus. Nam quamuis minus crassus quam maris sit, formam tamen seminis representat, ut supra cap. 5. dixi, & adhuc magis declarabitur infra cap. 9. Testibus, inquit Costæus, non sunt coniuncti seminarij meatus in feminis, ut in maribus. Imò eo intervallo ab ijs disiuncti, quod dimidij digiti crassitudinem equet, neque alia ratione, quam tenuissima membrana annexi. Sunt graciles, & angusti, minus quam in maribus flexuosi (et tamen flexuositas illa secundum Medicos ad seminis concoctionem tanti est usus) breuiiores, et habent aqueum humorem, non crassum, ut semen, et hunc, nullo in testes ingressu, in uteri cavitatem rectà ferunt. Cum ergo hoc inter partes, quæ ad seminis effectiōem à natura factæ sunt, discrimen in feminis, et maribus appareat, non alia profectò afferri potest causa huius discriminis, quam uariis usus. Cumque partes dictæ in maribus officio generandi seminis fungantur, ut, non idem munus in feminis exerceant, necesse est. Nescio an hæc, quæ profert Costæus, sibi in mente finxerit, an illa didicerit à Fallopio in suis illis minimè elaboratis scriptis anatomicis. Meatus enim seminales in feminis (ut studiosi ex Magno illo Andrea Vesalio, et altero Illo doctissimo Andrea



## Mundini Mundinij

Laurentio discere possunt) sunt coniuncti cum testibus, varijs anfractibus implicantur antequam ad testes perveniant, neque recta feruntur ad fundum uteri. Sed quod decepit Costæum, hoc esse puto. Meatus seminales, quarevis in viris, & mulieribus sint duæ venæ, & duæ arteriæ, & eorum exortus similis in utroque sexu, insertio tamen, & distributionis ratio est multum dissimilis, ut duo doctissimi nominati Andreæ observarunt. Nam vasa hæc in viris tota, & integra ad epididimida, & testes feruntur, at in feminis, & vena, & arteria bipartito finduntur. harum vero maior portio ad testes fertur, & varijs anfractibus prius implicatur ad seminis preparationem, minor vero portio ad uteri fundum spargitur. An ergo Costæus animadvertit tantummodo minorem horum vasorum portionem, non autem maiorem, & sic deceptus fuit, credens testes in feminis non esse cum vasis preparantibus coniunctos? atq; insuper per eandem minorem portionem semen, absque ullo in testes ingressu, in cavitationem uteri excerni, cum tamen menstrui portio per illam excernatur, vel uterus per illam nutriatur? clarè autem infra cap. 9. apparebit semen à testibus per uteri cornua excerni. Quod si Costæus diligentem habuisset dissectorem, observasset ulterius, à preparantibus vasis, & testibus oriri alia duo vasa, deferentia vocata, breviora quidem, quàm in viris, ut etiam vasa preparantia breviora sunt, ut ipse dicit (nam & preparantia, & deferentia in feminis, ut in maribus, abdominis cavitationem non egrediuntur, quia intus, non extra femine debebant semen effundere) sed tamen magis flexuosa, ad hoc, ut viæ brevitatem multitudinem flexuum compensaretur, neque ad collum vesicæ, ut in maribus ferri, sed ad cornua uteri, in quæ semen eructant. Vasa ergo preparantia, meatus seminales vocata, testibus in feminis coniunguntur, & flexuosa sunt, & non nisi per ingressum in testes, humorem, quem vero semini possis comparare, in cornua uteri transfundunt. Sunt autem in feminis vasa preparantia gracilia, & angusta. Nam omnia in feminis, ut supra dictum est de testibus, minora sunt, & frigidiora, ideo vasa illa præ frigiditate non tantum in feminis, quantum in maribus dilatari potuerunt. Partes ergo omnes, quæ semini gignendo sunt dicatæ, in feminis reperiuntur, & omnes necessarias conditiones habent,




habent, quæ pro huiusmodi munere fungendo requiruntur. Si aliqua verò dissimilitudo inter has, & marium intercedit, hæc illis non tollit aliquam essentialem conditionem. Vnde discrimina inter partes fœminarum, & marium genitales assignata, non possunt diuersum vsum illarum arguere, sed bene discrimen aliquod ponere inter semen masculineum, & feminineum. Fœmineum enim masculineo debilius, & frigidius est, maioremque ad patiendum potentiam habet. Concedo ergo diuersitatem illam instrumentorum in causa esse alicuius differentiae, verum accidentalis, non essentialis. Porro argumentum Gal. fundatur super hoc. Quod ubicunque organa destinata à natura pro aliqua operatione obeunda reperiuntur, neque eis necessaria aliqua conditio pro illa obeunda desit, ibi actionem illam exerceri necesse est. At partes, quæ ad generationem seminis à natura institutæ sunt, in feminis cum omnibus conditionibus, quæ essentialiter requiruntur ad talem generationem, reperiuntur æquè, ac in maribus, quamuis in aliquibus conditionibus accidentalibus differant; ergo generatio seminis in feminis fieri necesse est. Maior per se clara est. Minor probatur. Nam partes, quæ destinatæ sunt ad effectum seminis, sunt vasa preparantia, testes; conditiones essentielles sunt, flexuositas in vasis preparantibus, & glandosa testium substantia. hæc autem omnia sunt in feminis; quemadmodum etiam partes, quæ necessariae sunt ad emissionem seminis idest

vasa deferentia; varicosos autem para-

stas feminae non habent; at

hi ad emissionem necessarij

non sunt. Integrum ergo primi argumenti Gal. robur manet.





**Alia Gal. & Medicorum rationes probantes  
fœminam semen generare. Responsio-  
nes Peripat. & illarum confutatio-  
nes. Cap. VIII.**

**S**ed pergamus ostendere fœminas semen generare. Certissi-  
mum est in coitu aliquid à mulieribus emitti cum voluptate;  
aut ergo illud est sanguis menstruus, aut aquosus quidam humor,  
aut semen. Sanguis menstruus non est, ut quilibet potuit experi-  
ri. Nam quod ab illis emittitur non est rubrum; neque tempore,  
quo fluunt menses, voluptas vlla persentitur; serosum humorem  
non esse, ut dicunt Peripatetici, mirabilis vasorum præparantium,  
& plexuum structura, ut in maribus reperitur, convincit, ut enim  
dictum est supra cap. 5. vasorum plexus propter ulteriorem cōco-  
ctionem à natura sunt facti. ergo est quid excoctum, est semen.

Præterea arguo ego sic. Sicuti viri ex frequentibus congres-  
sibus cum fœminis exoluuntur, ita & mulieres, ut nemini, qui rem  
cum illis habuerit, & de hac re illas interrogauerit, quæ integra  
sanitate, & salubri constitutione secundum omnes partes corporis  
gaudebant, non debet experientia constare; at viri nō exoluuntur,  
nisi ex emissionem seminis. ergo & fœminæ non nisi ex emissionem  
illius. ergo fœminæ semen generant, non serosum, & crudum hu-  
morem, non speciem quandam excrementi (ut ausus est dicere Co-  
stæus) cuius propulsione natura subleuetur. Hoc argumentum  
contra Ar. habet vim maximam. Cum enim Ar. in primo de  
gen. an. 19. in principio conclusisset semen esse excrementum ali-  
menti sanguinei, quod ultimum in membra digeritur. Hoc con-  
firmabat quodam signo. Nam magnam vim habet resoluendi  
, illum, à quo secernitur. Sanguinis enim sinceri (inquit) salubris-  
, que secessio resolvere potest. Tunc sic. secessio seminis in mari-  
bus, quia est sanguinis sinceri, & salubris, habet vim magnam re-  
soluendi mares. ergo cum humor, qui à mulieribus in coitu emit-  
titur, illas resoluat, erit excrementum ultimi alimenti sanguinei,  
quod



quod in membra distribuitur, pars sanguinis sinceri, & salubris, proinde semen, non excrementitia superfluitas, ut dicit Costeus, aut serosus humor, & humiditas aquosa, ut Peripatet.

Quartò loco mulieres non minorem ipsis viris certè voluptatem in coitu sentiunt. At viri hanc percipiunt ex emissionem seminis. ergo & mulieres. Respondet Ar. primo de gen. an. 20. voluptatem, quæ in coitu sentitur, non solum semine exeunte fieri, verum etiam spiritu, ex quo consistente semen emittitur, & exemplificat in pueris, ut supra dixi cap. secundo, & quinto, voluptas ergo per Ar. in feminis ex spiritu exeunte fiet, & titillante, non autem ex seminis emissionem. nam secundum ipsum, semen non emittunt. Spiritus genitalis (inquit Sueffanus) licet non sit consistens in semen, cum mouetur ad membra genitalia, titillando voluptatem efficit non parvam. Et sic argumentum adductum est nullum. At ego contra hanc responsionem insurgens. accipio ex Ar. ipso secundo de gen. an. 4. Magna ex parte accidere, ut cum profusione cuiusdam humoris fœmina concipiat, ipsique voluptas una cum profusione contingat. At quæ magna ex parte fiunt, ea maxime secundum naturam sunt, primo de gen. an. 19. Si ergo voluptas accidit fœminæ simul cum profusione humoris, quem in coitu emittit, voluptas autem hac ex spiritu exeunte fit, siue dicas accurrente, non ne spiritus cum humore, quem in coitu emittit, simul exhibet? Fiet simul voluptas, & perfusio, & non simul spiritus, qui est causa voluptatis, cum humore exhibet? Quo maior ergo quantitas spiritus erit, non ne maior voluptas percipietur? Sed cum maximam mulieres ipsæ voluptatem persentiant, non ne bonam copiam spirituum consistere in humore, quem emittunt, necesse est? Sed si spirituum copia cum eo commisceatur, in eoque consistat, non ne semen dicendum erit? non ne verum semen erit, cum multis spiritibus, ut etiam masculinum, affluat? Fugies forsan dicendo, licet exeant spiritus, vel ad partes genitales mulierum confluant, non tamen commisceri cum humore, qui in voluptate emittitur; & imaginaberis per alias vias spiritus, per alias humorem exire. Non credo ita fugere poteris. Nam quod emittitur, in venis, & arterijs, quæ ad vterum pertingunt, continetur: et spiritus non possunt ad partes genitales, nisi per hæc vasa, accurrere.



## Mundini Mundinij

*currere. Vnde necesse est, ut cum eo, quod emittitur, commisceantur. In maribus maxima ex parte per vasa preparantia, & deferentia spiritus ad partes genitales accurrunt (dico maxima ex parte, quia cum totum corpus sit transpirabile, & unus sit totius consensus iuxta Hipp. paucos aliquos spiritus per ramulos alios ad partes genitales irruere possunt). Cum ergo hi iidem meatus, hæc eadem vasa in feminis conspiciantur, cur per hæc spiritus, in feminis etiam, ad easdem partes non accurreret? At cum in his vasis per dissectiones pateat humorem album contineri, quem feminae emittunt, cur spiritus cum eo non miscebuntur? Vasa etiam ista longè ampliora omnibus venis, & arterijs ad partes genitales foeminarum tendentibus sunt. Cur ergo spiritus non potius exhibunt per illa, quàm per has? Cur non longe plures per illa, quàm per alia? Sed dicent Peripat. spiritus commisceri in transitu solum cum humore illo. Sed hoc modo non fieri veram mixtionem spiritus cum eodem humore, sed tantum iuxta positionem, ut contingit in emissione lachrymarum in gaudio, de qua supra cap. 2. dixi. Proinde non licere ex hac commixtione arguere humorem, quem mulieres emittunt, semen esse. At ego dico. quòd si viæ, per quas dictum est spiritus exire, essent directæ, possemus credere spiritus cum humore illo non verè permisceri; at non sunt directæ, sed admodum reuolutæ, & reuolutiones illarum pro concoctione humoris in illis contenti à natura factæ sunt, ut patet ex capi 5. ergo mediante concoctione spiritus cum humore illo permiscentur, & sic per veram mixtionem. Quo circa semen est.*

*Verum instabit quis ad principale argumentum ex Ar. primo de gen. an. 19. Mulieres concipiunt absque vlla aliquoties voluptate. ergo non ex emissionem seminis percipiunt voluptatem. Et instabit ulterius aliquis, per deductam iam à me rationem sequi, æquè perfectum esse femineum semen, ac masculineum. Si quidem ex magnitudine voluptatis deduxi multitudinem spirituum cum semine commixtorum. ob spirituum enim maiorem, vel minorem quantitatem, magis, & minus perfectum semen euadit. At voluptas in feminis non est minor multoties, quàm in ipsis viris. ergo habebunt æquè perfectum semen. Ad hanc ultimam instantiam.*

*Primo*



Primo loco respondendo dico. Me argumentum ex concessis ab Ar. deduxisse; vocant argumentum ad hominem. Ex altera tamen parte non me latet voluptatem, quæ in coitu persentitur, aliunde; quam ex multitudine spirituum, pendere. Porro voluptatis, quæ per coitum persentitur, causæ tres à doctissimo Andrea Laurentio, quem semper in anatome pro securissimo duce sequar, in viris recensentur. Præter has autem tres, in fæminis quarta inuenitur. Prima est seminis turgentis, & quasi prurientis titillatio. Turget autem semen ratione spirituum impetum facientium. nam semen sine spiritibus, quale per gonorrhæam profundi solet, voluptatem nullam parit, neque verum semen est: ut statuit etiam Fernelius lib. 7. physiolog. 4. Vnde etiam ob paucitatem spirituum, qui Venere abutuntur, & frequenter coeunt, minorem percipiunt voluptatem. De hac causa videant quoque Studiosi Ar. primo de gen. an. 18. circa medium. Sola recitata causa ad voluptatem non sufficit, sed requiritur altera, & secunda, quæ est excretionis celeritas. Ut enim dolor non excitatur, nisi confertim, & celeriter fiat alteratio, auctore Platone in Timæo, Hipp. lib. de loc. in homine, & Gal. primo de sympt. caus. 6. in semine paulatim fluente, & pudendis veluti collachrymantibus voluptas nulla excitatur. Tertiò requiritur ad voluptatem spermaticarum partium sensus exquisitissimus, & earundem angustia. Ita enim titillatis partibus, & confertim, celeriterque reductis, quæ distendebantur, uasis in naturalem statum, situmque, voluptas ingens excitatur. Quarta adiungitur causa in fæminis, celeres, confertim facta masculiei seminis in uterum attractio; quod certè attrahunt præcipue, cum concipiunt, sed etiam, cum non concipiunt; per quam attractionem titillatio in tota uteri ceruice fit, & sic mulieres miram dulcedinem percipiunt. Vnde cum doctissimo Fernel. lib. 7. physiolog. 8. rectè soluitur problema illud, ita diffusè exagitatum à Bottono in suo lib. de Morbis mul. (& ab alijs) an mulieres maiorem voluptatem, quam viri in coitu persentiant. Nam mulieres pluribus modis oblectantur, quia & semen effundunt, & virile prolestant: quo quidem modo Tiresias in fabulis mulierum partes tutatus est; sed intensior est virorum voluptas: quia semen calidius, magisque spirituosum,

D celerius



## Mundini Mundinij

celerius, & quasi saltu quodam per partes exquisitioris sensus in uiris excernitur. Quibus stantibus clarum est quomodo, quamuis fœminæ aliquoties non minorem, vel etiam maiorem voluptatem ipsis maribus persentiant, non liceat ob id arguere illas vel equè perfectum, vel magis perfectū, quàm mares, semen generare. At quomodo Ar. qui voluptatis causam solos spiritus exeuntes agnoscit, non cogetur affirmare, fœminas magis perfectum semen, quàm mares emittere, quotiescunque maiorem ipsis maribus voluptatem in coitu persentiunt? Facile quinetiam diluitur primæ instantia, qua dicebatur mulieres concipere sine ulla voluptate. Concedo enim quòd aliquæ tales reperiantur. Sed dico huius rei causam non esse, quòd semen non emittant, aut quòd multi spiritus cum eo commixti non sint, sed quia partes, per quas semen transit, ignauiores habent, & obtusi sensus, vel naturaliter, vel quia excrementitio aliquo viscoso humore scateant, aut easdem latiores, & largiores ita, ut semen in egressu titillationem non efficiat, neque cum saltu, impetue ruens egrediatur. Adeo quod ob defectum aliquem in partibus, per quas semen in feminis transit, aliquæ concipiunt absque ulla voluptate. Quod si secundum illas partes bene sint dispositæ, impossibile est, quòd sine voluptate concipiant. At debemus semper argumenta desumere ab ijs, quæ bene, & naturaliter se habent, non autem ab ijs, quæ malè, et morbosè. Sed ad hanc instantiam alia afferam in fine huius primæ partis meæ disputat: in demolitione fundamentorum opinionis Ar. Non possum autem hic unum silentio inuoluere contra hanc instantiam, & est hoc. Quòd ego multas mulieres interrogavi de voluptate, quam sentiunt in coitu. Et omnes responderunt, se nunquam sine ingenti voluptate concepisse, quamuis aliquæ earum non multam voluptatem in coitu percipere solitæ fuerint; & narrauerunt vltèrius signum euidens, & certum illis fuisse, quòd conceperant, cum maiore, quàm sui moris fuerit, voluptate perfusæ fuerunt.

Galenus 14. de vs. part. 9. & cum eo quidam anatomici uisunt aliam, tam in maribus, quàm in fœminis voluptatis coitus causam, præter tres à doctissimo Laurentio assignatas, adinuenisse. Dicunt enim voluptatis quoque causam esse falsum sero-

sum



sum humorem, qui à spermatico venoso vase orto à sinistra emul-  
gente ad testem sinistrum tam in mare, quam in fœmina defer-  
tur; & qui in fœminis ulterius, per ramum minorem spermaticè  
sinistri vasis, ad vteri fundum spargitur. Cum autem committan-  
tur hic fines vasorum, quæ in sinistrum sinum matricis sunt diui-  
sa, cum sinibus eorum, quæ in dextrum eiusdem sinum sunt distri-  
buta, fit, ut dextra etiam pars vteri portionem illius salsi humo-  
ris serosi adsumat. Quare in toto vteri fundo huiusmodi humor  
recipitur. Sicuti ergo serositates incalescentes sub cute pruritum  
afferunt. Sic humor ille serosus in vasis seminalibus, & vteri  
substantia contentus, incitat ad se excernendum, & pungit, & per  
fricationem Veneream expirans dulcedinem affert. Sed, ut inge-  
nuè fatear, hæc dulcedinis causa suspecta mihi est. Et primo quod  
spectat ad serosum salsum humorem in maribus per sinistrum  
vas seminale venosum effluentem, narrat Realdus Columbus lib.  
II. cap. 13. de re anat. se multos nouisse, quibus, ut ab hernia in-  
testinali, quæ à Grecis enterocèle dicitur, sani euaderent, testis si-  
nister ablatu fuerat, qui tamen dum mulieribus coirent, eadem  
voluptate, qua antea, perfrui se solere affirmabant. Clarissimum  
est autem in semine istorum salsum serosum humorem prouenien-  
tem à sinistra emulgente non potuisse contineri ob sinistri testis  
abscissionem. Quod spectat ad eundem humorem serosum ad vte-  
ri fundum deriuantem. Si natura instituisset, ut hic humor pru-  
ritum excitaret, & per fricationem Veneream expiraret, cur non  
potius ad vteri cervicis internam partem, in qua à pene fit frica-  
tio, quam ad eiusdem fundum demandaretur? quomodo in graui-  
dis, in quibus uterus in amplam magnitudinem est extensus, &  
ob id eius fundum multum à ceruice distat, posset Venerea frica-  
tio esse in causa transpirationis humoris ad vteri fundum trans-  
missi? & tamen grauidæ in coitu maiorem dulcedinem perci-  
piunt, quam non grauidæ. Taceo quod, in quamcunque vteri par-  
tem humor ille deriuat, pruritus, quem excitat, non potest esse nisi  
morbosus, ut pruritus ex serositatibus sub cute incalescentibus  
morbosus est. Voluptatis ergo causæ omnes utriusque sexus tutius  
solummodo in seminis turgentia, celerem emissionem, attractionem,  
exquisitum sensum partium genitalium referendæ sunt, humore



## Mundini Mundinij

salso seroso omisso . Ex dictis licet duo deducere . Primum est non posse stare similitudinem, quā Peripat. afferunt inter humorem, quem femina in coitu emittunt, & lachrymas, quæ in gaudio ab oculis emanant . Nam lachrymæ non confertim, & celeriter fluunt . sine ulla circa oculos titillatione, & dulcedine fluunt . Vnde etiam sequitur quod copiosorum spirituum illis permixtio non fiat. Secus se habet de humore, quem femina in coitu profundunt . Nam cum magna circa partes genitales titillatione, & dulcedine profunditur, confertim, & celeriter, ut etiam in uiris, quemadmodum licet eas interrogare, & ex motionibus, quas in emissionem efficiunt, licet colligere . In emissionem enim viros penitus in omnibus imitantur . Vnde etiam sequitur, quod copiosi spiritus cum humore, quem femina emittunt, permixti sint .

Secundò licet pro confirmatione iam allati argumenti talem rationem conficere . De ratione humoris in coitu emissi est, si debet cum dulcedine emitti, ut spiritibus turgeat, & celeriter, & confertim moveatur . Humor à mulieribus in coitu emissus, cum dulcedine emittitur, ergo oportet ut spiritibus turgeat, & celeriter, & confertim moveatur . At humor spiritibus turgens, & celeriter, & confertim motus in coitu, semen est . ergo mulieres semen generant, & in coitu emittunt .

## Quintum Galeni Argumentum. Peripatet. responsio . Eius confutatio . Cap. IX .

**E** Videns argumentum feminas semen generare, et in coitu effundere ex eo habetur . Quia si dissecueris bruttorum feminas, cum in Venerem stimulantur, uidebis uasa earum seminalia, & testes humore albo, & crasso maxime plena esse, post coitum statim uacua . Similiter non pauca talis humoris copia in feminis, quæ iam diu aut conceperunt, & gravidæ sunt, aut à coitu abstinerunt, conspicitur in uasis, quæ uteri cornua ingrediuntur . Hæc autem uasa, si stylum. s. extrinsecus in ipsa immittas, uidebis in cavitatem uteri penetrare . quare eò etiam humorem illum transfundere pro certo habendum est . Disseca similiter mares tempo-



re, quo libidine ualde tentantur, uidebis in ipsis uasa seminalia, & testes plurimo albo, & crasso humore referta, post illud tempus, ferè uacua. Si hic humor est in maribus semen, in feminis uero, ut dicit Ar. non, sed est humiditas excrementitia loci propria, quæ ad conceptum ex primo de generatione an. 19. & 20. & secundo eiusdem quarto, nil confert, quomodo albedine, & crassitie semen maris æmulatur? si semen non est, cur notas seminis habet? si nil ad cōceptum confert, cur in maiori copia tempore coitus, quàm alijs temporibus, ut etiam in maribus contingit, à natura congregatur? Auer. ac Sueffanus afferunt quandam responsionem, & ut ego puto, eam ex Ar. 2. de gen. an. 4. colligunt. Congregari scilicet tunc, ad hoc, ut in coitu emissus, lubricum reddat matricis collum, & melius matrix aperiatur, & sic melius semen masculinum possit attrahere. At sciant, quod longè aliter se res habet de humoribus oleosis, qui pro obliniendis, et lubricis reddendis aliquibus partibus à natura instituti sunt, ac se habeat de humore, qui in uasis fæminarum seminalibus reperitur, & in coitu emittitur. Consideremus partes à quibus oleosæ lubricantes humiditates proueniunt. Et quia Auer. sibi complacuit comparare humorem, quem femina in coitu emittunt, saliuæ, quæ in os discurrit, consideremus paristhmias glandulas, quæ asperam arteriam, œsophagum, linguam oleosa humiditate irrigant. Vbi iuxta illas, ut iuxta fæminarum testes, reperies plexus uenarum, & arteriarum. Vbi harum anastomoses? An quia humiditas uiscosa oris partes irrigans non indiget perfecta coctione, & celebratione, ut indiget humor, qui in testibus, & uasis seminalibus fæminarum uisitur, non opus est ad eius generationem aliquo plexu, & anastomosi? ergo generatio humorum uiscosorum oblinientium aliquas partes differt à generatione humoris, qui in testibus, & uasis seminalibus fæminarum reperitur. Differunt generationes, ergo differunt generantia. Si differunt generantia, ergo & generata. Cum omnes agens agat, ut assimilet sibi passum. Si generata. ergo humor, qui in fæminarum testibus, et uasis seminalibus reperitur, differt ab humore uiscoso oris partes irrigante, & ab omni alio simili. si inter se differunt, & maximè differentia, quam explicauimus, quæ est essentialis, non accidentalis, ergo nō habent eundem usum,



## Mundini Mundinij

¶ à primo ad vltimum humor, qui in testibus, & vasis seminalibus fœminarum reperitur, à natura pro obliniendâ solum internâ colli matricis superficie, ut melius matrix attrahat semen virile, non est institutus, vt dicunt Peripatetici.

Præterea humor pro oris partibus, & alijs humectandis continuè debet sensim, & sensim effluere, & certè sic effluit. at humor in testibus, & vasis seminalibus mulierum contentus in coitu tantummodo effluit, & celeriter, & confertim. ergo hi humores diuersum vsum habent. Quòd humor in testibus, & meatibus seminalibus mulierum contentus, solum tempore coitus, aut alterius similis fricationis, profluat, probatur per ea, quæ supra diximus. Nam si dissecentur. fœminæ tempore, quo libidine tentantur, ante coitum, testes & seminalia vasa plena, post coitum statim, vacua habent. Quod si continue proflueret humor, licet sensim, & sensim non ante coitum illo vasa plena esse possent; vel si plena essent, non indigerent fœminæ coitu pro illis euacuandis. nam paulatim de se vasa exonerarentur, quemadmodum de partibus, quæ viscoso humore vicinas partes irrigant, contingit. Præterea narrat Gal. 6. de loc. aff. 5. & secundo de sem. 1. historiam de quadam vidua (illique historiæ quotidiana fauet experientia) quæ detineri nervorum distentione videbatur ob retentum semen, quod solebat, quando proprium virum habebat, in coitu emittere. Quo circa cum iussu Gal. illi viduæ ab alia muliere pudendum intromissis digitis contrectatum fuisset, oborta titillatione copiosum, & crassum semen cum labore emisit, & dicebat, non obstante labore illo, in emissionem similem voluptatem percepisse ei, quam alias in coitu percipere consueverat. Ex hac historia patet non continuè humorem, qui in testibus, & vasis seminalibus mulierum continetur, destillare. vt contingit de humore oleoso supradictò. Nam si continue destillaret, non posset congregari in tanta copia, neque esset opus naturæ suppetias ferre, procurando pudendi muliebris fricationem similem illi, quæ à mentula fit. Glandulæ enim, quæ viscoso humore abundant pro irrigandis partibus, ex se humorem illum euacuant, neque ope externa indigent. Sed quod omnium maximè responsionem allatam à Peripat. destruit, est, quòd ipsi statuunt humorem, quem mulieres in coitu emittunt, non esse



esse necessarium ad conceptionem . nam talis humor secundum Ar. primo de gen. an. 20. & 2. cap. 4. aliquoties non emittitur, & tamen fit conceptio ; si quando verò emittitur , ad melius emittitur . Humor autem viscosus partes obliniens necessarius est , non aliquando emittitur, aliquando non . Quòd hoc sit verum. Consideremus rem in exemplo assumpto . si continuè oris partes non irrigarentur humiditate oleosa, quomodo gustare aliquam rem , quomodo loqui, quomodo mandere, quomodo deglutire possemus ? Nulla ergo similitudo reperitur inter humorem oris partes irrigantem, & alios similes, & eum, qui in testibus, & vasis seminalibus fœminarum reperitur . Quid dices modo bone Auer. ? Videtur ne tibi, quòd humor, quem fœminæ in coitu emittunt, sit veluti salina in os famelici discurrens ? An salina illa famelici non est salina ? non scaturit à glandulis iisdem , à quibus reliqua omnis salina ?

Ex his licet dictum quoddam Sueßani refutare . Scribit Sueßanus super primum de gen. an. pag. 47. guttam , quam mulieres in coitu emittunt, & quam dicit vtilem esse, vt matrix aperiat, & semen virile deglutiat, per eosdem meatus emitti, per quos sanguis menstruus scaturit . Hoc autem falsissimum est . Iam enim ex dissectionibus diximus apertum esse, humorem, quem emittunt, contineri præcipuè in vasis, quæ ad cornua uteri pertinent . Et stylo in vasis illis immisso, nos cernere in cavitatem uteri penetrare . ergo per meatus, qui ad cornua uteri tendunt, humor albus in coitu à mulieribus emittitur : At vasa, per quæ menstrua expurgantur, non sunt meatus ad cornua uteri peruenientes, sed rami ab hypogastrica vena ad uterum sparsi, et (si ita placet) ramus ille minor à spermatica vena proveniens, de quo in super. cap. mentionem feci . Innixus huic suo principio Sueßanus, vt gutta, quam mulieres emittunt, expurgetur per meatus, vt iam dictum est, per quos menstruum pag. 60. dicit, testes in fœminis factos fuisse, vt menstruum præparationem accipiat . ergo sequitur secundum Sueßanum, quod menstruum per testes permeans ad uterum perueniat, & per ipsum expurgetur, quod à sensibus non solum alienum est, verum etiam inimaginabile. Vide quomodo dato vno inconuenienti plura sequuntur . Negant ve-

rum-



## Mundini Mundinij

rum usum testium fœminarum, negant semen illarum, & verum illius usum. inducuntur postea ad hæc absurda proferenda. Magna certè res est. Reuoluas totam Peripat. doctrinam circa humorem, quem mulieres in coitu cum voluptate emittunt, hæc disces. Illud esse serosum, proprium loci, superfluitatem excrementitiam, ad conceptionem non esse necessarium; cum aliquando emittatur, aliquando non; In quo tamen loco generetur, & verisimilem causam, ob quam à natura institutus sit, non disces certe. Hoc autem contingit, quia Ar. testes in fœminis non cognouit, ut probaui euidentissimis rationibus cap. 5. & adhuc minus fabricam vasorum seminalium illarum. Vnde non mirum, si dixerit humorem illum non esse ad conceptionem necessarium, & ad melius tantum in aliquibus esse. Posteriores vero volentes in hæresi sui Magistri Ar. perseuerare, & coacti ab anatome confiteri in mulieribus testes esse, in mille absurda incurrunt, & mille figmenta pronuntiant.

Porro stantibus iam recitatis ego sic arguo. Illud in aliquibus non est ad melius, sed est necessarium, quod in omnibus illis reperitur, sed in omnibus fœminis viuiparis fecundis, si dissecentur, inuenitur in testibus, & vasis seminalibus illarum humor albus, & crassus. ergo talis humor non ad melius in illis, sed necessarius est. Si est necessarius, vel necessarius est, quia ad conceptionem, vel quia ad voluptatem, quam fœminæ in coitu percipiunt, faciat, vel ad obliniendum collum matricis. Non necessarius est propter hunc vnum vltimum usum, ut paulo supra ostensum est. non propter voluptatem secundum Peripat. ut supra cap. 2. & 5.

patefieri. ergo contra ipsos Peripat. propter conceptionem necessarius est. Similis erat argumentatio Ar. qua testes ad

generationem necessarios

non esse probare contendebat supra cap. 4. in fine.



**Sextum, & septimum Medicorum argumen-  
tum Peripat. responsiones. Illarum  
euerfiones. Cap. X.**

**S**exto loco fœminæ vehementibus stimulis in Venerem inci-  
tantur, ferociunt, priapismo torquentur, pollutiones inuolun-  
tarias patiuntur, ut mares. at hæ affectiones maribus contingunt  
ex semine. Nam facta excretionem seminis, omne libidinis, &  
concupiscentie desiderium, & reliquæ affectiones desinunt. ergo hæ  
omnia ex semine fœminis contingere necesse est. Magna cer-  
tè res. Videmus mares ex copia, & turgentia seminis stimulis in  
Venerem agitari, priapismum, pollutionem cum magna voluptate  
pati. Videmus altera ex parte in fœminis partes, quæ in maribus  
ad generationem seminis, & ad illius emissionem faciunt, reperiri.  
Videmus substantiam albam, crassam in his contineri partibus.  
Observamus fœminas tali excreta substantia libidinis, & coitus  
desiderio, priapismo, pollutionibus inuoluntarijs liberari, & vere-  
bimur affirmare fœminas à tali substantia alba, & crassa habere,  
ut ad Venerem incitentur? ut ferociant? polluantur? priapis-  
mo vexentur? voluptatem persentiant? substantiam illam al-  
bam, crassam semen esse?

Vidit Ar. secundo de gen. an. 4. argumentum de pollutione  
inuolutaria. Sed dixit nil hoc concludere; & statuit pollutio-  
nem ex emissionem alicuius humoris infœcundi posse fieri. Hoc mo-  
do ergo pollutio in fœminis contingit secundum Ar. Idem potes  
dicere de alijs affectionibus dictis. At ego dico necessarium es-  
se, ut ijdem specie effectus ab eadem specie causa procedant. Si  
ergo pollutio, & ceteræ affectiones dictæ in viris à semine pro-  
veniunt, cur non etiam in fœminis? Deinde inuolutaria pollutio  
non fit in viris, nisi semen copiosum sit, & spiritibus turgidum, &  
quasi pruriens libidinosas moueat imagines, ut innuit Hipp. lib. de  
genit. & à philosophis admitti debet. Si ergo in fœminis inuo-  
luntaria pollutio fit, opus est, ut humor, qui excernitur, easdem



## Mundini Mundinij

conditiones habeat, aliter pollutionis non esset in causa. ergo non potest esse infecundus. quando quidem humor spiritibus turgidus infecundus non est. Vis huius argumenti adhuc maior apparebit, cum studiosi infra cap. ultimo huius primæ partis nostræ disput. discent miram sympathiam, quæ inter semificam, & imaginatricem vim reperitur.

Tandem una cum Galeno argumentum desumo ex similitudine, quam habent filij cum proprijs parentibus. quod quidem argumentum Medici nostri Oddus, Fernelius, Valesius, Massaria, Laurentius pro Achille suo habent. Obseruamus ergo, quod natus aliquando matri, aliquando patri similis generatur. Tunc sic. Effectus communis non potest provenire nisi ab aliqua causa communi. Similitudo natorum est communis effectus proveniens à patre, & à matre. Si enim à patre tantummodo proveniret natus semper patri, si vero à matre, matri semper similis esset. ergo à causa, quæ utrisque insit provenire necesse est. Hæc communis causa, aut est semen, aut sanguis menstruus. Nam his duobus tantummodo intercedentibus natorum procreatio à patre, & à matre fit. Sanguis menstruus non est. Nam menstruus sanguis in solis feminis apparet. ergo communis causa erit semen: ergo femina semen generat.

Vidit Auer. cap. ultimo primi de gen. an. vim huius argumenti, & pro eius solutione ingeniosam responsionem excogitavit. Nostri vero Medici (excepto uno Io. Baptista Sylvatico viro certè eruditissimo) qui ex professo controuersiam hanc de semine inter Ar. & Gal. tractarunt, quique adductum argumentum pro Achille habent, eam dissimularunt, non sine equidem magno Medicorum dedecore. Nam Peripatetici, cum videant per sua principia soluta argumenta, quæ pro fortissimis à Medicis habentur, tumidi incedunt causam vicisse credentes, & Medicos spernunt. Sed certè antequam hoc facerent, optime animadvertere deberent, an bene, vel malè Medicorum argumenta soluta fuerint. Responsio Auer. meo iudicio consistit in hoc. effectum, qui provenit à duobus secundum eandem speciem causæ, necessario in illis arguere causam communem illius effectus. effectum autem, qui provenit à duobus non secundum eandem speciem causæ,



causa, non arguere in illis causam communem. Pater, & mater secundum Ar. & Auer. sunt causa similitudinis, sed non secundum eandem speciem causa. Nam pater efficit similitudinem, mater vero illam non efficit, non concurrat effectiue ad illam, sed materiam aptam ad recipiendam similitudinem præbet. Ergo non valet in illis debere esse causam specie eandem. Enimvero quemadmodum Ar. vult generationem fieri ex mare, & femina, non vno, & eodem modo, sed mas apud ipsum est dator formæ, femina vero præstat materiam. ita, inquit Auer. vult Ar. similitudinem fieri ex illis, quod scilicet mas semper præstet formam similitudinariam, femina vero materiam, menstruum scilicet. Si enim iuxta Ar. inquit Auer. femina præstet materiam promptam formæ similimari, adhibet ei mas illam formam. Si det materiam conuenientem formæ simili ipsi, tunc mas inducit in eam illam formam, & tunc natus producitur similis matri. Cum ergo pater, & mater non concurrant vno, & eodem modo ad dandam similitudinem, sed pater effectiue, mater non effectiue, sed tribuendo materiam accommodatam (menstruum scilicet) non sequitur debere in illis dari naturam aliquam, in qua ad similitudinem natis præstandam conueniant, & in ipsis sit eadem, & per consequens non sequitur à matre semen debere generari. Exemplificat Auer. Scamnum fiat à Socrate Carpentario, & à Platone Carpentario. quia ergo ambo concurrunt effectiue ad scamni compositionem, necessario Socrates, & Plato debent conuenire in aliqua natura, quæ in vtrisque scamni sit factiua, & hæc est ars carpentaria. Sit vero altera ex parte Socrates calceolarius, & Plato coriarius; concurrunt ambo ad calcei effectiue. Plato enim præstat corium pro materia calcei, Socrates uero formam. Quia ergo non ambo effectiue ad calcei compositionem concurrunt, non necessario in ipsis debet reperiri communis aliqua causa, quæ eadem in vtrisque sit calcei factiua. Vnde causa, à qua fit calceus in Socrate, est ars calceolaria, in Platone vero, coriaria. Hæc est ni fallor Auer. responsio, & certè ingeniosè pro solutione argumenti à Gal. ex similitudine natorum desumpti excogitata.

Sed ego contra hanc responsionem insurgam, & spero me eius



## Mundini Mundinij

falsitatem esse patefacturum. Postquam ergo ostendi per cæ-  
teras supra positas rationes de necessitate fœminas semen gene-  
rare, si demonstraui semen illarum eadem specie vi efficiente  
conceptus conformationem esse præditum, qua præditum est vi-  
rile, non ne clarum erit fœminas effectiue, & secundum eandem  
speciem causæ concurrere ad dandam natis similitudinem? &  
esse causam similitudinis, ut Socrates, & Plato ambo Carpentarij  
sunt causa Scamni? Ita proculdubio. Nam, ut de se clarum est,  
& infra cap. 16. enodabitur, similitudo natorum præcipuè consi-  
stit in partium corporis conformatione, & figuratione. Eò au-  
tem libentius descendo ad hoc demonstrandum. quia aliqui Pe-  
ripat. victi rationibus supra allatis, concedunt fœminas semen  
gignere; & adhuc magis, quia vident Ar. ipsum, inter cætera  
loca, in quarto de gen. an. primo in fine feminarum seminis men-  
tionem facere. & primo de gen. an. 19. absolutè fœminas semine  
non priuare, sed solum negare à fœminis emitti tale, quale à ma-  
ribus. Verumtamen ut in sua hæresi perseverent, confugiunt  
 tandem ad illam sacram anchoram, ut dicant cum Ar. semen il-  
 lud nulla vi efficiente præditum, neque verum semen esse. Cum  
verum semen potestatem efficiendi in se contineat; hanc ve-  
ro uni marium semini tribuunt. Simul ergo, & se-  
mel contra hos probemus semen feminarum  
esse verum semen, habereque in se  
principium efficiens,  
& contra  
Aer. principium fetum  
efformans.





Fœminæ semen principium in se agendi, & formandi habere probatur.

Cap. XI.

**I**Ta ergo fretus diuino auxilio exordior. Si semen est excoctum, & spiritibus turgens, est verum semen, & principium in se agendi, & formandi habet. Semen feminarum est excoctum, & spiritibus turgens. ergo est verum semen, & principium in se agendi habet, atque formandi. Prima pars maioris propositionis probatur. nempe quod si semen est excoctum, sit verum semen. Nam Ar. in primo de gen. an. 19. d. verum semen esse sanguinem ulteriori coctione coctum. Semen ergo, quod est excoctum, est verum semen. Altera vero pars, quod si semen est spiritibus turgens, principium in se agendi, formandique habeat, probatur sic. Quia quæro de spiritibus, qui in semine tali continentur, quid agant in generatione fetus, fors an otiosi feriabuntur? Absurdum est hoc dicere. Forsan partes ex ipsis constituentur? Absurdissimum, & inimaginabile: ergo partes conformabunt. ergo efficiendi munere funguntur. ergo si semen est spiritibus plenum, principium in se agendi, & formandi habet.

Minor autem, quo ad eam partem, quod semen feminarum sit excoctum, probatur. Nam si crassum excernitur, est excoctum. Concoctio enim, quarto meteor. à tex. 19. fit incrassando. Sed feminarum semen est crassum, ut patet ex historia de vidua supra recitata cap. 9. & ex dissectione feminarum grauidarum, & aliarum, quæ diu à coitu abstinuerunt, in quibus licet in vasis deferentibus copiosum, & crassissimum semen inspicere: ergo feminarum semen est excoctum. Quod semen crassum, & spissum sit concoctum, audi ipsum Ar. 4. de gen. an. 1. Et semen concoctum calidius est, quale id, quod spissum est. In secundo de gen. an. 4. At vero quod concoctum est, (& loquitur de semine) crassum, & corpulentius est. Quod semen igitur sit excoctum, ex crassitie colligitur. Quod etiam feminarum semen sit spiritibus plenum, primo pro-



## Mundini Mundinij

probat per albedinē, quæ in semine feminarum cernitur. Nam secundo de gen. an. 2. semen album efficitur à multis ampullis, quæ paruitate sensum effugiunt in vnum concurrentibus, vt in spuma euenit at ampullæ, et bullæ, non nisi permixta spirituosâ substantiâ cum viscosa humiditate fiunt. ergo cum feminarum semen sit album, relinquitur, vt spiritibus plenum, & turgens sit. Sed quod sit huiusmodi certissima demonstratio præterea ostenditur. Nam habemus in mulieribus, vt in viris, plexus illos labyrinthicos vasorum præparantium, in quibus arteria venam, vena arteriam ingreditur, ad hoc, vt cum sanguine, qui in semen debet transmutari multi spiritus commisceantur, sicut etiam supra cap. 5. dixi. ergo feminarum semen spiritibus plenum, & turgens est, sed tamen minus masculo. ergo principium in se agendi habet. Patet quinetiam per ea, quæ in super. cap. & cap. 8. statui, Quod si semen feminarum non esset plenum spiritibus, voluptatem in illius emissionem ipsis non afferret. Ostensum enim est, quod, quia spiritibus plenum est, titillationem in partibus genitalibus efficit, vnde postea voluptas accidit. Si ergo feminarum semen est album, est crassum, est spiritibus plenum, concludendum est ipsum verum semen esse, & principium in se agendi, & formandi habere.

Sed quod sit verum semen probo insuper per notas, quas Ar. vero semini attribuit. Vt præteream secundum cap. secundi de gen. an. conditiones veri seminis adducens Ar. tertio de hist. an. ultimo scribit. Exit profectò semen hoc genitale album, & crassum, si integrum est &c. Quid ergo, si album, & crassissimum in feminis cernitur, ut patet ex historia de uidua, & dixi in principio 10. cap. ex dissectionibus notum esse, Forsan non erit dicendum esse semen verum?

Quod si diceret semen illud esse crassissimum, quia propter moram in illis uasis, à calore crassius redditum est. nam d. Ar. loco iam citato; quod si semen uiri in veluam proiectum excernatur, cum tamen aliquandiu in ea immoratum fuerit, crassius prodit. Scias, quod semen in uiduis, & alijs, quæ diu à coitu abstinerunt, conspicitur non crassum, sed crassissimum, & sic Gal. narrat de illa uidua; Unde si sua natura crassum non fuisset, crassissimum



non euasisset. Et scias ulterius, quod si humor, qui in his reperitur, esset humiditas aquea, cruda, gutta, nunquam propter moram in vasis crassesset. quæ enim per moram in aliqua parte crassescunt, à calore crassescunt; at aquea, cruda, calore solvuntur, vt docet Philosophus 4. meteor. à tex. 35. & secundo de gen. an. 2.

Afferuntur duæ rationes ex Ar. probantes semen foëminarum generantem, & formantem in se facultatem habere.

### Cap. XII.

**R**ationes, quas nunc adduxi, probant semen foëminarum efficiendi, formandique principium in se habere, sed non probant tale principium esse primum, principaleque, sed esse principium instrumentale. Afferamus alias probantes semen foëminarum principium primum in se habere. Pro hoc autem demonstrando, accipio primo. principium efficiens primum, atque conformans in semine, esse generantem facultatem, secundo de gen. an. 4. secundo generantem facultatem eandem esse cum Vegetante, ibidem, & secundo de an. tex. 42. Vnde sequitur, quod si semen in se habet Vegetatiuam facultatem, habet generatiuam; si generatiuam, formatiuam, & principium primum efficiendi, & formandi. Tunc sic arguo. Ar. 4. de gen. an. primo scriptum reliquit, naturam simul & facultatem cuius dare, & instrumentum; adeo quod, neque facultas sine instrumento, neque instrumentum sine facultate sit. Si ergo generatricis facultatis instrumentum, quod est abundans spiritus in semine, in femineo reperitur, Cur & ipsa in eo reperiri non dicemus? & si ipsa in eo reperitur, cur non eius ministra formatrix? Si ergo formatrix facultas semini femineo inest, aut otiosa manebit, quando semina vtriusque sexus miscentur, quod est absurdissimum, aut formabit, & sic semen foëminarum principium primum in se efficiens, & formans habebit. Quando dixit Ar. naturam simul facultatem

cuius



# Mundini Mundinij

cuius dare, & instrumentum, intellexit certè de instrumento, quod proprie dicitur organum, & est pars corporis peculiaris, dicata alicui operationi. Sed organum respectu spiritus, est instrumentum secundarium, non primum. Unde si illa propositio est vera de instrumento secundario, erit magis vera de primario, & immediato, quod est spiritus. Inueniri autem spiritum in semine feminarum, patet per iam in superiori capite allatas rationes. Adducta quoque in eodem ratio est, quæ demonstrabat spiritum in semine contentum esse instrumentum formatricis facultatis. Querebatur enim quid ageret spiritus in semine; an formaret, an ex eo partes formarentur. Sed hoc ipsum clarè quoque docet, ut omittam Auer. sexcenta loca, Ar. præcipue secundo de gen. an. 3. Inest (inquit) in semine omnium, quod facit, ut fecunda sint semina, videlicet, quod calor vocatur. Idque non ignis, non talis facultas aliqua est, sed spiritus, qui in semine, spumosoque corpore continetur, & natura, quæ in eo spiritu est, proportionem respondens elemento stellarum. Hæc protulit Ar. de spiritu in semine masculo contento; sed eadem est ratio de spiritu cuiuscunque seminis. Semper enim spiritus animæ instrumentum est.

Amplius Ar. secundo de gen. an. 4. circa medium concedit oua subuentanea animam Vegetalem habere. ergo ex suppositis facultas etiam generatrix erit in ouis subuentaneis, quæ absque maris congressu nascuntur. Verba Ar. sunt hæc. Questionem verò propositam (quæ fuerat, quæ de causa femina absque mare ex se ipsa non generet) ratione non carere patet in quibus, quæ oua subuentanea pariunt, cum femina aliquatenus possit generare. quod & ipsum recipit questionem, quo nam modo oua eorum dicantur viuere. Nec enim ita ut oua fecunda possunt. Sic enim actu animatum ex ijs efficeretur. neque ita se habent ista, ut lignum, aut lapis, quippe quæ corruptione aliqua pereant, ut quæ vitam quodammodo ante participarent. Constat igitur hæc aliquam habere potentia animam. Sed quam? Istam ultimam prorsus habeant necesse est, quæ Vegetabilis est. hæc enim æquè in omnibus animalibus, & plantis inest. Si ergo semina feminarum ouipararum, quæ nil aliud sunt, quàm oua earum, habent in



*ne vim generantem, non ne etiam generans facultas in semine vi-  
pararum erit?*

Sed statim hic se se opponet, suspicor, aliquis, & dicet. quam-  
uis Ar. concedat in statim allatis verbis, Vegetatiuam ouis sub-  
uentaneis inesse, non tamen sequi generatiuam quoque in illis con-  
ineri. Nam ex tribus facultatibus, ex quibus pars animæ Ve-  
getatiua constat, nutritiua scilicet, auctiua, & generatiua, gene-  
ratiuam esse nutritiua, & auctiua posteriorem: vnde ipsa præ-  
supponit reliquas, reliquæ vero absque illa stare possunt. Et re-  
vera ita obseruari. Nam sunt aliquæ plantæ, quæ nutriuntur,  
& augentur, & nullum producant semen. Sic sunt quædam ani-  
malia, quæ nutriuntur, & augentur, & tamen non sunt apta ad  
generationem; sicuti sunt animalia nata ex putri, & muli. Et ad  
secundum à nobis factum ex Ar. suppositum respondebunt, Ar.  
dicere Vegetatiuam, & generatiuam eandem esse facultatem,  
quia generatiua spectat ad partem animæ Vegetatiuam. Sed hæc  
singula confutemus. vis videre cum Ar. concessit animam Vege-  
ratiuam ouis subuentaneis inesse, generatiuam quoque illa in se  
continere supposuisse? hoc tibi clarè manifestabo. Postquam  
Ar. per nuper allata verba statuit, animam Vegetatiuam ouis  
subuentaneis inesse, mouet aliud quæsitum, in quo quærit, cum Ve-  
getabilem animam in se contineant, cur partes, & animal non ef-  
ficient? Respondet. quia sensualem animam habere ea oportet.  
non enim animalium partes ita sunt, vt plantarum. quam-  
obrem maris societate opus est. mas enim à fæmina separatus in-  
ijis est. Et quidem sic vsu euenit. subuentanea enim illa fæcunda  
redduntur, si mas coiuuit tempore quodam. & inferius declarans  
se magis, scribit. At vero in quibus sexus maris, & fæminæ di-  
stinctus habetur, fieri non potest, vt fæmina ipsa per se genere  
perfectè. Ita enim mas frustra esset. Quamobrem in ijs mas  
semper perficit generationem. hic enim sensualem dat animam,  
aut per se, aut per genituram. Dico modo ego ex his Ar. ver-  
bis. ad quodnam propositum esset istud Ar. quæsitum de ouis sub-  
uentaneis, scilicet cur partes, & animal non efficiant, si ipse non  
credidisset, ea facultatem generatiuam in se habere? cui funda-  
mento quæsitum illud inniteretur? Deinde, si ipse credidisset Ve-



## Mundini Mundinij

getatiuam ouis subuentaneis, non tamen generatiuam, inesse, facilis ad quæsitum erat responsio. Nam poterat dicere, oua illa partes, & animal non efficere; quia generatiuam, cuius munus est generare, & partes formare, non habebant; at hoc non dixit. Sed dixit, quia ad animal efficiendum, & partes animalis, sensualis anima requiritur; nam partes animalis, & animal ipsum, per sensualem in esse (vt ita dicam) animalis constituitur; Signum ergo est, cum concesserat supra, illa animam Vegetatiuam habere, concessisse etiam generatiuam continere.

Concedam generatiuam posteriorem facultatem esse reliquis duabus; sed tamen in animalibus non natis ex putri, neque oblati illæ duæ sine ipsa stare non possunt. Vnde cum fœminæ ouiparæ possideant vegetatiuam illis tribus facultatibus præditam, cur illas tres ouis suis non tribuent? Cur vegetatiuam ipsis tribuent absque generatiua? Ad id vero, quod dictum est, Ar. dicere generatiuam esse eandem cum Vegetatiua, quia scilicet ad partem animæ Vegetatiuam spectat. Volo quod studiosi sciant doctissimos, & eminentissimos viros in doctrina Ar. sustinere, facultates alicuius animæ non distingui realiter à suo fundamento, & subiecto, scilicet à parte illa animæ, cuius sunt facultates: vt nutritiuam, & auctiuam non distingui realiter à Vegetatiua, neque visuam, & auditiuam à sensitua, sed tantum ratione; adeo quod, in relatione ad diuersas operationes, eadem pars animæ nomen diuersarum facultatum sortitur. De qua re non est hic locus disputandi.

Denuo dicet aliquis. Ar. non concedere oua subuentanea habere Vegetalem animam. Nam secundo de gen. an. cap. 3. dicitur. Ar. illa principio carere, quapropter animata non esse. Sed sciamus, qui hoc modo instaret, Io. Gram. Sueffanum re vera existimare oua subuentanea per auctoritatem Ar. in 4. cap. eiusdem libri adductam, animam Vegetalem habere. Imò Io. Gram. probat ita esse. quia dum intus in corpore auium sunt, augentur, auctio autem est operatio Veget: animæ. Quapropter cum Sueffano respondendo auctoritati tertij cap. Ar. ibi. intelligere oua subuentanea non esse animata anima sensuali. Cum hoc tamen stat, quod sint animata anima vegetali.



*Sed iterum posset aliquis dicere . quòd quando Ar. dicit oua subuentanea animam vegetalem in se habere , intelligit de ouis , quæ intus in corpore auium sunt , non de ijs , quæ sunt extra . Quid vellet sic dicens concludere ? Ego sic concludam . Ergo per Ar. semen feminarum , dum in earum corpore erit , in se habebit animam vegetalem . at illud semen intus etiam in illarum corpore est , quod ex vasis deferentibus in cavitatem vteri effluxum est . & sic habeo intentum . Nam semen foras à feminis non emittitur , quando ex ipso fit conceptus . Deinde , vt multa omittam , rectè animaduertant verba Ar. & videbunt ipsum loqui de ouis ab auibus separatis . Cum enim Ar. conclusisset oua subuentanea vegetalem habere , subiungit . Sed cur partes , & animal non efficiunt ? Quomodo hæc verba proferre potest de ouis subuentaneis adhuc in auium corpore existentibus ? Quomodo enim , dum sunt intus in corpore , imaginari possumus , ipsa partes , & animal efficere posse ?*

*Anima Vegetalis ergo in ouis subuentaneis est secundum Ar. & per consequens in semine viuipararum . Vnde etiam in illo facultas generatrix , & formatrix inest , & per consequens eadem specie vis efficiens similitudinem quæ in semine marium ; quod est illud , quod contra Auer. probandum suscepi .*

**Dubitatur aduersus duas allatas rationes , & dubitatio secundum Ar. doctrinam remouetur cum nonnullis alijs instantijs . Cap. XIII.**

**S***ed operæpretium est , dubitationem pulchram , & per arduam , quam in superiori cap. tetigimus quidem , sed cursim : & quæ omnes Medicos neotericos hucusque transuersos egit , in manus resumere , & exactius enodare . Demonstravi hætenus semen feminarum in se habere virtutem formatricem , & illius instrumentum , nempe spiritum . Addo modò ex communi tam Peripat. quam Medicorum sententia , feminas materiam quoque*



## Mundini Mundinij

ad generationem tribuere. Cur igitur femina de se absque maris coitu non generat? reperitur vis generans in ipsa, instrumentum huius facultatis, materia, locus idoneus, quo alio ad generationem indiget? Hæc instantia Medicos valde torquet, & quamvis in super: cap. quædam attulimus ex Ar. per quæ facile ipsum ab ea euadere posse alicui videatur, multa tamen contra ea dubitanda relinquuntur. Formemus ergo sic contra Ar. instantiam, & dubitationem. Oua subuentanea habent facultatem in se formantem per te, & Ar. & materiam, ex qua partes formari possunt. Cur ergo ex eis absque maris semine pulli non generantur? Respondet Ar. ut vidimus in super: cap. Quod illud, quod generatur est animal, & est animal per sensualem animam, & quod efficiens talis animæ est mas, non femina. quapropter necessario ad generationem requiritur mas, qui per genituram talem det animam. neque enim fieri potest, ut vel facies, vel manus, vel caro, vel aliqua pars sit, nisi sensualis anima insit, quod si mas est efficiens talis animæ, impossibile est, ut fœmina ex se ipsa animal generet. Ex qua responsione licet tria de mente Ar. colligere. Primum est marem suo semini vegetantem facultatem, & sensitiuam tribuere. fœminam suo excremento non posse, nisi vegetatiuam impertiri. secundum est. quod ad hoc, ut semen perfecte efficientis locum habere dicatur, fœtui sensualem animam debet tribuere. Tertium est, quod si excrementum fœminarum sensualem animam in se contineret, fœmina de se generare posset absque mare. Cum ergo illam non contineat, non mirum si de se generare non possit. Hæc est Ar. à proposita dubitatione, & instantia euasio. Sed non desunt dubia. Nam remanet statim requirenda ab Ar. causa, propter quam femina non valeat suo semini vim sensualem tribuere, sed vegetatiuam tantum: mas vero amb. 15 suo semini impertiatur? Ego nullam aliam causam (valeat ipsa quantum valere potest) ex eo colligere possum, & scio, nisi hanc. Quod scilicet secundum Ar. mas, quæ mas, est efficiens; femina, quæ femina, patiens. Cum ergo efficientis sit formam tribuere, patientis vero materiam, formaque in animalibus sensualis sit anima; si femina suo semini sensualem animam tribueret, vel non haberet locum patientis, sed agentis, vel locum patientis,



Et agentis : Et sic posset de se generare .

Sed adhuc dubitabit aliquis . si semen maris continet Et Vegetalem animam in se , Et sentientem . ergo est animal paruum . Nam animal est animal per sensum . Deinde anima est actus corporis organici . at semen non est organicum ; ergo non animatum . Destituor hic à Peripateticis , qui paginas quamplures implent disputando utrum intelligentia mouens cælum , sit forma informans , vel assistens ; Et ut antiquiores sileam Achillinum , Iandunnum , Zimaram , videant studiosi quot scripta sint de intelligentia mouente cælum à Neotericis Piccolomineo , Et Zabarella , Et tamen cælum , Et multo magis intelligentiæ à sensibus valde remotæ substantiæ sunt . De ijs vero , quæ ad nostram generationem faciunt , Et sensibus obuia sunt , nil pulchrum quærunt , nullam speculationem mouent . Respondeo ego pro Ar. Et pro rei veritate . quòd habere animam contingit duobus modis potentia , Et actu , neque aliquid potest dici vel planta , vel animal , nisi actu animam possideat . Et similiter anima non est actus corporis organici , nisi actu in illo contineatur . modo in semine maris inest anima vegetalis , Et sensualis potentia , non actu . Quare non sequitur , quòd illud , aut sit planta parua , aut animal paruum , vel organicum esse debeat . Quando autem dicitur in definitione animæ , quòd est actus corporis organici , definitur anima , quæ actu est anima , Et in suo esse perfectò . nam dantur definitiones de rebus in suo esse perfectò . Sed aduertendum est . quòd quando dicitur , quòd anima est potentia in semine , non actu , non est secundum Ar. credendum , quod re vera anima in ipso non sit . nam , quòd anima insit semini potentia , non tollit , quod animæ essentia in illo contineatur . Sed bene tollit , quòd secundum esse perfectum in illo sit . adest enim veluti inchoatio animæ , sed non complementum . Adest autem hoc , quando operationes , quæ sunt propriæ illius animæ possunt per propria organa exerceri . Et tunc anima dicitur actu inesse . Hinc est quòd Ar. loco citato dicebat . animal viuere prius vita plante , deinde animalis , neque simul fieri animal , Et hominem , vel animal , Et equum . Nam tunc dicitur factus equus , quando adest finis , complementum . Quare tunc dicitur adesse actu anima , quando ipsius complementum adest .



## Mundini Mundinij

*Si suas operationes per propria organa non obit ; aut ne quidem obit, dicitur potentia, non actu adesse . existit enim ; sed modo imperfecto . Sed hac de re iterum parte tertia cap. 2. Verum inde manifeste cognoscitur animam vegetalem secundum suam essentiam in semine contineri . quia si semen generat plantam, vel animal, & generatio est actio vegetalis animæ, necessario ipsam semini inesse dicendum est . in quo est actio, & virtus sit oportet, inquit Valesius 2. contr. 9. De anima vero sensuali ita statuo . nulum dat quod non habet, semen masculinum dat animam sensitivam per Ar. ut supra ostendimus, ergo illius essentiam in illo contineri necesse est . Iudico autem ego secundum doctrinam Ar. animam vegetalem in semine esse in potentia magis propinqua, sensualem vero in remotiori . Intellectus verò speculativus extrinsecus aduenit, de quo nil in tota hac mea disputatione agere intendo .*

**S**olvitur dubitatio proposita in super: cap. secundum Gal. doctrinam. & remouentur instantiæ, quæ contra solutionem possunt afferri . & respondetur quibusdam quæsitis . **Cap. XIV.**

**H**Actenus personam Peripatetici indui, & defendi Ar. ut non cogatur fateri, postquam secundum ipsum, femininum semen in se vim formatricem habet, feminas de se absque mare generare . Verum durum mihi valde videtur, quod cum femina habeat in se animam vegetalem, & sensualem, ut mas, habeat easdem, ac mas, partes, per quas illas utrasque semini tribuere potest, ut apparebit infra cap. 17. ipsa tamen suo semini illas non tribuat ; & præcipue, cum obseruemus natos multoties, quo ad actiones, quæ sunt propriæ sensitivæ animæ, matribus similes esse . Præterea vero, quia, concesso femine semen & vegetalem, & sentientem in se habere animam, neque solum patientis, sed etiam agentis rationem habere, possumus rectissime saluare, feminam  
de



de se non posse absque mare generare . Imò ut infra cap. 16. & cap. ultimo videbunt studiosi, si volumus verè de multis, quæ circa generationem fetus contingunt, rationem reddere, cogimur affirmare, semen femineum non solum passiva, sed etiam activa facultate prædeditum esse . Ego igitur inhærendo ijs, quæ iam determinata sunt : fateor semen feminarum habere facultatem formatricem, & illius instrumentum . Statuo insuper contra Ar. easdem omnes facultates, quas masculinum, in se continere, atque feminam, quæ femina est, non solum patiens, sed agens esse . Deinde dico, non ob id sequi, quòd femina semen eius sit virtutis, ut solum sufficiat ad conceptum, feminaque absque mare possit generare . Nam licet in semine femine sit formatrix facultas, ea tamen est minus principalis, & est imperfectior : quare præsupponit facultatem magis principalem, & est subordinata facultati perfectiori, ut est facultas maris semini inexistens . Ad obeundum vero aliquod opus, requiritur de necessitate agens magis principale . Et hæc fuit quædam ex parte responsio subtilissimi Scoti 3. sen. & in quolib. Sed ego illud etiam addo . quòd si facultas formatrix debet operari, oportet ut sufficiens habeat instrumentum, quo in suis operibus utatur . Tale autem instrumentum est abundans calor in spiritu seminis residens . Quoniam vero seminis femina calor non est tantus, ut sit sufficiens per se ad conceptum formandum, ideo formatrix seminis femina inexistens, non potest de se conceptum formare . Necessarium ergo fuit, ut semen maris accederet, quod quidem cum calidius semine femina sit, tribueret eum calorem, qui ad opus conceptionis requiritur . Residet ergo in semine femina vis formatrix, sed ipsa perfectius viget in semine maris, ut etiam calor, quàm in semine femina . Et semen maris concurrit ad conceptum formandum magis principaliter, semen femina minus . Vnde sequitur etiam, ut, quamvis mas, & femina sint una agens, & patiens, magis tamen mas habeat locum agentis, magis verò locum patientis, femina . semen enim maris est perficiens, & complens semen femina . Vis videre, quòd requiritur mas ad hoc, ut afferat vim perficientem, & complentem, non ut novam virtutem tribuat, veluti testatur Ar. tribuere vim sensitivam, quæ non potest . tribui à femina? Ex hoc conicias .

quia



## Mundini Mundinij

quia in plantis est sexus masculinus coniunctus femineo, & tamen planta non habent sensum. Ad quid ergo natura sexum masculinum femineo in plantis coniunxit? ut tribuat virtutem efficientem? Minime. ostendi enim exemplo ouiparorum feminam, quæ femina est, illam tribuere. ergo ut det calorem, & virtutem sufficientem, & complementem. Sed requireret statim quis. Cur semen feminae est frigidius, & non sufficiens ad opus generationis? Respondeo ex Galeno secundo de sem. 4. & 14. de usu part. 6. Quod cum duo necessario concurrant ad perfectam fetus generationem. quorum alterum est semen, quod debet esse multo calore abundans (unde dicebat Gal. primo de tuend. 2. necessarium fuisse, ut natura plurimum ignis primordiis nostræ generationis immisceret, ad hoc, ut cum dicta primordia humida essent, humida non manerent, & sic ex illis animalium partes ad suas actiones exercendas aptæ formarentur; alterum vero est excrementitius humor, qui copiosus esse debet, ut potè qui fœtum per spatium multorum mensium nutrire debet; fieri non potest ut hæc ambo, vel in sola femina, vel in solo mare reperiantur. Nam multo calore abundans semen, non nisi à multa caliditate, excrementitius autem copiosus humor, non nisi à frigidityte, & humiditate generari potest. Cum ergo femina excrementitio humore abundet, necessario frigidior & humidior est; at cum talis sit, in exactè conficiendo semine deficit, & non potest semen ita calidum, ut ad conceptum, formandum requiritur, gignere. Non sequitur vero, ut putavit Ar. quod semen non gignat, & quod non sit verum semen, & satis calore abundans. Aduertendum autem est. quod quamuis mas semen semper calidius semine feminae generet: Verumtamen si in se consideretur, semen maris aliquando est magis calidum, aliquando minus. Item licet semen feminae minus, quàm maris, calidum sit; attamen in se consideratum, aliquando est magis calidum, aliquando minus.

Sed dicunt aliqui (ut licet videre apud Valesium in primo contron. 9.) non ne datur aliqua femina, quæ calidior est aliquo mare apto ad generationem? Ego difficulter hoc credo de femina naturaliter disposita. Hoc desumo ex doctrina Ar. & Gal. Legus Ar. 4. de gen. an. primo videbis ibi ipsum disputare con-



tra quosdam, qui asseriebant argumento copiae sanguinis, qua menstrua fiunt, fœminas esse calidiores viris, inter quos erat Parmenides, ut patet ex secundo de part. an. 2. Deinde vero observabis, quòd omnia illa, quæ in eo, & sequenti cap. adducit tanquam concurrentia ad generationem fœminæ, frigiditatem, & humiditatem præferunt; quæ vero tanquam concurrentia ad generationem maris caliditatem, & siccitatem. Passim in lib. de gen. an. hoc observabis. Cum principium non superat, nec concoquere potest propter caloris inopiam, vel frigiditatem, aut copiam materiae, procreari fœminam, cum materiam superat, & concoquit, mare fieri, absque ulla unquam horum suorum uniuersalium sermonum exceptione, & fœminam aliquam iuxta Ar. loquendo de naturaliter dispositis, putabis posse reperiri mare calidiorem? Absque ulla exceptione ex materia frigidiori, ex minus concocta, calore imbecillo pro efficiente concurrente, coadiuantibus causis extrinsecis frigidis, fœmina; ex materia calidiori, & exacte cocta, pro efficiente concurrente calore vegeto, coadiuantibus causis extrinsecis calidis, mas secundum Ar. gignitur, & fœmina erit ulla secundum ipsum calidior mare? Adeamus Gal. ipse 14. de us. par. 6. & 2. de sem. 8. mares omnes feminis calidiores constituit absque ulla exceptione de indiuiduis. non hoc autem egisset, non omisisset exceptionem, si iudicasset aliquam fœminam mare aliquo calidiorem esse. nam hoc pacto decepisset, non docuisset. bene verum est, quòd loquebatur de fœminis, & maribus non male affectis, sed dispositis secundum naturam, ut etiam Ar.

Sed dicunt biliosa mulier est pituitoso viro calidior. at ego, quid quid dicat Valesius, & una Præceptor meus Alexander Massaria ipsum insequens, non ita facile hoc ipsis concedo. nam, non ne mulier biliosa habet menstruas purgationes, quas pituitosus nullus vir habet? loquor hic de biliosa, & pituitoso ad generationem aptis, de biliosa, & pituitoso intra latitudinem sanitatis positis. quis enim dubitat pituitosum virum, si esset adeo pituitosus, ut semen ad generationem aptum minimè produceret, sed infecundum, biliosa muliere esse frigidior? Consulamus hic quoque Ar. & Gal. Ar. loco citato, & primo de gen. an. 19. & 2. cap. 4. docet menstruas purgationes prodire ob inopiam caloris, reliquias



## Mundini Mundinij

alimenti discutere non valentis. Hoc postea confirmavit etiam Gal. 14. de vs. part. 6. quomodo ergo si in pituitoso viro tantus est calor, qui reliquias alimenti discutit, in muliere vero biliosa non est tantus, ut hoc efficere possit, pituitoso viro mulier biliosa calidior erit? Si dicas posse dari fœminam adeo biliosam, & calidam, ut careat menstruis purgationibus? Qua caliditate hæc mulier pituitoso viro erit calidior? nativa? an aliena, & præternaturam? Ergo hæc biliosa mulier calidius semen masculeo generabit, hoc est biliosum, acre, mordax. At ego loquebar de caliditate seminis nativa, quando constitui semen maris calidius esse semine fœminæ, de caliditate, quæ ad conceptum instituendum sit apta, non de excedente, & præternaturam. Omnino instituit natura, ut fœmina haberet menstruas purgationes. his autem gaudens deficit in conficiendo semine, neque tanto calore abundans illud generat, ut de se sufficiat ad conceptum instituendum. Si eveniat præter intentionem naturæ, ut reperiatur fœmina adeo calida, ut illis præ caliditate careat, habebit semen omnino ineptum ad conceptum. licet enim illud semen fuerit valde calidum, erit calidum caliditate corruptiva, & destructiva conceptus, non institutiva illius. Caliditas fœminæ illius non erit similis caliditati, qua natura mares calidos instituit, erit caliditas morbofa. ergo semen quoque illius morbosum. ergo non aptum conceptioni. Nunquam insuper concedam mulierem biliosam habere testes, & reliquas partes ad seminis productionem concurrentes, calidiores caliditate naturali testibus, & partibus ad generationem seminis facientibus maris pituitosi. modo pituitosus ad procreationem sit aptus, & inter latitudinem sanitatis positus. Vis videre certissimè organa feminarum ad seminis generationem concurrentia esse necessario frigidiora organis marium, & semen feminarum semine marium frigidius necessario esse? Considera cum doctissimo Vesalio 5. lib. suæ anat. cap. 15. testes feminarum primo minores esse testibus marium; at monstravi cap. 7. minora frigidiora quoque esse; deinde dimidiam tantam partem vasorum seminalium, ut supra notavi eodem cap. ad illos tendere. nam reliqua pars in supernam partem fundi uteri spargitur. Cum ergo instituerit natura, ut dimidium tantum spiritus illius, qui ad testes marium

influit,



influit, testes feminarum sibi affiscant, quid mirum illos frigidiores esse testibus marium, proinde imperfectius, minimeque per se ipsum sufficiens ad conceptionem semen generare? Dubitabis ne amplius hac in re, in qua anatomicam habes demonstrationem? Coniunctientem quoque habemus in ipsa vniuersam Peripateticorum scholam, ut potest supra ex cap. 4. & 5. cuilibet patere.

At denuo instant, quia inueniuntur (dicunt) mulieres uterò intemperie calida laborantes. Sed ego dico. Fac ut etiam laborant testium calida intemperie, quid tum? acre, mordax, & urens semen generabunt quidem, sed non spiritu magis affluens, atque magis abundans eo calore, qui requiritur ad conceptum. Ego autem contendo semen maris calidius esse semine feminae, calore bono, mediocri, non immodico, minimeque apto ad opus generationis. Videtur ne tibi, quòd semen, quod à testibus intemperie calida laborantibus gignitur, possit ullo modo facere ad conceptum? Vterus similiter intemperie calida laborans concipiet ne? an potius conceptum peruret? Vide quid scribat Hipp. de tali utero 5. aph. 62. Audi quæ scribat Ar. 4. de gen. an. 2. ad propositum non admodum nostro dissimile. Omnia, quæ vel natura, vel arte efficiuntur, ratione aliqua sunt; calor autem, si valde superat, exsiccatur humorem. Si multum deficit, non concernit, sed mediæ rationem ad rem condendam seruari requiritur; alioquin ut in ijs, quæ igne coquuntur, plus ignis deurit, minus non coquit; ac evenit utrinque, ne quod agitur, perficiatur. Sic in coitu, maris, & feminae moderatione opus est.

Quidam meus amicus, quo cum hæc mea communicabam, duas attulit mihi instantias contra anatomicam demonstrationem, quæ ostendi testes marium calidiores esse testibus feminarum, proinde semen etiam calidius, & perfectius generare. Dicit ergo. quòd quantum valent in perfectis animalibus, de quibus nostra disputatio est instituta, spiritus multi per integram arteriam ad testes delati, testes ipsos marium calidos reddere, & unà semen in ipsis genitum, tantum potest minor portio spiritus per minorem arteriam ad testes feminarum delata. Nam testes feminarum sunt interni, marium vero externi. unde cum hi iniurijs ambientis sint expositi, non est mirum, si maiorem quantitatem spiritus requi-



## Mundini Mundinij

rant, quàm *fœminarum* ; qui cum externis iniurijs expositi non sint, & calore internarum partium illis circumstantium foueantur, minore quantitate spiritus indigent .

Deinde vero dicebat ; maiorem quantitatem spirituum ad testes *marium* demissorum præstare quidem , ut semen illorum extensivè, & quantitativè loquendo, sit calidius, sed non intensivè . at ego intendebar in hoc sermone à me proposito probare illud calidius esse intensivè .

Puto hæc facili negotio à nobis diluentur . Nam dicimus nos, quòd causa finalis est omnium principalissima , & nobilissima , & in operibus naturæ vincit omnes alias causas . unde cum videamus naturam in *maribus* testes collocasse ad extra , in *feminis* intus, possumus ex hoc arguere meritò, ut etiam supra cap. 7. fecimus, caliditatem testium , & seminis *marium* intensivam , & frigiditatem testium, & seminis *feminarum* . Decebat enim naturam iniurijs externis exponere eos testes, qui magis illis resistere poterant ; Cum ergo externis iniurijs exposuerit testes *marium* , non *feminarum* , arguendum *feminarum* testes ob suam frigiditatem occultandos fuisse, & per consequens minus calidos intensivè esse, minusque calidum intensivè semen generare . actualis enim frigiditas non potest stare, nisi cum minus intensiva caliditate, ut notum est apud philosophos . & hoc omnes *Anatomici* arguunt . atque hoc pacto ambas mihi ab amico propositas instantias sublatas esse existimo .

Sed aliam mihi solutionem subministravit Ioannes Hieronymus Bronzerius *Abbatensis* doctissimus philosophus, & Medicus, mihi que coniunctissimus , ut propter mutuum singularem inter nos amorem nominatum ipsum velim . Solutio est hæc . Observamus testes *marium* multis tunicis, siue involucris tegi . de quibus varij inter se sunt *Anatomici* . Ego vero iuxta meum morem sequar in his recensendis doctissimum Laurentium . Hæ ergo quattuor sunt ; duæ communes, duæ propriæ . Inter duas communes numeratur *scrotum*, et post illud altera tunica, à membrana carnosâ ortum ducens . inter proprias una exterior appellatur *elitroidis* ; altera immediate testes integens, & substantia valde crassa à doctissimo Laurentio appellatur membrana nervosa,



uosa, à diligentissimo Columbo vero, epididimon. Observamus altera ex parte testes fœminarum præter membranam à peritonæo deuenientem, inuestiri ab vnica, & illa quidem tenui membrana, quæ respondet membranæ nervosæ testium marium. Ex his ergo possumus dicere; quòd quamuis natura iniurijs externis testes marium exposuerit, ita tamen illos cooperuit, vt possent esse ab illis tuti, atque pauxillum caloris ad ipsos transmissi, impredientibus tot membranis, sed præcipuè membrana nervosa immediate illos tegente, posset transpirare. Adeò quod possumus meritò dicere, quòd tutamen, quod natura illis parauit, vices subeat interioris situs, quem testibus fœminarum assignauit. Sed cum non hoc contenta, instituerit etiam, vt ferè duplo maior quantitas spirituum ad testes marium, quam ad testes fœminarum influat, non ne dicendum est testes marium calidiores esse testibus fœminarum, ad quos quamuis in interna sede collocatos, multo minor quantitas spiritus influit, & ob tenuitatem membranæ illos inuestientis conclusus non seruatur, sed facillimè ab illis continuè transpirat?

Sed dicitur in secunda instantia, testes, vna cum semine marium posse esse calidiores, testibus, & semine fœminarum, ex ratione allata, extensiuè, non intensiuè.

At ego dico. quòd sensu ipso nobis constat semen fœminarum semine marium tenuius esse. at tenuius, frigidius quoque, vt supra patet cap. 11. si frigidius, minus certè intensiuè calidum; nam vbi frigiditas adest, ibi caliditas necessariò remissior est. si minus intensiuè calidum. ergo organa illud generantia minus intensiuè calida. hoc efficitur à testibus, & spiritibus in ipsis contentis. ergo testes fœminarum, & spiritus in illis contenti minus intensiuè calidi, quam testes, & spiritus marium. Patet consequentia. nam si & testes, & spiritus fœminarum magis intensiuè calidi essent, intensiorem calorem semini tribuerent. Omne enim agens assimilât sibi passum.

Sed quis quæso dubitare potest, si humor à duabus partibus eiusdem substantiæ, & naturæ concoquatur, & ad vnâ illarum concurrat multo maior quantitas spirituum, ad aliam multo minor, quòd concoquetur perfectius in ea, ad quam multo maior quan-



## Mundini Mundinij

quantitas spirituum concurrat? at testes marium, & feminarum sunt eiusdem substantiae, & naturæ, & solum accidentaliter differunt, ut ostendi supra cap. 6. & 7. Quis ergo dubitabit humorem, qui in testibus marium concoquitur, perfectius in illis concoqui, quam in testibus fœminarum? etsi hoc est, quis negabit illum intensius calidiorem esse altero, qui minus, & imperfectius coctus est? Minus coctum est crudius. à frigiditate cruditas est. ergo minus coctum habebit plus de frigiditate. at dictum iam est, quòd ubi plus est de frigiditate, ibi caliditas est intensius minor. Cum ergo maior quantitas spirituum ad generationem seminis marium concurrat, ut ex consideratione Vesalii manifestum est, quis dubitabit à primo ad ultimum illud intensius calidius esse semine fœminarum? Ex multitudine ergo spirituum licet argue-re intensiuam caliditatem seminis marium, ut Magnus re vera Vesalius fecit.

His puto ratum remanere nullam feminam naturaliter dispositam posse mare naturaliter disposito calidiorem esse, aut æquè calidam, proinde nullam semen ita calidum generare, ut mas generat, proindeque nullum posse de se concipere.

Verum cum per hæcenus determinata visa sit causa, cur, cum fœmina semen generet efficiente facultate præditum, opus etiam fuerit semine maris. Scire aliquis desiderabit. Cur cum mas semen generet, natura semen quoque in fœmina conseruaret, & præter semen maris, opus etiam fuerit semine fœminæ. Cur enim non potest ex solo semine maris in uterum eiaculato conceptus fieri, absque eo, quòd fœmina semen, & ipsa ad conceptum conferat, quæ fuit opinio Io. Costæi quinto lib. physiol. disquisit? Respondeo ex Gal. 2. de sem. 4. ad fœtus generationem opus fuisse semine fœminæ præter maris semen, ob diuersas causas. Nam primo nisi fœmina semen habuisset, ne appetere quidem coitum potuisset. Obseruare enim licet præsertim in suis feminis apud omnes nationes, illas post castrationem, se amplius apris non subiicere, & omnis venerei congressus obliuisci. Hoc vero non ob aliud accidit, nisi quia semen amplius castratæ non generant, quod pruriens libidinem concitat, & ad coitum animalia stimulat, at nisi ad coitum incitarentur, minimè generarent. quare primo hoc nomine ad ge-

neratio-



nerationem semen feminarum requiritur. Secundo vero: quia nisi femina in coitu voluptatem perciperet, illum non appeteret, ut supra ostensum est cap. 8. 10. & 11. voluptas ipsi euenit ex semine, ergo opus præter maris semen, semine quoque feminae fuit. Sed propter quid maius necessarium ipsum fuit. Considera enim quod semen constat ex duabus partibus, una crassiori, & terrena; altera spirituosam, & aerea. Ex spirituosam partes non possunt constitui, verum constituuntur ex sola crassa, ut probabimus in secunda parte huius disput. cap. 3. & 4. Considera ulterius. quod in semine maris pars spirituosam est multa; adeo quod partes, quæ gignuntur ex ipso, ex dimidio tantum illius generari cum veritate dici potest. Cum vero partes, quæ debent constitui ex ipso, sint multæ (nam præter partes albas, ex quibus fœtus integratur, adsunt etiam tres membranæ, quæ fœtum inuoluunt, & ipsæ quoque partes sunt albæ,) necessarium fuit, ut semen quoque, ex quo debebant tot partes formari, esset copiosum: at non ita copiosum semen à solo mare poterat conferri. opus ergo fuit, præter semen maris, semine quoque feminae. Et hoc est, credo, illud, quod significare nobis voluit Gal. quando lib. 1. de sem. cap. 7. & 2. cap. primo, & 4. & lib. 14. de usu part. cap. 11. docuit. semen femine cum frigidius humidiusque sit, esse quasi quoddam alimentum semini maris crassiori, ac calidiori accommodatum. Non enim semen verè nutritur. esset enim actu animatum, non potentia, ut cap. 13. conclusum est. Sed quoniam, quæ nutriuntur, per appositionem nutrimenti augentur; sic, quoniam per admixtionem seminis feminae cum semine maris, fit aggregatum quoddam maius, & accommodatum ad partes fœtus progignendas, dictum est à Gal. semen maris quasi nutriri semine feminae. Quod si hoc pacto calumniator Argenterius, omnibus infensus, Gal. dicta intellexisset, non illum irrisisset, quod semen femineum masculo quasi alimentum, non absolute alimentum, esse, docuisset. Doctissimus Laurentius lib. 2. op. anat. q. 17. scribit. Dum vero ali muliebri semine virile semen affirmat Gal. non de perfecta nutritione intelligit, quæ fit assimilatione, sed nutriri vult, foueri, conservari. quia enim calidius est semen maris, crassiusque femineo, tenuiori, frigidiorique diluendum, ac temperandum erat, ne tenues uanesceret



## Mundini Mundinij

,, sceret in auras . Sic aere nutriri spiritus dicuntur , hoc est con-  
,, seruari, foueri, refici . sic calidum omne , Hipp. lib. de nat. pueri  
,, frigido moderato nutritur .

Adeo quod, si vera sunt, quæ docet hic doctissimus Laurentius, ipsaque cum meis coniungantur, possumus dicere per admixtionem seminis feminae cum semine maris, fieri aggregatum non solum quantitate, sed qualitate etiam aptum, & accommodatum ad fœtum instituendum .

Porro ostendit Gal. locis citatis, secundam membranam fœtum inuoluentem, quæ allantoides, idest intestinalis à Medicis vocatur, ex semine feminae fieri . Observamus enim in dissecis animalibus, membranam allantoidem dependere ex vasis seminarijs, quæ ex feminae testibus in processus mamillares, uteri cornua, dictos, committuntur . modò semen à mare ei aculatum usque ad uteri cornua pertingere non valet . Nam cum recta ei aculatione per uteri cervicem in fundum illius ei aculetur, non potest adeo, expandi, ut etiam cornua irriget . sed cum ex illis vasis uteri cornibus commissis semen femina emittat ( nam ut supra cap. 9. dictum est, vasa illa in dissecis animalibus plena semine conspiciuntur, & stylo in ipsis extrinsecus immisso in cavitatem uteri penetramus ) quid aliud dicendum est, quam, quòd ex semine feminae membrana allantoides procreetur ? ostendemus enim in secunda parte huius disputat. cap. 3. membranas non posse, nisi ex semine, generari. rationabile ergo est membranam illam ex semine feminae gigni .

Non ita tamen hoc intelligendum est, ut ex eo solo, non ex maris etiam semine gignatur ; sed ut feminae seminis multo plus, quam seminis maris in generatione illius absumatur . neque ita intelligendum est, ut totum semen feminae in generatione illius absumatur . docet enim Hipp. lib. de genit. & experientia ipsa testatur, impossibile esse partum per omnia esse similem vel patri, vel matri, sed semper utrisque in aliquo similem esse . at si totum semen feminae in membranam allantoidem absumeretur, quomodo possemus saluare partum similem aliqua in parte matri nasci ? qua de re infra copiosè cap. ultimo huius primæ partis.

Io. Baptista Syluaticus Mediolanensis, vir quidem meo iudicio



dicio eruditissimus, & de Medicina optimè Meritus controuers.  
79. aliam seminis fœminæ necessitatem excogitauit, ita scribens.  
His rationibus illud accedit, & mea quidem sententia non leuis  
momenti. Quòd si speciei conseruatio est pro fine generationis  
constituta, cum indiuiduum nullo modo sempiternum esse possit ob  
materiæ naturam, fœminam, ut eius similitudo, atque species con-  
seruetur, vi generante, atque semine priuatam esse, inconueniens  
est. Si enim elementis, cæterisque animalibus illud tribuit natu-  
ra, ut suam similitudinem rebus indant, quo iure, & qua æquitate  
hac conditione priuata esset fœmina ipsa? quare, ut perfectorum  
animalium conditionem, & quæ imperfectorum est, inferiorem,  
ac deteriore faciamus, fœminis semen à natura datum esse, dicen-  
dum est; ut ad generationem necessariò concurrens, conetur po-  
tissimum inter coeteros usus, fœtus sibi similes reddere. Hæc ne-  
cessitas seminis fœminæ à doctissimo hoc viro ingeniosè equidem  
excogitata, atque hoc modo explicata non repugnat ijs, quæ dice-  
mus nos infra cap. 19. Ibi enim statuemus præter caliditatem, &  
frigiditatem aggregati ex semine maris, & fœminæ, ad genera-  
tionem maris, & fœminæ concurrere facultatem formatricem illi  
aggregato insidentem. Verisimile autem est maximam ad fœ-  
minam generandam habere efficaciam facultatem à fœminæ semi-  
ne prouenientem; præcipuè, cum in aggregato ex semine maris,  
& fœminæ maior quantitas seminis fœminæ reperitur. Attamen  
si quis attente rem considerare voluerit, non leues instantiæ con-  
tra hanc necessitatem moueri possunt. Nam in sequenti cap. ex  
Hipp. apparebit in mare dari semen & masculineum, & femineum.  
Et obseruamus etiam mulieres reperiri, quæ cum vno viro semper  
feminas, cum alio semper mares pepererunt. quod est signum  
dari semen in maribus aptum pro generandis fœminis. Et ulte-  
rius obseruamus oriri feminas omnino patribus similes, quod ex  
alio, quàm ex semine patris accidere non potest. Quapropter ego  
iuxta principia à me in vltimo huius primæ partis cap. tradenda,  
hanc necessitatem alio modo explico. Porro ordinauit natura,  
ut pro generatione conseruanda plures essent fœminæ, quam ma-  
res, ut etiam dicemus infra cap. 18. quia vnicus mas sufficit pro  
multis fœminis implendis. Ut plurimum vero fœminæ frigi-



## undini Mundinij

dius semen emittunt, mares calidius. ex calidiori mares, ex frigidiori feminas generari contingit, ut cap. ultimo huius primæ partis apparebit. Si ergo fœmina semine caruissent, ferè omnes masculi geniti fuissent, contra naturæ intentum. Quare necessarium fuit, ut et ipse semen generarent, ut quo ad fieri posset maior multitudo fœminarum, seruaretur. Adde præterea ego unum aliud. Quod si fœmina semen non generaret, nullam familiaritatem cum semine maris uterus haberet: unde ipsum non retineret, & conciperet. Mediante enim familiaritate, quam cum proprio semine fœminarum uteri habent, masculinum illos attrahere, & retinere valde rationi consonum est.

Sed circa iam dicta primo scire desiderabit quis, utrum per ea tantum vasa ad cornua uteri tendentia, & in uteri cavitatem penetrantia, ex quibus membranam allantoidem diximus dependere, fœmina semen emittant? Observamus mulieres gravidas semen extra emitte, utrum ergo per vasa uteri ad latera ipsius pervenientia semen emittunt? occlusum est tum adeò os uteri interius, ut ne vel minimum quicquam subire, vel excidere possit, ut infra parte secunda cap. 2. statuam. quomodo ergo hoc stare potest? Auic. gravidam mulierem nullis virium conatibus posse in concubitu semen effundere, affirmavit. At hoc experientiæ repugnat. Huic quæstioni ego cum doctissimo Laurentio lib. 2. op. anat. cap. 71. & q. 32. respondeo hoc pacto. Scribit iste vir à se observatos fuisse duos ductus semini muliebri excernendo dicatos. prior ductus ad latera uteri emicantia fertur, & hoc semen in uteri cavitatem, si mulier gravis non sit, eiaculatur; brevior enim est, & patentior via. Alter ductus veteribus incognitus, & neotericis etiam, priori continuus, sed aliquatenus oblongior, per latera uteri ad cervicem, & pudendum desinit. hoc gravidas semen effundere Laurentius existimat. & statuit mulieres, propterea tempore gravidationis maiore, quàm alijs temporibus voluptate in concubitu perfrui; quia vasa hæc à se observata, sunt oblongiora, & per cervicem uteri membranofam excurrunt. His nostris temporibus Iacobus Vidua diligentissimus, & exercitatus anatomus Venetus hæc eadem vasa observavit. Cæterum per priorem ductum in gravidis semen in cavitatem uteri effundit,



effundi, & masculine attrahi, cum uterus libidine feruet, & seminis est valde appetens, superfetatio, quæ aliquoties accidit, confirmat. Quomodo autem secundum meam sententiam, stante observatione doctissimi Laurentij, superfetatio contingat, dicam: si semen femineum, quando fit conceptio, totum ferè in uteri cavitate per cornu e. g. dextrum emittatur, coit in membranam allantoidem, ita ut vas cornu dextri obcæcetur, & semen non possit per illud amplius in cavitatem uteri effluere. Si ergo uterus gravidæ libidine ferueat in concubitu, potest per sinistrum cornu emitti illius semen, & aperto uteri ore quinetiam masculine attrahi, & sic fieri superfetatio. hoc autem rarissime contingit. Ex hac vero explicatione patet ratio, cur gravidæ ferè semper per vasa ad uteri cornua tendentia semen non emittant, sed per alia, ab his orta ad cervicem, & pudendum derivantia, à doctissimo Laurentio observata. fere enim semper semen femineum, & quando fit conceptio, & extra conceptionis tempus, per utrumque cornu emittitur; unde in conceptione uterque aditus observatur, produeta membrana allantoide ex progressionem seminis feminei in cavitate uteri. quo circa impeditur, ne semen amplius in illam emitti possit, atque ita per vasa alia dicta in cervicem emittitur.

Secundò requireret aliquis. propter quid mas ita copiosum semen non generat, ut solum possit sufficere pro conceptu? Crede quod natura provida viderit, quod si ita copiosum mas emisisset, cito interiisset. quoniam ex seminis emissionem valde exoluitur. Dicebat Avic. in lib. de anim. ad unam partem seminis faciendam concurrere 40. sanguinis. Miraris de hac causa? Nonne secundum Ar. ut vidimus supra cap. 5. adeò sollicita fuit natura, ne animalia perfecta ita cito, & crebro semen emitterent, ut in vasis spermaticis replicationes, & revolutiones multas parauerit? Cur? quia castiora illa esse decebat. Cur ita? Libido vehemens, & crebra in hominibus contemplationi, cui à natura erant destinati, valde officere poterat; sed in equis, & asinis? Sed dices forsan. Videmus in piscibus maximam copiam seminis, ergo maxima quoque reperitur in alijs animalibus, & tanta, quæ sola potest sufficere ad conceptum. Ad hanc instantiam primo dico. esse disparem rationem de semine in piscibus, & animalibus perfectis.



## Mundini Mundinij

fectis. Pisces non habent perfectum semen, non tantis spiritibus affluens, ut animalia perfecta (servata proportione inter frigidam naturam piscium, & calidiorem perfectorum animalium) & ideo pisces carent revolutionibus vasorum seminalium. Nihil igitur vetat pisces mares in maxima quantitate semen habere, nec non etiam in coitu effundere. parum enim ex emissionem illius resolvuntur. Cum pauca fiat ex tali emissionem spirituum dissipatio, quæ una est in causa exolutionis animalis. Secundò dico solùm semen marium in piscibus ad conceptum non sufficere, ut etiam in animalibus perfectis non sufficit.

His omnibus ita declaratis licet cuidam quæsito Costæi satisfacere. quærit ipse 5. lib. physiol. disquis: pag. 378. an semen feminae sit paris, vel imparis cum virili efficaciam. Non paris respondeo ego. Si imparis dicit ipse, quo, & qua facultate masculini adiuvet actionem? Siue enim calorem, siue viuificam vim suggerere illi dixeris, id ipsa res redarguit. Neque enim eius robur, quod calidius, quod efficacius est, accessione imbecillioris vel caloris, vel roboris augetur. Imò vero (subiungit.) Si ad virilis seminis adiumentum femineum requiritur, eodem tempore, quo emittitur maris semen, & femineum quoque emitti esset opus. hoc autem negat semper contingere, & re vera ita est.

Pro solutione huius secundæ instantiæ recurrant studiosi ad doctissimum Fernel. 7. physiol. 8. atque ad doctissimum Andream Laurentium in secundo lib. op. anat. q. 23. Quæsito vero facile nos satisfacimus. Dicimus enim semen feminae neque calorem, neque vim viuificam semini maris suggerere, sed seminis maris actionem ab illo adiuuari, quia illius accessione partes omnes ad fætum spectantes generantur, quæ ex solo semine maris generari non poterant, ob rationes iam dictas. accessione enim illius, aggregatum ex seminibus, & quantitate, & qualitate aptum ad generationem fætus efficitur. Virtutem præterea efficientem seminis maris, ex accessione virtutis seminis feminae, quamvis imbecillioris, corroborationem aliquam accipere, & adiumentum in sua actione admodum rationi consentaneum est, ut visum iam est, & quemadmodum infra cap. ultimo monstrabimus, contingentia circa generationem fætus fidem facere. Quapropter his omnibus, ita

stanti.



stantibus, licet concludere, quòd quamuis maris semen perfectionem semini fœminæ tribuat, non tamen ex se omnia potest, sed auxilijs seminis fœminæ & ipsum, pro generando fœtu indiget. Vnde semen fœminæ ad generationem, præter semen maris, necessarium est.

Tandem dicet aliquis, per te vis formatrix est in semine fœminæ, & in semine maris, ergo duæ formatrices virtutes concurrerent ad fœtum formandum, quòd est absurdum. nam unius rei unicum agens. Inferius quando solvam Ar. fundamenta ad hanc instantiam exactius respondebo. Nunc retorqueo contra Ar. argumentum. Feminarum ovipararum ova subventanea habent animam Vegetalem ex se, non à semine maris, vt supra cap. 12. ostendi; superueniente ergo mare, ova habebunt duas Vegetales. Hæc difficultas tangitur à Sueffano secundo de gen. an. 4. Sed videant studiosi quomodo eam soluat. Ego

respondeo. quòd ex commixtione seminis maris,

& fœminæ unica forma operans, unica  
facultas formatrix resultat,

atque ideo fœtus

ab unico

agente fit, non à duobus. Idem dicendum est

de reliquis facultatibus seminibus

insidentibus.





Francisci Valesij dubitatio, & aliæ grauiiores  
contra determinata, atque earum so-  
lutiones. Cap. XV.

**S** Ed alio modo dubitat Franciscus Valesius, vir certè grauif-  
simus, lib. 2. contr. cap. 7. contra determinata, & adeò apud  
ipsum fuit dubium, quod mouet, validum, vt illum coegerit conce-  
dere feminam de se concipere posse, quamuis quid imperfectum  
concipiat, vt sunt molæ. Dubium est. Statui semen fœminæ,  
quamuis efficientem virtutem in se habeat, minoris tamen virtu-  
tis esse, quàm, vt solum sufficiat ad conceptum. Sed contra est (in-  
quit Valesius) quod Hipp. lib. de genit. ita scribit. Quandoque  
quidem fortius est semen à muliere emissum, aliquando vero de-  
bilius. Similiter etiam quod vir emisit. & est tum in viro fœmi-  
neum, itemque masculum semen, tum itidem in muliere. Ex his  
autem verbis (inquit Valesius) constat fœminæ semen aliquando  
masculi semine fortius esse, aliquando debilius. Quandoque bo-  
nus dormitat Homerus. Miror unde hanc suam consequen-  
tiam grauissimus hic vir deducat. Femina quandoque fortius,  
quandoque debilius semen emittit, similiter & masculus. ergo fœ-  
minæ semen aliquando masculi semine fortius est, & sic de se so-  
lum potest ad conceptum sufficere? Non potest deduci hæc con-  
sequentia. Sciendum ergo est. Hipp. duplex in utroque sexu  
cognouisse semen; alterum robustius, & calidius; alterum de-  
bilius, & frigidius. Illud masculineum, hoc femineum vocat. Hipp.  
ergo comparans semen feminarum inter se, dicit, quòd feminarum  
semen non semper est vniforme; Sed aliquando fortius, aliquan-  
do debilius, aliquando retinet naturam seminis fœminæ, aliquan-  
do accedit ad naturam seminis maris, aliquando calidius est, ali-  
quando frigidius. non facit autem comparisonem feminarum  
seminis, cum semine marium. Comparans postea semen marium  
inter se, dicit, quòd aliquando emittitur fortius, calidius, aliquan-  
do debilius, frigidius. Feminarum ergo semen, facta compara-  
tione



tione cum semine masculi, semper debilius, frigidius est. Cum hoc tamen stat, ut aliquando sit fortius, calidius; aliquando frigidius & debilius. Quod autem locus in lib. de genitura ita sit intelligendus, patet si ponderentur optimè Hipp. verba, quæ parum infra à iam allatis leguntur. Si ab utrisque (inquit Hipp.) semen fortius prodierit, masculus erit partus. si debile femina nascetur. Si Hipp. quando supra dixit semen feminae fortius esse; illud semini maris comparasset, quomodo nunc diceret ab utrisque, mare scilicet, & femina fortius semen prodire, & item debile? Si semen feminae & fortius respectu seminis maris, semen maris non potest esse, & ipsum fortius. Idem dicas de debili. Non ergo semen feminae, quando Hipp. dixit aliquando fortius esse, cum maris semine, sed inter se ipsum comparauit.

Sed oritur maior difficultas ex nostra determinatione, quam sit illa allata à Vales. Quomodo enim potest verum esse, quod semen feminarum sit præditum virtute efficiente, minimè tamen sit potens de se generare. Si Hipp. in primo de dieta videtur statuere, non solum semen feminae semen maris superare: Verum cum docuerit, & in femina, & in viro masculineum, & feminineum semen esse, vult, quod etiamsi femina feminineum, & vir masculineum ad generationem conferat, semen tamen feminae feminineum aliquando superet semen viri masculineum? ergo videtur quod semen feminae sit æqualis, vel etiam maioris perfectionis semine maris, atque idè possit absque semine maris de se ad conceptum facere. Verba Hipp. sunt hæc. Si vero à muliere quidem feminineum, à viro autem masculineum, superauerit autem feminineum, audaciores quidem prioribus fient, verum tamen ornatae, ac moderatae etiam ipsæ. Hæc difficultas à nemine (quod ego sciam) fuit animaduersa. eius autem solutio erit mihi fundamentum pro resoluendis multis quæsitis, ut in progressu apparebit. Declarabo ego Hipp. per Hipp. Recurramus ergo ad Hipp. in lib. de genit. nam comparando ea, quæ tradit Hipp. in primo de dieta cum ijs, quæ docet in lib. de genit. difficultatem adductam, ut opinor, non inepte remouebimus. Hipp. ergo in primo de dieta docet duos modos, secundum quos mares gignantur, & duos secundum quos feminae. Primus est in generatione marium, quando tam à ma-

re, quam



## Mundini Mundinij

re, quàm à femina semen masculineum, in generatione vero feminae, quando ab utrisque feminineum prodit. Supposuit enim à mare semen masculineum, & feminineum prodire, & itidem à femina. Secundus modus est in generatione marium, quando ab vno masculineum, ab alio feminineum secernitur, superet vero masculineum. In generatione vero feminae, quando ab vno feminineum, ab alio masculineum secernitur, superet vero feminineum *fn lib. de genit.* docet hos duos eosdem modos. Primum modum, secundum quem mas, & femina procreatur, ponit in verbis supra citatis. Scilicet si ab utrisque semen fortius prodierit, masculus erit partus, si vero debile, femina nascetur. quod enim in *lib. de diætâ* dixit semen masculineum, & feminineum, hic vocat fortius, & debile. non est mea interpretatio, sed ipsius Hipp. Nam in *lib. de genit.* statim supra allata verba se ipsum exponens, scribit. fortior autem masculus femina est. Necesse est igitur ipsum à fortiori semine generari. Ergo idem est apud Hipp. semen masculineum, & fortius. per locum vero à contrario, idem dicas de debili, & femineo. Secundum vero modum, qui est, quando ab vno masculineum, ab alio feminineum prodit, superet vero in mare gignendo masculineum, in generanda vero femina superet feminineum, subiungit statim Hipp. ita scribens, Vtrum autem multitudine, ac copia praevaluerit, iuxta illud partus nascetur. Si enim molto plus fuerit debilis seminis, quàm fortioris, superatur forte, & debili per mixtum in feminam transit. Si vero plus fuerit fortis, quàm debilis, superatur debile, & in marem transit. Ex his verbis Hipp. in *lib. de genit.* colligitur modus, secundum quem intelligit, femine semen, siue feminineum sit, siue masculineum, superare semen maris. Superat enim feminae semen, maris semen, quando multitudine maris semini praeualet. Non vult ergo Hipp. in primo de diætâ, quòd feminae semen unquam superet caliditate, affluentia spirituum, & perfectione semen maris, sed quod illud superet aliquando multitudine, & copia. & tunc, pro ut semen feminae, est de se vel frigidius, vel calidius, generetur vel femina, vel mas. Pro ut enim copia praeualet, & calidius, vel frigidius est, iuxta illud, aggregatum ex seminibus temperatum euadit, calidius scilicet, vel frigidius resultat. ex calidiori autem aggregato mas, ex frigidiori vero



Si vero femina generatur, ut in fine huius primæ partis meæ disput. statuam, atque patefaciam. Idem dicas contingere, quando semen maris copia semen feminae excedit, & est vel de se frigidius, vel calidius. Sed, ut apparebit in difficultate proponenda, & dicam in fine huius primæ partis meæ disput. diuersitas aliqua est inter semen feminae copia superans, & inter semen maris. Hoc ergo modo Hipp. intelligendo, & interpretando, non sequitur secundum ipsum, feminae semen, quamuis aliquando superet semen maris, posse de se sufficere ullo modo ad generationem absque maris semine, ut concedere Valesius coactus fuit.

Non coincidit sententiæ Hipp. cum sententiâ Stratonici Physi-  
ci, de qua Gal. mentionem facit secundo de sem. 5. Dicebat Strato-  
nicus. marem gigni, cum maris; feminam, cum feminae semen præ-  
ualet. Vnde merito Gal. obijcit huic sententiæ. euenire scilicet  
ut feminae patri, mares matri quamsimillimi nascantur. Non  
ergo ex absoluto dominio seminis feminae, femina, seminis maris,  
nas generatur. Hoc obijci ipsi Hipp. non potest. Nam ipse  
non docet feminam generari, cum simpliciter semen feminae;  
marem, cum simpliciter semen maris præualet, ut dicebat Stra-  
tonicus. Sed feminam generari, cum semen femineum; marem,  
cum masculinum superat. semen autem femineum, & à femina,  
& à mare provenit secundum Hipp. & itidem masculinum, ut iam  
monstravi. Vnde potest dicere Hipp. feminam similem matri  
nasci, cum semen matris femineum superat semen patris, siue sit  
femineum, siue masculinum. Similem vero patri nasci, cum semen  
femineum patris superat semen matris, siue sit masculinum, siue  
femineum. Sed, hæc in fine huius primæ partis plenius declara-  
buntur.

At grauissima omnium allatarum emergit difficultas ex di-  
ctis Hipp. contra nostram interpretationem, & contra iam à no-  
bis determinata. Docet enim Hipp. primo de diætâ. quod si à  
femina semen masculinum, à viro femineum secedat, Supe-  
ret autem masculinum, mares generabuntur. Si vero à viro  
femineum, à femina masculinum, superet vero femineum, feminae  
gignentur. Ex his licet concludere, quod semen semen femi-



## Mundini Mundinij

na aliquando semine maris calidius sit, & non solum multitudine,  
& copia, sed etiam caliditate semen maris superet.

Cum enim ex semine feminae masculo superante, per Hipp. mas  
procreetur, ex faemineo vero viri superante faemina, & mas ex  
calidiori semper semine generetur, faemina ex frigidiori, sequitur  
secundum Hipp. quod semen faeminae masculum sit calidius se-  
mine viri faemineo. & sic falsum est, quod iam statuimus, semen  
maris semper semine faeminae calidius esse. Si enim ita se res ha-  
beret, ex semine maris faemineo superante, mares, non feminae,  
generarentur sicuti docet Hipp. Respondeo doctrinam primi de  
dieta de generatione maris, & feminae iam recitatam non esse  
integram, & omnibus numeris absolutam, verum mancā, &  
mutilam, illique aliquid ex alijs, & germanissimis Hipp. lib. adij-  
ciendum esse. Scribit ergo Hipp. 5. aph. 48. Mares dextra uteri  
parte, faemina sinistra magis gestantur. Peto ego, cur haec ita  
contingunt? Respondent interpretes ob caliditatem partis dex-  
trae, & frigiditatem sinistrae. Audi quid in com. scribat Gal.  
Quod propter temperamentum statim ab initio calidius, mascu-  
lus faetus generetur, demonstraui in commentarijs de semine,  
saepē etiam propter locum, id est partem uteri dextram (haec au-  
tem protinus ob hepatis viciniam calidior existit) conciliatur fe-  
tui temperatio calidior. quemadmodum ergo dextra uteri pars  
potest id, quod in ipsa conceptum est, calidius reddere, non ne  
idem praestare poterit uterus temperamenti calidioris? & quod  
sinistra uteri pars frigidius reddit, nonne uterus quoque frigi-  
dius reddet, si natura sua sit frigidior? Audi Gal. 5. aph. com.  
42. Haec vero talis conceptus fuisset (id est frigidior) nisi & viri  
semen, & mulieris uterus, quo concepit tempore fuissent frigi-  
diora. Hipp. ergo in aph. exprimens partem dextram, ut cali-  
diorem, sinistram, ut frigidiorē, reliquit, veluti ei mos est, ut  
quod de illis scripsit, nos de uteri temperaturis calidioribus, &  
frigidioribus subintelligeremus. Si igitur haec vera sunt, ergo  
non solum sufficit semen calidius superans pro generando mare,  
verum etiam requiritur, ut uterus sit calidior: neque solum se-  
men frigidius superans pro generando faemina, verum requiritur,



ut uterus sit frigidior. Hæc autem in ultimo cap. huius primæ partis dilucidabuntur.

His hunc in modum declaratis. Veniamus ad Hipp. Scribit ergo. Si semen à femina masculineum, à viro femineum secedat, superet autem masculineum, fieri marem. Si uterus non sit calidus, vel semen in dextra parte non recipiatur, non est verum. Scribit itidem. Si à viro femineum, à femina masculineum secedat, superet femineum, generari feminam. Nego hoc, si uterus sit calidus, vel semen in dextra parte recipiatur. Ergo tam ex semine femineo maris superante, si uterus sit calidus, quam ex semine masculineo femina superante mares generantur. ergo non sequitur, quod semen femina masculineum, calidius sit semine maris femineo; neque sequitur etiam, ut sit æquè calidum. nam ex solo semine femina masculineo, non generatur mas; verum commixtum est cum eo semen maris, quod calorem seminis femina intendit, quamvis semen maris sit femineum, femine masculineum. ostensum enim est supra cap. 14. semen maris semper semine femina calidius esse.

Verum enim vero sicuti à Galeno existimatum est lib. de genis non esse Hipp. sed Polybi, & ita Cornarius quoque testatur. ita primo maximam suspicionem de primo lib. de diæta affert mihi idem Gal. qui 14. de usu part. cap. 7. & 2. de sem. cap. 5. ex professo intendens causam generationis maris, & femina assignare, nullam mentionem eorum, quæ ex Hipp. in lib. 1. de diæta attulimus, facit; ac si ea nunquam legerit; & omninò alia principia supponit. quare ex his coniectari licet, aut Gal. non existimasse lib. illum esse Hipp. aut certè ijs, quæ ibi ab Hipp. docentur, non acquiescere.

Secundo verò clarè suam opinionem de 1. lib. de diæta Gal. detexit lib. primo de aliment. facult. cap. primo scribens conceptis verbis: primum lib. de diæta plurimum ab Hippocratica sententia recedere. Sed de his iterum in calce huius primæ partis, & accurati us.



## Mundini i Mundinij

Ex principijs Ar. & Auer. probatur semen  
foeminæ formatricem in se facultatem ha-  
bere. Tolluntur quædam fugæ Succani.  
Affertur quædam alia Costæi responsio ad  
argumentum Gal. desumptum ex similitu-  
dine natorum, eaque euertitur; atque ad  
examen reuocatur quædam Fernelij ratio  
contra Ar. Cap. XVI.

**H**is rationibus hunc in modum stabilitis, ad solutionem  
Auer. quam argumento à Gal. desumpto ex similitudine  
natorum, attulit, reuertamur. Cum ergo iam demonstrauerim  
semen femina formatrice facultate præditum esse, clarè Auer.  
posset constare falsitas eius solutionis. Si quidem ex hoc sequi-  
tur, quòd femina effectiue ad generationem concurrit, non quia  
materiam solummodo præstet. & quòd similitudinis natorum  
sit in causa eadem specie causæ, qua est mas. Nihilominus ulte-  
rius progrediamur, & immoremur parum in examinandis prin-  
cipijs tum ab Ar. tum ab Auer. iactis pro causa similitudinis  
natorum ad parentes reddenda. Inquit Ar. 4. de gen. an. 3.  
post multas suppositiones. Quòd si semen patris, potentia, quam  
in se habet generandi sibi simile in indiuiduo, superet menstruum,  
generatur filius similis patri. Si vero non superet, generatur  
similis matri. Inquit Auer. in solutione tradita ad argumen-  
tum Gal. de similitudine natorum cap. ultimo lib. primi de gen. an.  
quòd semper mas dat formam similitudinariam, femina vero præ-  
stat materiam. etsi femina præstet materiam promptam formæ  
simili matri, adhibet ei mas illam formam, & filius fit similis patri.  
Si vero det materiam conuenientem formæ simili ipsi, tunc mas  
inducit in eam illam formam, & natus generatur similis matri.  
Perpendamus omnia hæc dicta diligenter. Nam spero videbi-  
mus,



us, quòd si semen maris semper det similitudinem, & non etiam semen fœminæ, non poterimus reddere rationem, quomodo nati similes matri oriantur, & Ar. & Auer. coacti erunt vim efficientem, & formatricem semini fœminæ tribuere. Et hoc fuit illud, quod Gal. induxit ad credendum fœminæ semen vim formatricem in se habere, ut etiam maris semen habet, & quod me quoque ad amplectendam Gal. sententiam maxima ex parte impu-

Antequam autem perpendamus dicta Ar. & Auer. attendenda est quædam distinctio similitudinis individualis, de qua nunc sermonem habemus. Similitudo enim individualis corporum natorum ad parentes consideratur vel penes colores, vel penes compositionem, & figurationem partium corporis. penes colores, ut si mater exempli gratia sit alba, filius nascatur albus. si rubea, rubeus; si fusca, fuscus &c. quod idem de patre dicas. penes compositionem, & figurationem. ut si mater exempli gratia habeat nasum vel simum, vel supinum, labia crassa, vel tenuia, faciem rotundam, vel longā, & hæc omnia vel simul, vel separatim, filius oriatur penes hæc filius similis omnino matri, & hæc similitudo dicitur similitudo effigiei, et est verior similitudo individualis quam alia, quæ attenditur penes colores. quæ vero diximus de hac similitudine natorum respectu matris, idem dicas de ipsa respectu patris. Similitudo natorum, quæ attenditur penes colores, ut plurimum ex materia, & ex conditionibus materie ducitur. dico ut plurimum. nam aliquando fœminarum imaginatio, ut in sequenti cap. patefaciam, est causa similitudinis quo ad colores filiorum. Causa vero similitudinis effigiei secundum Ar. & totam eius scholam, Galeni, & totam Medicorum classem est semper virtus efficiens, & formatrix. Sed Peripat. volunt in solo semine maris tantum inexistere; Medici etiam in semine fœminæ. Si inuenimus ergo virtutem in semine fœminæ, quæ sit causa similitudinis effigiei natorum, sine dubio ratum remanebit semen fœminæ facultate efficiente, & formatrice præditum esse.

Sint ergo pater, & mater (quod sæpè etiam contingit) effigie, & figura valde inter se discrepantes. Oriatur ex illis filius similis matri. Quæro ab Ar. cur non similis patri? Respondet. quia



## Mundini Mundinij

quia potentia seminis patris, qua sibi simile in individuo generat, non superat menstruum. Cur non superatur menstruum? Respondet non superatur aut defectu facultatis eius, quando coquit, & mouet, aut copia, frigida tateque eius, quod concoquitur, & distinguitur. Sed quocumque horum modorum facultas seminis patris in agendo impediatur, peto ego cur illa facultas, cum non superat menstruum, & impeditur, ne imprimat ipsi figuram similem patri, imprimit figuram matris, quæ tam diuersa à figura patris est, & non potius quamlibet aliam figuram, quæ non adeo figuræ patris sit opposita? Quid respondebit *Ar.* huic interrogationi? Credo nullo alio modo posse *Ar.* respondere, quam hoc. Nempe ad generationem iam dictam matrem menstruum præstare, quod maiorem dispositionem habet ad suscipiendam figuram matris, ex qua decisum est, quam ad aliam alterius fœminæ, ex qua non est decisum. Sed tunc ego dico. menstruum non habet illam dispositionem ad suscipiendam potius figuram matris, à semine patris. quia potentia seminis patris, quam habet generandi sibi simile, disponet semper ad sibi simile. & quia si non disponet ad sibi simile, saltem ad sibi valde diuersum ut disponat non est rationabile. ergo menstruum habet illam dispositionem ad suscipiendam formam similem matri, ab ipsa matre, quod clarè fateatur etiam *Auer.* in supra recitatis eius dictis. habet enim dispositionem ad figuram illius, quia ab ipsa decisum est. Videamus quomodo à matre secundum *Teripat.* accipiat hanc dispositionem. Videtur ex *Suessano* lib. 8. sui dilucidarij q. 2. posse responderi. menstruum ad figuram matris habere dispositionem, quia deciditur ex materia iam toti corpori distributa, in qua particulares membrorum dispositiones aliquatenus sunt impressæ. Non mirum ergo si menstruum, à semine patris non superetur, quod filius similis matri oriatur. In hac responsione credo quod *Suessanus* respexit id, quod scriptum reliquit *Ar.* de semine maris lib. primo de gen. an. 19. & quod *Ar.* pronuntiauit de semine, ipse ad menstruum transtulit. Scribit ibi philosophus. rationem exigere, quia semen est excrementum alimenti sanguinei, quod ultimum in membra digeritur, ut filij similes parentibus sint. Simile est enim (inquit) quod ad partes accesserit, ei, quod remanet.

Itaque



Itaque semen manus, aut faciei, aut totius animalis est manus indefinita, aut facies, aut animal totum indefinitum, & quale quodcunque illorum est actu, tale semen potentia est, aut corpulentia sua, aut facultate, siue virtute, quam in se ipso continent. Videamus modo quo pacto Sueffanus intelligere possit, menstruum esse excrementum materiae iam toti corpori distributae. Intelligitne, quod menstruum sit excrementum tertiae coctionis, quae in singulis corporis particulis celebratur? an verè, quia, cum ex vena caua & eius ramis magnis corporis particulae sufficientem utilem sanguinem pro sui alimonia traxerunt, reliqui, quod tanquam quid redundans in venis illis dimiserunt, portio in menstruum secedat? si intelligit menstruum esse excrementum primo modo, rationabile est dispositiones particulares membrorum aliquatenus in ipso fuisse impressas, cum aliquatenus passum fuerit ab ipsis membris, cum aliquatenus membra in ipsum egerint. si intelligit esse excrementum secundo modo, qua ratione putabimus particulares istas dispositiones à membris illi impressas fuisse, cum nullam alterationem ab ipsis passum fuerit? Sed si quid à membris passum fuit, post sanguinis formam ab hepate acquisitam, à sola vena caua ramis passum fuerit? At ostendo fieri non posse, ut menstruum sit excrementum tertiae coctionis, quae in singulis membris corporis celebratur. Quia vero ostendi feminam semen generare, & illud etiam ad generationem necessarium esse, & in secunda parte huius disputationis cap. 3. & 4. demonstraturus sum ipsum materiam esse partium fetus albarum, quae sunt rubrarum fundamenta asseram primo probationem de semine. Quod autem probabimus de semine feminae, eodem modo probare poterunt studiosi de semine maris. Dico ergo. si semen est excrementum tertiae coctionis, quae in singulis perficitur membris, atque ideò ab ipsis particulares dispositiones illi imprimuntur. quomodo ex singulis corporis membris in vasa seminalia, & testes excrementum hoc deducitur? Statuit Fernel. doctissimus 7. physiol. cap. 2. 3. & 5. testes vehementissima attrahendi vi praeditos esse. an ergo materiam seminis ab omnibus partibus corporis attrahunt insita vi? Hanc attrahendi testium facultatem non expressit ullibi certè Ar. sed trabant etiam quantum vult doctissimus ille vir, quomodo at-



## Mundini Mundinij

do attrahere possunt materiam, quæ ex nutritione exempli gratia manuum, & pedum superfluit? Nam si eam ad se attrahunt, opus est, ut ex poris, qui in substantia sunt similarium partium manuum, & pedum, & qui alimentum pro nutritione earundem partium excipiunt, in venas primo capillares illa attrahatur, deinde ex his in parum maiores, ex his in adhuc maiores, ex his in alias maiores, tandem in maximam, & ex hac in vasa seminalia, deinde in testes. At hic modus attrahendi est in imaginabilis, neque eum admisit quoque Fernel. loco citato. Videamus an ita sit, pro exemplo assumentes membra magnitudine multum testes superantia, quæ insita vi quosdam succos attrahunt ad se. Lien insita vi melancholicum succum, renes serum ad se attrahunt; sunt viscera maxima, & tamen non nisi per ampla, eaque sibi vicina vasa dictos humores attrahunt. Si in toto corpore, in carnibus, melancholicus, serosusque humor contineantur, corpus ab eis non expurgant. Per quos longos tractus, per quot intricatos gyros materia seminis in testes attraheretur, si à quavis particula corporis in illos attraheretur? Si verum quoque esset semen foeminarum esse excrementum tertiæ coctionis quæ in quibusque corporis particulis fit, idem contingeret de semine marium: at in quo quæso differet hæc positio ab Antiquorum sententia, qui statuerunt (ut Ar. illis imponit) semen ab omnibus partibus corporis secedere, contra quos insurgit idem Ar. primo de gen. an. 18. validissimis rationibus, & Fernel. quoque alijs, à se non inepte excogitatis loco citato? Neque arbitror ex Ar. verbis elicitor semen maris esse excrementum tertiæ coctionis, quæ in singulis quibusque partibus fit. Nam dicit semen esse excrementum alimenti sanguinei, quod ultimum in membra digeritur. non dicit quod ultimum in membra digestum est, distributum est. adeo quod videtur mihi ex verbis Ar. quod ipse intelligat semen esse excrementum secundo modo iam de menstruo declarato.

Verum agamus etiam de sanguine menstruo, & probemus illum etiam non posse esse excrementum tertiæ coctionis, quæ in singulis membris celebratur. Et primo consideremus divisionem à nobis ipsius menstrui traditam supra in 2. cap. atque eam etiam melius declaremus iuxta nostra principia. Omnem ergo sangui-

nis



nis ex utero eiectionem ab Antiquis, & Neotericis etiam, nomine menstrui appellatam inuenimus. Hoc vero duplex est, aliud purum, aliud impurum. Impurum est, quod singulis mensibus excernitur.

Cum enim uterus sit veluti sentina, & cloaca, ad quam natura omnes sordes deponere solet, præcipue hoc agit, tempore, quo fluunt menstrua. tunc enim magis est concitata facultas expultrix, & via sunt magis aperta. Hoc ergo tempore prauis humores, qui in corpore reperiuntur ad uterum missi, cum menstruo permiscuntur, & prauam efficiunt mixtionem, sicque menstruum impurum profluit. Est etiam impurum, quod fluit singulis mensibus. quia cum sit sanguis superabundans, non potest à natura regi, fauoreque illius destituitur, vnde malum sibi asciscit qualitatem, & naturæ molestam, quamuis in proprio loco, in venis scilicet, contineatur, & locus sit conseruatiuus locati, vt obijcit eruditissimus Mercur. lib. 4. de morbis mul. cap. 1. Hinc est, quod si mulier grauida fiat, tempore, quo menstruum profluit, leprosus, & elephanticus fœtus oritur. Hinc etiam fit, vt mulieres ex suppressione menstruorum in habitum athleticum non incendant, sed in cacochymias, tumores viscerum, hydropes, inappetentias, palpitationes cordis, syncopes, pthyses, epilepsias, melancholias, canculos, & alia huiusmodi mala.

Impurum menstruum non est aptum pro generatione, aut alitione fœtus in utero; atque ob id toto grauidationis tempore in venis vsque ad partum reseruatur, à partuque expurgatur, atque si supprimatur dira infert symptomata. Si idem est sanguis is, qui statis periodis, vt inquit doctissimus Laurentius 2. op. anat. q. 20. per uterum excernitur, cum eo, quo & viscerum parenchymata coagmentantur, & fœtus in utero alitur, cur eius portio tempore grauidationis intus in venis à partu expurganda reseruatur, & non potius in fœtus nutritionem absumitur?

Gal. 2. pror. com. 48. scribit tempore gestationis fœtus absumi in illius alimentum vtilem sanguinem, & vitiosorem in venis permanere, qui singulis mēsis antea per uterum excernebatur. Similiter 3. in primum epid. 21. scribit exquisite inculpatum à partu sanguinem nunquam prodire. (nota illam negatiuam vni-



## Mundini Mundinij

uersalem, nunquam,) nam eius optima portio in fœtus incrementum est insumpta. quomodo ergo fieri potest, ut sanguis ille, qui tempore grauidationis intus reservatur, sit semper vitiosus, nunquam exquisitè inculpatus, ut propterea eo fœtus nutrirì haud valeat, & sit ille qui singulis mensibus antea per uterum excernebatur, nihilominus sanguis, qui singulis mensibus excernitur, sit alimentarius? sit eiusdem naturæ cum eo, quo viscera coagmantur, ut concordēs esse videntur contra Ferneliū Mercurialis, Massaria, Laurentius, Rudius meus amantissimus præceptor?

Dicet aliquis; quomodo menstruum reservatum in grauidis usque ad partum, est impurum, & vitiosum? non ne hoc post partum transit in lac pro nutritione æditi fœtus? fœtus non nisi puro, & benigno nutritur, ergo & purum, & benignum erat, quod tempore grauidationis intus reservabatur? Facilis est responsio. Nutritur quidem dulci, & benigno fœtus, sed nemo dicet totum lac ipsi cedere in alimentum. nam per multas trasmutationes lac in nutrimentum vertitur fœtus, in quibus varia excrementa generantur. Lac ergo, & puram, & impuram portionem menstrui in se habet, at antequam ipso nutriatur fœtus, secer-nitur pura ab impura. Adde quod quidquid est vitiosi in menstruo, potest aliquo pacto corrigi in trasmutatione illius, quæ in mammis fit, dum in lac à propria mammarum substantia vertitur.

Plinius, & alij pessima quædam narrant contingere ex menstruis. Datur me iudice menstruum magis, & minus impurum, & vitiosum, pro ut corpora fœminarum sunt magis, & minus impura; vel ergo in maximam impuritatem menstrui illa referrem, vel in corruptionem illius. atque ideo non de omni menstruo illa verificantur. Vtunque autem de hoc quæsito sit. nam de ipso disputare hic locus non est. Cum impurum menstruum ad generationem, & nutritionem fœtus non concurrat, clarum est, licet esset excrementum tertiæ coctionis, & dispositiones particulares in ipso à membris impressæ fuissent, non posse esse in causa, ut filius figuræ matri similis oriatur, ut in casu nostro supponimus.

Purum



**Purum menstruum** est, quod non habet mixtionem prauorum humorum, quod à natura regitur, eiusdemque naturæ est cum reliquo sanguine in venis contento. proinde etiam, & pro generatione fœtus, & illius alitione in uterum attrahitur. Hoc ergo purum non esse excrementum tertiæ coctionis, neque posse ipsi ab ipsis membris particulares dispositiones imprimi, per quas filius oriatur figuræ matri similis, diuersis rationibus patefaciamus.

Si sanguis superfluere debet in alitione singularum corporis partium, non ne rationabilius est, ut illæ attrahant successive ad se ex venis magnis id, quod potest sufficere pro earum nutritione, & reliquum, quo non indigent, in ipsis venis magnis relinquant; quam ut singulæ attrahant plus, quam indigeant, & illud iterum postea in venas magnas deponant, & inde ad vteri venas? Nonne attractio ista est superuacua? At nil natura superuacui instituit. Quod si dicat aliquis cum doctissimo Laurentio loco citato, idem contingere de singulis particulis, quod contingit de ventriculo, qui chylo saturatus, ipsum in intestina detrudit. particula vero saturatæ sanguine, quod reliquum est in venas refundunt, euomuntque. Respondeo. quod sicuti in natura menstrui declaranda dissentio ab hoc doctissimo viro, & ab alijs iam nominatis, ita, ut libere dicam, quod sentio, in hoc mihi eius sententia non probatur. Dissimilis enim est ratio de membris, quæ munus publicum sustinent, & de ijs, quæ non. Natura enim instituit, ut prima plus conficerent alimenti, quam indigerent, ut alijs in alimentum cedere posset, & ob id etiam plurimum caloris illis indidit. et hoc non instituit de secundis. quare si particulae omnes corporis plus alimenti attrahunt ex venis, quam indigeant, & quod illorum superfluum est postea refundunt in easdem venas. nonne attractio hæc est superabundans, & excedens? si debebat superabundare materia pro menstruo, nonne melius erat, ut in venis magnis ea superabundaret? ut particulae hanc superabundantiam in venis relinquerent? Sed fac hanc rationem esse nullam. quæso studiosi imaginentur iter, quod debet conficere residuum illud sanguinis, quod à particulis omnibus in venas magnas refunditur, & inde ad vteri venas promanat, & videbunt esse iter imperceptibile, ut diximus de seminis itinere. Ulterius notent unum



## Mundini Mundinij

aliud absurdum. Attraxerunt particulae sanguinem bonum pro sui nutritione, sed plus attraxerunt, quam indigebant ne? Peto ego cur residuum illud sanguinis laudabilis in venas reuolunt, cum saturatae sunt, si statim ac saturatae sunt ob continuum à calore substantiae nostrae fluorem, indigent nouo sanguine? Cur illud residuum expellunt, ut simile attrahant de nouo? Sed fac residuum illud refundi in venas. eodem ergo tempore ut nouum attrahatur in partium substantiam necesse est. ergo per quolibet etiam minimas venas, per venas capillares duo motus contrarii erunt; vnum attractionis, alterum expulsionis. vno, & eodem tempore per quodlibet minimum orificium venarum desinentium in partium substantiam sanguis egredietur, & ingredietur. egredietur è venis in partium substantiam pro earum nutritione. ingredietur iterum venas pro menstruo. quae apud me sunt in imaginabilia. Licet enim duo motus contrarii sint in aliquibus venis, ut meseraicis, illae paruae non sunt, ut capillares, sed multo maiores, & datur hoc aptior modus pro congregatione menstrui, ut iam patefecimus. Particulares ergo dispositiones membrorum neque etiam possunt menstruo puro imprimi per aliquam membrorum in ipsum actionem factam, atque ideò per hanc filius figurae matri similis haud nasci potest, ut in casu à nobis proposito suppositum fuit.

Sed fac etiam, ut particulares membrorum omnium dispositiones in menstruo impressae sint ab ipsis membris, ob id filius matri similis quoad figuram esse non poterit. quia similitudo in figura prouenit potissimum, ex compage, & figura partium corporis albarum. nam sunt haec fundamenta membrorum omnium, & non ex menstruo, sed ex semine fiunt, ut infra dicemus contra Costeum. Ergo quamuis particulares dispositiones membrorum imprimerentur sanguini menstruo, non ob id filius figurae matri similis nasceretur; sed necessarium est, ut in semine matris imprimantur, si debet figurae matri similis oriri. Aut absolute filios matri similes oriri, quia in semine matris insideat formatrix facultas, ut etiam in semine patris, quae sit causa similitudinis. modus declarabitur in ultimo cap. huius primae partis. Haec autem est conclusio, quam probare intendebarus contra aduersarios, & est

opinio



*Opinio Medicorum Ar. contraria.*

Quod spectat ad alterum; in manus resumamus orationem de dispositionibus membrorum in semine impressis, & subtilius rem rimemur, videamusque, an possint imprimi aliquo modo particulares membrorum dispositiones semini feminae. Sed non quia ab ipsis aliquam alterationem eius materia sustinuerit, ut confutauimus; & inuento hoc modo, quid etiam ex eo contra Perip. colligatur. Voco materiam seminis nunc, corpulentiam ipsius.

Credo ego, si filius matri effigie similis oritur ob dispositiones particulares membrorum semini ipsius impressas, cum nullo modo membra alia in materiam seminis agere possint pater venam, cauam, & arteriam magnam, atque vasa seminalia ab his orta. (actio enim omnis fit per contactum) solos spiritus seminis has impressiones suscipere posse. Nam spiritus tum vitales, tum naturales pro fouendis, & restaurandis spiritibus innatis à corde, & hepate feruntur ad cunctas corporis partes, moram vero cum illis trahendo ab eisdem mutationem aliquam suscipiunt, per quam fiunt veluti illarum proprii, proprietatesque, atque ideas illarum recipiunt; cum vero sui natura sint valde mobiles, & vehementer per vniuersum corpus circumferantur, & oberrent, ad vasa seminalia, & testes delati, in se ideas, & proprietates partium omnium, quibuscum moram traxerunt, seruantes, seminis materiae vera mixtione permiscentur, mediante ea mutatione, quam in dictis locis subit. Vnde possumus dicere, in semine, ut quodam misto resultante ex spiritibus, & seminali materia, particulares dispositiones partium omnium impressas esse, proinde dispositum esse ad suscipiendas figuras particulares, & similitudines illarum, non quia scilicet membra dispositiones has ipsius materiali, sed spiritali parti imprimant; proinde insiti sint semini spiritus ideas partium omnium, à quibus emanarunt, in se habentes.

At cum spiritus semini insiti agentis, & conformantis munere fungantur, ut cap. 11. & 12. ostensum est, vnde valent ideas, quas in se habent, exprimere. ergo dispositiones particulares, per quas semen foeminarum secundum Sueffanum, est magis dispositum ad suscipiendas figuras illarum, quam marium, non dependent à principio aliquo passiuo, sed ab effectiuo, & ar-



## Mundini Mundini

quant in semine feminae quid agens, non patiens. Sed cum iterum spiritus semini insiti sint agens, non primum, sed secundarium, instrumentum scilicet, & instrumentum conformans, & ulterius ubicunque est instrumentum, ibi quoque de necessitate sit virtus appropriata illi instrumento, quid aliud concludendum est, quam feminae semen virtutem insitam formatricem in se habere?

Uterius imaginatur Sueffanus, quantum conjicio ex eius dictis, quia menstruum est portio sanguinis, quae superfluit ex nutritione membrorum, ipsum passum fuisse aliquo pacto ab ipsis membris, & ideo particulares dispositiones membrorum matris aliquatenus suscepisse, per quas sit magis dispositum ad suscipiendas figuras particulares membrorum matris, quam alterius feminae, & sic per illas dispositiones, ex ipso oriri filium magis matri, quam alteri feminae effigie similem.

Sed cum ego iam ostenderim neque menstruum, neque corpulentiam seminis feminae perpeffionem aliquam à membris feminae sustinere posse, & quamvis menstruum aliquam ab illis sustinerent, non tamen ob id filios posse nasci figuræ matri similes, non potero forsitan probabilius imaginari spiritus vitales, & naturales à singulis corporis partibus in seminalia vasa, & testes deferri, & materiae, ex qua conficitur semen, permisceri: in hoc vero permissionis opere quia, per moram, quam cum ipsis partibus traxerunt, veluti illarum proprii facti erant, ideasque illarum præferunt, materiae illi quoquomodo imprimere proprietates, & dispositiones particulares partium, à quibus emanarunt? Hinc fieri, ut semen matris in se habeat dispositionem ad suscipiendam figuram potius matris, quam alterius feminae? Quae autem dixi de semine feminae, eadem de semine maris dicenda sunt.

Unum notandum est, antequam ulterius progrediar, quod quamvis spiritus aliqui permisceantur aliquo modo menstruo, non tamen dici potest illud in se particulares dispositiones membrorum impressas habere, aut eos ipsi imprimere particulares membrorum dispositiones. Pauci enim, qui in ipso continentur spiritus, sunt in transitu, non permanentes, non per aliquam illius transmutationem, & per veram mixturem, veluti sunt in humore, ex quo semen in vasis seminalibus, & testibus conficitur, ut ob



id neque etiam ad menstrui, veluti ad seminis naturam constituendam concurrant, quemadmodum declaratum est supra cap. 8. neque menstrui, sicuti seminis partes sunt. Quomodo ergo dicendum est menstruum habere in se impressas dispositiones particulares membrorum, si nulla illius pars habet in se illas impressas?

Declarabimus vero in sequenti cap. alio quodam modo à iam declarato, & à philosophis excogitato, spiritus ideas partium corporis in se concipere, retinere, & non solum semini, sed etiam sanguini menstruo illas communicare posse, multosque alios spirituum admirandos effectus afferemus.

Quòd si & hæc verisimilia sunt, & probabiliora ijs, quæ imaginatus est Sueßanus, liceat mihi augere contra ipsum hunc in modum. Idem est agens disponens, & inducens formam, Zimara theorem. 114. spiritus semini feminae insiti disponunt semen dum simul cum humore, ex quo semen conficitur in testibus, permiscetur ad suscipiendas particulares figuras membrorum illius. ergo figuras quoque particulares illorum ex eodem educunt, cum illud cum semine maris in utero, ut loco apto, mixtum fuerit, & ex illo partes effigie similes illis, à quibus emanarunt, formabunt. At non possunt formare de se. Sunt enim instrumenta, non agentia primaria, & ubi est instrumentum, ibi quoque virtus appropriata illi instrumento ut sit, necesse est. Si igitur in semine feminae, spiritus continentur formantes, in eo quoque ut formatrix facultas sit, necesse est.

Vide quomodo undique angustijs Peripatetici obsideantur. At obijciat forsitan aliquis. Illam propositionem, idem est agens disponens, & inducens formam, esse veram de forma substantiali, non accidentali. Dico in naturalibus illam propositionem esse veram de utraque forma, loquendo de formis, quæ mediante actione reali, non spiritali introducuntur, ut contingit de luce, quæ disponit medium, color vero inducit speciem. Stemus enim in nostro exemplo spiritus in semine feminae inexistentis est agens disponens ad figuras particulares partium, si idem spiritus non est inducens illas figuras, quod nam erit tale inducens? Sed accipe hoc argumentum. Quid dat formam, non ne dat consequentia  
for-



## Mundini Mundinij

*formam? figura consequitur formam. ergo quod dat formam, dat figuram. Sed quod dat formam, disponit ad formam, & quantum dat de forma, tantum dat de consequentibus formam. ergo quod dat figuram, disponit ad figuram. ergo idem est agens dans figuram, & disponens ad illam. & sic propositio illa vera est etiam de formis accidentalibus.*

*Ex his fortasse potest defendi non temerè sententia Antiquorum, qui putarunt similitudines particulares, quas filij cum proprijs parentibus habent, non ex alio pendere, quàm, quòd semen ab omnibus partibus corporis secedat. Vnde potest partes similes parentibus generare. Licet enim interpretari sententiam Antiquorum, quòd semen decidat ab omnibus partibus corporis, non secundum partem corpulentam quæ est passiva, sed secundum partem ipsius spirituosam quæ est activa. Et si comparabimus doctrinam Antiquorum hoc modo intellectam, cum doctrina Ar. multo clarior, & forsan firmior ipsorum, quàm Ar. doctrina erit. Nam non est, quod Ar. dicat, sufficere ad salvandas similitudines filiorum cum parentibus, quòd semen non decidat ab omnibus partibus corporis, sed quòd sit aptum suapte natura ad omnes partes, & habeat facultatem in se simile generandi. oportet enim ulterius declarare modum, secundum quem semen maris est aptum ad partes filiorum similes mari generandas, & secundum quem semen feminae, vel menstruum faciat, vel concurret ad partes filiorum similes feminae procreandas. In declarando autem hoc modo, ut iam patefeci, colligimus in semine feminae formantem facultatem, ut in semine maris, inesse.*

*Porro semen (ut redeamus ad primum propositum) & maris, & feminae est excrementum tertiæ coctionis, hoc modo. Nam materia illius superfluit ex nutritione vasorum seminalium, & testium. Quod si hoc verum est, ut est verissimum, quomodo semen potest acquirere dispositiones, quas isti imaginantur à singulis corporis membris? Sed an verum sit, semen esse excrementum nutritionis vasorum seminalium, & testium, & hac ratione posse dici excrementum tertiæ coctionis, studiosi dijudicabunt ex ijs, quæ docentur à Divino Galeno præcipuè primo de sem. 12. & 16. & à gravissimo Valesio 2. contr. 8. nec non ab Andrea Lauren-*



tio huius nostræ ætatis anatomicorum splendore lib. 2. op. anat. 7. 14. Nimis enim volumen excresceret, si singula vellem ita ad unguem persequi.

Verum iterum arguo contra responsionem Sueffani. Vel particulares dispositiones membrorum, quæ semini femine imprimuntur, quia deciditur ex materia iam toti distributa, arguunt in semine femine adesse virtutem passivam, vel effectivam. Non passivam. ergo effectivam. Probatur non arguere passivam. Nam semen maris deciditur, per Ar. 1. de gen. an. 19. iam citato, ex materia toti distributa. ergo particulares membrorum dispositiones in ipso impressæ sunt. ergo in ipso virtutem passivam, non effectivam contineri concludam. At hoc est contra Ar. & Peripat. ergo non est dicendum particulares dispositiones membrorum impressas semini, quia decidatur ex materia toti iam distributa, arguere virtutem passivam. ergo arguunt activam. ergo semen femine contra Ar. facultatem efficientem, & formatricem in se continet. ergo contra Auer. concurrit ad generationem, in eadem specie causæ, cum semine maris.

Si diceret Peripateticus aliquis. se non acquiescere in doctrina tradita à me de spiritibus semini commixtis. responderem ego. me in illorum scriptis hætenus non reperisse aliquid, quod doctrinam eam demoliat. Si verò is acquiescere non potest in ea doctrina, quæ tamen sapientissimam Antiquitatem consentientem habet; Arguamus contra eum breuiter in hunc alium modum. Dicis tu menstruum maiorem dispositionem habere ad suscipiendam figuram matris, ex qua decisum est, quam alterius femine, ex qua non est decisum. Ostendi contra te. quod si menstruum habet maiorem dispositionem ad suscipiendam figuram matris, non potest dispositionem illam habere à semine patris. Vnde relinquitur, quod à matre eam habeat. Tunc sic arguo. Idem est agens disponens, & inducens formam. mater disponit menstruum, nos dicamus suum semen ob rationem supradictam, ad recipiendam figuram matris. ergo mater dat quoque illi propriam figuram in conceptione. non potest dare illi figuram propriam, nisi ipsi tribuat facultatem, cuius munus sit figuras tribuere, (nullo enim alio modo, vel mas ipse figuram suam, effigiem propriam in conceptum introducit) at talis facultas non est, nisi for



## Mundini Mundinij

matrix per *Ar.* etiam ipsum . ergo mater virtutem formatricem suo semini largitur. ergo in illo facultas formatrix reperitur, ergo illud concurrit effectiue, & contra *Auer.* mater ipsa secundum eandem speciem causæ ad generationem fætus .

Examinemus hic quandam declarationem, quàm suis dictis *Peripat.* afferunt. Dicunt, cum effectrix virtus in semine patris inexistens est imbecillis, non potest formare fætum sibi similem, sed format similem matri. hoc autem prouenire ex impedimento agentis. Cum enim agens impeditur in sua actione propter eius imbecillitatem, siue sit de se imbecille, siue propter inobedientiam materiae, facit, quod non intendit. Sed studiosi non discedant à principio à me iactò. Sint pater, & mater effigie valde diuersi, & in quibusdam etiam particularibus dispositionibus contrarij, vt sepe videre est. Impediatur semen patris à semine matris, ne possit generare fætum sibi similem, quomodo fit, vt ex hoc impedimento fætus oriatur similis magis matri, quàm cuilibet alteri? Cur in hoc impedimento, limitatur actio seminis patris ad dandam figuram matris, non alterius, quæ nō adeò diuersa ab effigie patris sit, vt est matris effigies? oportet deuenire ad hoc. semen patris ex impedimento formare fætum ad similitudinem matris, eo quia matris semē, vel menstruum maiorem aptitudinem habeat, ad recipiendam similitudinem matris, quàm patris, vel cuiuslibet alterius. Sed vnde habet illā aptitudinem dico ego? à patris semine? an à matre ipsa? non à patris semine: Nam, vt supra dixi, patris semen non dabit, nisi aptitudinem ad recipiendam similitudinem patris, aut saltem similitudinem aliquam, quæ non valde distet à similitudine patris, vt distare matris effigiem supposui. ergo habet hanc aptitudinem ab ipsa matre, vt pote à qua est decisum; & hoc clarè fatetur etiam *Auer.* vt iam iam videbis, sed dico ego. qualis est ista aptitudo? in quo consistit hæc aptitudo? *Peripatetici*? oportet hoc declarare, & in hoc declarando res reducetur, vel ad dictum *Suessani*, vel ad positionem *Medicorum* è directo *Arist.* contrariam, vel ad nostram positionem de spiritibus. Sanguis enim vester menstruus est mollis, fluxilis, ad quàm libet figuram recipiendam æquè aptus, & accommodatus, quòd tu dicas de semine fæmineo. in quo ergo talis aptitudo consistet? A quo habet sanguis menstruus, & semen  
fæmine,



*fœmina, ut limitetur ad recipiendam potius hanc, quàm illam figuram? quomodo limitatur?*

*Verùm enim vero tempus est interrogandi ipsum quoq; Auer. Cur est, quòd ex patre, & matre effigie inter se valde differenti- bus, natus oritur similis matri, non patri, cum semper mas per Auer. tribuat formam similitudinariam? Inquit Auer. loco ci- tato. quia mater dat materiam promptam formæ simili ipsi, non autem formæ simili patri. Sed ego dico. Cum idem sit agens, dans promptitudinem ad accipiendam aliquam formam, & indu- cens illam formam. si mater dat materiam promptam ad acci- piendam figuram matris, dabit quoque ei figuram illam, non au- tem pater. & sic effectiue fœmina ad generationem concurret, & sic mas, & fœmina non in communi genere causæ, sed in eadem specie conuenient, contra, ac Auer. vult.*

*Quid. dicis modo Auer. mas, & fœmina sunt ne causa simili- tudinis natorum, vt calcei causa est Socrates coriarius, & Plato calceolarius? An vt scamni causa est Socrates, & Plato, qui am- bo sint carpentarij? Examinemus quæso exempla Auer. vt vi- deamus quodnam ex illis duobus exemplis magis sit aptum pro declarando modo, secundum quem mas, & femina sunt similitudi- nis causa. Accipiamus primum exemplum de calceo. Socrates coriarius non facit calceum, sed facit corium. at calceus, & co- rium non sunt idem effectus specie, sed differunt specie. Quid igitur mirum est, quod non fiant ab eadem specie causa, quæ Socrati coriario, & Platoni calceolario insit idest ab eadem specie arte? At non sic res est de similitudine natorum ad suos parentes. Nam cum natus patri, vel matri similis oritur, tam pater, quàm mater sunt causa similitudinis, & eiusdem speciei effectus. Similitudo enim non differt specie à similitudine in eadem specie animalis. quid ergo mirum est, necessarium esse, cum pater, & mater sint duæ res distinctæ, vt in aliquo principio eiusdem essentiae debeant conuenire, quod sit causa effectus, qui idem specie ab vtrisque procedit?*

*Accipiamus alterum exemplum. Scamnum fit à Socrate Carpentario, & à Platone Carpentario. Hic producitur effectus idem specie ab vtrisque, Scamnum scilicet. quia ergo est effectus*



## Mundini Mundinij

idem specie, arguit in utrisque causam esse specie eandem, artem scilicet Carpentariam. A pari ego dico. similitudo natorum, siue natus patri, siue matri sit similis, est idem effectus specie; nam similitudo non differt specie à similitudine; sicuti quoddam scamnū, quamuis differat ab alio scamno, attamen scamnum est; & pater, & mater concurrunt tanquam causa similitudinis, ut hactenus ostendi. patefeci enim quotiescunq; natus similis matri nascitur, hoc non posse provenire à semine patris, sed ab ipsa matre, & hoc in genere concedunt quoq; Ar. & Auer. ergo arguit in utrisque causam communem, quæ specie sit eadem, non genere. effectus communis, specie idem, non potest arguere, nisi communem specie causam. talis causa nō potest esse menstruum per ipsos quoq; Peripat. ergo est semen. Talis causa debet esse specie eadem. ergo semen in utrisq; est Specie idem. Sed non potest esse specie idem, nisi eadem virtute in utrisq; præditum sit. nam vnū esset verum semen, alterum equivoce semen. ergo si semen maris habet virtutem formatricem, semen quoq; femine in se illā continet. Vide quomodo stando in exēplis ab Auer. excogitatis, atq; ea applicando arg. à Gal. allato, nō illud labefactant, imò ex ijs contrarium, ac Auer. putauit, colligitur. Rogo autem studiosos, ut præter hæc, quæ nos aduersus ingeniosam Auer. argumentationem excogitauimus, non grauentur videre ea, quæ contra eandem attulit eruditissimus Io. Baptista Syluaticus contr. 79. qui vnus, ex ijs, quos hactenus mihi legere licuit, eam animaduertit, neque dissimulauit.

Sed lubet iterum ad Ar. reuertere, & alium mihi casum supponere, imò contrarium ei, quem in prima interrogatione supposui. sit mater effigie parum admodum à patre discrepās, ut aliquoties observatur. Oriatur filius ex illis similis matri. inquit Ar. quod potentia seminis patris sibi simile generandi in indiuiduo, tunc non superauit menstruum, & ideo non impressit figuram patris, sed eius oppositum figuram matris. Quod enim in generatione  
 ,, non superatur (inquit Ar.) transeat in oppositum necesse est, pro  
 ,, ea facultate, qua non superarit, quod generat, moueatque. Quod  
 ,, si quæ est mas, non potuit, fœmina gignitur. Sed si quæ est Cori-  
 ,, scus, aut Socrates, non patri, sed matri simile gignitur. Ut enim  
 ,, omninò patri mater opponitur. sic singulis generantibus, singule  
 gene-



generantes opponuntur . Sed contra . si semen patris, quando potentia, quam habet generandi sibi simile in individuo, non superat menstruum, figuram patris imprimere non valet, atque ideò imprimit figuram matris, quia mutat ad oppositum, & contrarium. Cum matris figura in nostro casu multo minus sit figuræ patris contraria, quàm quælibet alia, at ne contraria quidem, Cur fit, ut virtus seminis patris generans, quamlibet aliam figuram à figura matris, tanquam contrariam patris figuræ, non imprimat? si recurres ad dispositionem, quam habet menstruum ad figuram matris, non ad aliarum figuram, iam patet ex dictis in prima interrogatione, quomodo te conuincam . si recurres ad impedimentum . & hoc quoque confutatum est .

Deinde . cum patris semen per *Ar.* imprimit menstruo (nos dicamus fœminæ semini ob rationes supra allatas) figuram patris, superat menstruum, & hoc est agere per *Ar.* & hæc est actio principij efficientis . Tunc sic arguo . si efficientis, & formantis est facultatis in semine patris, figuram patris imprimere, & cum figuram patris imprimit, dicitur superare semen matris . ergo efficientis erit facultatis in semine matris, figuram matris imprimere, & cum semen matris impresserit figuram similem matri, dicendum erit semen matris superasse semen patris . At iam demonstravi, quòd quotiescunque natus similis matri oritur, hoc non ab alio potest procedere, quàm ut semen matris figuram propriam imprimat . ergo relinquitur efficientem, & formantem facultatem semini matris inesse, & semen matris superare semen patris . Sed perpende bene supra citata verba *Ar.* & videbis ipsum in illis generantem facultatem fœminæ semini concedere . Inquit enim . Ut enim omninò patri mater opponitur, sic singulis generantibus, singulæ generantes opponuntur . Sueßanus interpretatur sic hæc verba . singulis generantibus virtutibus, singulæ generantes virtutes opponuntur . ergo per ipsum *Ar.* generanti virtuti individuali seminis patris, opponitur virtus generans individualis seminis matris . ergo per ipsam *Ar.* in semine fœminæ virtus generans continetur . Vidit Sueßanus posse hoc colligi contra *Ar.* ex ipsius iam adductis verbis, atq; ideò occurrit argumento hunc in modum . Dicit ergo primo singulis generantibus facultatibus singulas generantes



## Mundini Mundinij

nerantes opponi, videlicet Socrati, non Socrates, homini non ho-  
mo, sed monstrum. Subiungit vero. appellauit autem virtutes,  
quæ opponuntur, generantes, quia licet generentur. tamen tra-  
hendo ad se fætum, possunt dici generantes. Responsio equidem,  
quæ neque stare potest cum verbis Ar. neque cum ipsa verita-  
te. Non cum verbis Ar. quia Ar. opponit Socrati matrem, non  
autem non Socratem, & mari, feminam. Audi Ar. iterum.  
Quod si, quæ est mas, non potuit, femina gignitur; sed si quæ est  
Coriscus, aut Socrates, non patri, sed matri simile gignitur. Non  
cum ipsa veritate. Nam si quæ generantes facultates opponun-  
tur, trahunt ad suam naturam fætum, non possunt esse meræ pri-  
uationes, vt non Socrates, non mas, non homo. priuatio nil agit.  
ergo sub illis priuationibus sunt formæ operantes. Priuatio sem-  
per supponit aliquam formam. ergo facultates quoque generantes  
in semine feminae reperiuntur. Aliquis alius diceret forsan pro  
defensione Ar. facultates generantes alias actiuas, alias passiuas  
esse, & singulis generantibus actiuis, singulas generantes passiuas  
opponi. Studiosi iudicabunt an hæc bene vel malè dicantur.

Sed non possum me hoc in loco continere, quin aliam quandam  
responsionem ad argumentum Gal. ex similitudine natorum de-  
sumptum, à Costæo excogitatam adducam. Morum vero, atque  
effigiei (inquit) similitudo cur non ab alimento est, quod fætui à  
matre suggeritur? sanguis enim ille, qui ex vniuerso matris cor-  
pore est, spiritibus, calore, vitæ eiusdem vim, cuius in matre par-  
ticeps est, ad alendum fætum asserens, cur non in ipsum tenerri-  
mum, tam longa, continuaque actione maternas omnes imprimat  
notas? Qui hominis, qui plantarum mares obseruauit, habet exem-  
pla huius potestatis, quam alimenta tenent, euidentissima. Qui fe-  
tus enim à strumosa nutrice fuere alti, strumosos, qui ab epilepti-  
ca epilepticos euasisse, & stirpes immutato solo priorem naturam  
reliquisse, videre est non raro. Concedo ego, à Costæe, quòd mares  
sequantur temperamenta corporis, & clarè hoc à Gal. didici in  
lib. quod an. mores, & quod temperamenta multum ab alimentis  
alterentur, atque ideò alimenta possint esse in causa diuersorum in  
animalibus morum, et diuersarum dispositionum præter naturam,  
quæ consequuntur quorundam membrorum intemperiem. vt est  
epilepsia,



epilepsia, & strumosi tumores, qui ambo affectus ab intemperie cerebri frigida proueniunt. Sed miror, quomodo ausus es putare, hanc responsionem inseruire pro soluendo argumento ex similitudine natorum desumpto: Cum iam hanc confutatam à Gal. lib. 2. de sem. cap. 1. videre potueris, & sine dubio videris. quare aut eam debebas omittere, aut euertere ea, quæ contra ipsam Galenus adduxit. Dicis ergo ex alimento magnas mutationes, & alterationes prouenire, & testimonium ex stirpibus præcipuè desumis, quæ immutato solo priorem naturam reliquisse videre est non raro. Itemus quæso in hoc tuo exemplo, & videamus, quàm bene hæc responsio soluat argumentum de similitudine. An ex hoc unquam inuenies ex alimento permutari figuram? Arbor Persica in Ægyptum translata, bonum alimentum nacta est, & esui idoneum fructum protulit, tamen figuram nunquam permutauit. Quid? triticum in lolium mutatione loci si transeat, ut aliqui asserunt ex Theoph. lib. 2. de hist. plant. 5. id contingit, quia semen tritici putrescit in tali solo, ex ipso vero putrefacto nascitur lolium; non nascitur primo triticum, deinde attracto succo illius soli, mutatur triticum in lolium, sed nascitur primo lolium. Neque, arbitror Polycletus statuam effingens humanam, sinum nasum, luto, aut ceræ permittet facere; quare materia, ex qua alitur, vel etiam ex qua generatur fœtus, ei figuram non præstat, sed virtus generans. Præterea conformationes diuersæ membrorum, & variæ figuræ, quibus contingit filios, aut matribus, aut patribus similes euadere, ex figura solidorum membrorum, & compage illorum præcipuè fiunt, non tantum ex carnosiss partibus, quæ circa solidas obductæ sunt, & ex sanguine materno generantur: membra vero solida non gignuntur ex menstruo sanguine, ut in secunda parte huius disputat. cap. 3. & 4. ostendam, sed ex semine. Quare præter rationem est, opinari fœminam propter multam materiam menstruam, quam præstat, reddere sibi fœtum effigie similem, similitudinesque quò ad effigiem alimenti, & materie temperiem sequi, ut sequuntur similitudines, quò ad mores. Sed & illud iam ex supradiçtis manifestum est, formantis facultatis munus esse, similem, vel dissimilem parentibus fœtum reddere. Cum ergo ex sententia Costæ variæ figuræ, & similitudines, & materia,



## Mundini Mundinij

materia, sanguine scilicet menſtruo, procedant, relinquitur, niſi aliud dici poſſe, quàm ipſum, dum quærit virtutem efficientem, & formantem ſemini ſeminarum auferre, imò ſeminas ſemine priuare, cogi poſtea ſanguini ipſi menſtruo illam concedere. Quod quamuis à doctrina Gal. non omninò alienum ſit (vt ſtudioſi poſſunt videre in fine ſecundi cap. ſecundi lib. de ſemine) à doctrina tamen Ar. toto cælo eſt remotum; ſed cur Coſtæus facultatem formatricem concedit ſanguini menſtruo, ipſa vero ſemen ſeminae priuat? an ſemen ſeminae non eſt purior pars ſanguinis? adhucque vltiori coctione elaborata? non ne ſemen ſeminae eſt humor perfectior? ſpiritibus plenior? magis accommodatum inſtrumentum facultatis formatricis, quàm ſanguis menſtruus? Ita quidem eſſe ſupra monſtrauimus contra Coſtæum cap. 7. & contra alios cap. 5.

Feminam ergo ſemen generare, & verum ſemen, & facultate efficiente, & formante præditum, concludamus omnia iam dicta hoc unico argumento complectentes. Si datur effectus ſpecie idem à patre, & à matre procedens, neceſſarium eſt dari in vtriſque cauſam eandem ſpecie, à qua effectus talis proueniat. Sed datur effectus à patre, & à matre idem ſpecie procedens, qui eſt ſimilitudo, quàm nati modo patris, modo matris referunt. ergo datur cauſa ſpecie eadem, communis patri, & matri, à qua ſimilitudo filiorum efficitur. Talis cauſa non poteſt eſſe menſtruum, ſecundum etiam ipſos Peripateticos. ergo eſt ſemen. ergo ſemina ſemen generat. Semen non eſſet cauſa ſpecie eadem in patre, & in matre, ſi ſemen patris haberet in ſe virtutem formatiuam, ſemen matris non haberet, imò ſemen matris hoc modo, neque ſemen dici poſſet. ergo non tantum ſemen patris, ſed etiam ſemen matris facultatem formatiuam in ſe habet.

Verùm me abſtinere etiam non poſſum, quin ad examen reuocem quandam rationem doctiſſimi Fernelij, quam exiſtimauit ex principijs Ar. deduxiſſe, atque confirmari ſemen ſeminae non ſolum materiam in generatione eſſe. Doctiſſimus ergo ille vir ſic  
7. phyſiol. 6. ſcribit. Si nobis permittetur Ar. rationem huc accommodare, ea certè quamuis ab aduerſario petita, rem noſtram omnem conſtituet, & quaſi ſepimento aliquo vallabit. Is enim

naturam



*naturam* ait maris, ac *fœminæ* utrumque sexum in fruticibus miscuisse, quod sola vis mascula (licet terra materiam ei conferat) non satis sit, quæ procreationem in stirpibus efficiat. Quod si in his, multo magis opinor, in amantibus, quæ præstantiori sunt ordine, necessum fuerit maris, ac *fœminæ* vires coniungi, non idcirco dumtaxat, ut *fœmina* materiam suppeditet, sed ut copulatis, atque confusis amborum viribus, semen vnum ex ambobus procreationi aptum proferatur. Hoc igitur integris, absolutisque viribus præditum, tanquam opifex in subiectam materiam incumbit. Nullo certè modo hæc argumentatio Fernelij sub silentio prætereunda erat. Nam tenemur admonere studiosos, gravem illam in se errorem continere, quare non debent ei fidere. Imponit Fernel. *Ar.* quod voluerit in procreatione plantarum, terram materiam conferre, nihilominus naturam miscuisse in seminibus plantarum vim masculæ, & *fœminæ*. quasi *Ar.* velit plantas, quæ *fœminæ* sunt, non materiam, nam hæc à terra tribuitur, sed vim quandam ad generationem conferre. At ne per insomnium quidem hæc *Ar.* in mentem venerunt. Etsi Fernel. magis diligens in legendo *Ar.* fuisset, talia *Ar.* non imposuisset. vult enim *Ar.* plantas, quæ *fœminæ* sunt, non aliud, quàm materiam ad generationem tribuere, quæ in animalibus sanguini menstruo respondeat; terram vero in prima plantarum delineatione, & germinatione nullo modo materiam subministrare. Bifida sunt semina omnia plantarum (vocat *Ar.* bivaluia) ut clarè conspicitur in castaneis, fabis, & alijs huiusmodi; in sui vero medio corpusculum quoddam continent. Iactò in terram semine, corpusculum illud, aperto in duas partes semine, crescere, & germinare incipit: adeò quod, ex illa apertura radiculam in terræ profunditatem, & cauliculum quendam versus aerem mittit. hæc accretio, & germinatio, secundum *Ar.* corpusculi illius, non fit ex attracto, ut Fernelius *Ar.* imponere videtur, ex terra humore (nam quomodo illud à terra potest attrahere. in se humorem, si nondum radices sunt factæ?) sed ex insito quodam seminibus humore, quod lacteum *Ar.* vocat. Radicula ex illo lacteo formata, ex terra postea nutrimentum attrahit pro perfecta generatione, & incremento plantæ. Cum ergo Fernelij



## Mundini Mundinij

ratio fundetur super hoc, quod terra materiam in prima pro-  
creatione plantarum de mente Ar. tribuat, patet, quam vana,  
& futilis remaneat. Sed ne aliquis credat ea, quæ attuli, ex mea,  
non ex Ar. mente, attulisse, in medium adducam loca, quæ om-  
nem de hoc dubitationem cuique auferre poterunt. In fine pri-  
mi cap. lib. de iuu. & sen: hæc leguntur. Ex seminibus enim  
generatio accidit omnibus ex medio. Bivaluis enim existi-  
bus omnibus, quæ coaluerunt, continetur, & medium est utrius-  
que particularum. Hinc enim ramusculus oritur, & radix na-  
scentium. Principium autem medium horum est. Circa medium  
quarti cap. secundi de gen. an. ista alia scripta reperiuntur. Sed  
dubitaueris cum primum cor oriatur sanguine præditum, sanguis  
autem sit alimentum, quod extrinsecus venit, unde nam primum  
alimentum subierit? An id verum non dicitur (nota) alimen-  
tum omne esse extrinsecus? Sed protinus, ut in plantarum semi-  
nibus, inest aliquid tale primum, quod lacteum vocatur, sic in  
animalium materia, excrementum constitutionis alimentum est.  
Audi etiam quid scribat Ar. ultimo cap. primi de gen. an. Ouum  
enim conceptus est, & animal ex parte eius creatur; reliquum ali-  
mentum est animalis: seminis etiam aliqua ex parte consi-  
stit, quod oritur. reliquum alimentum (nota) ger-  
mini, radicique primæ est. quam eandem au-  
toritatem adducam infra in secunda par-  
te cap. 5. ad quod, pro ma-  
gis detegenda fal-  
lacia ratio-

nis

Fernelij hic adductæ, rogo stu-  
diosos, ut confu-  
giant.



Quibusdam observationibus ostenditur in femina semine facultatem formatricem contineri. Quæ sit facultas formatrix. Cap. XVII.

**V**erum pro coronide huius partis in medium afferamus quasdam observationes, quæ nobis manifestent virtute quadam formatrice feminam in generatione fœtus concurrere. Deinde inuestigemus modum, secundum quem potest tali virtute ad generationem concurrere. Nam inuento hoc modo, spero non inualidum argumentum colligemus ad ostendendum feminæ semen insitam facultatem formatricem habere.

Legitur apud Heliodorum, Hidassem Regem Æthiopiæ cum Regina Persina couisse in cubiculo, in quo inter diuersas virorum, & mulierum albarum imagines, Andromedæ, & Persæi imago depictæ erant. Regina ergo inter coeundum tantopere, Andromeda placuit, ut grauida facta, pepererit puellam Carichiam appellatam imagini Andromedæ similem. Ferunt Quintilianum, & Alciatum ab infamia adulterij mulierem vindicasse, quæ puellam nigram pepererat, cum & ipsa, & maritus albi essent, pro defensione illius afferendo, quod in cubiculo imaginem Æthiopis haberet. Refert Gal. lib. de Theriaca ad Pisonem cap. II. quandam vetulam ei narrasse hominem opulentum quidem, sed deformem extitisse, qui cum affectaret pulchrum sibi filium procreare, formosum in ampla tabula puerum depinxit. Inde uxori congregiens præcepit, ut è regione positam imaginem diligenter consideraret. Illa vero attentè respiciens, & totum animum illuc coniiciens (erat enim pulchra valde ea figura) puerum peperit non patri, sed picturæ similem. Jacob in Sacris litteris, cum volebat ut oues agnos albos ederent, ramos arborum à cortice denudabat, ut albi essent, deinde eos ponebat in aquis, quas oues potabant. cum volebat ut fœtus varios ederent, ponebat in aquis ramos virides, ramosque virides, & albos miscebat. Hic autem



## Mundini Mundini

modus à Jacob observatus à D. Augustino in lib. 12. de civ. Dei cap. 25. pro naturali habetur. Narrat Io. Baptista Porta in suo lib. de Magia Naturali, si bene recordor, Gallinam indicam peperisse ova, & ea cubasse in quodam loco, in quo è directo quosdam montes nive refertos conspiciebat, atque ex continua illa inspectione pullos omnes albos ortos fuisse. Quo exemplo docet modum, quo possumus procurare, ut gallinæ, columbi, & ceteræ aves domesticæ diuersi coloris nascantur. Quæ autem narrat Porta, leguntur quoque apud doctissimum Fernelium lib. 7. physiol. cap. 12.

Hanc, vel illam effigiem fœtui imprimere, non ne attinet ad aliquam virtutem efficientem, & efformantem? Manifestum ergo est per historias adductas de necessitate in feminis virtutem huiusmodi reperiri. At si quæras, qualis sit ista virtus, quæ in feminis existens, potest varias conceptas imagines, & effigies fœtui imprimere? Respondent communiter eam esse imaginationem, & probant hoc à simili. Experimur si gravida mulier alicuius cibi desiderio flagret, neque eo potiatur, fœtui illius cibi notam in aliqua parte muri. Sicuti ergo mulieris imaginatio valet post formatum in utero fœtum, & aliquantisper induratum, imaginem aliquam in se comprehensam illi insculpere, ita dicunt vel facilius potest, dum conceptus adhuc formam seminis retinet, tenerimusque proinde est, varias in illo effigies imprimere. Unde etiam si quæras modum, secundum quem imaginatio potest iuxta vehementem comprehensam imaginem, vel coloris speciem, fœtum in prima conformatione, & delineatione effingere. dicunt illum eundem esse, secundum quem post formatum fœtum, alicuius cibi vehementer desiderati figuram illi imprimit. Quidquid dicat Hyeronimus Fracastorius lib. de symp. & antip. cap. 23. ex Avic. 5. lib. de an. & ex Buccaferreo in lib. Ar. de mot. an. & communiter ex alijs doctissimis Philosophis elicitur hoc.

Quod dum gravida vehementer aliquam rem appetit, assiduo in animo speciem illius rei reuoluit, unde illa in spiritibus animalibus fortiter imprimitur. Appetitus vero mouens hos spiritus impressam speciem illam habentes, illos cum reliquis spiritibus & sanguine permiscet; sanguis attractus simul cum spiritibus ad uterum pro nutritione fœtus, parti, cui in alimentum cedit, speciem



ciem, quæ fuit illi impressa, communicat. Dicere ergo ex his principijs philosophorum possumus. Quod dum mulier vehementer animo concipit inter coeundum alicuius viri, vel mulieris effigiem, species illius effigiei in spiritibus fortiter imprimatur, moti vero spiritus ad vasa spermatica, & in se retinentes illam speciem, cum semine commisceantur, ipsamque semini imprimant, & per consequens ipsi embryoni. & eò magis, si inter formandum embryonem, mulier assidue in imaginatione speciem illam reuoluat. Sic enim renouatur impressio in spiritibus, & in embryone.

Consentit hæc speculatio cum Ar. doctrina in problem. tradita (si tamen illorum omnium auctor fuit Ar.) si quidem in 10. partit. problem. problem. 10. hæc leguntur. Cur proles cætorum animantium magis, quam hominis, suis parentibus similem gerit naturam? An quod homo vago, varioque plurimum animo in coitu est? pro ut autem pater, & mater in conceptu affecti fuerunt, ita partus euariant? Cætera vero animantia, aut certè plurima rei tantum ipsi intendunt, totaque se veneri dedunt. In quorum interpretatione Petrus Aponensis per similitudinem secundum naturam, dicit, quod non solum potest intelligi similitudo quantum ad internas animi affectiones, & mores ipsos, verum etiam quantum ad accidentia extrinseca, quantum scilicet ad effigiem, & externarum partium figurationem. Patet ergo, quod si volumus reddere rationem de ijs, quæ olim observata fuerunt, & in dies observantur, necessario debemus fateri, in feminis reperiri virtutem aliquam actiuam, & hanc concurrere ad fetus formando.

Tantum equidem potuit hæc ratio apud multos celeberrimos viros, ut existimauerint similitudinem natorum perpetuo ab imaginatione fieri.

Sed alias observationes in medium afferamus. Obseruamus quasdam mulieres similes sibi filios procreare, cum tamen ipsæ ne minimum quidem desiderium filios illos sibi similes pariendi habuerint. Similiter aliqua procreabit filium non sibi similem, sed alicui ex suis maioribus, quem nunquam agnouit, vel alteri extra cognationem. Vnde legimus apud Ar. 7.  
de



## Mundini Mundinij

de hist. an. 6. & primo de gen. an. 18. in Sicilia mulierem, quæ ad  
ulterium cum Æthiope commiserat, filiam generasse albam, &  
banc deinde non album, sed nigrum filium peperisse. Tertiò bru-  
torum femina non in speculis se inspiciunt, & tamen sæpissimè fe-  
tus sibi similes edunt. In his tribus casibus non possumus confu-  
gere ad imaginationem, & illorum causam in ipsam referre, ut  
manifestum est. Quid igitur? dicemus ne requiri virtutem ali-  
quam efficientem, & actiuam in mulieribus, si volumus reddere  
rationem, cur illæ fœtui speciem cibi desiderati insculpant, & cur  
ob vehementer in imaginutione conceptam alicuius pulchri infan-  
tis imaginem, in embryone illam imprimere valeant; non tamen  
in illis virtutem actiuam requiri, cum nullo præcedente desiderio,  
vel propriæ imaginis prægressa inspectione, filios ad sui similitu-  
dinem, vel etiam ad similitudinem suorum maiorum, de facie igno-  
torum effingunt? Non credo hoc aliquis imaginabitur. Impres-  
sio fit semper à virtute imprimente. Talis virtus est actiua, non  
passiua. Impressiones in casibus iam enarratis à virtute semini  
maris insita non possunt fieri, ut superiori cap. contra Ar. &  
Auer. ostensum est. non ab imaginatione feminae, ut clarum est,  
quid igitur dicendum est? Ego cum doctissimo Laurentio, impres-  
sionum omnium, quæ circa fœtus contingunt duplicem in feminis,  
ut etiam in maribus causam cognoscere sum coactus. alteram or-  
dinariam, quæ perpetuo agit, nisi impediatur; & hæc est facultas  
formatrix semini insita; alteram extraordinariam, quæ non sem-  
per ad generationem concurrit, sed extrinsecus aduenit, & hæc est  
imaginatio, vel cognoscens superior facultas. Prior virtus, cum  
singularum partium nostri corporis ideam in se contineat, si libe-  
re agat, & in toto formationis tempore à nullo impediatur, iuxta  
vim suam perpetuo fœtum effinget. Vnde non est mirum, si mu-  
lieres procreant filios sibi similes, nullo hoc faciendi desiderio præ-  
gresso, nullaque præcedente cogitatione; & similes non sibi, sed  
maioribus suis, cum illos tamen non agnouerint; & brutorum fæ-  
minæ prolem sæpissimè sibi similem edant. Hanc ordinariam vim  
solam agnouit Ar. 4. de gen. an. 1. & in germanis suis lib. & so-  
lum in semine maris, non autem feminae. Verum si primo confor-  
mationis tempore, formatrix hæc facultas ab imaginatione, vel co-

gitatio-



gitatione impediatur, non illius, sed huius fiet impressio, & iuxta hanc fœtus figurabitur. Vnde fit, ut à nigra, & deformi matre, albus, & pulcher fœtus, & ab alba, & pulchra, niger, & deformis procreetur, & contingant omnia ea, quæ de ouibus Iacob, & gallinis narrata sunt. Hanc virtutem extraordinariam agnouit auctor *Problematum* (siue fuerit *Ar.* vel quiuis alius) loco citato. Sed illud ego noto. Quod quamuis agnouerim, tam in fœminis, quam in maribus duplicem impressionum, et similitudinis filiorum causam, alteram ordinariam, alteram extraordinariam. Attamen extraordinaria in fœminis est efficacissima, in maribus imbecillima. Marium enim imaginatio parum confert ad tribuendas similitudines, & impressiones faciendas. Vnde vir ille opulentus, de quo *Gal. lib. de Theriaca ad Tisonem*, curauit, ut vxor intente inspiceret imaginem pulchram. neque in historijs legimus solam imaginationem marium fuisse in causa alicuius impressionis. Sed tamen aliquid & ipsa conferre potest, eo modo, quem supra in fœminis declaravi, nempe spiritus impressos specie alicuius rei mouendo ad vasa seminalia maris: unde semen plenum illis spiritibus in embryone speciem illam aliquatenus posse imprimere negandum mihi non videtur: præcipue vero si diligenter perpendo allatam auctoritatem *Ar. in probl.* & interpretationem *Petri Aponensis*. Non enim solum de imaginatione matris, sed etiam patris mentionem faciunt. Hoc tamen ad arbitrium studiosorum relinquo. Quo circa statuo extraordinariam causam impressionum marium coadiuuare quidem posse extraordinariam fœminarum, dum mas, & femina in imaginatione alicuius rei consentiunt; sed de se nil posse imprimere, fœminarum extraordinariam de se solam impressionum causam esse. Vide modo si fœmina ad generationem concurrat actiue. Vide quomodo ex habito discursu cogimur in fœminæ semine vim insitam efficientem, & formantem concedere. Sed exoptabit quis scire cur extraordinaria impressionum causa in fœminis est efficacissima? quia femina in suis imaginationibus est vehementissima, & totam illis se dat. Secundo quia non solum imprimit in semine mediantibus spiritibus conceptam speciem, verum etiam in sanguine, qui in nutrimentum fœtus distribuitur. Vnde multoties impressio renouatur in sanguine,



## Mundini Mundinij

sanguine, & diu in illo conseruatur. Nil ergo mirum, si femina-  
rum sola imaginatio valeat imprimere.

Tandem desiderabit quis ex me intelligere, quæ nam verè sit  
hæc facultas formatrix semini insidens. Arist. ut supra visum est  
cap. 12. existimauit eam esse facultatem spectantem ad animam Ve-  
getalem. Galenus sexcentis in locis hoc idem fassus est. Sed tan-  
dem in libello de fet. format. cap. ultimo, admirabili illo cap. con-  
fessus est, se de ea ambigere. non posse vero adduci, ut existimet  
ad Vegetalem attinere, cum summam videre liceat in fetuum for-  
matione, illius potentiam, & sapientiam. Vegetalis vero; non  
modo sapiens non sit, verum omni prorsus ratione careat. Vnde  
hoc solum se habere, quod de illa pronuntiet, summam artem, &  
summam sapientiam illi inesse. Auic. virtutem formatricem sta-  
tuit esse intelligentiam decimi ordinis, & illam Calcodeam appel-  
lauit. Alij aliter opinati sunt. Doctissimus Fernelius 7. phy-  
siol. 4. in animalibus perfectis per triplex genus canalium ad te-  
stes peruenientium venam, arteriam, neruum, triplex spirituum,  
& facultatum genus contribui semini existimauit. per venas, spi-  
ritus naturales simul cum facultate naturali à iecore. per arte-  
rias, spiritus vitales cum vitali à corde. per nervos, spiritus ani-  
males cum animali à cerebro. Statuitque præterea mediantibus  
his canalibus, ab omnibus corporis particulis non nihil spiritus, &  
facultatis de repente eidem semini communicari, idque valida  
agitatione corporis, & perturbatione, quæ in ipso coitu fit. Quod  
ex eo probat. quia titillatio vehemens tunc corpus vniuersum exi-  
mia voluptate afficit. quod argumentum ferè coincidit cum argu-  
mento Antiquorum, de quo Ar. primo de gen. an. 17. Ex his con-  
cludit spiritum generantem, si quis in nobis spiritus est, qui gene-  
rans dici mereatur, nil aliud esse, quam coniunctionem, & confu-  
sionem quandam omnium illorum spirituum. Colligere ergo de  
illius mente possumus, generantem quoque facultatem in animalibus  
perfectis, nil aliud esse, quam aggregatum quoddam (ut ita  
dicam) facultatum, quæ ex vniuerso corpore, maxime vero ex  
partibus principibus iecore, corde, cerebro cum spiritibus con-  
flunt, easque omnes semini insidere, tanquam procreationis ma-  
gistras, & opifices. Cæterum putat si quis contentione velit ge-  
neran-



nerantem facultatem, & spiritum à testibus ipsis procedere; huncque in illis ex multorum congressu simplicem esse factum, vix fortasse posse rationibus convinci. Quod idem de facultate generante dicendum est. Favet Alex. Aphrod. siue Trallianus Fernelio primo probl. probl. 28. Scribit ibi Alex. Cur plerique stulti liberos prudentissimos procrearunt, & contra multi valde prudentes, stolidissimos? quod homines stultiores cum concumbunt, totos libidini se se dedunt, itaque animo penitus in corporis concreationem demerso, astrictoque tantum rei venereæ, semen vires optimas, tum rationales, tum naturales adeptum perfluit, creatque proinde hominem prudentiorem. At homines prudentes, & docti semper aliquid vel honesti, vel utilis animo complectuntur, nec in ipso quidem venereo coitu omnino à rerum studio desistunt. itaque animo remissiori profluens semen, expers longè facultatis illius animalis incumbit.

Hinc etiam deduci ratio potest, cur homines stulti, atque indocti filios robustos maximè procreant, prudentes, & docti, imbecillos. Quamvis autem in semine animalium, & naturalem, & vitalem, & animale Fernel. & Alex. reponant, tanquam generationis opifices, & magistras. attamen ita ego illos interpretor, ut vitalis, & animalis non forment, sed hæc actio solius naturalis virtutis propria sit. Adeò quod, naturalis in semine residens formet membra, sed directà à virtute aliqua cognoscente, & prudentia plena, & ab ipsa prima causa mediante celo; (ut ob id Ar. dixerit solem, & hominem generare hominem, Gal. dubitauerit, Auic. Calcodeam intelligentiam introduxerit) nec non ex ipsis facultates naturales traducat. vitalis facultas vitam fœtui inspiret. Animalis sentientem, & motiuam tribuat.

Hinc si debiles in semine sint hæ facultates, iuxta facultatem, quæ debilis in illo est, fœtus debilis oritur, ut dicit Alex. Hoc modo possunt hi authores statuere has facultates semini animalium insidere tanquam generationis magistras, & opifices. Ex his vero, quæ dicta sunt de semine animalium, patet quid dicendum sit de facultate insita seminibus plantarum. Mihi vero sufficiat de facultate formatrice ea determinasse, quæ ad meum propositum con-



## Mundini Mundinij

ducere videbantur, atque aliorum sententias de essentia illius attulisse, atque in probabilem sensum traxisse. Cæterum relinquo, ut de ipsa tanquam re abstrusissima, suo arbitratu unusquisque iudicium faciat, & me confero ad quædam valde ingeniosa expendenda.

Doctissimus, & facundissimus Fernel. in secundo de abditis rer. cau. cap. 3. sic scribit. Ea certè (imaginatio. scilicet) potest tenello fœtui colorem, vel figuram partis immutare, & signa quædam, & quasi inuista imprimere. Cæterum totius formæ substantiam, aut universam corporis conformationem, nulla potest animi quantumvis fixa, atque intenta in aliquam rem cogitatio præstare. Quæ enim tam acris, & tam vehemens est rerum cogitatio, quæ visa tam altè insculpta sunt in animo, atque impressa, ut possint sexus speciem mutare? Optarent quidem mulieres id sibi privilegium ferri, esseque in sua potestate situm, ut quoties marem comprehenderent, eundem etiam gignerent. Sed quæ conceperit, si forte procerum quempiam, & liberali specie virum, si mancum, si claudum, si canino capite, si caudatum, si execto naso, aut sine intestinis, acri, intentoque animo intuebitur, talem ne obsecro oportet illius fœtum evadere? Dum porrò fœtus partes singule finguntur, eas ne mulier sigillatim animo, & cogitatione lustrat, ac veluti pertractat? Aut cum in ovo sensim pullus coagmentatur galilina ne incumbans, in partes singulas eo, quo finguntur ordine cogitationem defigit? Ita ne necessarium fuerit, non modo mulieres, sed & omnes tum avium, tum reliquorum animantium fœminas gnaras esse, & peritas anatomes, & novisse quo queque pars ordine fingatur? Nulla anus tam delira est, ut hoc existimet. Ergo tametsi ea vis animi, quæ fingit, notis quibusdam variare, ac veluti distinguere fœtus colorem, aut formam potest, nequaquã tamen potest eas confirmare: neque id in parentibus est positum, ut qualem volent fœtum edant, sed id diuinitus accipi consentaneum est.

Ingeniosè equidem excogitata hæc sunt, & faciunt contra iam à nobis declarata, & stabilita. Ingenium ergo & nos parum acnamus, postquam ab ullo ea animadversa hucusque fuisse non vidimus, & exploremus, an quemadmodum ingeniosa sunt,



*sunt, ita cum veritate consentiant. à redargutione autem ultimæ rationis incipiamus.*

*In brutis principium omnis localis motionis est imaginatio. ut docuit Ar. 3. de an. à tex. 48. & communiter philosophi. Videant studiosi Piccolomineum in lib. de motu an. At instrumenta motus musculi sunt.*

*Dum igitur equus mouetur ad herbam, imaginatio est causa, ut moueantur omnes musculi, et anteriorum, et posteriorum crurum. Cum opus est mouere collum equi, imaginatio musculos ei motioni deputatos ad motum impellit. Denique ubi membrum aliquod qualibet motione mouere voluerit, illud statim mouet. Dum imaginatio harum partium motiones instituit, ipsam musculos omnes illis motionibus dicatos perlustrare, & pertractare non est necesse. Si hoc esset, oporteret certissime equos anatomes musculorum gnaros esse; Cum tamen non solum equi, sed ne homines quidem, qui optimè dissectiones corporum non calleant, cognoscant, qui musculi quibus motionibus præpositi sint, quamuis ad quas volunt motiones eis utantur. Sicuti ergo imaginatio potest esse causa, ut aliqui determinati musculi moueantur, cum tamen non agnoscat illorum singulorum usus, quid opus est, ut inquit Fernel. dum fœtus partes singulæ finguntur, ut eas mulier sigillatim animo, & cogitatione lustret, ac veluti pertractet? Non ne possunt partes fœtus ad imaginationes arbitrium conformari, & tamen illam ne minimam quidem earum cognitionem habere? Quia modum ignoras doctissime, & facundissime vir, secundum quem præcisè imaginatio possit esse causa conformationis partium corporis, vis negare, quod est per experientiam notum, ipsam aliquando particularis conformationis illarum causam esse? Quia ignoras modum, secundum quem præcisè aliquis effectus ab aliqua causa proveniat, vis negare illum effectum à tali causa provenire? An quia ignoras modum, secundum quem præcisè imaginatio est causa motionis musculorum, negabis illam causam esse eorum motus?*

*Dicis; quæ nam tam acris, & tam vehemens est rerum cogitatio, quæ visa tam altè insculpta sunt in animo, atque impressa, ut possint sexus speciem mutare? Ex hist. Gal. & Heliodori cessat hæc admiratio. In prima enim ex inspectione fixa figuræ mascu-*



## Mundini Mundinij

li, masculum fuisse genitum, in altera ex inspectione intenta figura fœminæ, fœminam fuisse procreatam apparet.

Subiungis. optarent quidem mulieres id sibi privilegium ferri etc. Certè hoc est privilegium paucarum, et posuimus etiam hoc hoc esse extraordinarium, non ordinarium: si mulieris imaginatio alicuius particularis conformationis debet esse causa, oportet, ut mulier ea præ alijs sit vehementis, fixæ, et constantis imaginationis, hoc autem non ex alio, quàm ex tali temperamento illius provenire potest; at raræ huius temperamenti inveniuntur.

Videmus mulieres diversas res tempore gestationis vteri appetere, et pauperes præsertim desideratis ferè semper frustrari, et tamen pauca sunt, quæ rei desideratæ fœtui notam inscul-

pant. Cur ergo non eadem erit ratio et de conformatione, ut aliquarum imaginatio possit esse

causa illius, aliquarum vero non?

Judicent studiosi an hæc,

quæ ex Fer-

nel.

attulimus, à Doctissima Lauren-

tio omittenda fue-

rant.





Soluuntur rationes Peripateticorum, quibus  
contendebant probare feminam semen  
non generare. Cap. XVIII.

**T**empus modo est respondendi argumentis, quæ à Peripat. ut ostenderent feminam semen non generare, excogitata fuerunt. Erat primum argumentum quod si femina semen generaret, in conceptione præcipue illud intra se emitteret. Tamen multe mulieres fassæ sunt Ar. et vicina Auer. iuravit, se sine ulla voluptate, et emissionem concepisse. Dixi supra cap. 8. me aliquot mulieres interrogasse, quæ mihi retulerunt, se in conceptione extraordinaria voluptate perfusas fuisse, et ex hac extraordinaria voluptate semper deinceps coniecisse tempus, in quo semen conceperant. Modo dico, si aliquæ sunt, quæ sine voluptate concipiant, ut aliquas esse haud nego, id contingere, ut loco citato dixi, ob morbosam aliquam genitalium fæminarum affectionem. Scribebat Ar. 2. de gen. an. 4. magna ex parte accidere, ut cum profusione feminae agatur, in qua (inquit) voluptas et maris, et feminae contingere solet. At ex primo de gen. an. 19. quæ magna ex parte fiunt, ea maxime secundum naturam sunt: quibus auctoritatibus usus etiam fui in supramemorato capite. Præter naturam ergo dicendum est, quod fæminæ non profundant, et voluptatem non sentiant, et morbidum, ut ipse dicit, est. Secundum naturam vero erit, quod profundant, et voluptatem percipiant. At argumenta ex ijs, quæ naturaliter eueniunt desumenda sunt. Neque ex eo, quod voluptatem in conceptione non persentiant, licet arguere, quod semen ex vasis deferentibus in cavitatem uteri non emittant. Si quidem necesse est utriusque sexus semen in conceptu misceri ex Gal. 14. de usu par. 7. et ex Hipp. 1. de dieta, et de nat. pueri, et de genit. Emittunt ergo semen in conceptione, sed ob affectionem partium, per quas semen transit, morbosam, voluptatem non persentiunt. ut supra cumulatus cap. 8. declaratum est. et ob id credunt non emisisse.



## Mundini Mundinij

Ad id vero, quod narrat Auer. de sua vicina, aliqui respondent accusando muliebrem sexum, ut mendacem, & testem adducunt Ar. lib. 9. de hist. an. primo, quo in loco scribit mulieres sua natura esse mendaces. Ex quo apud Græcos illud extat adagium muliere iurante ridet Cælum. Ego vero sexum muliebrem ita accusari molestè fero. Et quemadmodum inter viros aliqui sunt veraces, aliqui mendaces. Ita ego audacter affirmo inter mulieres, alias esse veraces, alias esse mendaces. Si quæ vero sunt ex veracibus, quæ dulcedinem nolint confiteri, id venire ex verecundia, et pudore illarum pro certo habeo. Sed astutissimam, turpissimam, mendacissimam meretricem vicinam Auer. fuisse iudico. quæ calido inuento mendacio, Auer. infamiam suam celare voluerit. Verum etiam, atque etiam de ipso Auer. mirandum est, quod ita credulus fuerit, ut præ credulitate penitus immemor euaserit. An immemor es ò Auer. eorum, quæ amantissimus præceptor tuus Ar. in 2. de gen. an. 2. & 3. de hist. an. ultimo scriptis mandauit? Semen esse aereum, spumosum, aerique expositum liquefcere, acquiescere, & infecundum reddi? Sed & in primo de gen. an. 6. scribit Ar. animalia, quæ penem habent oblongum, infœcundiora esse ijs, quæ mediocrem habent, quod ob viæ longitudinem semen refrigeretur. Semen enim frigidum infecundum esse. Si ergo in proprio conceptaculo semen refrigeratur, multo magis in aerem, & aquam effusum, & multo magis, si per aliquod temporis spatium in aqua moram traxerit? Quis enim credat illam tuam vicinam subito post spermatizationem prauorum hominum balneum ingressam fuisse, & sic concepisse? Sed dicam melius. quis non potius credat simul cum eis balneum ingressam fuisse? Hoc parum est. Adeò Auer. ob verba illius bonæ meretricis immemor euasit, ut eorum, quæ ipse scripta reliquit, oblitus fuerit. Videant studiosi quid in com. super caput 2. secundi de gen. an. scribat. Consentit enim penitus cum Ar. imò adducit verba eadem cap. ult. tertij de hist. an. Sed peius illud est, quod in illo eodem cap. in quo hist. de illa infamissima meretrice narrat, docet, si semen aerem attingat, (non si diutius in eo remaneat) corrumpi illius completionem. Pereamni verba propria illius transcribam. Et si tu quæreres (inquit) utrum vulua habeat virtutem immutatiuam, hoc



hoc indiget speculatione . quia non potest dici , quod vulua facit membra embryonis , sed virtus informatiua ipsa facit cum calore fixo in spermate . ergo virtus immutatiua , quæ est in vulua , non est nisi loco conseruationis : & ideò cū attingit sperma aer , corrumpit complexionem eius , & per hanc viam potest intelligi , quod virtus immutatiua est in vulua . Si ergo corrumpitur seminis complexio , cum aerem attingit , quomodo amissa propria complexione ad conceptum aptum erit ? quomodo ò Ar. vicina tua concepit semen , quod in balneo per aliquod temporis spacium remanserat ? Valeat ergo Auer. cum sua illa solemni meretrice . Valeat primum Peripatet. Argumentum .

Erat secundum Argumentum . Quod si femina semen generaret , posset de se absque mare concipere . Syluaticus contr. 79. admodum sicco ( vt aiunt ) pede hoc argumentum pertransit . Valesius autem secundo contr. victus hoc argumento , concedit feminam de se posse concipere , sed conceptum alere , & ad perfectionem deducere non posse . Sed si verum esset , quod concedat Vales. nimium frequentes obseruarentur virginum abortus , sed nullus illarum visitur . Quod si aliquando molæ in mulieribus fiunt , tale quippiam contigisse in ijs , quæ viro caruerunt non est obseruatum . Vnde molæ proportionem non respondent ouis subuentaneis . Nam hæc absque mare generantur , illæ vero generari non possunt , vt & experientia , & Gal. ipse 14. de usu partium cap. 7. docet . Quod si molæ posset absque mare generari , proportionem ouis subuentaneis responderent . Mirandum ergo de Valesio , qui cum legerit Gal. loco citato , tamen affirmauerit mulieres de se molas posse generare . Quo circa respondeo ego inhærendo ijs , quæ supra cap. 14. adduxi . Quod etiam si femina semen , & materialem , & efficientem in se facultatem habeat , non potest tamen absque mixture seminis maris conceptum instituere . Nam facultas efficiens illi insidens , est agens minus principale , imperfectius , neque tantum caloris femina semen habet , quantum ad talem actionem requiritur . Ad aliquam autem actionem obeundam de necessitate opus est agente verè principali , & sufficiente instrumento .

Ad tertium argumentum de proiectione humiditatis , quæ fit à vulua in coitu , & tractione ad se seminis maris , dico . quod , quan-



## Mundini Mundinij

do vulua emittit extra se suum semen, non attrahit etiam virile, & tunc insuper non fit conceptio. Sed quando attrahit viri semen, proprium etiam in se retinet, neque extra effundit. & tunc fit conceptio, si nullum aliud impediat. Quare, quando vides extra vuluam semen effluere. Signum est, vuluam tunc maris semen non concepisse. Non ergo verum est id, quod assumebatur in argumento, vuluam suum semen extra emittere, & alienum attrahere. Quando enim suum emittit, alienum etiam non attrahit. Sed hoc modo suum in conceptione emittit. Nam illud ex vasis deferentibus emittit in cavitatem suam, at illuc etiam maris semen attrahit. differt ergo extra emittere, & in cavitatem emittere. Si enim dum vulua concipit maris semen, proprium extra emitteret, sequeretur quod ipsum ad generationem non faceret, at non extra, sed intra emittit. ergo ad generationem facit.

Ad quartum desumptum ex duplici euacuatione. Respondeo provenire illas duas euacuationes contrarias in fœminis ex diuersarum partium temperamento. Habent enim humoris incocti euacuationem, quia habitus totius frigidus est. unde multum sanguinis incocti redundat. Scribebat Ar. 2. de gen. an. 4. Cum enim  
» natura concoquere nequeat, excrementum fiat necesse est, non so-  
» lum alimenti inutilis, sed etiam in venis, (nota) & per tenuissimas  
» venas exudando exuperet. Habent humoris cocti euacuationem, quia seminalia vasa, & testes habitu totius in femina ob maiorem ad illas partes, quam ad alias spirituum concursum, calidiores sunt. Non inconuenit autem me iudice, si femina secundum varias partes, varias excretionem habeat, & variij sit temperamenti. Ex his etiam duabus euacuationibus, altera humoris crudi, altera humoris cocti, non est arguendum feminam esse calidi, & frigidi simul temperamenti, quò ad totius temperamentum. Nam humor ille coctus, dicitur talis, respectu alterius humoris crudi, non autem respectu humoris, qui à mare secernitur. nam huius respectu dicitur, & ipse frigidus, & penè incoctus. Fœmina ergo secundum temperamentum vniuersi corporis est temperamenti frigidi, cum hoc tamen stat, quod habeat testes habitu corporis calidiores, & sic in illis generetur humor magis perfectus, & coctus, quam in reliquo corpore.

Omniò



Omnino non potest fœmina habere euacuationem humoris crudi, & humoris exactissime cocti. At semen fœminarum non est exactissime coctum. Vnde non præsупponit excellentem calorem, & talem, qualis in mare reperitur. Non sequitur ergo, quod fœmina sit simul temperamenti frigidi, & calidi. Sed & hoc accipiant Peripat. Videtur ne illis absurdum fœminas perfectorum animalium duabus gaudere euacuationibus? conspiciant clarè duas in fœminis ouiparis euacuationes. quarum vna stat loco seminis, altera loco menstrui. Ouum constat ex duabus partibus, vitello, & albumine. Docet Ar. 6 de hist. 3. & 3. de gen. an. 2. & 4. cap. 4. pullum generari ex albumine, nutriri vero ex vitello. ergo vitellum stat loco menstrui; quia fœtus in utero, quoad perfectè formetur, menstruo nutritur, et pullus, quoad perfectè effingatur, vitello. Albumen vero est loco seminis. Ostendā enim in 2. parte huius disput. cap. 4. et 6. partes, quæ sunt fundamēta nostri corporis, ex semine generari: at partes pulli per Ar. locis citatis ex albumine generantur. Sed de hoc in fine sequentis cap. studiosi plura legent. Non accusent ergo Peripat. duas in fœminis perfectorum animalium euacuationes.

Ad quintum in quo dicebatur vnius rei unicā materiam, vnicū agens esse, dico. quod semina maris, et fœminæ mutua substantiæ familiaritate, et amicitia se copulant, et prorsus confunduntur in conceptione, non autem separatim agunt. atque propterea ex utrisque commune motus principium fit, atque communis unicā materia, pro totius animalis procreatione. Quod si aliter esset, ad vnius animalis generationem conspirare non possent. Omnino si semen fœminæ motus principium habet, eiusdem cum maris semine motus principium habet, ex Gal. 14. de usu part. 7. facultates seminis maris, et fœminæ sunt eiusdem speciei; miscetur vero fœminæ semen cum maris semine, ut perficiatur. imperfectius est enim motus principium in semine fœminæ contentum, perficitur vero motus principio seminis maris illi superueniente; ac tum demum ex utrisque principiis vnicū agens fit, in vnumque motum utraque principia conspirant.

Ad sextum puerulorū, et fœminarū non eadem est ratio. Illis siquidē non supersunt reliquæ laudabilis sanguinis, ex quibus semē



## Mundini Mundinij

gigni queat . quia portio sanguinis in nutritionem, altera in incrementum absimitur . His copiosus sanguis superfluit, è quo semen gignitur .

Ad septimum, fœminam naturæ defectum esse absolute, nescio quomodo dici possit . Nam cum secundum Ar. in primo de gen. an. 2. & lib. 2. cap. 1. & 4. cap. 1. mas, & fœmina principia generationis sint . Si generatio futura est, natura de fœmina, æquè, ac de mare, sollicita esse debet . Imò cum maior numerus fœminarum, quam marium appareat, audiui quendam Excellentissimum virum colligere, naturam magis de fœmina, quam de mare sollicitam esse . at si intimius res consideretur, non hoc, ex hac consideratione deduci potest . Sed bene, æquè de fœmina, ac de mare naturam curam habere . quod certè nobis sufficit . Natura enim conservationi intendit specierum, at vnicus mas sufficit pro implendis multis fœminis, quare plures fœminæ, quàm mares requiruntur . Dicendum ergo est . fœminam esse imperfectiorem mare . licet enim semen generet, quia tamen non tam perfectum, vt mas generat, vt dictum est cap. 14. non sequitur vt eiusdem, ac mas sit perfectionis .

Ad signum quod octauo loco afferunt . Dico quod verum est mulieres non posse concipere, antequam menstrua illis erumpere incipiant, & postquam cessarunt . At hoc non ob vnum menstruorum defectum contingit, verum etiam ob defectum seminis . nam antequam menstrua appareant, vt dixi de puerulis, sanguine laudabili non abundant, pro semine gignendo . vt qui in incrementum absimitur . Postquam vero menstrua cessarunt, tanta copia sanguinis non generatur ob debilitatum calorem, vt & pro alitione, & generatione seminis sufficere possit . Vel si generatur semen, vt experimur generari in quibusdam vetulis luxuriosis, ob calorem imbecillum redditum minimè fœcundum est . Idem de ijs, quæ menstruis carent dicendum est . Carent enim hęc sanguine depurato . quare infecundum est earum semen .

Ad confirmationem dico . quod quo tempore incipiunt innotescere menstrua in fœminis, eo etiam tempore incipiunt generare semen . Non sequitur ergo, vt quod in maribus est semen, in fœminis sit menstruum . Valeant ergo Ar. & sectatorũ rationes .

Red-



Redditur ratio secundum iam stabilita principia de multis, quæ quæri solent circa foetus generationem. Cap. XIX.

**S**uperest tandem, ut iuxta ea, quæ primo cap. proposui, rationem reddam de ijs, quæ circa foetus generationem contingunt. Queritur ergo. quare inter foetus alij mares, alij fœminæ nascantur. Hic non recensebo Antiquorum opiniones. Nam studiose eas præcipuè apud Ar. 4. de gen. an. 1. possunt videre, sed solum opinionem Ar. & meam adducam. Responsio ergo ad hoc questum, secundum expositionem Auer. potest ex Ar. loco citato colligi talis. Quando calor seminis maris superat menstruum fœminæ, & ei calorem tribuit æqualem calori, qui naturaliter reperitur in cordibus marium, tunc facultas seminis maris educit ex illo formam maris, & ex ipso membra convenientia huic formæ generat, testes, penem. Quando vero menstruum non superat, & tribuit ille calorem minorem eo, qui in cordibus marium reperitur; tunc semen non agit pro sua forma, sed educit è menstruo formam mari contrariam, quæ est forma fœminæ, & ut ita dicam fœmineitas, & generat ex ipso membra huic formæ convenientia, utrumque præcipuè. Hæc ita declarantur. Quando semen tribuit menstruo calorem æqualem calori naturaliter reperto in cordibus marium, generat ex menstruo cor eiusdem caloris. cor hoc generabit sanguinem calidum, ut maribus conuenit: unde & excrementum huius sanguinis, quod est semen, erit multum calidum. quare necesse est etiam, ut convenientia huic excremento conceptacula generentur. Hæc sunt meatus seminales, & testes, & penis; per testes vero, & penem mas differt secundum Ar. à fœmina. Econuerso quando semen tribuit menstruo calorem minorem reperto in cordibus marium, ex eo generat cor minoris caloris, quàm maribus conueniat. cor hoc generabit sanguinem minus caloris participem, & minus sincerum sanguine marium: unde etiam excrementum huius erit crudum, & impurum, quod est



## Mundini Mundinij

menstruum . quare necesse est , vt conueniens huic excremento conceptaculum generetur ; tale est uterus , per quem femina & mare differt . Vide quomodo membra , per quæ mas differt à femina , possint consequi iuxta doctrinam Ar. caliditatem , vel frigiditatem . Vnum vero , de quo Ar. Empedoclem arguebat , hoc erat , quod non poterat reddere rationem , quomodo partium , per quas mas , & femina differunt inter se , caliditas , & frigiditas causæ essent .

Sed dices . cur Ar. in assignando modo , secundum quem frigiditas , & caliditas sunt causæ , vt genitalia in mare , & femina diuersæ sint figuræ , confugit ad cor ? Quia iuxta ipsum 6. de hist. an. cap. 3. tertio de part. an. cap. 4. secundo de gen. an. cap. 4. lib. de iuu. & sen. cap. 2. cor primum est membrum , quod ex menstruo formatur . Quare etiam in ipso , vt in principio , anima collocatur , & primum omnium masculinitatem , vel femineitatem recipit . Unde virtus in ipso residens membra reliqua sibi conuenientia format . Hoc modo mas , & femina secundum Ar. & expositore Auer. generatur , si rectè Auer. intellexi . Reassumam autem , vt & Auer. facit , breuiter quæ de hoc modo dixi . Causa diuersitatis maris , & feminae est diuersitas membrorum . propriorum maris , & feminae . Causa diuersitatis horum , est diuersitas excrementi . Causa diuersitatis excrementi , est diuersitas caloris sanguinis . causa diuersitatis caloris sanguinis , est diuersitas caloris cordis , quod sanguinem generat . causa diuersitatis caloris cordis , est diuersitas caloris seminis , & virtutis in semine residentis . Semen ergo calidum generabit ex menstruo cor calidum . hoc generabit sanguinem calidum , huius excrementum erit calidum ; huius organa accommodata non sunt , nisi testes , & penis , per has partes fetus est mas . E conuerso res se habet de femina .

Ego vero alio modo marem , & feminam generari puto . dico ergo inhaerendo ijs , quæ supra cap. 14. statui , quod mas semper est calidior femina , & ideò semper etiam magis calidum semen , quam femina generat . Verumtamen si istud semen in se consideretur , non respectu seminis feminae , aliquando est magis calidum , aliquando minus . similiter semen feminae , licet sit semper minus calidum , quam maris semen , ( loquor de seminibus fecundis ) attamen in se considerata , aliquando est magis calidum , aliquando minus . In-



super cum mas sit calidior femina, necessarium est, ut ex calidior  
 semine generetur, femina vero ex minus calido. His sic suppositis.  
 si aggregatum ex semine feminae, & semine maris erit calidius, ge-  
 nerabitur mas, si minus calidum, femina. Aggregatū est calidius,  
 vel frigidius, prout semen à mare, & à femina prodiens est cali-  
 dius, vel frigidius. Causae vero generationis calidioris, vel frigi-  
 dioris seminis tam in mare, quam in femina sunt multae. Ab Ar. 7.  
 de hist. an. cap. 6. & 4. de gen. au. cap. 2. recensentur quatuor. E-  
 tas, temperamentum, ventorum natura, lociq; conditio, aquarum  
 qualitas, addo ego omnis potus, & cibi qualitatem, & temperamē-  
 tum partis, à qua semen provenit. Nouella, et senescens aetas frigi-  
 dius semen, florens calidius: sic mares, & feminae calidi, vel frigidi  
 temperamenti calidius, vel frigidius generant. Aquilones ad sin-  
 cerioris, Austri ad impurioris, & magis excrementosi, et per con-  
 sequens frigidioris seminis generationem faciunt. Idem dicas de  
 regionibus, in quibus vel aer nebulosus, & caliginosus est, & non  
 agitur, vel purus, & assidue ventillatur. sic ex aquis crassis, cru-  
 dis, sanguis inconcoctus, & frigidius gignitur, & semen eiusdem  
 naturae. è contra est de limpidis, & purgatis. Idem dic de cibis, faci-  
 lis digestionis, & calidis, & vinis optimis, & de cibis, & potibus  
 difficilis digestionis, et qui frigidi, & crassi sunt succi. Semen à par-  
 te dextra proveniens, cum calidius sit semine à sinistra provenien-  
 te, aptum est ad gignendos mares: è contra se res habet de semine  
 sinistrae partis: semen autem à dextra parte proveniens, est calidius  
 semine sinistrae partis, quia vas præparans venosum dextrae partis  
 immediate à trunco venae cauae descendens oritur, sinistrum vero  
 vas, non à venae ipsius trunco, sed à ramo emulgente. at rami emul-  
 gentis sanguis, aquosior est, & sero multo dilutus, quia per ipsum  
 serositas sanguinis à rene attrahitur. semen ergo sinistrae partis,  
 cum ex frigidior sanguine fiat, non potest esse ita calidum, ut est  
 semen partis dextrae, quod ex sanguine puriori, & magis elabora-  
 to generatur. Causam veram ob quam vas venosum sinistrae par-  
 tis seminale ab emulgente oriatur, non à trunco venae cauae, primus  
 omnium assignavit Realdus Columbus lib. 6. de re anat. versus fi-  
 nem, & lib. 11. cap. 13.

Verum aggregatum ex seminibus, non solū calidius, vel frigi-  
 dius est, prout semen à mare, & à femina calidius, vel frigidius  
 prodit.



## Mundini Mundinij

**Prodit.** Sed etiam pro ut uterus calidior, vel frigidior est. Si enim aggregatum sit calidius, & recipiatur in utero calidiori, calidius conseruatur, & generatur mas. si recipiatur in utero frigidiori (frigidiori tamen inter sanitatis latitudinem) amittit de sua caliditate, & ad frigiditatem vergit, & ex eo femina nascitur.

Intelligitur autem secundum Hipp. & Gal. aggregatum ex seminibus in sua caliditate conseruari ab utero calidiori bifariam, vel scilicet si ipse de se calidior sit, vel si aggregatum in latere dextro uteri recipiatur, e contra vero, si ipse vel frigidior sit, vel etiam in latere sinistro recipiatur, ni admodum calidus de se uterus sit. Latus enim uteri dextrum calidius est sinistro, tum quia, ut dictum iam est, ex calidiori sanguine nutritur. nam nutritur sanguine immediate proueniente à vena caua; sinistrum vero sanguine proueniente ab emulgente. tum etiam, quia hepar locatum est in parte dextra, quod plurimo calore abundat. dictum est autem ab Hipp. 6. ep. sect. 2. tex. 12. partes, quæ secundum rectitudinem sunt sitæ, necessario plus inter se communicare, ac frui. non ergo mirum, si partes uterorum dextræ, sinistris absolute calidiores sunt.

His omnibus ita suppositis. recenseamus omnes modos, quibus aggregatum ex seminibus potest esse calidius, vel frigidius. nam tot modis mas, & femina generari poterunt. Calidius resultat aggregatum, si tam à mare, quam à femina calidius prodeat, vel ab vno calidius, ab altero frigidius, sed copia superet calidius. Aggregatum frigidius resultat, si ab utroque frigidius prodeat, vel ab vno frigidius, ab alio calidius, superet vero copia semen frigidius. Prodeat ergo ab utroque calidius, generabitur mas, & erit ferox, bellicosus. Prodeat à mare calidius, à femina frigidius, superet copia semen maris, uterus sit solummodo temperatus, generabitur mas, & erit minus ferox, & validus. Prodeat à femina calidius, à mare frigidius, superet copia semen feminae, uterus sit calidior, vel in dextra parte recipiatur, generabitur mas; sed meo iudicio effeminatus. si uterus sit frigidior, vel in parte sinistra recipiatur, generabitur femina. Vide quam differentiam semen maris calidius, & semen feminae itidem calidius in fetibus constituunt, quando alterum eorum prævalent. Prodeat ab utroque  
semen



semen frigidius, generabitur necessario femina abiectissima, & effeminatissima. Prodeat à mare frigidius, à femina calidius, superet semen maris, recipiatur in utero frigidiori, vel parte laeva, femina generabitur, sed generosa, & in hominibus virago. recipiatur vero in utero calidiori, vel parte dextra, generabitur potius mas. & ratio est. quia iam suppositum est semen maris esse semper calidius semine feminae. si ergo cum prodit à femina calidius, à mare vero frigidius, & copia superet semen feminae, iam diximus posse marem generari, conspirante caliditate uteri, cur etiam quando prodibit semen à mare frigidius, & à femina calidius, & superat semen maris, coadiuvante caliditate uteri mas non generabitur? Prodeat à mare calidius, à femina frigidius, superet copia semen feminae, generabitur femina mollis, & effeminata. Et hic etiam potes notare differentiam, quae in fetibus oritur, quando semen maris est frigidius, & praeualet copia, & semen feminae praeualet, & itidem frigidius est.

Verumenim vero à longe causam generationis maris, & feminae hactenus tetigimus. Accedendum est cum Ar. ad proximiores causas, & declarandus est modus, secundum quem caliditas, & frigiditas aggregati ex seminibus possunt esse causa generationis maris, & feminae. Modus ergo ex mea sententia est iste. Quando aggregatum ex seminibus est calidius, aptum est ad suscipiendam formam maris. (dictum est enim marem femina esse calidiorem). quare formatrix facultas illi aggregato insidens vim maris ipsi tribuit, scilicet masculinitatem. Quia vero non inuenitur uis aliqua absque proprio organo, de necessitate formatrix facultas simul ipsi tribuit debita organa, & ideo ex eo aggregato pennis, scrotum, & vasa seminalia, testesque aliter, ac solet in generatione feminarum, format, per has vero praecipue partes mas est mas, & à femina differt. Hic est modus generationis maris. Eundem esse dicas in generatione feminae. Porro non recurro ad id, quod Gal. docuit lib. 2. de sem. 5. & 14. de usu part. 6. genitalia feminarum solo situ à genitalibus marium distinguere. Hoc enim video erudite confutatum ab Andrea Laurentio in lib. 2. op. anat. q. 7. Formatrix ergo facultas generat marem, & feminam. ad generationem maris habet materiam calidam



## Mundini Mundinij

Et bene concoctam, & calorem validum pro instrumento, ad generationem fœminæ, e contra.

Vis autem videre formatricem facultatem proximam esse causam generationis maris, & fœminæ, quamvis de hac, in generationis maris, & fœminæ causa assignanda, Gal. nil meminerit? Considera, quod, sicuti supra narratum est, mulieres ex aspectu figuræ masculi, masculos, ex aspectu figuræ fœminæ, fœminas procreant. In his vero casibus imaginatio est efformans. at nulla prægressa inspectione alicuius imaginis, nullo prægresso desiderio magis marem, quam fœminam generandi, efformans, erit facultas seminibus insita, ut supra collegi cap. 17. Quare præter caliditatem, & frigiditatem aggregati ex seminibus, ad generationem maris, & fœminæ facultas formatrix concurrit, & ad ipsam, tanquam ad causam proximam confugiendum est. Galenus autem eius non meminit, ut potè rei apud se notissimæ.

Ex his autem potes reddere rationem, cur mulier utero gerens marem, sit bene colorata. contra si utero gerat fœminam, ut testatum reliquit Hipp. 5. aph. 42. & cur si fœtus in utero citius, frequentius, & validius moveatur, signum sit ipsum marem esse, e contra vero, fœminam. Hæc enim in caliditatem fœtus utero gesti referenda sunt. masculus enim fœtus sua caliditate calorem gravidæ confortat, unde meliores coctiones efficit, & excrementa pauca aggregat. color autem efflorescit similis humoribus, dicebat Hipp. in principio lib. de hum. Mas similiter, quia calidior est, citius fœmina conformatur; unde citius in utero mouetur 7. de hist. an. 3. caliditas etiam ad motum res aptas facit, sicuti frigiditas pigras reddit. unde mas frequentius, & validius in utero mouetur.

Potes similiter rationem reddere, cur aliquis cum una muliere omnes mares, cum altera omnes fœminas procreet. omnes enim mares facit propter seminis fœminæ, & uteri caliditatem. propter vero seminis, & uteri frigiditatem, omnes fœminas; & ob hanc eandem causam, & mares, & fœminæ in nouella, & ingrauescente ætate fœminas, in alijs potius mares generant.

Potes ulterius modum docere, secundum quem vel mares, vel fœminas generare aliquis poterit. Si enim vir cibus boni succi, facilis



cilis digestionis, conditis aromatibus, vinis optimis utatur, versetur in aere puro, mediocriter se exerceat, liget sibi testem sinistrum; ita tamen, ut dolorem ligatura non afferat, rarius coeat; nam immodica Venus semen frigidius reddit; hæc eadem obseruet mulier, & præterea superlatus dextrum decumbat, & à concubitu illico super illud quiescat, & imaginem alicuius infantis masculi attentè inspiciat, mares procreabuntur. E conuerso femina.

Confert vero summopere pro generandis masculis, vel fæminis, si sæpè, sed præcipuè inter coeundum, à viris mulieres rogentur, ut sibi vel marem, vel fæminam procreent. Verùm mirum in modum illud ad generationem marium facit, si viri proprias uxores ament, & omni studio quærant ab ipsis mutuo amari, & hoc ob tres rationes. Prima est. quia cum animaduertit uxor se vnice à marito diligi, omninò voluntati mariti adhæret, & affectat omnibus modis ipsi rem gratam facere. Vnde si maritus desiderat, ut marem generet, assiduo in imaginatione reuoluit hoc mariti desiderium, & marem procreat. declarauimus modum supra cap. 17. Secunda ratio est. quia in amore leuiter, & placidè ebullit sanguis, sicuti in ira efferuescit. Vnde factum est, ut amantes ita facile irascantur. nam facilis est transitus ab incalescentia sanguinis, ad efferuescentiam. Cum ergo maritus, & uxor se mutuo amant, sanguis illorum incalescit. ex sanguine calidiori, calidius semen generatur, & sic mares nascuntur. Tertia causa est. quia videmus miram sympathiam inter imaginatiuam facultatem, & inter semificam, & partes ipsas genitales. Nam cum vasa spermatica plena semine sunt, excitantur in nobis in somnijs libidinosæ phantasmata, & videtur nobis, quòd cum aliqua coeamus, & fit pollutio. Sic cum imaginamur aliquod obiectum pulchrum, statim penis erigitur. Sic cum viri varijs curis detinentur, parum seminis gignunt; proptereaq; tunc libido eos non stimulat. cum vero se totos Veneri dant, & assiduo in animo libidinosæ versant, plurimum seminis accumulunt, vnde nil aliud, quam coire, facerent. Cum ergo mas, & femina se mutuo amant, quid mirum est moueri quam plurimos spiritus ad partes genitales, & commisceri cum semine, vnde calidius euadat? ex calidiori autem semine mares procreari dictum est.



## Mundini Mundinij

Cardanus lib. 12. de subtil. rerum in principio scribit. Etenim  
 à caliditate mares procedunt, à frigore fœmellæ. Quoniam quod  
 perfectum est, potentius multitudine, aut loci caliditate superat,  
 quod est imperfectum. Inde nata ratio masculos filios procrean-  
 di triplex, Prima ut homo exerceatur, solidioreque utatur  
 cibo, & rarius concumbat. Nam sic semen calidius euadit. se-  
 cunda ut mater super latus decumbat dextrum, & à concubitu  
 illico super illud quiescat. Dixit enim Hipp. masculi in dextris,  
 fœminæ in sinistris generantur. Facit & ad hoc herba mercuria-  
 lis dicta mascula, quæ duos quasi coleos habet pro seminibus. nam  
 fœmina racemos, auctore Dioscoride, à quo sumpsit Plinius. Has  
 ambas in nostro horto cum Thoma Iseo Medico, dum hæc scri-  
 berem, considerabam. Ex secunda observatione, multi nostro  
 consilio potiti sunt voto. Tertiam hanc nondum experiri contin-  
 git. Oportet autem, ut aiunt, nuper purgatis ex irino supponere,  
 & in cibis propinare. & ubi conceperit, masculæ folia edenda  
 dare.

Quæritur secundo cur fœtus modo patri, modo matri similis  
 oriatur. Respondeo id accidere ex vario dominio facultatis for-  
 matriæ in semine patris, vel matris residentis. Si enim præua-  
 let formatricis facultatis semini patris insidentis vis, fœtus oritur  
 similis patri. Si præualet vis formatricis facultatis seminis ma-  
 tris, oritur fœtus similis matri. Quomodo autem intelligatur vim  
 formatricis patris, vel matris in formatione fœtus præualere, di-  
 scent studiosi ex statim subiungendo quæsito.

Ex primo, & secundo quæsito oritur tertium. Cur scilicet fœ-  
 tus oritur aliquando mas, & assimilatur matri, & oritur aliquan-  
 do fœmina, & est similis patri. Respondeo ex iactis principiis.  
 Cum aggregatum ex semine patris, & matris est calidius, & in  
 ipso plus est seminis matris, tunc oritur mas, & est similis matri.  
 Cum enim in maiori quanto sit maior virtus, quis dubitabit in eo  
 aggregato, in quo plus est seminis matris, plus quoque esse (ut ita  
 dicam) facultatis à semine matris prouenientis, atque ideo fœtum  
 similem matri effingi? sic, si aggregatum ex seminibus sit frigi-  
 dius, aut de se, aut concurrente frigiditate uteri (semper enim  
 hoc subintelligendum est, ut rectè principia nostra consideranti  
 patebit).



patebit) femina nascetur. Sed si plus erit ibi seminis patris, femina assimilabitur patri. Non negarim etiam. si aggregatum constet ex equali portione seminis patris, & matris, quia efficacior est vis à patre procedens, posse nasci feminam similem patri.

Gal. 2. de sem. 2. vult, quod, quantum ad vim seminis, cum semen maris efficacioris sit virtutis semine feminae, proles semper patri similis nasci deberet. Sed tamen femineam genituram vim, & facultatem efficientem menstrui sibi adiungere, quæ novem mensium spatio assidens, quamvis imbecillima sit, tanto inualescit, & superat, quanto in primo congressu à maris semine superabatur, & sic fœtus matri similis oritur. Sed hæc responsio non omnino mihi satisfacit. Nam statui supra cap. 16. diuersasfigurationes membrorum, quibus contingit filios, aut matribus, aut patribus similes esse, ex compage, & figura solidorum membrorum præcipuè, non solum ex sanguineis partibus, quæ circa hæc obdu-ctæ sunt, fieri. at partes solidæ ex semine, sanguineæ ex menstruo generantur. oportet igitur, si filius debet matri similis fieri, ut virtus in semine matris existens, statim in primo congressu cum semine maris, & in prima adumbratione, & lineatione solidarum, & seminalium partium superet, non autem auxilium à menstrui facultate expectet; Aduertendum autem est, quod quamvis plus possit in assimilando aliquando virtus à semine feminae proueniens, non tamen quicquam potest, nisi perfectionem à virtute seminis maris acceperit, iuxta ea, quæ tradidi supra cap. 14.

Ex responsione huius tertij quæsti patet, quàm rationabile sit dictum quoddam vulgare. Cum enim fœtus multum similis matri oritur, dicunt vulgares, quod mater multum de suo ad illius generationem contulit. Idem dicunt de patre, quando fœtus oritur similis patri.

Quarto quæritur, cur fœtus aliquando non patri, sed auo, vel abauo, non matri, sed auia, & abauia similis est? Respondeo cum Ar. 4. de gen. an. 3. iuxta expositionem Auer. quod quando virtus formatrix à patre procedens dominatur, & superat in efformando, verum debiliter, tunc fœtus non similis patri, sed auo, oritur. Si adhuc magis debiliter, oritur similis abauo. Si non dominatur, similis deinde matri. Quando vero fortiter dominatur,



## Mundini Mundinij

tunc foetus oritur similis patri. Idem dicas de semine matris. Quando enim fortiter dominatur, & superat, fetus similis matri, quando debiliter, similis auiæ, quando vix dominatur, similis ab-  
auiæ, quando superatur, nullo autem pacto superat, similis patri oritur. Quod autem dixi de toto foetu, idem dicas de partibus. sæpe enim aliæ partes patri similes, aliæ matri, alię maiorum alicui similes constituuntur.

Sed hic non possum silentio præterire pulchram quandam dubitationem. Si enim verum est, ut cum semen feminae copia excedit semen maris, fetus oriatur similis feminae, ut determinatum est, videtur de necessitate sequi, ut semper in ouiparis pennatis foetus sint similes matribus; quod à sensu remotissimum est. Observamus, quod si semel, vel bis gallus gallinae supervenerit, gallina 4. & sex, forsamque plura ova fecunda edet. adeo quod, si semen à Gallo emissum diuidamus in sex partes, parua valde portio illius singulo ex sex ovīs inerit. portio vero oui, ex qua communiter creditur generari pullus, quæ est albumen, est adeo magna, ut possimus credere albumen portionem illam seminis galli vigesies, & plus etiam superare. hoc autem non est credendum euenire de semine mulieris, respectu virilis.

Hæc est pulchra dubitatio. Pro qua tollenda studiosi audient noua, & non indigna eorum auribus, quæ & ego audiui ex ore celeberrimi mei præceptoris Hieronymi Fabricij ab Aquapendente. Non existimat iste celeberrimus vir, ut hucusque omnes putarunt, docti ab Ar. 6. de hist. an. 3. tertio de gen. an. 2. & 4. de gen. an. 4. pullum generari ex albumine oui, & nutriri ex luteo. Sed vult persuasus rationibus, quas videbunt studiosi cum libellum de ouo promulgabit, & quas consulto prætereo, ne videar primus aliorum inuenta omnino publicare, spermaticarum partium pulli primam delineationem, ex portionibus illis albis rotundis, quæ initio vitelli adherent, & geminae in omnibus ovīs ceruntur, & ab Ar. 6. de hist. 2. grandines vocantur, fieri. quæ fuit, ut ibi scribit Ar. aliquorum etiam Antiquorum opinio; partes vero sanguineas ex vitello generari. nutriri partes spermaticas ex albumine, sanguineas ex luteo.

Iuxta ergo hanc sententiam facile dubitatio proposita diluitur.

Siqui-



Si quidem grandines illę non sunt adeo magnę, ut proportio non seruetur inter illas, & semen galli. & precipue si loquamur de ouis, quę statim post coitum cum gallo, gallina parit. Verisimile enim est, illis maiorem quantitatem seminis galli, quam posterioribus inesse. Vnde commodę saluare possumus, pullos aliquos non similes matri generari posse. Porro Cardanus, lib. supra citato, non docuit quidem aliquid, de oui grandinibus; attamen vult crura, & alas ex luteo fieri. at hę partes maximam carnosarum, & sanguinearum partium auium partem conficiunt. Inquit ergo Cardanus. Primum igitur, calore fouente gallinę, semen illud in fistulas paulatim oui candidum vertit, tum vero & lutei aliquid, nam alę, & crura ex luteo fiunt. Indicio est, quod pulli, qui ex ouo, cuius lutea duo sunt absque sepiente membrana, capite vno, sed quatuor alis, & totidem pedibus nascuntur, arbitranturque prodigium, quale olim Mediolani contigit. Itaque quidquid bullis refertum est agitur, & siccatur, transitque in membranas, nervos, & duriores partes. Ex quibus comprobatur quadam ex parte sententia celeberrimi Aquapendentis, & ob id ea referre volui. Elicitur enim ex his sanguineas partes pulli ex luteo gigni; ergo non est verum luteum inservire solum pro nutrimento.

Superest alia remouenda difficultas, quę ex nostris dictis emergit. Diximus semen calidius fęminę facere posse ad generationem maris. dicet aliquis. semen calidius fęminę, non ne est a fęmina? non ne habet calorem illum a fęmina? ergo semen fęminę calidius facere quidem poterit ad generationem calidioris fęminę, sed non ad generationem maris. nil enim ultra vires proprias agit.

Respondeo ad hanc difficultatem. verum esse seminis fęminę calorem a fęmina provenire, sed non omnem caliditatem in semine fęminę calidiori contentam a fęminę temperatura provenire.

Iam enim manifestavi pręter temperaturam fęminarum, ad maiorem, vel minorem caliditatem in semine earum gignendam concurrere etiam ingestorum, & ambientis maiorem, vel minorem caliditatem. Vnde ex usu e.g. cibi, & potus calidorum semen gene-



## Mundini Mundinij

Generari potest præditum maiori caliditate, quàm possit illi imprimi à fœminæ temperatura; potest scilicet habere illam caliditatem non à fœminæ temperatura, sed quia illud productum sit ex sanguine ex calidiori cibo, & potu genito.

Quantum imaginatio supra temperaturam fœminæ possit calidius reddere semen, iam patefactum est; & quantum animi affectus, præsertim amor, qui inter genitores intercedit. & hic fere continuè inter illos summus intercedit.

Dicimus deinde calidius semen fœminæ de se facere ad generationem fœminæ calidioris; sed accedente præterea semine maris, quod semper calidius est semine fœminæ, (licet de se sit minus calidum) atque conspirante uteri caliditate, dicimus fieri aggregatum ex seminibus calidius semine fœminæ calidiori: proinde esse in illo aptum efficiens, & aptam materiam pro generatione maris. & si sit in eo aggregato maior quantitas fœminæ seminis calidioris, quàm maris seminis, & maris semen de se, scilicet respectu maris seminis, sit minus calidum, dicimus, ut paulo supra declarauimus, non fieri quidem à tali, & ex tali aggregato calidiorem fœminam, sed marem, verum tamen naturam fœminæ redolentem, marem effœminatum, frigidum inter mares.

Adest porro in eo aggregato calor seminis maris, qui quidem calor, licet semen maris sit de se minus calidum, non est per se accommodatus pro generatione fœminæ, quamvis calidioris, sed maris, at effœminati, & mollis. Quando ergo semen fœminæ est minus calidum, & semen maris itidem, tunc calor seminis maris plus iusto retunditur à semine fœminæ, & ideò aggregatum resultat frigidius, & aptum pro generatione non maris, vel effœminati, sed fœminæ. Quando vero semen fœminæ de se calidius est, calor seminis maris parum retunditur à semine fœminæ, & ideò aggregatum resultat calidius, & conspirante uteri caliditate aptum pro generatione maris, sed effœminati, ob imbecillitatem caloris agentis, & ob multam copiam materiæ à fœmina subministratæ in aggregato existentem.

Ar. vult, quod quando menstruum est plus iusto frigidius, non possit à calore seminis maris perfectè coqui, & ideò fœmina generetur. Quando vero est minus frigidum, à semine perfectè concoquatur,



coquatur, superetur, & generetur mas. Nos vero dicimus, quòd quando semen feminae est frigidius, & miscetur cum semine maris, obtundit calorem seminis maris, & praesertim si copia excedat semen maris, semenque maris sit de se minus calidum; unde calor, qui in miscella seminum existit, minus validus resultat, & minus potens perfectè crassamentum, & corpulentiam illius miscellae conquerere, & superare: unde etiam illa corpulentia minus cocta, & minus calida remanet, & sic femina, non mas generatur. è contra dicimus de generatione maris.

Sunt haec diuersa ab ijs, quae Ar. de modo generationis maris, & femina tradidit, sed non ijs contraria, imò similia. Quod enim ipse tribuit vni calori seminis marium, vt efficienti, nos tribuimus calori resultanti ex miscella seminis vtriusque sexus; & quod ille tribuit menstruo de se magis, vel minus crudo, & frigido, vt materiae, nos tribuimus corpulentiae miscellae seminis vtriusque sexus, magis, & minus calidae, magis, & minus coctae.

Instabit quis. Dixisti nunc, quòd quando semen feminae est minus calidum, id est de se frigidius, & semen maris itidem, & superat semen feminae, tunc calor seminis maris plus iusto retunditur à semine feminae, & ideò aggregatum resultat frigidius, & aptum pro generatione feminae; sed quando semen feminae de se calidius est, calor seminis maris parum retunditur, & fit aggregatum calidius, & aptum pro generatione maris. Fac modo vt semen feminae sit frigidius, maris non itidem, sed calidius, & superet copia semen feminae, vt in altero quoque casu superabat, tunc ne retundetur plus iusto calor seminis maris, & fiet femina? an ob resistetiam maiorem, quam calidius maris faciet frigidiori feminae, fiet aggregatum calidius, et per consequens gignetur mas, contra id, quod in enumeratione modorum generationis maris, & feminae statuisti? Respondeo fiet aggregatum frigidius, & per consequens femina. licet enim resistat, & contra agat calidius maris, non tamen adeò resistit, & contra agit, vt aequè parum illius calor remittatur, ac remittitur, quando simul confunduntur semen feminae de se calidius, & maris de se minus calidum. parua adest dissimilitudo, parua contrarietas inter calidius feminae, & minus calidum maris; ideò parua inter illa fit actio, & reactio. è contra se res habet



## Mundini Mundinij

*habet de semine fœminæ frigidiori, & maris calidiori.*

*Admonemus autem studiosos . quòd, si animum bene adhibuerint, quatuor modos posuimus , secundum quos aggregatū ex seminibus utriusque sexus calidius euadere potest , & per consequens secundum quos mares generari possunt; & quatuor, secundum quos aggregatum frigidius euadere potest, et per consequens secundum quos fœminæ generari possunt. Hos autem modos posuimus, ut quantum possibile esset imitaremur auctorem lib. primi de dieta, ut possunt colligere studiosi ex ijs, quæ ex eo lib. attulimus supra cap. 15. Vidimus enim doctissimum Laurentium non solum imitatum , verum penitus illum auctorem sequutum fuisse . nos autem Laurentij iudicio plurimum tribuimus . Sed nouam disputationem non instituimus contra aliquem , cui videretur durum admittere illos modos, et ex quatuor, secundum quos mares posse generari dictum est, admittat tantum duos , scilicet quando ab utroque calidius semen prodit, & quando à mare calidius, à fœmina frigidius quidem , sed copia superat semen maris ; & quatuor modis fœminas postea generari velit , cum aliqua tamen inter illas diuersitate , ut & nos notauimus, quando scilicet ab utroque frigidius semen prodit , vel quando à fœmina frigidius, à mare calidius, sed copia superet semen fœminæ, vel quando à mare frigidius, à fœmina calidius, & superet semen maris, vel etiam si superet semen fœminæ. nam semen maris simpliciter loquendo semper calidius est semine fœminæ. tam igitur simpliciter loquendo erit calidum semen minus de se calidum maris, quam fœminæ magis de se calidum, imò magis calidum. Si ergo, cum semen maris est de se minus calidum , & copia superat, generatur fœmina, rationabile est generari quoque fœminam, cum semē fœminæ est de se calidius, maris de se frigidius, & superat semen fœminæ. Imò dicimus hunc ita opinātem apte posse reddere rationem cur plures fœminæ , quàm mares oriantur . pauciores enim mares nascuntur, ob difficultatem modi generationis eorum; plures fœminæ, ob multiplicem earum ortus modum . Sufficiat nobis, iuxta etiā modos generationis maris, & fœminæ ita moderatos, posse rectè respondere problematibus omnibus propositis de generatione maris, & fœminæ , & præsertim illi adeò pro difficile ab Ar. habito , cur mas oriatur similis matri, et fœmina similis patri. Fiet enim mas si-*  
*milis*



milis matri, dum in aggregato ex utriusque seminibus calidis plus erit seminis matris. similis patri, cum in eo plus erit seminis patris. fiet femina similis patri, cum in aggregato ex seminibus frigidiori, vel dicas minus calido, erit plus seminis patris: similis matri, cum in eo maior quantitas seminis matris erit. Sufficiat nobis etiam nihil dimoueri fundamenta supra à nobis iacta cap. 14. quibus contra Peripat. Gal. & Hippoc. veram sententiam defendimus, ne cogantur fateri fœminam de se concipere posse, cum in eius semine vis formatrix, una cum suo instrumento, nempe spiritu, reperiatur, & habeat materiam, & locum aptum pro conceptione.

Moderando hoc pacto modos, secundum quos mares, & secundum quos feminae gignuntur, oritur similiter difficultas de calidiori semine fœminæ, quod non possit facere ad generationem maris; illa tamen tollitur modo etiam iam declarato; posse gigni à fœmina semen calidius, quàm suæ temperaturæ conueniat; sed semen fœminæ non facere de se ad generationem maris, at simul confusum, & mixtum cum semine maris, indeque acquisita maiori caliditate, validitateque.

Verum si hæc mea disputatio ad manus doctissimi Andreæ Laurentij peruenerit, rogo illum, ut nodum difficillimum in Hipp. & in ipsius dictis orientem mihi dissoluat. Nodus est, & fuit à me animaduersus supra cap. 15. Passim doctissimus hic vir in secundo op. anat. lib. habet. Semen maris semper calidius esse semine fœminæ; unde in fine q. 16. statuit contra Valesium, neque calidissimæ fœminæ semen, ob eius frigiditatem, & debilitatem, posse de se fœtum instituere. similiter in q. 30. docet Hippocratem agnoscere in utroque sexu duplex semen, masculineum, & femineum, atq; Hipp. interpretatur, ut per masculineum calidius, et validius semen Hipp. intelligat; per femineum, frigidius. Insuper cum Hipp. admittit, si semen à viro femineum, à muliere masculineum prodeat, et superet masculineum, generari marē; si vero superat femineum, generari fœminam. Dicam ego mas generatur ex calidiori simpliciter semine; cum enim mas simpliciter femina calidior sit, necesse est ipsum ex calidiori semine generari. mas generatur ex masculineo semine femine, fœmina ex femineo maris. ergo semen fœminæ masculineum est calidius simpliciter semine



## Mundini Mundinij

maris femineo. ergo maris semen nō est calidius semper semine femina. ergo femina aliqua ex Valesio de se generabit. Studiosi meā de hac difficultate opinionem habent supra cap. 15. & postea hic completē explicatam. Summa hæc est. Hippocratem per semen masculinum intelligere semen calidius, validiusque, per femineum frigidius minusque validum. Marem semper esse calidiorem femina, proinde etiam ex simpliciter calidiori semine esse genitum, & calidius semen semper gignere: unde quamvis semen maris, facta comparatione inter seipsum, sit aliquando magis calidum, & minus, & femina semen itidem. attamen semen maris minus calidum, femina magis calido, calidum esse (loquor de seminibus fecundis, & ad generationem aptis) quocirca calido existente utero, si ex semine masculo femina mas generatur, concurrente eadem uteri caliditate ex semine maris femineo marem generari. Imò tantum abesse, ut semen femina masculinum ex se faciat ad generationem maris, quod quinimò neq; conceptus institutionem auspicari possit, ni sufficientem calorem ad tale opus, et potestatem validiorem, & perfectiorem à semine maris accipiat. Doctrinam ergo lib. primi de dieta mancā esse, neque Hipp. dignam; atque, aut quatuor modos generationis maris, & totidem generationis femina esse ponendos, aut duos maris, & quatuor femina. Vt cunque autem de his modis statuatur, quamvis valde probabile sit dari quatuor, & maris generationis, & femina, nos posse rationem reddere de omnibus contingentibus circa fetus generationem.

Postquam ergo manifestum fecimus per positionem Medicorum, non solum nos posse respondere argumentis Ar. & sectatorum, atq; responsiones, quas rationibus Medicorum afferunt, refellere, verum etiam fundamenta illorum destruximus, & rationem reddidimus de ijs, quæ contingunt circa fetus generationem, contrā, ac Ar. existimavit, relinquitur ipsam veritati consentaneam esse, & probabiliorem Ar. positione. Quare licet concludere feminam semen generare, quod est verum semen, & non solum facultate passiva, sed etiam efficiente præditum esse. Et hæc de prima Parte meæ disputationis ad laudem Sanctissimæ Trinitatis, & Deiparæ Virginis dicta sint.



# MVNDINI MVNDINII VINCENTINI

## DISPUTATIONIS,

In qua ea, quæ de semine sunt controuersa inter Peripat.  
& Veteres Medicos, & doctissimos quosdam  
Neotericos discutiuntur,

## PARS SECVNDA.

Arist. sententia de semine maris.  
Cap. Primum.



**GGREDIOR** secundam disputationis partem, in qua proposui quærere, vtrum semen maris in se principium tantummodo efficiens habeat, an & materiale. Afferam in hac secunda parte sententiam Ar. & sectatorum cum suis fundamentis. Secundo sententiam Hipp. & Gal. & eorum rationes; singulisque semper subnectam responsiones, quæ à Peripat. fuere excogitatæ. Tertiò loco fundamenta Ar. & sectatorum euertam. Ar. ergo semen maris rationem efficientis solum, nullo modo materiæ, habere existimauit. Constat iuxta ipsum secundo de gen. an. 2. & 3. ex duabus partibus semen, altera aerea, & spiritiuosa, altera aquosa, & corpulenta. In spiritiuosa vis efformans residet. Eiaculatur à mare in ceruicem vteri. inde in illius sinum ab vteri calore attrahitur; unde ceruix, quæ modo madebat, resiccata mox sentitur secundo de gen. an. 4. semen deinde sanguinem menstruum purum in eundem sinum vteri spiritiuosa sui parte allicit, principium motionis ipsi infert, vim formantem tribuit, ipsum alterat,



# Mundini Mundinij

5, immutat, & cogit. Audi ipsum Ar. secundo de gen. an. 4. Cum  
2, autem semen de mare accessit in fœminæ uterum, partem purissi-  
2, mam excrementi constituit. & inferius. Cum autem excre-  
2, mentum fœminæ in utero constiterit à maris genitura, quæ simile  
2, facit, ut lactis coagulum: coagulum enim lac est continens calo-  
2, rem vitalem, qui partes similes ducit, eodem, ut unit, atque con-  
2, stituit: & genitura ita se habet ad menstruorum naturam. eadem  
2, enim natura lactis, & menstruorum est, itaque coactis iam parti-  
2, bus &c. Primo de gen. an. 20. Sed evenit porro, quod ex recta  
2, ratione est, ut cum mas formam, & principium motus præbeat,  
2, fœmina corpus, atque materiam, quemadmodum in lactis concre-  
2, tione corpus lac ipsum est, succus, aut coagulum principium spis-  
2, sandi, cogendique obtinet. Sic quod à mare in femina distingui-  
2, tur, intelligi debeat. Per hæc habemus à semine menstruum pu-  
rum cogi. alterari vero, & immutari ex ipsius altera oratione  
2, in secundo de gen. an. 4. Inquit Ar. Dicendum partes moveri, non  
2, mutantes locum, sed manentes, & alterascentes mollitie, duritie,  
2, colore, & reliquis partium similarium differentiis, factæ iam  
2, actæ, quæ erant potentia. An semen maris principium motio-  
nis menstruo, & vim formantem tribuat ex mox subiun-  
gendis auctoritatibus studiosi dijudicabunt. Primo de gen. an.  
2, 20. scribit Ar. Apertum unà cum ijs est, de quo differendum de-  
2, inceps sit. Quemadmodum scilicet ad generationem mas conse-  
2, rat, & quo nam pacto semen maris causa eius, quod gignitur, sit.  
2, Utrum ut insitum, & protinus inde pars corporis gignendi mi-  
2, stum cum materia fœminæ: an semen nihil commune cum corpo-  
2, re habeat, sed motus, visque in eo contenta sit, quæ communicet.  
2, hæc est enim quæ agat: quod autem consistat, & formam reci-  
2, piat, reliquum excrementi fœminæ est, &c. Secundo de gen. an. 1.  
2, Semen igitur tale est, motumque habet, & principium tale, ut mo-  
2, tu peracto pars existat quæque, eademque sit animata. Non est  
2, enim facies, nisi animam habeat, neque caro, sed corrupta, æquivo-  
2, ce dicitur facies, aut caro, perinde quasi lapidea, aut lignea facta  
2, sit. Simul autem partes similares, & instrumentales, siue offi-  
2, ciales efficiuntur. & quemadmodum non securim, non aliud in-  
2, strumentum dixerimus factum esse ab igne solo: sic non pedem,  
non



non manum, eodemque modo ne carnem quidem. nam eius quoque  
 aliquod officium est. Dura igitur, mollia, lenta, rigida, & quicunq;  
 alij affectus partibus insunt animatis, à caliditate frigiditateve  
 effici possunt. At ratio, quæ iam caro, aut os est, non potest: sed à  
 motu proficiscente efficitur ab eo, quod genuit, quodque actu est id,  
 quod potentia est id, ex quo gignitur: quomodo quoque in ijs agi-  
 tur, quæ arte efficiuntur. Ferrum enim durum, aut molle effici-  
 tur calore, vel frigore. at vero ensis, à motu instrumentorum, quæ  
 artis obtinet rationem. Ars enim principium, formaque eius,  
 quod efficitur est, sed in alio. Motus autem naturæ in ipso est,  
 ab altera profectus natura, quæ actu obtinet formam. Hæc ca-  
 dem habentur in eodem lib. cap. 3. in fine, & cap. 4. in medio ibi.  
 At vero in quibus sexus maris, & fœminæ. quæ ne tadio lecto-  
 res afficiam non transcribam. Postquam ergo parti purissimæ  
 menstrui semen vim generantem prestitit, ipsamque constare  
 fecit, secundum eius corpulentiam dissolvitur, versumque in spiri-  
 tum evanescit ex secundo de gen. an. 3. unde nulla ex eo fit  
 fœtus pars, neque materia partium illius aliqua pars  
 est. Efficiens ergo tantum principium  
 maris semen in se habet se-  
 cundum Ar. non  
 autem  
 materiale. Inseruitque generatio-  
 ni ut efficiens, non ut  
 materia.





## Sententiæ Ar. sectatorum rationes.

## Cap. I I.

**V** Ideamus modò huius sententiæ fundamenta. Nil unquam in se ipsum agit; quia idem sibi esset contrarium. actio enim non cadit nisi inter contraria. Idem ageret ad sui destructionem. Sed si semen maris in generatione fœtus rationem materiæ haberet, sequeretur, quòd aliquid in se ipsum ageret. ergo semen maris materiæ rationem non habet. Minor probatur. Nam semen maris, ex consensu non modo omnium philosophorum, sed etiam Medicorum, rationem agentis habet; si ergo materiæ etiam rationem habeat, aliquid in se ipsum ageret; idem sibi esset contrarium, ageretque ad sui destructionem.

Secundò ex primo de gen. an. 20. Opifex non est unquam pars sui opificij. Semen est opifex, vel etiam ex Gal. sententia. ergo fœtus materia esse non potest.

Tertiò ex secundo de gen. an. 3. Coagulum lac mutat, & cogit, neque illius coagulati pars fit. ergo neque semen maris pars instituti fœtus est, & illius materia.

Quartò arguitur ex natura seminis. Si enim ex eo, tanquam ex materia constituerentur partes fœtus, exempli gratia os, nervus, cartilago, tunc semen coagulari esset necesse. si quidem huiusmodi partes similes sine coagulatione fieri non possunt. At natura seminis neque à calido, neque à frigido coagulatur, cum illud à frigido humidum fiat, & aqueum; à calido vero aquea non coagulentur. ergo ex eo, tanquam ex materia, partes fœtus non constituuntur.

Quintò cum animalium omnium, quæ coitu propagantur, communissima conditio sit, ut semine propagentur, communissima etiam afferenda est ratio, quæ illorum omnium procreationi satisfaciat. At in his quædam sunt, ad quorum conceptum non materia seminis, sed virtus tantum illius à mare afferri videtur, ut in insectis contingit. ergo in omnibus animalibus, quæ per coitum propagantur, communissima conditio est, ut à mare non materia,

sed



sed tantum vis seminis tribuatur . Quod dictum est de animalibus insectis declaratur sic . In insectis per coitum non aliquod membrum mas in feminam, sed contra femina in marem indit . Verisimile ergo Ar. non est, in istis semen à mare in feminam, sed solum vim seminis immitti . quasi in his femina materiam ad opificem apportet . In insectis ergo à maribus non materia aliqua, sed solummodo virtus affertur . Hinc fit, ut insecta diu coeant, absolutaque breui generent . coniuncta enim manent, quousque constituent, perinde ut semen constituit . Sed abiuncta cito edunt conceptum, quoniam & imperfectum, quod pariunt, est .

Maximo sexto loco indicium est, inquit Ar. primo de gen. an. 29. quod & avibus, & piscibus oviparis euenit, non tale emitti à mare, quod insit in eo, quod genitum est, sed virtute tantum contenta in semine maris viuificari, ut dictum est de insectis . Aues enim feminae absque mare ova subuentanea edunt . Quod si mas nondum luteo in album mutato, femina superueniat, secunda ex subuentitijs redduntur statim . Verisimile autem non est materiam seminis illis ovis à mare immitti, sed tantummodo vitæ, & fecunditatis vim infundi .

Hoc idem in generatione quoque oviparorum piscium euenit . Ubi enim femina ova ediderit, mas semen aspergit, & quæcumque attingit, secunda efficiuntur . quæ non attingit, remanent in secunda; quasi non ad quantitatem mas conferat, (inquit Ar.) sed ad qualitatem . Quod si absque materia seminis masculini, sed sola illius virtute nonnulla animalia fieri possunt, rationi consentaneum est naturam, quæ nunquam pluribus agit, quod paucioribus agere potest, in quolibet fetu sola masculini seminis efficacia, minimè materia ad conceptionem uti .

Arguit præterea Celsippus lib. 5. quest. Peripat. q. 2. Cur misceri oportet duas materias maris scilicet, & femine in conceptu ? Si enim virtus utriusque in alteram agat, in materiam maris perfectiorem, aget imperfectior virtus feminae . hoc autem modo non ad perfectionem tendet generatio, sed ad imperfectionem . Si autem singulae virtutes in suam materiam agant, non unum fiet animal, sed duo . unum scilicet ex semine maris, alterum ex materia femine . Sufficit igitur una materia femina, &



## Mundini Mundinij

ne, & vnum agens, quod est in semine maris, ut vnum ab illis fiat.

Nonò arguit Calumniator Argenterius. Potest ne tantillum semen semel à mare in vuluam iniectum, partibus omnibus spermaticis delineandis, ossibus, cartilaginibus, ligamentis, venis, arterijs, nervis, membranis sufficere? Non ergo materia, sed efficientis solum, & opificis semen maris rationem habet.

Decimò. eadem est materia, ex qua augetur, & ex qua constituitur primum fetus secundo de gen. an. 4. in medio, & 4. eiusdem primo versus finem, & cap. 8 in fine. Secundo collig 10. & com. ultimo in primum de gen. an. Vnde Medici axioma illud suum habent, ijsdem nos nutriri, ex quibus constamus; at singula perfectorum animalium partes sanguine nutriuntur, ergo ex sanguine generantur, non ex semine.

Ultimo. si partes principes cor, & hepar ex sanguine generantur, ut omnes fatentur. Cur non & reliquæ partes, quas posterius perfici omnes admittunt? Sed si ex sanguine generantur, non ergo ex semine, & præcipuè maris. & per consequens semen materiae locum non habet.

## Hipp. & Gal. sententia. Gal. rationes pro illius probatione Peripat responsiones. Illarum euerfiones. Cap. III.

**H**ipp. diuersis in locis lib. 5. de genit. de nat. pueri, & lib. 1. de diæta, & cum eo Gal. præcipuè primo de sem. existimarunt semen maris in se principium non modo effectiuum, sed etiam passiuum habere. neque solum in generatione fetus efficientis, sed etiam materiae rationem subire; quamuis masculinum magis locum agentis, femineum vero magis patientis habeat. Habet autem rationem agentis, ratione partis spirituosæ, ratione vero corpulentæ, & crassæ, habet rationem materiae. Statui pro hac sententia probanda, & stabilienda seriem, quam Gal. ipse in lib. de semine observauit, imitari. Ita enim studiosi maiori cum facilitate poterunt omnia, quæ allaturus sum, intelligere, & firmiter retinere



retinere. Gal. itaque lib. primo de semine tanquam fundamen-  
tum suæ disputationis accipit. in fœminis, quæ concepturæ sunt,  
semen maris in vtero retineri, & nisi retineatur, conceptum nul-  
lo pacto fieri posse.

Hoc autem esse verum tribus modis deprehendit Gal. Pri-  
mus fuit in equis, canibus, asinis, bobus, capris, ouibus, in  
quibus partim custodum horum animalium sibi inuicem consen-  
tientium confirmatione, partim propria, ac multiplici experien-  
tia deprehendit, omnia ea, quæcunque post coitum semen ex-  
creuerunt, nunquam concepisse; quæcunque vero retinuerunt,  
grauida facta fuisse. Secundus modus fuit in mulieribus ipsis, ut  
pote, quæ maximè id, quod in ipsis contingeret, non modo percipe-  
re posse viderentur, sed etiam illud ipsum explicare. Dixerunt  
ergo Gal. mulieres ab illo interrogatæ (& hoc quotidie etiam fa-  
tentur) ubi semen conceperunt, quædam se in vulua motio-  
nem sensisse, quæ quasi conuelleret, ac paulatim in se illam contra-  
beret. ex quo, Gal. inquit, verisimile est, hoc ipsum, quod dicunt  
mulieres, semen concipere, & nomen conceptionis, à concipiendo  
à mulieribus fuisse impositum. sic Hipp. lib. de genit. inquit. Si  
fœmina partus perita sit, & cognouerit quando genitura non ex-  
cidit, tunc illa sciet, qua die intra se, ipsam concepit. Sic ancilla  
psaltria, de qua Hipp. lib. de nat. pueri, ubi sensit semen non existi-  
sse, & vuluam ad semen contractam fuisse, dubitauit se esse graui-  
dam, ut re vera erat. ex quo postea iussu Hipp. septies in terram  
desiliendo conceptum emisit.

Tertius modus, quem seruandum censuit Gal. ut cognoscere  
an semen in concepturis debeat in vtero retineri, fuit. ut integros  
libros auctorum, quicunque de hoc argumento tractarunt, perle-  
geret; & inuenit hos omnes hoc idem confirmare. Imò nonnullos  
eorum diligentiores, vuluarum etiam motum describere, quo  
ad semen contrahuntur, ipsumque undequaque comprehen-  
dunt.

Quod cum rursus in dissectionibus sibi experiendum Gal. du-  
xisset, multa deprehendit animalia prægnantia, in quibus omni-  
bus vuluæ fœtibus prorsus cohærentes ceræbantur, siue maiores,  
siue minores, siue penitus parui extitissent.



## Mundini Mundinij

Sed Gal. præter huiusmodi rationes aliter id conatur confirmare . ac primo testimonio , & auctoritate Plat. qui utrum veluti quoddam animal appetens procreationis esse docuit , atque illum propterea semen ad se se attrahere , illud auide complecti , & continere . Secundo testimonio ipsorum virorum , qui non raro in coitu euidenter percipiunt , illorum genitale tanquam à cucurbita ab utero intro attrahi . quod præcipue contingit , si coitus fiat proxime cessantibus menstruis , quo maxime tempore genituram uteri concipiunt . Hoc igitur sit futuræ disputationis solidum fundamentum iuxta Hipp. Plat. & Gal. si fœmina debet concipere , necessario semen maris in utero debere retineri . Atque hætenus Ar. ipse ab Hipp. Plat. & Gal. non dissentit . Cum enim ex Ar. ostensum sit , semen principium motionis menstruo præbere ; quomodo hoc efficere posset , nisi intus in utero attraheretur , & retineretur ? actio non fit in instanti . Si ex primo de gen. an. 20. & 2. eiusdem cap. 3. & 4. semen coagulo , menstruus sanguis lacti , proportionem respondet , & coagulum permiscetur lacti , non nec etiam semen debet menstruo misceri ? quomodo potest misceri menstruo , nisi in uteri cavitatem attrahatur , & retineatur ? Sed

5) hoc vel ex ipsius Ar. ore audiamus . Profusio autem non intus  
2) fit , ut quidam volunt : os enim uteri angustum est . Sed ante , quò  
2) fœmina mittit vaporem illum nonnullarum recrementum . eodem  
2) enim mas etiam mittit , quod fuderit ; & aut ibidem manet se-  
2) men emissum , aut intro ab utero trahitur , si calidus est , & modicè  
2) temperatus . Cuius rei indicium ; quod locus , qui modo madebat ,  
2) resiccatus mox sentiatur . & quod magis est , hoc idem confirmat  
2) exemplo quorundam animalium , subdens . Animalibus autem  
2) quorum præcordijs vulua vinctur , ut auibus , & piscibus , qui ani-  
2) mal pariunt , ne semen illuc trahatur , sed profusum deueniat ip-  
2) sum impossibile est . Subiungit modum docens . Trahit genitu-  
2) ram hic locus suo calore . Menstruorum etiam decessio , & con-  
2) fluuium , fomitem in ea parte caloris parat . Itaque ut vasa non  
2) illita , calido diluta humore aquam in se trahunt , ore inuerso , ita  
2) attrahitur . Secundo de gen. an. 3. quamobrem an semper id fo-  
2) ras exeat ( idest semen maris ) quærendum non est , neque an pars  
2) sit vlla formæ constitutæ . Non semper , sed ne quidem semel

que



querere possemus, an geniture corpus foras exeat, si intus non attraheretur? quod intus non attractum, & retentum non fuit, foras exire non potest. Quid dicam de bono Auer. qui tantum tribuit virtuti attractrici uteri 2. collig. 10. ut sibi persuaserit vicinam illam suam scelestissimam, & impudicissimam potuisse concipere in balneo, in quo pravi homines semen emisserant? quamvis ex alia parte nescio postea, quomodo bene sit concors cum suo magistro Ar. qui nuper citato loco voluit semen à calore uteri, non ab illius propria virtute attractrice, ut d. Auer. intus attrahi.

Constans ergo, & firmissimum hoc sit iuxta Hipp. Plat. Gal. & Ar. & suum fidissimum comm. Auer. si femina conceptura sit, necessario ab utero intus semen maris attrahi, & retineri. Vtrum postea attrahatur à virtute uteri propria, & ab alia propria, retentrici dicta, retineatur, concurrente calore uteri in his actionibus, ut instrumento, quemadmodum asserunt Gal. & Plato; an ut Ar. à solo calore, iudicent studiosi. Et ut melius possint id iudicare, in memoriam reducant ea, quæ diuinè Gal. docuit lib. 1. de facult. nat. Iacto hoc fundamento, ulterius progrediamur, & cum Gal. ad Ar. ipsum veniamus, qui coagulato menstruo à semine, ipsum dissolui, ac in spiritum abire in uteris affirmat. 2. de gen. an. 3. ut adduximus in 1. cap.

Observamus in humidis substantiis, quæ in flatum convertuntur, ex minima etiam earum quantitate maximam spiritus copiam constitui. & hoc in ventis ipsis clarum est, quicunque de fluminibus, ac paludibus, aut mari spirant, quales sunt, qui sinuales, & qui pelagij nuncupantur. Hi enim maximi interdum flant, ut pote, cum plurima eorum substantia ex minima humoris mole evaserit. Sicuti etiam qui è terra flant, hoc idem præferunt, qui in copiosiore aere resoluta terræ vligine spirare consueverunt. Sicuti ergo ventrem videmus, cum flatibus infestatur, quam plurimum intumescere, ac distendi, ac dolore affligi; non ne etiam si in prima conceptione genitura in spiritum difflatur, vulvas ipsas in magnitudinem attolli, doloreque affligi necesse erat? At nil tale in his apparet. imò tunc minores, ut dictum est, minusque turgidæ cernuntur, & in nulla femina dolore affliguntur. Si volerisque statim, ubi concepit animal aliquod, illud diffecare, ex



## Mundini Mundinij

omni parte vuluam circa conceptum contractam, illique cohaerentem inspicias; quod certè non inspiceres, si in ipsa flatus reperirentur. nam flatus impedirent, quò minus circa fœtum contrahi posset. Quòd si quis pro Ar. dicat, flatum ex semine genitum, per muliebrem pudendum exire, atque ideò prohibere, ne uterus valde tumidus, atque distentus dolore afflicteretur. hoc refutatur. Nam quemadmodum ructus, & crepitus per os, & infernas partes expirantes, ostendunt flatus ex ventre euacuari; & ob id etiam tumor, & inflatio ventris remittitur. ita si per muliebrem cunnum flatus exirent, & id quidem perciperetur à mulieribus, & tumor ob id remitti appareret. at nullum unquam istorum post conceptionem in aliqua integræ sanitatis, & quæ abortum non fecerit, aut maximum de abortu periculum non subierit, muliere contigit. Galenus 3. de nat. facult. 3. ex auctoritate Herophili, & Hipp. 1. atque experientia ipsa docet; concepto semine uteri os ita claudere, ut ne aciem quidem acus, aut specilli admittat. Quid ergo flatus in ventre, qui orificia adeò lata habet, cognoscuntur ex tumore, distentione, dolore, & præterea eorum exitu vel cum sonitu, vel sine; nullum vero horum in alicuius integræ sanitatis mulieris utero unquam apparet? An hæc omnia frequentia in uteris esse non deberent? Nullam ergo ne minimam probabilitatem habemus, cur in spiritum euadere genituram debeamus existimare, non crepitus aliquos, vel cum sonitu, vel sine sonitu per vuluam, cervicem expressos, non euidenter tumorem, non distentionem, non doloris alicuius sensum in conceptionis principio oborientem.

In his admodum ingeniosè à Gal. contra Ar. excogitatis exultant Medici, & penitus acquiescunt, ut possunt studiosi videre apud Oddum, & alios Neotericos, qui in hoc, de quo nunc agimus, argumento versati fuere. Sed si alijs à nobis non muniantur, non est, quod in illis exultent, & acquiescant. Ad hæc enim omnia paratissimas Ar. sectatores responsiones habent. Et primo dicunt eorum aliqui. Ar. non hoc solum affirmare, quod suppositum est in rationibus adductis, ut coagulato menstruo à semine, corpus ipsius in spiritum abeat, verum ita abeat, ut euanescat. Adeò igitur attenuatur versum in spiritum, ut insensibiliter, & latenter sensim ex utero exeat, absq; dolore, tumore, distentione, & crepi-



*en. At contra nos sic instamus. Humida substantia in spiritum conuersio, est actio merè naturalis. Si ergo corpulentia seminis debet in spiritum versa euanescere, magis rationabile est, ut antequam semen menstruum cogat, & immutet, illa euanescat, quam, postquam illud cogerit, & immutauerit. Nam repatitur semen, dum agit in menstruum, & obtunditur eius calor. at magis rationabile est, ut humida corpora à calore ita in spiritum uertantur, & attenuentur, ut euanescant, quando ille amplior est, quam, quando imbecillior redditus est, imbecillior. n. calor habet uim eleuandi à rebus humidis uapores. amplior autem, illos uapores dissipandi. Cum ergo ob rationē dictam, post menstrui coagulationem calor seminis redditus sit imbecillior, sequitur, quod corpulentia seminis in uapores conuertetur quidem, sed hi non dissipabuntur, & discutientur insensibiliter, adeò quod, absque dolore, tumore, distentione, uel crepitu, ut ex Gal. deduximus, euanescant.*

*Si dixeris non à calore seminis, corpulentiam illius in flatum uerti, & dissipari, sed à calore uteri. Dicam ego uterum calidiorē esse propè coitum, quam longius à coitu, quanto. n. minus coitus distat, eo magis seruatur in utero æstus, quem in coitu contraxit. Cur ergo corpulentia seminis in flatum conuersio, post coagulationem menstrui differtur? Turget propè coitum uterus spiritibus, quos ad ipsum in actu coeundi confluere plurimos concedunt omnes.*

*In considerationem etiam adhibeo. quod seminis corpus lentum est. at quæ lenta sunt, non possunt tota in spiritum conuerti. Sunt. n. lenta ob plurimum elementi terræ in ipsis perfectissime permixtū. at hoc non potest in spiritum conuerti. Semen ergo maris non potest in spiritum abire secundum eius partem terrenā. & hoc etiam optimè cognouit Ar. 2. de gen. an. 2. His de causis (inquit ibi philosophos) semen quoque exit quidem intrinsecus spissum, & album calore interiore, multum spiritus calidi continens. Sed egressum, ubi calor euannit, et aer refrigeratur, humidum nigrumque euadit. remanet. n. aqua, etsi quid paruum terrenę portionis continetur; ut in pituita, (nota) sic in semine, cum siccescit. In pituita, dico ego, resolutis partibus tenuioribus, remanent quedam partes terrestres, & quæ in uaporem, & exhalationē conuerti non possunt; sic se res habet in semine per Ar. ut in pituita. ergo in semine non omnes partes illius*  
in



## Mundini Mundinij

In exhalationem conuertuntur, atque ideò terrestres remanent. Neque recurrat quis ad illud, quòd *Ar.* loquatur de resolutione extra corpus. nam eadem est ratio resolutionis humidorum in corpore, & extra corpus. eodem enim modo utrobique fit. resoluntur scilicet partes tenuiores, remanentibus crassis. Quid ergo eveniet ò Peripatetici de parte seminis terrestri? Non me fugit, quid respondeat *Cæsalpinus* loco supra citato, eliciens, ut ego puto, responsum ex *Auer.* in com. super 3. cap. 2. de gen. an. Corpulentiam scilicet seminis, postquam prima fœtus materia coagulationem adeptæ est, si quæ in flatum non fuerit extenuata, excerni vnde cum humiditate menstrui in eam capacitatem, quæ relinquitur inter intestinalem, & amnion. Ita *Cæsalpinus* ad verbum scribit. At contra. Cur expelletur pars corpulentie, quæ in flatum non fuit extenuata, tanquam quid superfluum, cum reliquis excrementis inter allantoidem, & amnion, si accommodatissima materia est, ut in hoc, & sequenti cap. ostendetur, pro multis partibus ad fœtum spectantibus generandis? Eius etiam quod dicitur à *Cæsalpino* nulla ab *Ar.* fit mentio; quid ergo, illum ne de incuria arguamus?

Verùm Conciliator diff. 36. sibi persuasit alio modo rationes allatas *Gal.* posse euitare, fictitiam quandam interpretationem ad dicta *Ar.* de mente *Avic.* ex 9. de an. adducendo. Ita enim interpretatur *Ar.* quod velit corpulentiam seminis in spiritum verti, non flatuosum; vnde evanescat, & transpiret extra uterum, sed in spiritum, qui sit instrumentum virtutis formativæ, formantem scilicet, & embryonis factorem. Hanc interpretationem videtur sequutus etiam doctissimus *Fernel.* 7. physiol. cap. 9. Fundamentum autem, cui innitur Conciliator ad afferendam talem interpretationem, ut mihi videtur, desumitur ab ipso ex similitudine, quæ est inter coagulum, & semen. Dicit enim Conciliator (& in hoc consentit cum eo etiam *Albertus Magnus* lib. 16 de an. cap. 13.) quòd coagulum non coagulat lac per virtutem suam, nisi subtilietur in spiritum, nam is postea penetrans per totum lac, & secum habens virtutem coagulantem, lac densat, & coagulat. Dicit enim quòd virtus coaguli non imprimitur lacti, nisi vaporazione coaguli fulcita. Vnde *Albertus Magnus* asserit. Coagulum esse  
sicuti



sicuti spiritum coagulantem. A pari ergo. si semen debet menstruum coagulare, ut in spiritum vertatur necesse est. Videant studiosi, quam sibi fugam paret Conciliator, ut rationes Gal. adductas evitet. Fugæ huius ab aliquo, qui in argumento, quod præmanibus habemus, versatus sit, mentionem ullam factam fuisse, hætenus vidisse mihi non licuit. Experiamur nos, an aditus ita occludere Conciliatori possimus, ut nesciat quò se recipere. Meo igitur iudicio in hac expositione sunt multi errores. Sed antequam illos detegam, oportet inuestigare quid Ar. per corpulentiam seminis intelligat. Constat secundum doctrinam etiam Ar. 2. de gen. an. 2. semen ex duplici substantia. altera aerea, & spiritiosa, altera aquea, & humida cum portione aliqua terrestri mixta. quando igitur querit Ar. quò nam vertatur corpulentia seminis, quando facultate in semine contenta agit, & determinat corpulentiam illius in spiritum verti, & evanescere, intelligit ne semen & secundum eius partem spirituosam, et secundum aqueam in spiritum verti, an vero secundum aqueam, & humidam tantum? Absurditas quædam est existimare Ar. voluisse partem spirituosam seminis in spiritum verti. nam sic spiritus in spiritum verteretur. ergo intelligit Ar. aqueam tantum partem seminis in spiritum verti. Clare quoque hoc ex verbis Ar. elicitur. Causam enim reddens Ar. cur corpulentia seminis in spiritum vertatur, & evanescat; dicit quia humidam, aquosamque naturam habet. ergo pars aquosa in spiritum vertitur, non spiritiosa. ergo per corpulentiam seminis, per seminis corpus, Ar. intelligit aquosam, & humidam partem seminis.

Primus ergo Conciliatoris error est; quòd illud, quod Ar. pronuntiat de corpulentia seminis, Conciliator interpretatur de semine. at valde differt dicere semen, & corpulentiam seminis, ut nunc ostendi.

Secundus error est; quia iuxta hanc expositionem, si semen debet coagulare menstruum, si debet virtus seminis per menstruum difundi, oportet, ut prius in spiritum vertatur, qui postea penetrans per menstruum, & secum vehens virtutem coagulantem, ipsum cogat. At statuunt qui partes Ar. tuentur, ut licet videre in responsione Casalpini supra allata, & ex Auer. in com.  
loci



## Mundini Mundinij

loci Aristotelici, prius coagulationem menstrui à parte spirituosae seminis fieri, deinde corpulentiam illius in spiritum verti.

Tertius error est; quia faciamus, quòd Conciliator per semen intelligat corpulentiam seminis, adhuc plurimum defecit. nam cum corpulentia seminis sit lenta, & viscida (ut experientia constat) atque ideò portionem terrenam in se habeat, impossibile est, ut tota in spiritum conuertatur. attamen Conciliator absolutè pronuntiat de ea, quòd in spiritum vertitur. ergo elicitur Conciliatorem velle totam corpulentiam seminis in spiritus conuerti. quòd si tota non conuertitur, cur non explicauit. Conciliator, quid de ipsa coagulato menstruo eueniat? quod nam concilium est hoc?

Quartus error est. quia quamuis coagulum subtilietur, ut dicit Conciliator, & spirituosum reddatur, attamen dicitur coagulum coagulationis lactis causam esse, & lac coagulare. At Ar. omninò negat corpulentiam seminis causam esse generationis, & per consequens menstrui coagulationis. Reliquerat equidem sub dubio Ar. 1. de gen. an. 19. utrum seminis corpus sit causa generationis, an habitum aliquem, & principium motus genitale obtineret. Non immemor suorum dictorum statuit in primo cap. 2. de gen. an. semen motum habere, & principium tale, ut motu peracto pars quæque existat. Quocirca clarè ex ipso elicitur non corpulentiam seminis, sed facultatem, & principium motus, quod in se ipso continet, generationis causam esse. Quemadmodum ergo dicunt aduersarij, & communiter omnes, coagulum lac coagulare, & tamen per aduersarios in spiritum conuertitur: Sic possèrius dicere per eosdem corpulentiam seminis causam generationis esse, licèt in spiritum abeat. At Ar. in primo secundi de gen. an. huic contrarium statuit, ut iam vidimus. absolutè enim corpulentiam seminis causam generationis esse negauit, & statuit illius causam, esse facultatem in semine residentem. Fac corpulentiam concurrere ad generationem, ad menstrui coagulationem, versam tamen in spiritus, negandum ne est simpliciter ipsam non concurrere?

Quintus error est. quia verba Ar. in quibus declarat corpulentiam seminis in spiritum conuersionem, repugnant interpretationi Conciliatoris. Verba Ar. sunt in 3. cap. 2. de gen. an. ut su-



prædictum est. Sed antequam illa afferam pro maiori eorum intelligentia altiusculè exordiendum mihi est. Postquam ergo *Ar.* determinauit in primo cap. 2. de gen. an. id, quod sub dubio reliquerat cap. 19. primi lib. semen scilicet non corpulentia sua, sed virtute, quam in se habet, & ab eo, à quo genitum fuit, accepit, conceptum formare, nullamque esse rei genitæ partem; & patefecit in secundo cap. quæ sit natura eiusdem seminis, in tertio statim dubitans quæsiuit; si semen nulla sit pars eius, quod in utero gignitur; quando facultate in eo contenta agit, in quam illius corpus naturam aliam conuertatur? Quæsito versus finem illius tertij cap. satisfacit philosophus ita scribens. Corpus autem genituræ, in quo semen animalis principij contentum vna provenit, partim inseparabile à corpore, in quibus diuina pars comprehenditur, qualis est, quæ mens appellatur, partim separabile, hoc in quam genituræ corpus dissoluitur, versumque in spiritum euanescit, cum naturam humidam, aquosamq; habeat. Quamobrem an semper foras exeat, quærendum non est, neque an pars vlla sit formæ constitutæ. quomodo nec de succo, à quo lac cogitur, quæri tale quid conuenit. nam is quoque mutat, & nulla pars constitutæ magnitudinis est. Hæc sunt verba, quæ ita interpretatur de mente *Auic.* Conciliator; ut in illis velit *Ar.* semen in spiritum formantem, & factorem (ut ipse dicit) embryonis transmutari. Perpendamus ea diligenter. *Ar.* ergo respondendo ad quæsitum iam recitatum pronūtiat quatuor de corpulentia seminis. Primum pronuntiatum est. quod dissoluitur. Secundum quod in spiritum conuertitur. Tertium quod euanescit. Quartum est, hæc ita contingere. quia humidam, aquosamque naturam habet. Corpus ergo genituræ per *Ar.* humidum, aquosumq; existens, non solum in spiritum conuertitur, verum etiam euanescit, ò bone Conciliator. si solum dixisset *Ar.* illud in spiritum conuerti, forsitan interpretatio tua, & *Auic.* aliquid valeret, quod scilicet conuertatur in spiritum generantem, & embryonis factorem. posses. n. vocabulum spiritus interpretari de quo spiritu tibi placeret. Sed dicit *Ar.* præter eius in spiritum conuersionem, illud euanescere. præter. n. eius in spiritum conuersionem, addit euanescentiam. ergo intelligit *Ar.* quod per meatus cecos exhalet, neq; vllò pacto in conceptu remaneat, neq; s. sub forma spiritus.



## Mundini Mundinij

55 *Vis videre hoc esse certissimum? Considera illa verba. cum naturā  
humidam, aquosamque habeat. Heus bone Conciliator in quem  
spiritum conuertuntur corpora humida, & aquosa? in spiritum for-  
mantem, & viuificum, an in vaporem, & flatus? Fauet mea ex-  
positioni Auer. Io. Gram. Sueffanus, Iulius Castellanius, Gal. Va-  
lesius, Casalpinus, ut innumeros eminentissimos viros sileam.*

*At consideremus interpretationem Conciliatoris, non in re-  
spectu ad verba Ar. sed simpliciter in se. & hic est maior error  
ceteris. Quid opus est, o Conciliator, ut pars corpulenta seminis  
in spiritum vertatur, si copiosissimis spiritibus semen turget, qui  
soli satis esse possunt pro instrumento virtutis fetus formativæ? &  
multo magis, si necessaria est pars illa pro generatione multarum  
partium, quas nullo modo ex menstruo, ut tu unā cum Ar. sta-  
tuis, generari posse evidenti demonstratione infra patefaciam? Si  
igitur corpulentia seminis utilis materia est pro generandis mul-  
tis fetus partibus, cur illa in spiritus verti debet?*

*Sed relictis Conciliatoris nugis, demus cum Gal. si vis, o studiosè  
lector, etiam hoc ipsum fieri posse, ut coagulato menstruo in spiri-  
tum conuertatur genitura humor, sensimque, ac latenter exeat, ut  
nullum vel tumoris, vel doloris, vel sonitus vestigium relinquat,  
ut re vera fuisse Ar. mentem credimus; atque ab ipsa rei natura  
progredientes ratione magis agamus. Quærit ergo Gal. utrum  
in ipsa uteri cavitae menstruum contineatur, idque collectum  
occurrentis semen impellat, motionisque principio indito ex vulua  
excernatur versum in spiritum? an eo tempore, quo fœmina cum  
mare coit, per vasa eò pertingentia semini obuium fiat, dum vim  
illam ab illo suscipere concupiscit? Sed utrunque istorum absur-  
dum esse Gal. demonstrat. Nam secundum doctrinam Ar. san-  
guis in cavitae uteri collectus contineri non potest. Docuit ipse 2.  
de part. an. 3. & 3. eiusdem 4. sanguinem in nullo alio, præter cor,  
membro extra venas contineri. Sanguis ergo in uteri cavitae  
collectus non erit amplius sanguis, sed concretus sanguis, quem  
thrombom Greci vocant. Concrescit enim præterquam in corde,  
continuo sanguis, cum in animali è venis in quamcunque cavitae  
tem exciderit. quare non ex sanguine, sed ex concreto sanguine  
hoc modo animal fabricabimus; quod quàm sit absurdum nemo*



non videt. Ex ijs etiam, quæ ex Ar. in 1. cap. attuli patet, ne per insomnium quidem ipsi potuisse in mentem venire, sanguinem menstruum collectum in utero contineri posse, dum semen pro conceptione in illum attrahitur. Si vero semini occurrere sanguinem dicamus, necesse proculdubio erit occursum illum, & coitum utrorumque in orificijs vasorum contingere. Quod si est; utrum concedemus dispersitum ne in tot particulas, quot sunt vasorum orificia, an sibi ipsi continuum permanens semen cum menstruo cunniri? Prius illud videtur admodum difficile: partim, quod huiusmodi seminis distractio, & divisio non convenit illius naturæ, quod omnes concedunt, & confirmat experientia esse lentum, & viscidum, adeo ut difficulter possit in varias partes distribui. partim quod foret necesse aliam certam causam inuenire, quæ tanquam præses quidam semen diuideret, & ad singula orificia sigillatim traduceret. Quamobrem id restat, ut semen secunda ratione sanguini menstruo copuletur, quod naturæ seminis convenientius est, neque præter vulvæ attractionem, & seminis ei aculationem, ullam aliam efficientem causam requirit. Quod se est. Quærit Gal. 1. à quo proveniat, ut sanguis in vulvam excidat, qui in singulis venarum orificijs cum semine commiscetur. Deinde à quo in unum omne illud corpus congregetur. Tertiò quomodo totus hic sanguis in spacio pauci temporis extrinsecus membrana operiatur. Membrana si quidem apparet, quæ fœtum ipsum statim, ubi primum conceptus est, siue multorum, siue paucorum sit dierum, unde quaque circumdat, ac continet. Sæpenumero enim mulieribus post tres, aut quatuor dies à principio conceptus, semen ipsum membrana circumvolutum excidere consuevit. quod idem poteris in animalium dissectionibus manifestè deprehendere. vulvam si quidem totam ad semen contractam, ipsique semini membranam circumiectam evidentissimè inspicias. & hoc etiam Hipp. confirmavit lib. de nat. pue. sic scribens. Quomodo vero genituram sexto post die viderim narrabo. Mulieris ancilla psalteria quædam erat insignis, quæ ad viros ventitabat; quam quidem non oportebat in ventre concipere, ne uilior redderetur. Audierat uero hæc psalteria, id, quod dicere inter se mulieres consueverunt. Ubi uidelicet mulier conceptura est, non amplius exire



## Mundini Mundinij

5, viri semen, sed intus contineri. Hoc igitur cum audiisset, animad-  
6, tit, semperque observauit: & fortè ubi sensit semen non exisse,  
7, haræ manifestauit. Quod eum ad aures nostras peruenisset,  
8, iussimus ipsi in terram desilire, at illa septies ferè id fecit, & ge-  
9, nitura non sine strepitum quodam excussa, in terram defluxit:  
10, quam cum mulier vidisset, inspexit, atque admirata est. Qualis  
11, autem fuerit, ipse dicam. Perinde erat, ac si quis crudi oui exte-  
12, rius putamen detraberet, ut per interiorē membranulā, inte-  
13, rior humiditas pelluceret. Hæc Hipp. inquit manere intus semen,  
membranamque circundari testatus. Sed introducāmus nos Ar.  
ipsum singulis illis tribus quæ sitis à Galeno propositis responden-  
tem. Ad primum ergo, & secundum quæ situm respondere potest;  
ut ex ijs, quæ de mente illius attuli in 1. cap. patere potest. semen  
ab utero in cavitatem suam attractum, calore proprio in eandem  
sanguinem menstruum attrahere, & cogere. semen vero vim ha-  
bere sanguinis attrahendi, clarè fatetur etiam Gal. ipse lib. 1. de  
semine (ne longè abeam) cap. 6. Restat ergo solum videre quid re-  
spondere possit Ar. de generatione membranæ, quæ sanguinem  
menstruum in vnum congregatum circum amplectitur, & conti-  
net. Si enim inuenerimus ipsum non posse reddere rationem gene-  
rationis huius membranæ, falsam illius positionem esse colligere  
dicebit. Comparemus ergo modum generationis membranæ con-  
ceptum circum amplectentis ab Ar. assignatum, cum modo à Ga-  
leno ipso excogitato. Integrā autem Ar. orationem, quam su-  
pra cap. 1. attulimus, transcribamus. Scribit ergo Ar. 2. de gen.  
an. 4. Cum autem excrementum feminae in utero constiterit à ma-  
ris genitura, quæ simile facit, ut lactis coagulum. Coagulum  
enim lac est continens calorem vitalem, qui partes similes ducit  
eodem, ut unit, atque constituit. & genitura ita se habet ad men-  
struorum naturam. eadem enim natura lactis, & menstruorū est.  
Itaque coactis iam partibus, corpulentus humor excernitur, obdu-  
citurq; circum, parte resiccescente terrena membranæ, tum neces-  
sario, tum etiam alicuius gratia. Nam & calescentis, frigescen-  
tisue rei externa siccescere necesse est, & animal non in humido,  
sed seorsum contineri oportet. Ex hac oratione patet secundum  
Ar. membranā, quæ fetum inuoluit, & utero adhæret, à Medi-



eis chorion vocatam, nec non & ceteras membranas, generari ex corpulenta menstrui portione ad extra pulsa, atque à calore conceptus, & uteri siccata. ab omnibus enim corpulentis, quæ terreo participant, cum à calore calescent, humiditas exhalat. quapropter siccescere ea oportet. Modus vero, secundum quem membrana chorion secundum Gal. doctrinam in 1. de sem. 4. generatur, est iste. Dictum est secundum auctoritatem Plat. uterum esse veluti animal appetens procreationis, atq; iccirco ad se se trahere semē, illudq; complecti, ac continere. quo tempore ergo continuum sibi ipsi permanens semen ob suum lentorem, à vulua attrahitur. cum ab omnibus eius partibus simili modo appetatur, extenditur, ac dilatatur, ita ut totam internam uteri superficiem attingat. Cum igitur lentum, ac crassum sit, calidoque corpori adhæreat, facile assequitur, ut membranam contrahat; non aliter, quam pultis aliquatenus liquida supra instrumentum aliquod latum, & calidum extensa, exterior pars illud instrumentum tangens crustulam contrahit. Aduertendum autem hic est, non esse credendum Gal. in his verbis uelle membranam chorion à solo uteri calore fieri, non concurrente facultate seminis formatrice, ut imaginatus est Conciliator diff. 37. nam hoc falsum est, & inimaginabile, neque videtur id ex illius, in nuper citato loco, verbis elici posse. Tanto enim artificio venæ & arteriæ per chorion membranam distribuuntur, ut nullus imaginari possit absque concursu formatricis facultatis membranam illam generari. Adde vero Gal. expressis verbis affirmare 2. de nat. facult. cap. 3. semen membranam illam induere ope facultatis formatricis. Neq; huic determinationi repugnat Ar. in nuper citatis verbis, si quis illis attentè animum adhibuerit. Videtur autem Gal. generationem prædictæ membranæ ab Hipp. ipso accepisse. Nam ipse in princ. lib. de nat. pu. docet genituram calefactam, & inflatam pellicula circumdari, ut panis, dum torretur, crusta quadam obducitur. Ita ergo Hipp. & Gal. intelligendi sunt, ut similitudine, & exemplo rem, alioquin obscuram, declarare velint. quasi velint dicere. quemadmodum panis, vel puls crusta quadam, ita conceptus pellicula circumdatur. modum autem generationis omninò similem esse nolint. qua in re ablego studiosos lectores ad doctissimum Andræam



## Mundini Mundinij

Laurentium lib. 2. op. anat. q. 27. Quod dictum autem est de generatione membranæ chorion, idem dicendum est de alijs membranis. Quis ex his duobus modis uidetur tibi, humanissime lector, probabilior? uel potius, quis tibi ex his uidetur stare posse? Mihi certè uidetur modus Ar. nullo modo admittendus. Substantia membranæ chorion, ut etiam aliarum, ductilis, tenax, extensibilis debet esse, & est. Nam cum fetus crescit diuelluntur, & extenduntur multum, pro diuersis motibus ipsius in utero. membranæ omnes crassæ, & albæ sunt substantiæ. quomodo ergo possumus imaginari, ex sanguine menstruo membranas illas generari, qui penè nullius lentoris est particeps, qui friabilis est, minimè ductilis, qui minimè in latum, & alias dimensiones distendi potest? quomodo, si talis est, in membranam extensibilem, dilatabilem, & tenacem euadere potest? si sanguis menstruus est ruber, cur membrana chorion non est rubra, sed alba? cur non attestatur naturæ eius, ex quo gignitur? orta attestantur suis principijs. An non magis apta, & conueniens materia erit corpus seminis, quod crassum, lentum, uiscidum, album est? An non multo minore labore semen huiusmodi qualitatibus præditum in membranam à natura transmutabitur? Hæc omnia de alijs membranis dicenda sunt. Sed uideo Peripateticos responsuros. Quod membranæ processu temporis sui nutritione augentur, et ad magnam perueniunt quantitatem, & tamen seruant naturam membranarum, extensibilitatem, tenacitatem, crassitiem, albedinem; & tamen dum augentur, nutriuntur sanguine menstruo. ergo sanguis menstruus est accommodata materia, ex qua partes tenaces, & extensibiles possunt generari, & albæ. Hæc responsio equidem est ipsius Auer. 2. collig. 10. & 1. de gen. an. com. ultimo, ut apparet ex decima ratione adducta pro Ar. sententia in sup. cap. Dicit enim in his duobus locis Auer. non differre materiam generationis, & nutritionis, neque auctiorem à generatione, nisi quia auctio est generatio in partibus; & procreatio est generatio universalis. Unde concludit, quod si sanguis est sufficiens ad nutrienda omnia membra, proinde etiam augenda; (nam auctio non nisi nutritione mediante fit) est etiam sufficiens pro ipsorum generatione. At contra. Nutriuntur quidem post primam earum generationem membra-



na conceptum inuoluentes, sanguine menstruo ex utero attracto. Sed illo non nutriuntur, nisi ex tenui, in crassum, ex liquido, in viscidum, ex rubro, in album mutetur. Vnde non mirum si extensibilitatem, crassitiem, & alias suas qualitates seruant. ergo & in prima generatione membranarum, si ex ipso debent illæ generari, ut mutationes illas subeat necesse erit: At ad quid natura laborabit in transmutando menstruo, ut lentum, crassum, album euadat, si in utero præstò habet seminis corpus huiusmodi qualitatibus præditum? Cur in summa in utero ex sanguine menstruo contendet natura semen generare, dum contendit ex ipso membranas formare, si semen in utero paratum habet? Natura nunquam facit per plura, quod æque bene potest facere per pauciora. Ad responsionem Perip. & Auer. dico. Membranas habere lentorem, & tenacitatem, & reliquas qualitates in prima sui procreatione. Vnde dum post primam earum constitutionem nutriri, & augeri incipiunt, & perseverant, sanguinem suæ substantiæ similem reddunt. Non mirum ergo si tales seruantur, dum magnitudinem acquirunt, quales in prima sui constitutione erant.


Dicet aliquis cur natura instituit membranas (& quod dicimus de membranis, dicatur de cæteris partibus albis, & exanguibus, ut in altera subsequente ratione apparebit) nutriri ex sanguine, qui tanta indiget sui mutatione, si debet in nutrimentum illarum cedere, & non potius instituit succum, qui à substantia illarum non esset adeò diuersus? An sanguis non solum inseruit pro nutritione membranarum, & reliquarum exanguium partium, sed etiam uiscerum principalium, & omnium rubrarum partium? Elegit ergo natura sanguinem, ut succum, qui commodè his, & illis pro nutrimento inseruire poterat. Instituit autem, ut ex sanguine semen generetur, & hoc postea in uterum eiaculetur, ut minore labore in utero partes quasdam, ut sunt membranae, & cæteræ exanguæ, ex illo generet. partes autem quædam ex semine generari debebant, partim quidem, quia apta instrumenta naturæ operationibus ex alia materia formari non poterant, ut uisum iam est, & adhuc magis in subsequenti cap. clarum fiet; partim, quia non poterat natura pro duratione animalis formandi calorem in partibus illius implantare, adeò, ut per multum tempo-



## Mundini Mundinij

temporis in illis conseruaretur ; nisi ipsum fundasset in humore viscido, & tenaci, à quo non posset ita facile transpirare ; talis autem semen est . Natura porro nutrit membranas , & ceteras exangues partes ex sanguine , illum prius mutando in semen . (Cum enim sint ex semine , ex semine quoque nutriri debent , se eadem est materia generationis , nutritionis , & auctiois , ) in formandis autem ipsis , hunc laborem conuertendi sanguinis in semen non subit ; quia in nutritione ipsarum non habet promptum , nisi sanguinem ; sed in illis formandis , in utero promptam habet semen . Quæ prouidentia ergo esset nature , quæ in utero haberet promptum semen pro illis formandis , attamen illud omitteret , & quæreret ex sanguine illas formare , & ex ipso non posset illas formare , nisi prius ipsum in semen transmutaret ?

Concludamus ergo . Cum semen in utero attrahatur , & retineatur , in spiritumque secundum eius corpulentiam verti non possit , & extra uterum euanescere , necessarium esse ipsum , secundum illius corpulentiam , in utero tanquam materiam partium ad fœtum spectantium retineri .





# Altera Gal ratio. responsiones Peripat. illarum confutationes.

## Cap. IIII.

**C**onsideremus pro secunda ratione simul cum Gal. prima de sem. s. eas partes, quas Medici solidas, radicales, & seminales vocant, exempli gratia venam, arteriam, nervum, tanquam communia instrumenta. Querit Gal. ab Ar. ex qua materia huiusmodi instrumenta gignantur? Ille autem respondet, ut supra patefuit, illa ex sanguine fieri. Sed contra Gal. arguit istud minimè fieri posse. Cum enim huiusmodi instrumenta sint alba, exanguia, cava, longa, & satis magnam distensionem admittant, nullo modo videntur posse generari ex materia rubra, tenui, liquida, quæ neque incendi, neque in modum fistulæ perforari possit; cum illa magis requirant materiam albam, crassam, lentam, quæ longius distrahi, & perforari valeat. Propterea concludit Gal. huiusmodi partes non ex sanguine, tanquam materia ineptissima, sed ex semine omninò fieri, tanquam ex materia, quæ omnes iam dictas qualitates obtinet. Hic vidit Gal. Peripat. quandam sibi fugam parare. Se igitur illis opponit. Fuga hæc est. Partes dictas fieri quidem ex sanguine, sicuti carnem, & reliquas corporis partes, sed diuersa planè ratione. Si quidem ceteræ corporis partes sine pluribus transmutationibus proximè ex sanguine generantur, solidæ autem sunt ex sanguine, qui minimè propriam substantiam, formam, & colorem retinet, sed multas antea transmutationes subiit. Hanc responsionem Gal. cum Ar. irridet Galenus. Petit ergo ab Ar. cum mutatur sanguis pro generatione solidarum partium, nunquid è rubro mutetur in album, è tenui, in crassum, è liquido in lentum? Quod si hoc est. Visitorum motuum, quos ascribendos illi Ar. testatur, oblita natura esset; frustra que in hoc laboraret, cum sanguinem tale efficere conaretur, quale à principio semen ipsum habebat. at natura nil frustra facit. Cur igitur sanguinem contendat in substantiam albam, crassam, lentam transmutare, si semen huiusmodi substantiæ est?



## Mundini Mundinij

Non negat igitur Gal. per multas transmutatinnes sanguinem in venam, arteriam, & neruum posse euadere. Nam hoc negari non potest. si quidem ex sanguine partes solidæ omnes nutriuntur, & augentur. Sed nutriri, & augeri non possunt, nisi sanguis in earum substantiam conuertatur. at in prima earum generatione hoc contingere posse negat. Si quidem in prima earum generatione natura multo magis accommodatam habet materiam pro illarum generatione, quam sit sanguis; talis vero materia est semen. Quod si sanguine nutriuntur, & augentur, necessarium est, ut illum in naturam seminis conuertant, antequam eo augeantur; ut potè in materiam proximam, ex qua ipsæ constant. quæ omnia in calce sup. cap. clare & exactè explicata sunt. Ex hac ergo altera ratione habemus semen maris materiam fetus esse.

Andreas Cæsalpinus vir certè eruditus, & subtilis lib. 5. Peri quæst. q. 2. ad hanc fortissimam certè Gal. rationem duo subterfuges excogitauit; quæ, quia studiosis possent imponere, illa omittere nullo modo debeo. Non moratus autem sum in alijs recensendis, quæ huius viri pro iam allatarum rationum solutione attulit, quia cuique vix mediocriter perito, & optimè fundamenta nostra intelligenti, facillimum est eorum inefficaciam detegere. Volo autem describere integram huius viri orationem, ne forsan alicui videri possit, me mutius illius responsa attulisse. Scribit ergo. Ad alteram dubitationem, quæ ostendit sanguinem menstruum materiam ineptam esse ad primam partium constitutionem, quia & crassior sit, & minime tenax, nec alba. Concedimus totum illum sanguinem, qualis excerni solent per purgationes menstruas, non esse primam materiam animalium, sed eius partem, quam seligit natura trahens per arterias ex vtericis arterijs. In his enim continetur concoctum, sincerissimum, primumque alimentum, ex quo nobilissima quæque partium constituatur. e cuius excremento ossa, & nervos fieri testatus est Ar. 2. de gen. an. cap. 4. Quod autem putent partes albas ex alba substantia fieri e necessitate, rubeas ex rubra, nulla ratio est. Cum enim transmutatio fiat alimenti secundum substantiam, quid prohibet etiam fieri secundum accidentia? At partes rubeas ex non rubeo fieri patet in quorum conceptu. In ortu enim pulli, oritur sanguis ex non sanguine, nec tum ex albo, tum ex luteo. Parcat mihi doctissimus, & acutus huius



vir. aut vim rationis Gal. se non intelligere fingit; aut re vera illam non intelligit. Scio etiam ego: quod cum transmutatio fit sanguinis secundum eius substantiam, fit etiam secundum accidentia illius, atque ideo secundum illius colorem. Sed dico ego; quod si debet sanguis ammittere, non simpliciter colorem, sed colorem, ita ut, proxime mutandus sit in partes albas; hoc non potest fieri, nisi per plures secundum substantiam mutationes, ut etiam norunt Peripat. quemadmodum vidimus supra. Cur ergo natura laborat in transmutando sanguine pluribus secundum substantiam mutationibus, pro generatione illarum partium; si habet materiam promptam, quæ non indiget tot transmutationibus, quæ materia semen est? Cur laborat, ut sanguinem in semen transmutet in utero, si semen in eo promptum habet aliubi genitum? Frustratoria ergo est huiusmodi substantiæ sanguinis transmutatio pro generandis partibus solidis, & albis. Si vero dicerent Peripat. sanguinem ammittere colorem in nutritione partium albarum. Iam diximus mutare colorem, quia ipsum illæ partes in semen convertunt, tanquam in materiam earum proximiorum; deinde hoc sibi ipsis penitus assimilant, & in earum substantiam convertunt ut manifestauimus in calce sup. cap. Non possunt ergo Peripat. argumentum deducere; quod si partes albæ sanguine nutriuntur, ex sanguine etiam generentur; Nam nutriuntur sanguine conuerso tamen in semen; cum ex semine genitæ sint, quemadmodum iam monstratum est. Exemplum vero, quod adducit de ouo, clare contra ipsum Cæsalpinum facit, & ipsum conuincit. Nam partes rubæ ex luteo oui, albæ ex albumine fiunt, ut dixi in fine primæ partis huius disputat. at oui luteum ad colorem rubeum accedit; & licet non sit sanguis, leui tamen mutatione in sanguinem vertitur. ut patet si quis frangat ova, quæ per biduum vel paulo plus gallina cubarit. Sed orationem Cæsalpini prosequamur. Alterum subterfugium ponit ita scribens. Præterea quid impedit, quo minus ex materia menstrui excrementi, quamuis rubea, seligatur pars alba? inesse tenim albedinem sub rubedine omni sanguini patet per eius abluionem. præcipue si ex muliere mittatur sanguis in aquam calidam. Nam non multo post, rubedine abluta, coit substantia alba, ac pituitosa. Esse autem pri-



## Mundini Mundinij

3, *nam materiam animalium, pituitam in menstruo excremento*  
9, *contentam, aperuit Ar. primo de gen. an. cap. 18. Pituita enim*  
2, *alimenti utilis excrementum est; ideò alere potest. Non ergo*  
*ex sanguine creatur animal, sed ex sanguinis excremento. quod*  
*enim in matris corpore perfici nequiuit, perficitur in corde fœtus.*  
*Prætermittamus quærere an hæc sint ad aures philosophi. Quæ-*  
*ro quomodo hæc consentiant cum ijs, quæ in primo subterfugio di-*  
*cta sunt. Nam ibi dictum est, partem sanguinis, quam seligit*  
*natura trahens ex arterijs vteri, esse materiam fœtus: Hic seli-*  
*gitur pro materia pars sanguinis pituitosa: Sanguis arteriosus*  
*non est pituitosus: est calidissimus, tenuissimus, ni me mea phi-*  
*losophia fallit; quomodo ergo pituitosus? quæ pars alba potest*  
*seligi ab illo? Deinde cur est, quæso, quòd tantopere Cæsalpi-*  
*nus laboret in inuenienda in sanguine menstruo materia alba, si*  
*in vtero in conceptione corpulentiam seminis habemus albam, &*  
*ad generationem fœtus aptissimam? Potest certè ab hac inue-*  
*stigatione supersedere. Imaginatur etiam hic vir, cor fœtus per-*  
*ficere pro generatione partium, sanguinis portionem pituitosam,*  
*quæ in corpore matris perfici nequiuit. Videbat enim Cæsalpi-*  
*nus quantum laboris impenderet per hanc suam positionem ipsi*  
*naturæ, quæ ex inconcocto, & frigidissimo succo partes albas*  
*generare debebat, cum inconcocti succi à natura regi haud va-*  
*leant, antequam concoquantur. At hæc est imaginatio falsa.*  
*Nam prima stamina cordis fibrosa, quæ sunt illius fundamenta,*  
*sunt alba. ergo ex materia alba generantur. à quo ergo materia*  
*illa alba perficietur, si nondum cor fœtus est formatum, sed pri-*  
*ma tantum illius stamina delineari incipiunt? Requiritur hic vt*  
*studiosi sciant quæ sint partes, quæ primæ in fœtu generantur, &*  
*modum, quo cor, & reliqua viscera generari incipiunt. Pro*  
*quorum resolutione recurrant ad Gal. lib. de fœt. format. cap. 5.*  
*& ad doctissimum Andream Laurentium 2. op. anat. quæst. 26.*  
*& duabus sequentibus. tantisper etiam tolerant, donec ad cap. 6.*  
*huius secundæ partis deueniamus. quod enim ibi de generatione*  
*iecoris dicemus, idem de cordis, & reliquarum partium genera-*  
*tione dicendum erit.*

1 *Sed denuò hic se opponit nobis Conciliator. Nam vel ex ver-*  
*bis*



Bis ipsius Gal. putat se probare arteriam, venam, nervum, & alias partes exanguis ex sanguine, non ex semine generari. Verba sunt in 3. c. 2. lib. de facultatibus natur. Scribit ibi Gal. Natura nullius materiae veterem formam servat: quippe ita sanguis essent cunctae animalis particulae, is scilicet, qui à matre confluit ad maris semē una uniusque formae materia, cera vice artificii subiecta. Nulla vero animalis partium pro ea ratione ex hac, rubra, humidaue efficitur. siquidem os, cartilago, arteria, vena, adeps, glandula, membrana, medulla, exanguia quidem sunt, ex sanguine tamen facta. Et paulo infra. haec alia leguntur. At quid erat semen? principium animalis efficiens: materiale namque menstruum est sanguis. Ex his duobus locis habemus partes exanguis ex menstruo gigni, & semen esse efficiens. Hanc in Gal. dictis repugnantiam adducit quoque doctissimus Andreas Laurentius lib. 2. op. anat. q. 17. Sed ut ingenue fatear parum in ea est immoratus, & quam brevissimis verbis se ab illa expedit, quamvis meo iudicio res sit digna exactiori examine.

Iulius Alexandrinus vir Gal. valde addictus, de eoque certè optimè meritis, ob pugnam adversus Argenterium pro ipso susceptam, in suis annotationibus hanc in Gal. scriptis repugnantiam diffusè tollit sic scribens super primam allatam orationem.

Ad hominem argumentum, quod dici solet, hoc erit: quippe ex Ar. familia Erasistratus, cum quo nunc Galeno res est, non negaturus (quia Ar. quoque ita senserit,) ex sanguine ortum suum ducere ista. quae cum tam à sanguinis natura diversa sint, necessario ex magna immutatione, & alteratione talia fient: ut propterea virtutem, ac facultatem (quod ille volebat) haec ipsa effecta reddentem, in semine locatam supponere sit pernecessarium: semen enim effectoris, formantisque vim retinet apud Ar. ut materiae vicem menstruum. Ex concessis igitur habebitur argumentum hinc. Nam re vera ex semine procreari cuncta haec, utique ex idonea maximè ad id materia, edocti sumus à Gal. alibi quod ipsum tamen, semen inquam, ex sanguine est. ut si hoc iam nomine alio quodam modo ex sanguine rursus oriri quis haec dixerit: quia ex sanguine semen, ex quo demum haec, non pessimè dixisse existimandus sit. Sed & ob id, quod pauca sit, quae



## Mundini Mundinij

que in vterum projicitur, seminis quantitas, ipsum autem interea  
ex sanguine alatur, augeſcatque, ex sanguine gigni, formarique  
partes propè affirmare alicui liceat. Non eſt nobis de nihilo fi-  
cta hæc loci huius explicatio. Sed auctorem habet Gal. ipſum-  
met, hoc ipſum ſcribentem primo in Hipp. libellum de nat. hum.  
Adducamus nos verba Galeni. Quum vero ſanguis dicatur bi-  
fariam (inquit Gal.) alius quidem, quem vel ſecta vena, vel vul-  
nere inflicto profluere videmus, qui & vtriuſque bilis, vt oſten-  
dimus, & pituitæ particeps eſt: alius purus, & integer, & cuius-  
que mixturæ alterius humoris expers: porro ex ſanguine priorẽ  
ſignificatu fætum formari fortasſe verum eſt: non ita tamen ve-  
rum eſt, quod ex eo iuxta alterum ſignificatum: neque enim is ſo-  
lus unquam in prægnantibus gignitur. Cur autem (fortasſe) in  
ſermone adiecerim, nequaquam vos fugere puto. In commenta-  
tarijs ſiquidem de ſemine monſtrauiſus plures noſtri corporis  
partes ex ſemine gigni, cum ſolæ carnoſæ ex ſanguine efformen-  
tur. quoniam vero exigua eſt ſeminis in vterum iniecti moles:  
nutrimētum, ac incrementū illi ex ſanguine accedit. ob id ergo po-  
teſt aliquis dicere, parum abeſſe, quin partes ex ſanguine vniuer-  
ſæ formentur. Quò autem & ſemen ſuum à ſanguine ortum ha-  
bet, eò & affirmauerit ex ſanguine fætum gigni non videbitur  
mentiri: vt tamen non ex ſincero quidem ſanguine, & alijs hu-  
moribus vacuo, ſed ex eo potius, qui ſanguis per excellentiam di-  
citur.

Ad orationem vero Gal. 2. loco adductam reſpondet Iul. Alex.  
quòd ſemen non ſolum efficiens animalis principium eſt, ſed mate-  
riale etiam. & hoc determinatum fuiſſe à Gal. in lib de ſem. Qua-  
re licet aſſerat hoc in loco ſemen eſſe efficiens, non tamen negare  
eſſe etiam materiam. Vnde diuerſum quidem ab ijs, quæ ſcripſit in  
lib. de ſemine dicere, ſed non contrarium. Ex quibus exactiſſimè  
ablatam in Gal. dictis omnem repugnantiam ex ſtimo; & conycc-  
re ſtudioſi poſſunt, quàm parum Conciliator in doctrina Gal. ver-  
ſatus fuerit; cum tamen, poſtquam munus conciliandi ſuſceperit,  
unde Conciliatoris nomen adeptus eſt, ipſum in ea verſatiſſimum  
eſſe decebat.



Afferuntur duæ aliæ Gal. rationes contra  
Ar. & vna Costæi. atque ostenditur  
cas contra Ar. non conclu-  
dere. Cap. V.

**E**Xtant duæ aliæ rationes Gal. contra Ar. quarum primam adducit lib. 1. de sem. cap. 5. alteram vero cap. 9. eiusdem lib. Videamus earum efficaciam. Prima ergo ratio est huiusmodi. Aristotelem facientem vuluam semen eijcere, menstruum vero retinere, operibus naturæ aduersari. quando quidem unaquæque animalis particula facultatibus naturalibus fuit donata, ut eo perfruatur, quod attrahit, & id expellat, quod sibi alienum est. Cum itaque uterus in conceptione semen ad se se attrahat, & arctè circumquaque amplectatur, id efficit, propterea quod est ei familiare, & accommodatum. Pariter cum idem uterus singulis mensibus menstruum excernat, non illud peragit, nisi quia est ei alienum. Cum ergo per Ar. in fœtus generatione uterus semen reijciat, menstruum vero retineat, sequitur quod reijciat id, quod est ei familiare, & retinebit quod est ei alienum. hoc autem operibus naturæ aduersatur. Non ergo ex menstruo sanguine, sed ex semine fœtus generabitur. Imaginatus est Gal. Peripat. huic rationi posse respondere. Menstruum alienum quidem utero esse, sed tamen à semine qualitatem recipere, qua proprium, & accommodatum ipsi efficitur. Contra Instat Gal. menstruum non acquirere qualitatem à semine, quam prius semen in se non haberet. Cum nil alijs exhibeat, cuius particeps ipsum prius non fuerit. vnde si responsio allata vera esset, sequeretur naturam eo, quod proprium per se, atque accommodatum fuerat, expulso, quod ab alio aptitudinem accepit, eligere. quod naturæ instituto repugnat. Deinde dicit Gal. Ar. qualitatem ipsi menstruo ex semine non tradere, sed motionis principium solummodo exhibere. Perinde ac miraculis contingit illis spontinis, quæ sua constitutione seruata, ex sola huiusmodi principij cōsequutione, in motu diutissime



## Mundini Mundinij

*sine perseuerant . quapropter neque etiam licet affirmare menstruum, secundum Ar. qualitatem aliquam accipere ex semine, ex qua fiat utero familiare . quia solum accipit motionis principium . Atqui non ex motu, sed ex qualitatis congruitate, vel incongruitate, aliud eligere, & continere, aliud auersari, ac propterea eijcere naturam videmus . Sed parcant mihi Gal. Manes . Volo ego personam Peripat. sustinere, & Ar. tueri . Amicus Socrates, amicus Plato, magis amica veritas . Primo ergo non dicit Ar. utrum semen reijcere, ut per auctoritates supra cap. 1. & 3. adductas licet intelligere ; sed ipsum in spiritum versum, sua sponte euanescere . Secundo non respondebit Peripat. ut Gal. ipse existimauit . Sed dicit sanguinem menstruum, qui singulis mensibus excernitur, impurum esse, & utero, & naturæ alienum (ut docuit doctissimus Fernel. lib. 7. phisiot. 7. ) at qui ad conceptionem concurrit, purus, & sincerus est, atque ideò utero non alienus . Tertio dicit, ut ostendi supra cap. 1. & cap. 3. vel ex ipsius Gal. sententia, non utrum hunc purum sanguinem menstruum in cavitatem propriam in conceptione attrahere ; sed semen in eadem contentum istud præstare . Quarto non tantum huic puro secundum Ar. à semine principium motionis inditur . ut Gal. dicit, verum ut supra cap. 1. ex Ar. monstrui multifariam immutatur, & cogitur . Sed præter eas auctoritates audiant studiosi, quæ in 4. de gen. an. 1. habentur . Cum enim principium non superat, neque concoquere potest propter caloris inopiam, neque ducit in suam formam, sed tantisper superatur, mutari in contrarium, necesse est . Sic eodem lib. cap. 3. Degenerat autem quod patitur (hoc menstruum est) nec superatur, aut defectu facultatis eius, quod coquit, & mouet, (hoc semen est) aut copia, frigiditateque eius, quod concoquitur, & distinguitur . Semen ergo secundum Ar. in utero ei aculatum elicit ex venis ad uterum tendentibus sanguinem purum, ipsum coquit, alterat, immutat, cogit, principium motionis ipsi infert, deinde versum in spiritum, sua sponte euanescit. quæ omnia sunt valde diuersa ab ijs, quæ in adducta ratione Gal. Ar. imposuit . Sicuti ergo conceptus, ex sanguine menstruo puro iam formatus, non est utero alienus, nisi tempore exclusionis . Sic nec in prima illius ad partium formas dispositione*



none ipsi molestum, & alienum esse verisimile *Ar. est*. Per quæ  
Gal. ratio infirma remanet.

Deueniamus ad alteram rationem, quam contra *Ar. lib. 1. de  
sem. cap. 9. Gal. adducere dixi*. Galenus ergo increpat *Ar. hoc  
pactò*. Si per *Ar.* semen plantarum omnium, non solum mate-  
riale principium, verum etiam efficiens in se habet, Cur de semine  
animalium perfectorum idem dicendum non est? Etenim cum  
natura non alijs facultatibus plantam, alijs animal soleat creare,  
eademque ratio seruetur in generatione plantarum, ac ipsorum  
animalium, cur id, quod in plantis confessus est *Ar. ad animalia  
quoque non transtulit*? An oblitus in hoc fuit suorum dogma-  
rum? In plantis semen indiget terra, ut calore illius fotum, vis,  
quæ in eo delitescit, suscitetur ad agendum. Vnde videmus ex  
medio semine duplicem germinationem. alteram quidem in trun-  
cum, & ex trunco in ramos, ex his in surculos donec ad minimas  
virgas, & minutissima flagella deueniat. alteram vero deorsum  
in radices magnas, ex his in minores usque ad minima capilla-  
menta, quæ ex terra alimentum suscipiunt. Sic propemodum se-  
men maris vtero fœminæ, qui terræ proportionem respondet, habet  
opus. Membrana chorion multas venas veluti radices continet,  
per quas fœtui ex vtero alimentum subministratur. Pariter in fœ-  
tu animalis non unicum, sed tres præcipuos truncos ex tribus cer-  
tis principijs productos cernere licet. venam scilicet cauam ex  
hepate. ex corde magnam arteriam, quam aortam *Ar. vocat*.  
Ex cerebro, spinalem medullam. ex quibus multæ deinde propa-  
gines primum maiores, deinde minores consurgunt, donec tandem  
huiusmodi propagatio ad extremas, & minimas soboles deueniat;  
ut fœtus animalis in vtero non ineptè sanguinea planta nominari  
possit. Si quis vero putet se hanc Gal. rationem, & similitudinem  
posse euertere, & *Ar. tueri*; propterea quod, ex vno semine fiat  
planta, quæ vna tantum facultate Vegetali prædita sit. ex altero  
autem fiat animal, quod præter huiusmodi qualitatem, alijs quo-  
que facultatibus præditum sit. ex quo colligat semen quidem  
plantarum & efficientis, & materiæ principium continere, semen  
vero animalis propter plures facultates, & perfectiones id conse-  
qui non potuisse. Huic tacitæ Gal. obiectioni occurrit dicens *Ar.*



## Mundini Mundinij

ipsum non negare fœtum in vtero primum viuere vita plantæ, deinde animalis. (hoc expressit Ar. 3. de gen. an. 2. & declarauit etiam quomodo intelligendum sit. Unde etiam 2. de gen. an. 3. dicebat philosophus fœtum non simul fieri plantam, & animal; neque simul animal, & equum). quo circa tam planta, quàm animal eundem opificem, eandemque vegetabilem animam habere formantem; atque eo tantum inter se differre, quod planta sanguinea, vel carnea, non amissa, quam prius habebat, facultate, sed alia insuper acquisita in animal erat euasura, ac suo tempore de loco in locum transitura. Cum ergo plantæ, & animalia, quatenus pertinet ad generationem, nutritionem, & auctiorem, una atque eadem ratione producantur, constet vero, semen plantarum non solum efficiens, sed etiam materiale principium continere, utique coactus est Ar. idem de semine animalium perfectorum statuere.

Tantum equidem potuit hæc ratio apud Oddum, & Excellentissimum præceptorem, & conciuem meum Alexandrum Masaria, ut Oddus valde licentiose lib. 3. suæ Apol. pro Gal. cap. 5. affirmauerit Ar. pugnancia scripsisse. Masaria vero non erubuerit pronuntiare in lib. de morb. mul. cap. 5. illam contra Ar. demonstrare. Sed iterum hic mihi & Gal. & illorum duorum virorum Manes parcant. dum de obliuione Ar. arguunt, ipsi, vel de eadem, vel de incuria sunt valde increpandi. Heus viri unde quaque doctissimi, cur Ar. statuit in semine plantarum, & materiale, & efficiens principium contineri? Quia statuit etiam in illis vtrumque sexum, maris scilicet, ac fœminæ coniunctum esse, eandem plantam vim maris, & fœminæ in se habere. Quid ergo mirum semen plantarum continere in se materiam, quæ à fœmina in animalibus prouenit, & simul efficiens ipsum, quod in eisdem à mare per Ar. tribuitur, si in una, & eadem planta vterque sexus conuinctus est? hoc autem in animalibus contingere non posse, in quibus natura marem à fœmina distinxit? Hæc est vera ratio diuersitatis de semine plantarum, & animalium. semen ergo plantarum est veluti aggregatum ex semine maris, & fœminæ sanguine menstruo secundum Ar. & est conceptus quidam. ut in auihus est ouum fœcundum, non autem ut semen in animalibus,



bus, quod teste Ar. à mare tantummodo emittitur. non ergo mirum si in generatione & materia, & efficiens sit. Debebat ergo Gal. ostendere semen maris proportionem semini plantarum respondere; scilicet idem esse semen maris in animalibus, ac semen plantarum in plantis. cum vero in eo sermone versetur, ut velit probare semen maris habere in se principium materiale, & in sua probatione supponat ipsum semini plantarum proportionem respondere, in quo continetur & id quod à mare, & à fœmina ad generationem tribuitur, quia in plantis uterque sexus mixtus, & coniunctus est, non ne assumit pro certo, quod probandum est ab illo, & negatur ab Ar.? Nulli dubium est. quod, cum ex semine plantarum, non solum ut efficiente, sed etiam ut materia planta generetur, si animalium seminis, quod à mare tantummodo secundum Ar. tribuitur, eadem esset ratio, ac seminis plantarum, haberet in se materiale principium. Sed quod non eadem sit ratio docet Ar. quia in semine plantarum adest materiale principium fœminæ, & efficiens maris. adeo quod dicet, si ex eo, ut materia, generatur planta, generari quâ planta, ut fœmina, illud produxit, non quâ mas. at de semine animalium hæc dici non possunt, quia solum à mare procedit. Omnino sicuti ex generatione plantarum elicitur in conceptibus plantarum & efficiens, & materiale principium contineri; ita elicitur utrumque principium, non in seminibus animalium, sed in conceptibus eorum necessario esse, quod Ar. nunquam negavit. Sed melius est ut totam ex Ar. orationem de hac re transcribam ex fine primi de gen. an. Sexus igitur maris, ac fœminæ distinctus in genere omnium animalium gressilium est. & quanquam diversa sunt animalia mas, & fœmina, tamen specie idem sunt, verbi gratia homo utrumque. at in plantis facultates istæ miscentur, nec mas à fœmina separatur. quamobrem ex se ipsæ progenerant, nec genituram emittunt, sed conceptum, quod semen vocatur, afferunt, idque Emp. bene retulit suo carmine.

Deinde etiam ouiparo genus arboreum tulit ortu. ouum enim conceptus est, & animal ex parte eius creatur, reliquum alimentum est animalis: seminis etiam aliqua ex parte consistit, quod oritur: reliquum alimentum germi, radicique primæ est.



## Mundini Mundinij

5, *mæ est. Hoc idem quodammodo in ijs etiam euenit animalibus, quæ*  
,, *sexu distinguuntur. Cum enim uniuntur, & generant, inseparata*  
,, *redduntur, ut plantæ. idque natura eorum nititur, ut vnum fiat.*  
,, *quod cum coeunt, & coniunguntur, conspicitur vnum effici ani-*  
,, *mal ex ambobus, atque ea, quæ semen non emittunt diu complexæ*  
,, *funguntur venere, dum conceptum constituent: ut insecta, quæ*  
,, *solent coire. alia tamdiu exigunt, donec partem aduentitiam*  
,, *quandam mittant, quæ conceptum constituat spatio temporis lon-*  
,, *giore, quàm in sanguineo genere agatur. Hæc enim parte qua-*  
,, *dam diei cohærent: genitura intra plures dies constituitur: mox*  
,, *vbi eam emiserunt partem absoluuntur. Profecto animalia*  
,, *tanquam plantæ decisæ esse videntur; perinde quasi illas quoque,*  
,, *postquam semen attulere, dissoluas, & separes in sexum insitum*  
,, *maris, ac fæminæ. Atque hæc omnia rectè ita à natura condita*  
,, *sunt. Plantarum enim substantiæ non aliud munus, nulla alia*  
,, *actio, nisi generatio seminis est. Quod cum maris, ac fæminæ*  
,, *coitu efficiatur miscuit ea natura, indiscretumque sexum maris,*  
,, *& fæminæ plantarum generi tribuit.*

*Hic mihi non dicat aliquis Galenum rationem suam adducere*  
*non de semine maris tantum, sed de seminibus maris, & fæminæ*  
*simul mixtis. Nam Gal. loco citato illud agere contendit, ut pro-*  
*bet semen maris passuum in se principium continere, & omnes au-*  
*ctores etiam, ut Oddus, & alij hoc argumento Gal. vtuntur adhuc*  
*idem ostendendum. Deinde si sic res se haberet, aduersus Ar.*  
*ratio Galeni nil valeret. Nam Ar. concedet in miscella seminis*  
*maris, & fæminæ materiale principium contineri: Verum istud*  
*non à mare, sed à fæmina provenire asseuerabit. Gal. autem in*  
*eo versabatur nunc, ut istud à mare provenire aduersus Ar. mon-*  
*straret. Concludamus ergo rationem Galeni concludere de con-*  
*ceptu animalium, non de illorum semine. Quibus omnibus sic stan-*  
*tibus videtur ne tibi studiosè lector Ar. de obliuione arguendus?*  
*Sed valde ego de Oddo miror, qui tantum sibi tribuit, ut Apolo-*  
*giam pro Gal. composuisse sibi persuaserit, & tamen nil aliud in ea*  
*agit, quam omnia ad uerbum ex Galeno transcribere, nil ferè sui*  
*addendo; non animaduertendo quid firmiter, quid minus firmiter*  
*à Galeno prolatum sit: non adducendo quid Peripatetici respon-*  
*deant,*



deant, respondereque possint. Si hoc est Apologias componere iudicent studiosi.

Sed quandam aliam rationem Costæi lib. 5. disqu. Physiolog. contra Ar. perpendamus. si sola vis in semine maris residens ad generationem animalium perfectorum sufficeret, corpulentia autem eius materia fœtus non fieret. ut Ar. vult, quid opus esset non solum vim, sed substantiam seminis in vterum transferre? quo pacto enim in aliquibus animalibus voluit Ar. fœminas solam vim in coitu sine corpulentia excipere à maribus, ita perfectioribus animalibus consultum iri videretur, si citra emissionem humoris illius, cuius absumptio tantam sæpe affert vitæ iacturam, mas in fœminam solam vim, spiritum, vel vaporem in vterum immisso, spiraret. oportet ergo ut seminis maris corpus pro materia fœtus inseruiat. Imò Costæus solum corpus seminis marium, non semen fœminarum, materiam partium fœtus albarum esse statuit.

Huic rationi fidere non debent studiosi. Nam & simpliciter, & in doctrina Ar. commodè euerti potest. simpliciter euertitur. quia, ut dicam infra cap. 7. in solutione sextæ rationis Ar. certò scire aliquis non potest, utrum, dum insecta animalia coeunt, & fœmina particulam vulvæ respondentem in marem indit, à mare suscipiat vaporem quendam vim formatricem in se continentem, an vero humorem aliquem. Quis enim scire potest, cum insecta in coitu uniuntur, quomodo se res in illis habeat? Hæc res ergo sensui latens est, & soli naturæ cognita. Malo autem ego ea, quæ in perfectis video animalibus, ut pote sensui patentia, ad imperfecta transferre, quam ex ijs, quæ in imperfectis mihi incerta sunt, & imaginaria solum, velle arguere de ijs, quæ in perfectis fiunt animalibus. Cum ergo videamus in perfectis animalibus in fœminam corpulentiam seminis à mare immitti pro generatione animalis, affirmabo intrepide, idem in imperfectis fieri. Et sic respondebo etiam sextæ rationi Ar.

Quod si velimus affirmare cum Ar. 1. de gen. an. cap. ultimo vaporem solum quendam, non humorem fœminam in insectis à mare in coitu excipere (nolo enim ut aliquis imaginetur voluisse Ar. nudam vim generantem à mare fœminam in his accipere: tritum est illud, formas non posse de uno in alterum corpus migra-



## Mundini Mundinij

re sine aliquo subiecto) potest respondere *Ar. insecta animalia per multum temporis spatium simul vnita in coitu manere, quousque fœtum constituent, quapropter paulo post coitum, partum edunt, siue sit ouum, siue vermiculus; animalia vero perfecta pauco tempore simul manere in coitu. Unde, si in his spiritus solum quendam mas in vterum spiraret, non ea efficacia vim, & efficientiam sanguini menstruo tribueret, ut requiritur. Facile enim spiritus ille euanesceret, qui in generatione tamen opifex est. Quapropter opus fuit corpore aliquo, quod spiritum contineret, & hoc seminis maris corpus lentum, crassumque est.*

**A**fferuntur quædam propriæ rationes ostendentes semen maris pro materia fœtus inferuire. & nonnulla difficilia dubia remouentur. Cap. V l.

**A**fferam ego, ni fallor, quasdam rationes, quæ satis clarè ostendent semen maris in generatione animalis materiæ locum habere. Manifestissimum est per ea, quæ in prima parte huius disputationis attuli, semen maris, & fœminæ easdem notas habere, esse eiusdem substantiæ, & naturæ, eodem modo generari. Nam tam in mare, quam in fœmina eadem organa præparantia, & excoquentia, & eiaculantia reperiuntur, sola vero maioris, & minoris differentia inter se differre; quod semen maris sit perfectius, calidius, crassius semine fœminæ. At fœmineum semen materia fœtus est. cur ergo seminis maris corpulentiam, & crassamentum negabimus materiam esse? Fœmineum semen fœtus materiam esse probatur. Nam omnes determinant fœminam materiam in generatione fœtus tribuere. at sanguis menstruus non potest esse partium albarum fœtus materia, ut supra ostendimus in hac parte cap. 3. & 4. ergo materia illarum, fœminæ semen erit. Videtur ne tibi studiosè lector, quod ad solidas, & vocatas seminales partes corporis generandas fœmineo minus aptum sit masculinum semen, quod illo magis crassum, lentum, & tenax est?

Quæ



Quæ nam ratio est, à Peripatetice, ut semen maris crassius, viscidius aboleatur, & extra uterum dissipetur, femina vero tenuius, frigidius à dissolutione se vindicet, & in utero perstet pro materia fetus?

Observamus secundo loco. quod si caper ouem inierit, generatur ovis duriori, & crassiori lanitio: econtra si capram aries, capra molliori, & tenuiori pilo gignitur. Pili oriuntur ex cute, & varij sunt pro varietate illius; ita Ar. 5. de gen. an. 3. docet. Ita confirmant omnes, & præcipue doctissimus, & de Medicina optime meritus Saluus Selanus in pulcherrimo sermone de natura pilorum, habito in com. super secundum art. Medic. lib. tex. 18. & 21. cutis per Ar. ex 2. de gen. an. 3. in fine, ubi de ortu eius loquitur, fit, humore ex materia, ex qua constituitur fetus, euaporante, ut in pulte refrigerata oritur crustula. cutis ergo ex materia, ex qua constituitur fetus secundum Ar. generatur. Talis materia, si caper ouem inierit, non potest esse sanguis menstruus ovis, neq; capræ, si illi aries superuenerit. nam cutis est pars extensibilis, crassa, tenax: at ostensum est supra cap. 3. partes huiusmodi ex sanguine menstruo gigni nullo modo posse. ergo cutis ex semine vel ovis, vel capri generabitur, quando oui caper superuenit. non ex semine ovis. nam cutis partus ovis non est penitus oui conueniens; ut ex pilis colligitur, qui non sunt molles, ut pili ouium. non ex semine capri. nam diuersa etiam est à cute capri. non ex semine ovis alterato, & immutato à semine capri. nam semen ovis mutatur ne pro generatione cutis ad crassius, & viscidius? at ad quid natura institueret, ut semen ovis à semine capri ad crassius, & viscidius transmutaretur, si semen capri crassius, & viscidius est? non fit aliquid à natura per plura, quod potest æque bene fieri per pauciora, ut dixi etiam supra. ergo ex semine utriusque generatur, & sic semen maris simul cum semine feminae concurrat pro materia in constitutione fetus. Sicuti vero se res habet de cute ipsa, ita de alijs partibus internis eiusdem cum cute generis se habere quis vetat? ergo non solum efficiens principium semen maris in se habet, verum etiam materiale. Eandem rationem deduces quando aries capræ concreditur.

Desumo tertio loco alteram rationem ad probandum semen  
masco-



## Mundini Mundinij

masculum pro materia partium fetus inseruire ex quibusdam affectionibus filiorum hereditarijs. Observamus à patre epileptico filios epilepticos ut plurimum procreari. Epilepsia vero originem habet ab intemperie cerebri frigida. nam ab hac pituitosi humores generantur, qui angustiam postea in ventriculis cerebri promouentes, sunt in causa, ut vniuersi corporis actiones animales amittantur, & subsequantur convulsiui illi interpolati motus totius. Nascatur igitur ex patre epileptico, & matre sana epilepticus filius: cerebrum huius filij, à cuius intemperie epilepsia ortum ducit, vel habet hanc intemperiem à menstruo matris in prima formatione, aut primam formationem pro nutritione tributo, aut à semine matris, aut patris. non à menstruo ad primam formationem tributo. nam cerebrum est membrum exanguine, atque ideo ex menstruo non potest generari, ut cap. 3. & 4. de alijs exanguibus membris ostendimus. neque à menstruo tributo ad nutritionem post primam formationem. nam à sana muliere non nisi salubre menstruum prouenire potest. non à semine matris ob hanc eandem rationem; & quia *Ar.* in feminis semen non concedit. ergo à semine patris. Quid igitur? Imaginaberis ne semen patris, ut efficiens solum, malè afficere, & disponere semen matris, atque ideo cerebrum malè affectum, & dispositum ex semine matris oriri, ex ipso vero, tanquam ex materia, cerebrum non fieri? Sed hic parum siste; & considera primo, quod in *Ar.* doctrina hæc imaginatio admitti non potest. nam non agnoscit ipse in feminis semen, sed solum sanguinem menstruum. deinde considera optime substantiam cerebri, & substantiam seminis patris, & matris, & affer mihi causam, cur cerebrum generari possit ex semine matris, non patris? Cur magis sit accommodatum semen matris pro materia cerebri, quam semen patris; cum demonstratum iam sit in 3. cap. huius partis semen patris non posse extrahere, & ibidem, & sequenti cap. partes albas ex semine gigni? Nam cum ego nullam inuenire possim, & necesse sit cerebrum ipsum ex semine, non ex sanguine generari, & videam natum ex patre epileptico, & matre sana ad epilepsiam dispositionem habere, audacter pronuntiabo ex miscella seminis patris, & matris cerebrum huius nati epileptici factum fuisse; dispositionemque



uemque illam ad epilepsiam prouenire; quia ob defectum caloris seminis patris mixtura, ex qua cerebrum formandum erat, frigidior resultauit, quam naturæ cerebri sani conueniat; proinde intemperatum ex illa genitum fuit, & subinde aptum ad pituitosos humores producendos.

Sed mihi à quodam meo amico, quo cum hac mea communica-  
bam, & qui mordicus sectam Peripateticam sequitur, obiectum  
fuit. magis accommodatum esse semen matris pro materia cere-  
bri, quam semen patris. Nam cerebrum partium omnium cor-  
poris, teste Ar. 2. de part. an. 7. frigidissimum est: at semen ma-  
tris frigidius est semine patris. magis ergo accommodatum est  
semen matris pro generatione cerebri, quam semen patris. Huc  
ut peruenirent Peripatetici expectabam. Audiant ergo studiosi.  
Si hæc ratio Peripateticorum valet, ostendo ego magis accommo-  
datum esse pro generatione cerebri semen patris, quam semen ma-  
tris. Nam re vera studiosi possunt discere ab Auic. prima pri-  
mi doct. 3. cap. 2. & ab interpretibus super illud caput, ossa, carti-  
lagines, ligamenta, tendines, membranas, nervos, spinalem me-  
dullam cerebro frigidiores esse. ergo per eorum rationem semen  
matris, ut frigidius semine patris, magis accommodatum erit pro  
generatione membrorum cerebro frigidiorum, & semē patris ma-  
gis accommodatum pro generatione cerebri, ut membri minus il-  
lis frigidi. Cum dico nunc semen, per illud corpulentiam seminis  
intelligo. Dubitas ergo forsitan corpulentiam seminis maris frigi-  
dam esse, proinde aptam pro generatione membri frigidi? Re-  
curre ad Ar. 2. de gen. an. 2. qui te docebit semen, secreta illius  
parte spirituosam, quæ efficientis in generatione locum tenet, refri-  
gerari, humidum, nigrumque euadere, illius remanere aquam,  
cum pauca terrena portione. Si igitur frigiditas, ut velle viden-  
tur hi, est sufficiens dispositio pro generatione cerebri, patet nil  
nobis obstare posse, quin semen patris accommodata materia sit  
pro generatione cerebri filij epileptici. Sic ego de affectu epile-  
ptico paterno hæreditario rationem redderem, neque puto aliam  
posse probabiliorem reddi. Si quis vero alius mihi modus firmè  
respondendi ab aliquo ostensus fuerit, pergratum mihi erit, pro  
nullaque statim rationem hinc à me deductam habebo; unius enim



## Mandini Mundinij

veritatis amore hæc scribere sum aggressus . Quod autem ego de epileptico affectu induxi, poterunt studiosi facillimè de alijs hæreditarijs affectibus à simili inducere . Cum ergo non possimus reddere probabiliter rationem de morbis paternis hæreditarijs, nisi supponamus patris semen fœtus materiam remanere, concludam contra Ar. & sectatores, semen maris non solum efficiens, verum etiam materiale principium in se continere . Per hanc quinetiam rationem, si inducant studiosi morbos maternos hæreditarios, qui pendent ab alicuius membri exanguis intemperie, vel, ut aliqui volunt, substantiæ proprietate, non invalidam, ut putato, rationem habebunt, ad demonstrandum fœminas semen generare, & materiam fœtus illud esse, si attentè animum adhibuerint .

Sed statim huic rationi obijciat aliquis . Sunt paternæ quædam hæreditariæ indispositiones, quæ pendent ab aliquibus membris, quæ ex sanguine materno gënita sunt ; & inter has recensebo calculosam renum affectionem, & intemperiem iecoris calidam, per quam filius patietur per hæreditatem paternam in facie varros . Renes, & iecur sunt partes, & rubræ, & sanguineæ . ergo paternæ affectiones filiis imprimuntur per alterationem à semine in sanguinem menstruum factam, absque eo, quod semen patris materia filiorum generationis sit . Pro responsione, non nego ego calorem acriorem existentem in semine patris calculosi, vel intemperiem calidam iecoris patientis, posse calorem acriorem in menstruo, ex quo iecur, & renes fœtus fiunt, imprimere, atque ideo filium nasci paternas intemperies vel renum, vel iecoris patientem, proinde calculo renum, & varris in facie subiectum esse . Sed multa quoque me docent, ut patefeci cap. 4. calorem eundem, qui opifex fuit in generatione renum, & iecoris fœtus, ex corpulentia seminis patris mixta cum corpulentia seminis matris, non ex menstruo, formasse prima stammina, & fundamenta & iecoris, & renum . hæc sunt venæ per substantiam iecoris, & renum sparsæ . Ergo per alterationem quidem à calore seminis patris in menstruum factam, oritur filius paternas gerens indispositiones partium sanguinearum, sed non aq̃sque eo, quod corpulentia  
seminis



*seminis patris materia generationis filij sit. & possunt Peripatetici saluare affectiones filiorum paternas hereditarias membrorum rubrorum, per solam alterationem à semine patris in menstruum factam; sed non possunt saluare postea generationem primorum staminum, & fundamentorum horum membrorum; & adhuc minus per eam possunt saluare paternas filiorum affectiones hereditarias membrorum alborum, vt nunc de cerebro induxi. nam hæc membra non sunt genita ex menstruo, sed ex semine. Sed cur magis ex semine matris, quàm patris, à quo filius habet illorum affectiones? Si ignorant studiosi iuniores quomodo venæ sint prima stamina, & fundamenta iecoris, non grauentur recurrere ad Gal. lib. de fetus form. cap. 5. & ad doctissimum Saluum selanum super 2. art. Medi. lib. tex. 12. pag. 285. nec non ad doctissimum nostrum Andræam Laurentium 2. op. anat. locis supra in calce cap. 4. citatis. ab his enim clarè discent non iecur, aut cor primo formari, sed primo venas, & arterias; & his postea formati attrahi per venas sanguinem, & ex ipso generari parenchyma iecoris; ex attracto verò sanguine per arterias, cordis parenchyma constitui. Iurè ergo venas fundamenta iecoris, & prima illius stamina nuncupauimus.*

*Est tandem, (vt nil ab aduersarijs excogitatum, saltem intantum, relinquam) altera dubitatio. Ex his enim, quæ à nobis hactenus stabilita sunt, apparet partes nostri corporis non ex vna, sed ex diuersis materijs fieri. aliquas enim ex sanguine, aliquas ex semine fieri statuimus. at videtur, quòd vnum corpus ex vnicà materià fiat, non ex pluribus. Sic dubitat Auer. com. ult. in primum de gen. an. Sed facilis est responsio. Etenim Gal. vult ex distinctis materijs diuersas corporis partes formari, non quidem, vt diuersis, atque inter se contrarijs, sed in vnum conspirantibus. Ita vt, si hæc quidem pro vna, hæc autem pro altera parte conueniens materia existat, omnes tamen in vnā communem materiam coeant, ex qua vna communis anima educatur.*



Quæ in contrarium allatæ fuerunt Ar.  
& sectatorum rationes euertuntur.

Cap. VI.

**R**estat, ut euertamus rationes, quæ ab Ar. & sectatoribus contra Gal. & sectatorum sententiam allatæ fuere. Quantum ergo ad primum argumentum. Illud concedatur tanquam verissimum, idem simul agens, & patiens esse non posse, cum hac limitatione, ratione eiusdem; id est agens, quæ agens, non posse esse patiens. Dicimus vero in semine maris duas partes reperiri, alteram quidem tenuissimam, aeream, & spirituosam, in qua anima vegetalis, vis generandi, & principium motus est; alteram crassiorem, et magis corpoream, seu materiale, in quam fit actio. Unde nulli mirum videatur, semen secundum huiusmodi varias partes, cum agentis, tum patientis vires habere. Sicuti mirum, vel absurdum non est, edito animali, animam in corpus agere, & illud regere. Quamobrem sicuti artifex, & materia non idem sunt, ita nec anima seminis, & seminis corpus idem statuendum est.

Ad secundum dicimus. Semen, quæ opifex est, non esse materiam fœtus. neque enim vim generandi in semine contentam, neque seminis spiritus, fœtus partium materiam esse volumus.

Ad tertium exemplum illud de coagulo propositum nostrum admodum confirmat. Sicuti enim coaguli corpus in lacte, in quod agit, atque in caseo, quem densat, remanet. ut sæpè eius odor, & sapor, qui inter gustandum illum agnoscuntur, manifestant; ita & seminis quoque corpus in fœtu permanere confitendum est.

Ad quartum. semen coagulari non posse calore, vel frigore, ut extra corpus fidem habet ex sensu, ita in viuente corpore, & utero ipso cogi, non admirabitur ille, qui in memoriam reuocabit, generatim quidem concoctricis facultatis in corpore vniuerso eam esse efficaciam, ut quæ tenuiora sunt, crassa, quæ crassiora, tenuia, prout res postulat, paruo negotio reddat. Particulatim vero

tantum



tantum esse facultatis formatricis robur, ut non hoc tantum præstare valeat, quod externus quoque ignis, in lentam, crassamque materiam efficere solet, cum pulvis indurat, & membrana obducit, sed materiam in opportuna loca pro rei usu sapientissime distribuere, excavare ossa, venas arterias, passim incredibili artificio meatus aperire, & formam partibus quibusque suam inducere.

Ad quintum, in quo communissima propagationis ratio quaeritur. Dico communissimam conditionem omnium animalium, quæ per coitum propagantur, esse, ut mas semper materiam, & corpus seminis tribuat, non solam illius vim, quemadmodum supra ostendi cap. 5. dum pro Ar. respondebam rationi Costæi. Quapropter quæso studiosi illuc recurrere non grauentur. Insecta vero diu coeunt, & fœmina in illis partem utero respondentem in maris corpus immittit mea quidem sententia. quia insecta animalia sunt frigidissima. adeo quod, si semen à mare in corpus fœminæ immitteretur, ut in perfectis fit animalibus, partim præ frigiditate illius, partim, & multo magis præ frigiditate loci fœminæ, in quem recipitur, fœtum quantum vis imperfectum institueri non posset, sed penè gelasceret. necessarium ergo fuit. ut fœmina in insectis partem utero respondentem in marem immitteret, & diu in illius corpore detineret, ad hoc, ut talis pars sic in corpore maris conclusa, à calore illius foueretur, & sic intra se concipere posset. Iudicent modo studiosi an hæc à me excogitata ratio, ob quam fœminæ insectorum particulam sui in mares indant, & diu coniunctæ cum illis maneant, sit probabilis, nec ne.

Ad sextum. Si verisimile non est Ar. & sectatoribus, dum post congressum galli cum gallina, ova ea, quorum luteis nondum album est aggeneratum, fœcunda redduntur, materiam aliquam seminis illis ovis à gallo immitti, verum fœcunditatis vim solum infundi; Hipp. Gal. & toti Medicorum scholæ valde verisimile videtur id ita contingere. Quapropter quantum valet illi negatio, tantum his affirmatio. Sed studiosi possunt hic recurrere ad ea, quæ in fine ultimi cap. primæ partis huius disputat. de ovis dixi.

Quod ait Ar. de piscibus maribus, qui sola aspersione seminis  
supra



## Mundini Mundinij

supra oua, fœcunda ipsa reddunt, à veritate mea sententia est alienum. Ego in piscibus rem ita se habere iudico. Coeunt pisces mares cum fœmellis, & hoc docuit etiam Ar. 5. de hist. an. 5. & 6. cap. 11. & 13. & 1. de gen. an. 6. in illasque semen emittunt. Ex mixtis utrisque seminibus in utero fœminarum generantur oua fœcunda, & post adeptam debitam perfectionem in utero, excluduntur. Si debent fœtus ex ouis exclusis nasci in pennigeris, opus est ut incubentur: mutuo incubitus in piscibus, mares supra oua exclusa semen spargunt. unde insitus ouorum calor à calore seminis marium fœtus suscitatur ad agendum, & sic pisciculi ex illis formantur, quemadmodum in pennigeris insitus ouorum calor per incubitum fœtus in actionem erumpit. Meo igitur iudicio idem est in pennigeris incubitus, & in piscibus seminis supra oua aspersio; & quemadmodum in pennigeris oua fœcunda non sunt, nisi mares, antequam fœminæ ouorum luteis album aggenerent, cum illis coeant; & quamvis incubentur, pulli ex ipsis non generantur. ita me iudice quantumvis mas semen supra oua aspergat, ex illis pisciculi generari non possunt, nisi, antequam ipsa in utero fœminarum perfectæ sint, mares cum fœminis coierint; cuius enim rei gratia coeunt? Et quemadmodum in pennigeris nunquam oua excluduntur, nisi incubentur, aut aliquo alio calore simili incubitus calori foveantur, licet per coitum maris instituta sint: ita in piscibus nunquam oua, quamvis per coitum maris instituta sint, excluduntur, nisi mas semen super illa spargat, aut aliquo calore, qui tantumdem valeat, foveantur. Et si hæc probabilia, & rationabilia sunt, (nam alijs, an sint, iudicandum relinquo) nego in piscibus illis, in quibus mas super oua semen spargit, oua ipsa per solam talem aspersione fœcunda fieri, ut Ar. asserit.

Ad argumentum Casalpini. Dico misceri duas illas materias. causa vero cur debeant misceri ostendi in prima parte disputat. huiusce cap. 14. & multis alijs evidentijs infra per totum discursum. Nam si volumus reddere rationem de multis contingentibus circa generationem fœtus, oportet fateri semen fœminarum cum semine marium misceri in illius generatione. Dico ulterius ex illis duobus seminibus unicam materiam fieri, & unicum  
agens,



agens, ut in prima parte cap. 18. in responsione ad quintam rationem, etiam affirmavi. Unde non relinquitur Casalpio locus à me quærendi, an virtus utriusque sexus seminis in alienam, an in propriam materiam agat. Sed magis minutim consideremus illius rationem. Inquit Casalpius. Si misceantur materia maris, & materia femina, & virtus utriusque in alteram agat, in materiam maris perfectiorem aget imperfectior virtus femina, & hoc modo non ad perfectionem, sed ad imperfectiorem tendet generatio. Quis modus arguendi est iste? Parcat mihi iste vir, adest in hoc syllogismo fallacia æquiuocationis. Nam dū supponit imperfectiorem virtutem feminae agere in perfectiorem materiam maris, intelligendum est virtutem feminae esse imperfectiorem, non respectu materiae maris, nam respectu huius semper est perfectior, ut pote cum in ipsam agat, sed respectu virtutis maris. nam virtus feminae hac est imperfectior. & cum dicitur materia maris esse perfectior, dicitur esse talis respectu materiae feminae, quæ est imperfectior, non respectu virtutis feminae. In terminis ergo latet æquiuocatio, & ratio est nulla, & duplici modo peccat.

Ad deliramentum Argenterij. Dicamus conceptum in primo conceptionis tempore molem seminis ab utroque parente emissi non excedere, & ita pusillum in hominibus esse, ut dimidij pollicis digiti magnitudinē non superet, ut in abortibus paulo post conceptionem à doctis viris fuit observatum. Cur ergo ex semine semel à mare iniecto mixto cum semine feminae singularum spermaticarum partium prima stamina non effinguntur, quæ posthac alimenti perpetua appositione, & assimilatione, incrementum, & perfectionem suam capeffant?

Ad decimum fateor eandem esse materiam generationis, & nutritionis. Quando dicunt nutrimum sanguine. ergo ex illo generamur. Respondeo nutriri nos ex sanguine, sed diuersimode immutato. Nam partes spermaticæ nutriuntur ex sanguine, sed in semen immutato; partes sanguineæ vero ex sanguine parum alterato. Cum enim partes seminales sint factæ ex semine, nunquam sanguis eas nutrire poterit, nisi in semen conuertatur. Ita docet Gal. 14. de vs. part. 10. & 1. de sem. 12. Ita doctissimus Fernel. 7. physiol. cap. 2. ut alios doctissimos viros omittam. Eadem ergo est materia generationis, & nutritionis. quia partes, quæ sunt genitæ ex semine, nutriuntur semine. partes, quæ sunt genitæ ex sanguine, nutriuntur sanguine.



## Mundini Mundinij

Hic se nobis opponit Accorombonus, cuius annotationes in *Ar. dum* impressor ad finem huius 2. partis peruenisset, mihi in manus inciderunt, negans partes spermaticas ali semine ob duas rationes. quia scilicet deficit semen in animalibus in quibusdam ætatibus. nam in prima, & ultima ætate non generatur semen. ijs ergo temporibus quomodo illæ ex semine nutriri poterunt? & quia oporteret adesse vasa, quæ semen à testibus, in quibus illud conficitur, ad illas deferrent. vt iecur habet venas, per quas sanguis defertur.

Hæc procedunt ex mala intellectuione principiorum Gal. & Hipp. Nam partes spermaticæ aluntur semine, non accepto pro aggregato ex spirituosâ, & corpulenta parte seminis, & hoc est verum semen, sed accepto pro corpulenta tantum parte, ex qua genitæ etiam fuere, vt hætenus satis me explicauimus. patet autem quomodo in omni ætate talis corpulenta seminis pars ab omnibus partibus spermaticis in ipsarum nutritione possit generari, & quomodo non opus est testes generare illud semen, ex quo eæ omnes aluntur. ad quid ergo requiruntur propria vasa à testibus ad partes spermaticas tendentia?

Obijcit etiam hic author Galeno, qui ex albedine partium spermaticarum arguit earum generationem ex semine, quod ipse non inspexerit abortus fetuum. nam in his venæ, nerui, ossa sunt rubra, vt potè ex sanguine genita, non alba. Sed sciat hic author. quod hæ partes in fœtu utero gesto considerari possunt vel respectu carnosarum, & sic sunt albæ, cum tamè tunc, ob prohibitam difflationem sanguinis, quo coalescunt, rubescant; vel respectu habito ad se ipsas cum fœtus est extra uterum, & sic rubræ dici possunt. At Medici eas considerant primo modo, non secundo, & re vera sic considerari debent. Alia habet hic vir attinentia & ad hanc, & super: nostræ disput. partem, quæ ex iactis principijs facile à quouis reijciuntur, notatuque digna non sunt.

Ad vltimum respondeo. Principum partium parenchymata ex sanguine quidem generari, sed tamen earum prima stamina, & fundamenta ex semine, quemadmodum innui supra cap. 4. & in superiori capite ostendi.

Concludamus ergo quod in hac secunda parte intendebamus iuxta Veterum Medicorum sententiam, semen maris non solum principium effectuum, verum etiam passiuum in se habere.



# MVNDINI MVNDINII VINCENTINI

## DISPUTATIONIS,

In qua ea, quæ de semine sunt controuersa inter Peripat.,  
& Veteres Medicos, & doctissimos quosdam  
Neotericos discutiuntur,

## PARS TERTIA.

Propositio, & ordo dicendorum.  
Cap. Primum.

**H**ACTENVS Veterum Medicorum sententiam de semine maris, & feminae, à diuersis eam obiectionibus vindicando, illustrauimus, atque probabiliorem Ar. sententia monstrauimus. quo circa, & nos Veterum Medicorum sententiam sumus sequuti, & studiosis sequendam proposuimus. At quidam doctissimi Neoterici nec Veterum Medicorum, nec Peripat. opinioni acquiescere potuerunt. quare nouam in Philosophia, & Medicina opinionem introducere conati sunt, asserentes in perfectis animalibus, de quibus nostra est instituta disputatio, nec semen maris, nec femina concurrere actiue ad generationem, sed passiuè: efficiens vero esse calorem uteri, nec non eum, qui cum quadam vi à principijs internis matris per venas, & arterias uteri in fœtum distribuitur. Inouiparis vero esse calorem matris cubantis. Adeò ut soli feminae vis efficiens generarionis sit ascribenda. Deceptos hos doctissimos viros arbitror. Cum vero de semine disputandi laborem, eo precipuè consilio, ut studiosos iuuarem, neque promitte-



## Mundini Mundinij

rem eos sententias falsas amplecti, suscepim, neque debui, neque potui abstinere, quin horum virorum opinionem recenserem. sola enim auctoritate sua facile poterant multos in suam sententiam trahere; & mihi vitio vel ab ipsis doctissimis Neotericis versum fuisset; quòd de semine controuersias discutere proposuissem, & tamen eorum placitum diuersis rationibus muritum pratermissem. quare aut de industria me illud dissimulasse, aut ne vidisse quidem. primum arguere ignorantiam cum malitia, secundum negligentiam. Porro non expectent studiosi, ut doctissimos Neotericos proprio nomine appellem. nam statui gratia reuerentiae, qua illos prosequor, eorum nomini parcere. Quoniam vero Neotericorum opinio duas continet in se partes. in quarum prima habetur nec semen maris, nec fœminæ effectiue concurrere ad generationem. In altera vero in perfectis efficiens in generatione esse calorem uteri, vimque unà cum calore, ut diximus, à matre conceptui communicatam, vel calorem matris cubantis in ouiparis, talis erit ordo huius tertiæ partis nostræ disputationis, ut consideremus, primo, & ponderemus rationes, quibus probant primam partem suæ opinionis; dein de vero inspiciamus quibus fundamentis innitatur secunda.





Rationes, quibus Neoterici probant semina  
vtriusque sexus vi efficiente carere. so-  
lutiones earum & quarundam Fer-  
nelij interrogationum.

Cap. II.

**P**rimum Neotericorum argumentum, quo quaerunt astruere semen tam maris, quam feminae ratione efficientis carere, est huiusmodi. Idem non potest esse simul agens, & patiens: ac semina vtriusque sexus vi passiva donata sunt, ut statuunt Medici, & nos probauimus, & iterum affirmamus. ergo actiuam etiam vim habere non possunt.

Adiungunt. agens, & patiens specie semper diuersa esse, atque contraria saltem oppositione priuata. De hac ratione diximus in secunda parte huius disputationis cap. 7. Breuiter iterum respondeo. agens, qua agens, non posse etiam simul patiens esse. Anima seminis est agens primarium, spiritus cum calore seminis instrumentum: seminis corpulentia, materia. & hac diuisio competit tam semini animalium, quam semini plantarum. ratione igitur diuersarum partium, semen potest esse, & est agens, & patiens, non ratione eiusdem partis. Anima seminis non agit in se ipsam. corpulentia seminis non patitur à se ipsa. & anima differt specie à corpulentia.

Imaginantur vero Neoterici me esse diuisurum semen plantarum in germen seminis, quod primum germinare incipit, (idest ut ego puto, corpusculum illud, quod est in medio seminum) & reliquam partem seminis, & ideo ratione harum partium dici agens, & patiens. Non sic ego diuido; nec voco corpulentiam in semine plantarum reliquam, præter germen, partem seminis. nam & in germine ipso stat corpulentia; reliquum vero seminis inseruitum pro primo alimento germinationis seminis, dum incipit nasci, tum pro operimento, & tutamine ipsius germinis, quoniam enim semina plantarum per aliquod tempus asseruari debuerant; ideo



## Mundini Mundinij

aliquo operimento ad sui conseruationem indiguerant. Unde non est mirum, si in ortu phaseolorum, & fabarum videamus post primam germinationem, partes binales seminis supra terram ascendere. Illud enim, quod ascendit inseruiebat pro operimento partis, à qua, & ex qua fit prima germinatio, non pro materia germinationis. Pro huius autem considerationis à me excogitatæ faciliiori intelligentia recurrant studiosi ad ea, quæ dixi cap. 16. in prima parte contra Fernelium.

Sed dicunt Neoterici non licere effugere, quod semen sit materia ratione corporis, & sit agens ratione animæ ob duas rationes. Nam forma non agit in propriam materiam, sed in alienam, ut sibi similem formam in materiam inducat, at cum iam finem suum obtinuit, & materia potitur, non est, ut agat amplius. Respondeo propositionem illam ita vniuersalem, formam non agere in propriam materiam, esse falsissimam. Nam anima agit in corpus, illud regendo, & mouendo. similiter, ut loquamur de Vegetali: non ne vegetalis corpus organicum ad perfectam magnitudinem deducit? Obseruamus etiam in multis seminibus stirpium. quòd quando ex eis fit prima germinatio, vix potest cognosci, quæ nam species plantæ sit, quæ ex illo semine germinare incipit; spacio autem temporis illa germinatio crescit, & ita perficitur, ut clarè cognoscatur cuius speciei plantæ illa sit. Peto ego. non ne anima Vegetalis est forma germinationis illius rudis, & imperfectæ? Quod nam est agens præter animam vegetalem, quod illam perficiat, illique figuram conuenientem propriæ speciei tribuat? Anima Vegetalis Anima vermiculi, qui sericum gignit, ipsum in papilionem mutat pro conseruanda specie. Ergo forma in propriam materiam agit.

Dicunt quando forma materia potitur, non est, ut agat amplius. Respondeo. quando anima subiecto perfectò potitur, adeo quod per illud potest in actiones suas erumpere, non est, ut amplius illud transmutet, non dico in illud agat; sed quando eo potitur imperfecto, debet illud perfectum reddere. Virtus generans in puero nuper nato, non ne potitur corpore illius infantis? ergo non debet amplius agere? falsum est. nam nouas partes generat, dentes. ergo non cessat ab actione. Idem dicas de germinatione



ne illa rudi plantarum. non ne anima vegetalis in ea est? Et tamen in eam agit. illam perfecit. Quid dices deinde de anima vermiculi illius, qui sericum producit?

Instant denuo. Semen habet animam vel actu, vel potentia. Dico quod actu animæ essentiam habet, ut ostendi in prima parte cap. 13. Inferunt. si actu. cum seruetur anima cum corpore seminis, adhuc frustra agit. præcipuus enim agentis finis est, ut conseruetur, quem ubi acquisiuit, quiescit. Respondeo semen habet actu essentiam animæ, sed imperfectè stat essentia illa in semine; seruaturque cum corpore seminis imperfectè. frustra ergo non agit, si agat, ut perfectè seruari possit. si enim agit, ut conseruetur, ut dicunt hi, si sub illa imperfectiōe manebit, conseruari neque in indiuiduo, neque in specie poterit.

Vnum autem aduertendum est. quod potius dicendum est animam agere in proprium subiectum, quàm in propriam materiam, quia verius dicitur, & semen, & corpus esse subiectum animæ, quàm materiam.

Secunda ratio, qua non licet effugere, quod semen sit materia ratione corporis, agens ratione animæ est hæc. Dicunt Neoterici. Anima præsertim vegetalis est agens non abstractum, sed organicum, quod non agit nisi organo adiunctum. at qui dicit animam hanc agere in corpus seminis, dicit eam esse agens abiunctum à corpore, & assistens, ut nautam naui. semper enim diuisum est agens à patiente, in ijs, quæ vere, & per contactum, ac physice agunt. ne hic mihi quis motores cælestes obijciat. In hac ratione alterum de duobus necessarium est contingere, aut ut ego vix illius non intelligam, aut nullius illa sit momenti. Agens assistens apud philosophos semper est forma penitus immaterialis, at forma hæc non dependet in propria operatione à corpore aut subiectiue, aut obiectiue, ut doctissimus, & subtilissimus Pomponatius probauit lib. de immortalitate animæ, Apolog. & defensorio. Videamus modo an qui dicit animam seminis agere in corpus seminis, dicat ipsam agens abstractum, & assistens esse. Vis rationis Neotericorum consistit in hoc, ni fallor. Agens est semper diuisum à patiente, per nos anima seminis agit in corpus seminis. ergo ipsa est agens diuisum, & abiunctum à semine, in quod agit.

ergo



## Mundini Mundinij

ergo agens assistens est . hoc argumentum est nullius momenti, ne dicam peius ; & fundatur supra malam intellectionem maioris propositionis . Succurrat Neotericis . Agens diuisum esse à patiente essentialiter , sed non subiectiue . Imò si agens naturale debet agere , cum omnis naturalis actio fiat per contactum , ut agens sit in subiecto, in quod agit, necesse est . Quid ? quia anima in semine non habet particulare organum , forsitan elicient ipsam esse agens assistens ? male . anima seminis quidem non habet particulare organum, quia stat imperfectè in semine, tamen agit adiuncta instrumento proprio, nempe spiritui . Imò ipsi inhaeret ; & spiritus corpus est ; ut vel hac altera ratione , licet anima seminis agat in corpus seminis , non possit dici ipsam esse agens à corpore diuisum, & abstractum .

Secundo Neoterici ad principale arguunt sic . Si semen aut maris, aut fœminæ utranque vim haberet , sequeretur fœminam sine maris ope generare posse , & marem absque fœmina . Pro probatione primæ consequentiæ remouent responsionem , quæ posset afferri, & dicunt . Quamuis enim effugere soleant , qui fœminei seminis efficientiam tuentur , quoniam illud tenuius est , frigidius, & omnino ineptum, quod solum generare possit . tamen illud voluntarium est admodum , & nihil videtur prohibere , quin fœmina reperiatur calidioris temperaturæ, quæ semen generet calidius, & crassius, & quale isti ad generationem requiri aiunt , ut optimè deducit Valesius ex Hipp. lib. de genit.

Pro probatione secundæ consequentiæ remouent aliam responsionem, quæ à nobis posset afferri . Nam possumus dicere (ut imaginantur) locum habilem mari deficere , & alimentum fœtui , quo augeri, & inolescere possit, dicunt enim , quamuis hoc concedatur , tamen nullam deesse conditionem , qua possit saltem fieri prima fœtus inchoatio . natura enim tale agens est, quod præsente materia, nullo impediante semper agit .

Incipiamus à remotione huius vltimæ responsionis . Non dicimus nos non generari fœtum in vasis spermaticis , vel aliqua alia parte maris, quia sic alimentum non suppetatur fœtui , deficiatque locus habilis, quo augeri , & inolescere possit : sed quia deest locus conueniens pro prima illius inchoatione , & deest materia sufficiens,



ciens, & in quantitate, & qualitate pro generatione illius, ut ostendimus in prima parte cap. 14.

Quod spectat ad probationem primæ consequentiæ. Interrogemus hos viros. Cur, cum fœmina habeat per illos materiam, & efficiens, quod constituunt esse calorem illius, & vim ab illa emanantem, de se non generat? Respondent. ad speciei propagationem molitam esse naturam sexus differentiam, ut à duobus cum quadam perfectionis, ac temperiei (notent studiosi) differentia coeuntibus, proprio ab utrisque semine profuso, materiam conflaret unam aptam generationi. Quid dicent studiosi? hæc sunt ne contraria ijs, quæ statuimus nos in prima parte cap. 14. Sed ulterius. sunt ne hæc voluntaria? Nam dicam ego. nil prohibere, quin fœmina reperiatur talis temperatura, & perfectionis, quæ semen generet, quale pro materia apta generationi requiritur. ergo fœmina de se generabit. Deinde dico me ostendisse in prima parte cap. 14. fœminam mare frigidiorē esse, neque ullam naturaliter dispositam reperiri, quæ calidum, ut mas, semen generare possit. & patefeci ex Gal. hoc ex propria natura fœminæ contingere. Cum enim necessario fœmina menstruo sanguine abundet, fieri non potest, ut semen ita calidum, ut solum ad generationem sufficiat, generet. Ut quid igitur hæc tanquam voluntaria sunt accusanda? Quod Valesius deduxerit ex lib. de genit. fœminam aliquam posse calidius, & crassius semen, quale ad generationem requiritur, generare, studiosi recurrant ad cap. 15. primæ partis. nam ibi similiter declarauimus Valesium in intelligentia illius loci hallucinatum fuisse, neque hoc ex verbis Hipp. deduci posse.

Tertio loco reprehendunt Neoterici illud, quod dicimus semen habere animam, sed in potentia, & hanc animam agere. Dicunt enim, quod aliquid habere formam in potentia, est notare materiam, non agens, & concludunt si semen equi facit equum, oportere habere formam equi. nihil enim agere quatenus est in potentia, & alia subiungunt, in quibus, ut etiam in his, ut ingenuè fatear, nescio intelligere, aut putare quid nobis Neoterici obsint. Semen enim habet actu essentiam animæ præcipuè vegetalis, ut ostendimus in prima parte cap. 13. & quamvis habeat actu essentiam illam, dicitur potentia habere animam vegetalem, quo-

usque



## M undini Mundinij

usque non solum illa generationis munus exercere incipiat, sed reliquis officijs ad se spectantibus pro individui conseruatione per propria organa fungatur. hoc enim ex *Ar. 2. de gen. an. 3.* elicetur, & ex alijs locis. Dum torpescens, & veluti sopita facultas generans in semine iacet, quod contingit, cum nondum exsuscitata est à calore uteri, nullumque molitur opus, quis non censeat illam potestatis nomine iurè appellandam? & cum iam partium corporis in semine delineationes, et descriptiones molitur, & in embryo ne nondum formationem plenam adeptu continetur, quis non idem censeat? & cum corpus plenè formatum est, verum anima nondum organis, ad propria munia, quæ obitura est, fabrefactis uti valet, quis censebit illam perfectionis, & actus nomine dignam esse? Dicitur ergo anima seminis esse in potentia in illo respectu operationum, non respectu existentiae. Et semen equi generat equum, quia equus illi animam vegetalem, & sentientem proprias equi impertitus est. Cur ergo semen illud separatum ab equo non poterit equum generare? quid opus habet amplius semen illud praesentia equi? Requiritur hi viri actum praesentem, cuius virtute semen agat. actus praesens est anima seminis. semen vero habet hanc animam ab illo, à quo decisum est. Non est equidem anima in semine potentia, quemadmodum in homine adhuc uiuente dicimus potentia inesse formam cadaueris. Si enim hoc modo in semine esset, non posset esse agens, non posset generare, & notaremus re vera materiam, non agens. Sed res se habet, ut declaratum nunc est.

Dicunt non est aliquid, quod potentia existens, possit se deducere ad actum. & hoc ab illis pro maximo fundamento habetur. Debilissimum fundamentum. Nil potentia existens potest se deducere ad actum primum, qui est forma. Sed cum habet actum primum, bene potest se deducere ad actum secundum, qui est operatio. & cum habet actum primum, dicitur esse in potentia ad secundum.

Ex allatis rationibus putant Neoterici se demonstrasse semina utriusque sexus carere principio efficiente. Studiosi erunt indices.

Porro licet in prima parte cap. 12. aliquas rationes, & praecipue ex



pue ex *Ar.* adduxerim, ex quibus licet intelligere semen animæ essentiam in se continere, animatumque esse, quia tamen, dum hæc scriberem, aliquos audiui istud non posse capere, aliqua alia ex *Gal.* & *Ar.* subnectam, quæ clarius rem ita se habere confirment. Non loquar autem hic de omni anima, sed de Vegetatiua tantum.

Ad *Gal.* quod attinet, *Nicolaus Leonicens* conciuus meus, & in Europa Medicinæ Galenicæ parens in sua epistola de virtute formatiua demonstrat ex verbis *Gal.* in lib. de sæt. format. cap. ult. atque in primo de sem. cap. 9. in fine, & 10. in primis verbis animam vegetatiuam in semine residere, proindeque semen animatum esse. Unusquisque potest ex se loca illa ponderare. sensis idem cum *Gal. Vales.* 2. contr. 9. *Massaria* lib. de morb. mul. cap. 5.

Quod spectat ad *Ar.* duo illius loca considero. primum est in 1. cap. 2. de gen. an. alterum in 4. cap. eiusdem lib.

Quærit in fine 1. cap. *Ar.* an semen habeat, an non habeat animam: & determinat illud habere animam, & potentia esse. declarans vero quomodo potentia sit, cum idem à se ipso potentia propius, & remotius esse dicatur, affert exemplum de Geometra dormiente, & vigilante, qui respectu eius, qui contemplatur potentia est Geometra. Ex quo loco elicitur clarè *Ar.* velle semen habere animam non potentia, quæ excludat habitum, sed quæ habitum includat; veluti Geometra, & dormiens, et vigilans habitum Geometriæ habet. Semen ergo ex *Ar.* habebit animam potentia, sed non potentia respectu essentia animæ, sed potentia, quæ essentiam animæ includit. Verba *Ar.* sunt hæc. Sed habeat ne semen animam, nec ne, ratio eadem atque de partibus reddenda est. nec enim anima vlla esse potest in alio, nisi in eo, cuius est, neque pars vlla esse potest, quæ particeps animæ non est, nisi æquiuocè, vt mortui oculus. Semen igitur, & habere animam, & esse potentia palam est. Propius autem, & remotius idem à se ipso potentia esse potest: vt Geometra dormiens remotius, quàm vigilans est, isque remotius, quàm qui iam contemplatur. Argumentum sit huiusmodi. Sicuti Geometra dormiens, & vigilans est potentia, ita semen per *Ar.* habens animam est potentia. At Geometra dormiens, & vigilans ita potentia est, vt habitum Geometriæ in se



## Mundini Mundini

contineat . ergo semen habens animam ita erit potentia , vt essentia animæ realiter illi inexistat .

In cap. vero 4. docet Ar. vim, quæ incrementum efficit ex alimento in animalibus, & plantis, eandem à principio constituere id, quod natura efficitur; & quia quæ efficit incrementum, vegetabilis anima est, concludit eandem quoque animam esse, quæ generat. Hunc locum in prima parte cap. 12. citavi, cum supposui facultatem generantem esse principium primum efficiens, & conformans fœtum, & esse eandem cum vegetabili. Verba Ar. sunt hæc. Materiam igitur fœmina præbet, principium motionis mas, & quem-  
admodum quæ ab arte efficiuntur, per instrumenta efficiuntur, sed  
verius dixerim per motum eorum, qui artis operatio est: ars autem  
forma eorum, quæ efficiuntur, est in alio: sic à facultate, siue virtute animæ vegetalis agitur, vt quæ in animalibus ipsis, & plantis postea ex alimento vis eadem efficit incrementum, vtendo caliditate, & frigiditate, quasi instrumentis (motus enim in ijs constitit, & ratione aliqua vnumquodque efficitur) sic etiam principio constituit id, quod natura efficitur. eadem enim materia est, ex qua augetur, & constituitur primum. Itaque facultas quoque agens eadem, quæ principio est, sed maior. quod si hæc vegetalis anima est, eadem quæ generet quoque est. idque natura cuiusque est insita & in plantis, & in animalibus omnibus.

Clarè ergo fatetur Ar. vim, quæ principio constituit, & generat fœtum, esse animam vegetalem. modo hæc anima vegetalis, quæ incipit generare, & constituere fœtum non est anima vegetalis parentis. nam re vera ipsa non generat, & constituit fœtum, quamuis semen producat, illique vim generantem præstet. Quod hoc sit verum attende diligenter verba illa. vt quæ in animalibus ipsis et plantis postea ex alimento vis eadem efficit incrementum. ergo supponit Ar. vt vis, quæ generat, primo generet, & postea ex alimento efficiat incrementum. at ista non possunt verificari de anima Vegetali parentis, nam hæc primo ex alimento incrementum efficit, & perducit parentem ad perfectam magnitudinem, postea pro generatione operatur. Cuius igitur est anima, vegetalis, quæ principio generat? ubi continetur? Certè cum principio generet, (loquendo de animalibus) vt sit anima alicuius ex generatione illorum



illorum primordijs, ut in aliquo eorum contineatur, necessarium est. hæc primordia sunt duo, semen, & sanguis menstruus. hæc anima non est menstrui, non continetur in menstruo per Ar. ergo est seminis, continetur in semine. ergo semen est animatum.

Non dicat mihi hic aliquis cum Auer. in 7. metaph. & Mer- cenario in dilucidat. sufficere ad hoc, ut dicatur animam generare, quod virtus animæ patris, à quo semen decisum est, in semine sit. Nam peto an virtus illa sit, quæ generet, an anima patris. non anima patris, ut iam ostendi. ergo virtus illa est, quæ generat. at Ar. vim generantem fœtum vocat animam vegetalem. ergo vir- tus illa per Ar. est anima. ergo semen est animatum.

Dicet alius. anima est in semine, sed potentia. si hoc verum est, aut est potentia ad esse ipsius animæ, (vtar philosophicis terminis) aut potentia, quæ includit esse, ut iam declaravi. si est potentia, quæ includit esse, habeo intentum. nam semen erit animatum. si est potentia ad esse ipsius animæ, non potest dici, quod anima gene- ret. Ratio est. quia non potest attribui actio alicui rei sub ea ratio- ne formali, qua nondum est. nam sub ratione formali, qua nondum est, nondum potest agere. actio enim insequitur esse ipsius rei: qua- re si nondum adest esse ipsius animæ, sub ratione animæ non potest aliqua actio fieri. si ergo in semine anima est potentia ad esse, non potest dici, quod anima generet. Vidimus tamen Ar. statuere animam esse, quæ fœtum à principio constituit, quæ ipsum generat. ergo anima per Ar. secundum suam essentiam in semine conti- netur.

Declaratum quoque est, quod potentia, qua est anima, quam habet semen, est potentia, qua Geometra dormiens, & vigilans di- citur esse potentia respectu illius, qui contemplatur. Si igitur ani- ma, quam habet semen, est potentia, non erit potentia ad esse, sed potentia, quæ esse ipsius animæ includit.

Animæ essentiam contineri in semine putat ex Ar. etiam Ni- colaus Leonicens loco citato, atque ulterius ex Themist. in para- phr. in primum lib. de an. cap. 21. in fine hoc idem ostendit. pote- runt locum studiosi ponderare.

Sive autem virtus efficiens in semine contenta sit anima, sive quidvis aliud, sciant studiosi rationes, quibus contra Ar. osten-



## Mundini Mundinij

dimus facultatem efficientem, & formatricem in semine fœminæ contineri in cap. 16. & 17. primæ partis, nec non aliquas adductas in cap. 12. eiusdem partis robur suum retinere. non enim fundantur super hoc, quòd semen animatum sit, aut facultas efficiens, & conformans in ipso residens sit anima, quemadmodum poterunt animadvertere.

Postulat hic locus, ut nobis quasdam interrogationes ex Fernelio in lib. 1. de ab. rer. cau. faciamus. Iste enim non tam doctissimus, quàm eloquentissimus vir, quamvis semini utriusque sexus principium effectuum ascripserit, istud principium minime animam esse voluit, sed virtutem quandam præparantem semen ad suscipiendam animam, atque ideo quædam ingeniosè excogitavit, quæ videntur nostram positionem labefactare, & quæ à nemine, quod ego sciam, hucusque animaduersa fuere.

An ergo si in semine perfectorum animalium, ex quo fœtus fiunt, anima præest, non etiam in putri materia, ex qua animalia sponte nascuntur, continebitur? Respondeo in putri materia, ex qua generari animalia debent, animæ essentiam non præexistere, sed bene in semine, ex quo generari animalia perfecta debent. quia istud ex corpore animato decidit, & ex ijs partibus corporis animati, in quibus potuit illi animæ essentia communicari, ut patefeci in prima parte cap. 17.

A qua ergo virtute ex putri illa materia animalia procreantur, si in illa anima non præest? A virtute viuifica caloris cœlestis dico ego cum nostris philosophis Mercenario, & Piccolomineo locis infra citandis.

At sequetur hoc modo imperfectis animalibus è putri illo pedore natis præstantior rem esse, ac diuinior originem, quàm perfectissimis illis, quæ vis seminis in vitam produxit? Respondeo non à sola vi seminis, quæ ad Vegetalē pertinet secundum nos, animalia perfecta procreari; verum ad illorum procreationem concurrere quoque virtutem diuinam, summèque sapientem, ut citato loco statui. quapropter nullum tale absurdum sequi ex mea positione video.

Si anima est congenita semini, in eodem semine sunt ne plures animæ? Ex unico enim semine non unicum, sed multos contingit nasci



nasci canes, & unusquisque suam habet animam. Responsionem illam recipimus. Cum vnicus fœtus ex semine fit, vnicam fuisse in illo animam, cum multi, multas. Ita natura comparatum est meo iudicio, vt animalia multipara non vnicum, sed multa vno coitu semina effundant; vt etiam plantæ vnica vice multa. quorum sua cuique insit anima. Sua autem inest cuique ex seminibus plantarum anima, dum separata sunt à plantis; sed dum coniuncta sunt, ab vna anima numero, nempe ab anima plantæ illa in se gerentis omnia animantur. ita vt vnica sit in illis, dum coniuncta manent, anima. Idem dicendum de seminibus animalium.

Si contigisset hoc ipsum semen sic totum in vnum vteri locum colligi, vt vnicus inde emergeret canis, is ne multas canum animas contineret? Respondeo, fœtum vnicum, vel multos non nasci pro numero locorum vteri, in quæ semen recipiatur, quemadmodum rectè docuit Ar. 4. de gen. an. 4. Sed si semen canis ita in vnum locum colligeretur, vt vnicus inde canis emergere deberet, plures canes in vnum coniuncti nascerentur, & unusquisque propria anima præditus.

A quo gignitur anima in semine contenta? quemadmodum semen a corpore generantis prodit, videtur quoque seminis animam ab eiusdem anima produci. Si vero hoc concedatur, inexplicabile est, qua ratione fieri possit, vt vnica generantis semen anima, alias de se nouo quodam, & inaudito procreationis genere, tam repente, tam crebro multiplicet. Ego certè in prima parte loco præallegato docui modum, secundum quem semen potest facultatem naturalem, vitalem, & animalem suscipere. Voces modo hanc animæ in semen receptionem, aut animæ generationem, aut seminis animationem, aut nomine carentem transitionem, vt dicit Zabarella de transitione animæ ad nouam aggeneratam per nutritionem partem, (quamuis sit aliqua differentia inter transitionem animæ ad semen, & ad aggeneratam partem) nil hoc curo. Sufficiat mihi, sicuti Ar. putauit, rationabile esse asseuerare, dum in insectorum coitu fœmina particulam vuluæ respondentem in marem figit, marem materiæ in illa particula contentæ vim Vegetalem, & sentientem tribuere; ita rationabile esse, asseuerare in perfectis marem proprio semini easdem vires impertiri. Eadem est  
ratio



# Mundini Mundinij

ratio de semine fœminæ. Præcipuè cum affirmet *Ar. 2. de gen. an. 4.* in ouis, quæ aues fœminæ ex se absque maris congressu produ-  
cunt, animam vegetalem contineri.

Sufficiat mihi, in re omnium difficillima, & abstrusissima multo  
rationabilius esse ita dicere, quàm ponere in semine (vt facit Fer-  
nel. lib. citato) facultatem, & vim, quæ concinnam conformationem  
corporis & partium aptam secum coniunctionem in illo efficiat,  
& tamen hæc facultas ad Vegetalem animæ partem non spectet;  
& tamen actio conformandi non pertineat ad naturalem animæ  
partem, vt asseuerarunt hucusque omnes & philosophi, & Me-  
dici, & veritate coactus fassus est etiam Fernel. lib. 5. physiol. cap.  
3. & lib. 7. per totum. Sufficiat nobis non esse coactos sexcenta  
*Ar.* præcipuè loca extorquere, vt cogitur Fernel. & fingere in-  
mente modum, secundum quem præparata, & conformata ex se-  
mine materiæ accedat postea extrinsecus anima. Denique cum  
viderimus Fernelium sibi ipsi palàm de efficiente principio in se-  
mine contento contrarium, superuacaneum duximus velle ex pro-  
fesso contra illum disputare. Apparet enim ex hac in-

suis scriptis aperta contrarietate nulla alia  
confutatione dignum esse, satisque ip-  
sum se ipsum redarguis-  
se. Sufficiat quo-  
que

igitur studiosis has Fernelij rationes op-  
portunam naçtos occasionem  
nos diluisse.





Sententia Neotericorum de efficientia in generatione foetus solius foeminae. eorum rationes. sententiae, & rationum euerfiones. Cap. III.

**I**nspiciamus modò Neotericorum sententiam. Afferam autem propria illorum verba in illa adducenda, ut in sup. quoque cap. feci, & plenius, ne aliquis credat me illis imponere ea, quae non scripserunt. singula autem non persequar; nam nimis excresceret volumen, neque debemus tadio beneuolos studiosos afficere. Seligam potiora. Dicunt ergo. Effusis in utero seminibus utriusque sexus, inter illa oriri mutuam actionem, & passionem, absque victoria vnus, & generatione fetus, ex qua materia apta generationis fetus resultat. Agens vero, dicunt, perficiens hanc materiam, & informans, longe aliud est, calor inquam aut gallinae cubantis, aut equae utero gestantis. Hoc autem verum esse agens. quia actu est, & praesens, quia tangit, & in ipsam seminalem materiam se se ingerit, & insinuat, ut docebimus: est simile, aut secundum speciem, aut secundum genus. secundum speciem in perfectis animalibus, in quibus foemina fouet utero foetum, unde forte & foemina dicitur. secundum genus, ut in ijs, quae imperfectiora sunt, in quibus quaedam diversae speciei fouendo excludere solent oua alterius; quae tamen solent conuenire in genere proximo, ut anseres, anates, gallinae, &c. Tandem concludunt. Agens meae sententia non est aliud, quam, quod huic materiei accedens, illam calefacit, efformat, viuificat, in ijs, quae ex putri fiunt, calor excretus à re putrescente. In ijs, quae oua excludunt calor animalis incubantis. In ijs, quae animal intus generant, calor tum uteri ipsius, aut loci eiusmodi, tum qui à matris corpore per uenas, & arterias in foetum distribuitur.

Confusi adeo sunt in sua disputatione Neoterici, ut diu cogitauerim pro illorum mente penetranda. Nam ex adductis uerbis uidetur, quòd uelint unum foeminae calorem in ouiparis, & in perfectis



# Mundini Mundinij

fectis animalibus esse efficiens, ex alijs vero infra adducendis elicatur ipsos in perfectis animalibus vim quandam aliam, præter calorem, à fœmina procedentem agnoscere. Cum vero in tota sua disputatione nil dicant, ex quo possit elici, aliquam aliam efficientem vim, præter calorem cubantis avis, in ouiparis ipsos agnouisse, persequar eorum dicta de ouiparis tanquam constitutum ab ipsis accipiens, in ouiparis calorem cubantis fœminæ efficiens esse in generatione pullorum.

„ Scribit Ar. 3. de gen. an. 2. oritur pullus incubante aue, ut dicitur.  
„ Etum est. sed si, aut tempus sit bene temperatum, aut locus, in quo  
„ oua manent, tepidus, cōcoquuntur & auium oua, & quadrupedum  
„ ouiparorum sine parentis incubitu. hæc enim omnia in terra pariunt,  
„ concoquuntur oua tepore terræ. nam si quæ quadrupedes  
„ ouiparæ frequentates fouent quæ ediderint oua, custodiæ gratia id  
„ potius faciunt. Hæc eadem leguntur apud Albertum Magnum lib. 17. de an. cap. 3. Falsum ergo est calorem fœminæ cubantis, aut eiusdem speciei, vel generis proximi, ut statuunt Neoterici, esse efficiens in generatione pulli ex ouo.

Manifestum quoque feci in ultimo cap. secundæ partis aspercionem, quam pisces mares proprii seminis supra edita à fœminis oua efficiunt, inservire pro incubitu. Neque Ar. negat ex tali aspersione multum caloris illis infundi. ergo in ouiparis efficiens in generatione non est calor fœminæ tantum, sed etiam maris. Hoc idem aëstruitur ex coitu insectorum.

Adde, & hoc est fortissimum argumentum, nam est sensatum. oua incubari partim à fœmina, partim à mare in multis ouiparis. alternatim enim illa incubant, ut clarè observamus in columbis, & alijs auibus volatilibus. imò observamus, si fœmina incubitum intermittat, & interim incubandi munus mas non subeat, pullos ex ouis non excludi, sed vrina fieri, & corrumpi. ergo non solum fœmina concurrit ut efficiens, sed etiam mas.

„ Audiant Neoterici Ar. ipsum. Columba (inquit 6. de hist. 4.)  
„ magna ex parte marem, & fœminam generant: priorem marem,  
„ posteriorem fœminam, & cum pepererint primum ouum, uno interposito die secundum pariunt. Incubant ambo vicissim, interdum  
„ mas, noctu fœmina. & cap. 8. Incubat magna auium pars, ut de colum-



55 columbis retuli fœminę mare succedente. aliqui mares incuban-  
 56 di munus tantisper subeunt, dum fœminę intermisso incubitu ci-  
 57 bum quærunt. & inferius. palumbium fœmina incubat à pome-  
 58 ridiano incipiens, totaque nocte, et vsque ad tempus ientaculi per-  
 59 seuerans, reliquo tempore munus idem mas subit. Perdices bina  
 60 ouorum receptacula faciunt. in altero fœmina incubat, in altero  
 61 mas. excluditque sua vterque, & educat.

Insuper concedunt Neoterici in perfectis animalibus duas fœ-  
 minę actiones in conceptum, vt apparebit infra, quarum alteram  
 vocant externam, & hæc prouenit à calore vteri, alteram inter-  
 nam, quę prouenit secundum illos à calore per venas, & arterias  
 in fœtum distributo. Cur ergo in generatione ouiparorum calor  
 oui internus non requiritur? non ne in ouo reperitur calor à fœ-  
 mina illi ingenitus? non ne, præter calorem hunc, reperitur quo-  
 que calor à mare per genituram illi tributus? quid aget ille ca-  
 lor, feriabitur ne? & si agit, cum sit secundarium agens, à qua  
 virtute regetur? meo iudicio ab aliqua virtute in ouis contenta,  
 à nobis formatrice dicta. An requiritur in generatione fœtus in  
 viuiparis animalibus virtus calori super addita, vt velle etiam  
 Neotericos infra ostendemus ex proprijs ipsorum verbis, in oui-  
 paris vero solus calor sufficit?

62 Sed dicunt oua diu seruari, & vsque adeo refrigerari, vt om-  
 63 nis planè seminis masculi calor, si quis in eis reperiiebatur, extin-  
 64 guatur, & tamen adhibito animalis cubantis calore fœcunda fie-  
 65 ri. Sed cur non extinguatur etiam calor, si quis inerat illis à fœ-  
 mina? Sed nego adeo refrigerari oua, vt extinguatur calor à ma-  
 re per semen illis inditus, & tamen cubata fœcunda fieri. & de-  
 bent hoc Neoterici probare. Nam si eueniat vt extinguatur ca-  
 lor illis à mare inditus, remanebunt infœcunda.

66 Addunt Neoterici. Nec est vt quispiam putet, oua non so-  
 67 lum materiam esse, sed etiam actiuum principium in se continere,  
 68 semen scilicet maris. nam si hoc esset, sine animalis cubatu gene-  
 69 rarent, non otiosa tam diu seruarentur. Negant hic Neoterici in  
 ouis semen maris reperiri, non dicunt calorem maris, & tamen  
 vidimus supra ipsos statuere ex vtriusq; sexus semine simul mixto  
 materiam vnā conflare aptam pro generatione fœtus. Sed oc-



## Mundini Mundinij

caſione dictorum hic à Neotericis volo principium quoddam ponere, per quod non ſolum ad illa habeatur à ſtudioſis reſponſum, verum etiam ratio, ob quam ex ouiparorum quadrupedum ouis, & quorundam auium absque incubitu, ſed tamen neceſſario accedente aliquo extrinſeco calore, pulli excluduntur. Principium autem hoc, non eſt meum, ſed doctiſſimi Andreae Laurentij. neminem enim vnquam laude propria defraudabo. Doctiſſimus autem hic vir tali principio vtitur in perfectis animalibus, ego illud applicabo ad ouipara, & vt puto, non ineptè. Tria ergo genera cauſarum apud Medicos reperiuntur, vnā vocant principalem, alteram adiuuantem, tertiam ſine qua non, et dant exemplum in medicamento purgante. Cauſa principalis purgationis eſt medicamento proprietates; cauſa adiuuans, caliditas medicamento; cauſa ſine qua non, natiuus noſter calor, ſine quo medicamento vis ſopita in actum haud quaquam erumperet. Ita ergo in formatione pulli ex ouo, cauſa principalis eſt virtus formatiua. cauſa adiuuans, eſt calor ouo inſitus. Cauſa ſine qua non, eſt calor cubantis animalis, aut ſimilis quiuus alius calor. inſitum enim ouo calorem fouendo, vigorem illi addit; vnde in actum ſtrenuè erumpit, & penitus materiæ dominatur, illam varie tranſmutando, & ad quas vult figuras ducendo. Ex his facilis eſt reſponſio ad dicta Neotericorum. Clare enim neceſſitas apparet caloris cubantis animalis, vel alterius proportionē calori cubantis animalis reſpondentis. Ex his etiam alia, quæ à Neotericis ſubiunguntur de exemplo coaguli, nullo negotio ſtudioſi euertent.

Ultimo non digrediar, vt oſtendam calorem à re putreſcente excretum non eſſe ſufficiens agens pro generatione eorum, quæ ex putri oriuntur, vt ſtatuerē vidimus Neotericos in ſupra eorum allata oratione. nam nimis à ſcopo nobis propoſito aberraremus; ſtudioſos in hoc quæſtione ablegam ad acutiſſimum Mercenarium, qui theorema proponit in ſuis dilucidationibus, an genita ex putreſcente materia à calore ſolis, vel mixti putreſcentis produci poſſint; & ad Piccolomineum in lib. de ortis ex putri cap. 3. in quo diſputat de cauſa efficiente genitorum ex putri.

Vidimus quid ſentiendum ſit de efficientia caloris incubantis ouis. Videamus quid etiam ſentiendum ſit de caloris vteri efficientia.



*olentia. Audiant rem miram studiosi. Statuunt Neoterici primam seminis conformationem à calore uteri, tanquam ab efficiente, in perfectis animalibus fieri. Vocant vero primam seminis conformationem, qualem genitura saltu à psaltria ab utero excussa sortita fuerat, de qua Hipp. lib. de nat. pu. Ut autem intimius illorum mentem penetremus, integram hic orationem, in qua se exponunt, afferemus. Externa (inquiunt) vocetur actio feminae in semen prolificum, qua illud utero recipiens, complectens, & circumquaque attingens, ac fouens calefacit, illi per oscula vasorum agglutinatur, crassiusculum id reddit, atque pellicula quadam, ac veluti operimento, inuestit. quod non ineptè Ar. crustulæ comparauit, quæ in pulte fit ex calore ignis, & ea refrigerata conspicitur. Vocatur autem actio hæc externa, quoniam est ipsius uteri in semen, imò vero in fætum eo toto tempore, quo fætus in utero continetur. quo quidem aliquam formationis partem compleri ex eo dignosci potest; quoniam calor omnis pro varietate materiae, in quam agit, ita diuersam illi formam, & constitutionem tribuere videtur: sol enim lutum compingit, & crassum reddit, ceram mollit, ac liquat: terrestrem marinæ aquæ partem in salem vertit, aqueam, ac tenuem in vapores. Semen vero non simplex esse corpus, sed ex multis, & contrarijs partibus conflatum, tum illud docet, quod mistum est, et ex perfectorum numero mistorum, quæ ex quatuor elementorum compage resultant, tum etiam quod ex sanguine ortum est, & eo quidem quatuor humoribus constante: adde etiam, quòd duo re vera semina sunt, alterum maris, & feminae alterum, & consistencia, & qualitatibus primis, & quantitate etiam forsitan inter se discrepantia. Quocirca ex actione uteri, & nativæ eius caliditatis in seminalem hanc materiam, necessario fit, ut huius partes quædam crassescant, & substantiam quandam compactam obtineant, aliæ uero attenuentur, atque in spiritum, flatumque uersæ intumescant, & calore agitatae semutuo diuidant, atque peruadant. quam dixerimus primam esse ipsam fætus, aut certè seminis conformationem, quale narrat Hipp. primo de nat. pu. se uidisse sexto à conceptu die ab ancilla psaltria saltu ab utero excussum.*

*Genitura à psaltria saltu excussa fuit huiusmodi. Qualis au-*



## Mundini Mundinij

tem erat (inquit Hipp.) ego referam. veluti si quis ovo crudo externam testam circumcirca adimat, in interna vero pellicula inclusus liquor pellucescat. Modus quidem talis erat, & ut abundè dicam, ruber erat liquor, & rotundus. In pellicula vero fibræ quædam albæ, ac crassæ inesse videbantur. cum cruore crasso, & rubro obuolutæ: circum autem pelliculam foris cruenta vestigia instar suggilatorum; iuxta medium vero tenue quid eminebat, quod mihi umbilicus esse videbatur, & per illum sanè spirationem extra, & intra primam facere apparebat; quin & pellicula genituram ambiens, ac complectens, tota ex illo tendebatur.

Ex his Hipp. verbis habemus in genitura psaltriæ fuisse formatas membranas fœtum integentes, & venas per chorion dispersas vnâ cum vasis umbilicalibus, & descriptum, ac delineatum iecur. Gal. enim lib. de fœtus format. cap. 3. affirmat illud membrum, & rotundum, quod intra conspiciebatur, fuisse iecur.

Videamus an uteri caliditas aliquam harum partium formationem moliri queat. membrana chorion ita formata est, ut vbicunque orificia vasorum ad uteri internam superficiem desinentium illi contigua sunt, ibi ipsa sit perforata, ut commodè, & perbellè orificia vasorum, quæ in illa sunt, & vasorum uteri se inuicem committere possint, ad hoc, ut materia & pro generatione partium sanguinearum, & pro nutritione conceptus influere possit.

Membrana allantoïdes ita formata est, ut desinat in meatum quendam, qui est in medio uenarum, & arteriarum umbilicalium, & in supernam vesicæ fundi partem inseritur, urachon, urinaculum ab anatomicis appellatur. Omittamus nunc mirabilem structuram uenarum, & arteriarum, quæ per chorion dispersa uasa umbilicalia constituunt, referre, & ex illa contra Neotericos argumentum deducere. infra enim hoc commodiori loco faciemus. stemus uero in structura membranarum fœtum obuoluentium recitata.

Quis est ergo, qui tam sortem habeat imaginationem, ut adeo artificiosas harum membranarum fabricationes in unum calorem, tanquam in efficiens, referre possit, ut faciunt Neoterici? Producat ex se calor, ut loquamur de allantoïde, membranam certa cavitæ præditam, hanc in canalem quendam rediget, & hunc ab

extra



extra intus in fœtum deducet, & inseret mirabiliter in uesicæ fundum, ut subinde genita abundans urina per illum in capacitatem dictæ membranæ à fœtu possit expelli? Tantam providentiam habebit de se calor? calor extrinsecus? ut uteri calor est respectu fœtus?

Assimilant Neoterici membranas ipsas crustulæ, quæ pultî obducitur ex auctoritate Ar. (ut ego reor) in 2. de gen. an. cap. 3. in fine. Omittamus etiam hic, quod Sueßanus interpretes Ar. non spernendus, vult ibi Ar. de generatione cutis loqui, & se ipsum explicasse videtur philosophus 10. probl. probl. 29. ubi loquendo de generatione cutis, eam crustulæ comparavit, attentè crustulam illam, quæ pultî obducitur, pensitent Neoterici, & conferant cum membrana chorio, & multo magis cum allantoide, & postea pronuntient has similes illi crustulæ esse? Quod nam artificium est in illa crustula? quæ determinata cavitas? quæ insertio? Quod nam est in illa dissimulare, & organicum? Tanta organizatio pendeat ab una caliditate? à caliditate extrinseca tanquam ab efficiente? deinde à diuersitate materiæ?

Concedi equidem potest pro diuersitate materiæ, à calore hanc membranam crassiores, illam tenuiores fieri, & cavitates nasci ob materierum intumescencias; sed apertiones foraminum artificiosè debitis locis factas, miras necessarias fœtui distributiones, insertionesque partium intrase, cavitates semper in omnibus fœtibus tales figuras sortitas, in calorem, & diuersitatem materiæ solummodo quis potest referre? Quis, ut uno uerbo dicam, materiæ quadam necessitate hæc artificio miro plena fieri asseuerabit, ut asserunt Neoterici in fine allatæ eorum orationis?

Possunt autem hic commodè studiosi recurrere ad ea, quæ in secunda parte cap. 3. uersus finem de generatione membranæ chorion diximus ex nostra sententiâ.

Quid dicam de illo rubro, & rotundo intra membranam contento? potuit ne illius descriptio, & delineatio ab uno calore uteri fieri? Sed neque hoc constituent infra Neoterici, ut uidebimus. dicent enim fieri à ui quadam per uenas in fœtum distributa, quam hepaticam appellabunt; & tamen cum hic primam suam seminis formationem asserant esse talem, qualem

narrat



## Mundini Mundinij

narrat Hipp. fuisse genituræ à psaltria excusæ, coguntur hoc fieri. in genitura enim Hipp. rubrum illud rotundum continebatur.

Sed pergamus ad alia. Postquam Neoterici pronuntiarunt, ut vidimus, ex sua sententia agens esse in ouiparis calorem incubantis avis, in perfectis calorem tum uteri ipsius, aut loci huiusmodi, tum qui à matris corpore per venas, & arterias in fœtum distribuitur, iubent hanc rem diligenter animaduerti, ut hoc ultimum eorum pronuntiatum declarent, & stabiliant. Perlustremus ergo diligenter hanc suam animaduersionem. scribunt igitur.

„ Quam rem diligenter animaduerti velim. Cum enim semen,  
„ materiæ tantummodo vices gerat, quid aliud possumus excogitare,  
„ re, quod agentis corporei proximique munere fungatur, quam ipsam  
„ matrem? hæc enim non solum materiam fœtui procreando  
„ suppeditat, sed etiam calorem natium impertit: quod in omnibus  
„ proportionem quadam verum est, in ijs vero, quæ intus generant,  
„ & utero gerunt, est manifestissimum, in quibus distribuitur à matre  
„ in fœtum ipsum non solum sanguis per venas umbilicales appellatas,  
„ sed etiam spiritus, & calor innatus per arterias. Nouimus enim vasa  
„ utraque umbilicalia nuncupata venis, & arterijs ipsius uteri  
„ continuari, intercedente membrana, quæ chorion dicitur. Quamobrem  
„ arteriæ matris, quæ ad uterum pertingunt, seminali materiæ continuatæ,  
„ arterias in semine generant, & venæ venas.

Ex his habemus venas, & arterias conceptus generari à venis, & arterijs uteri matris, & Neoterici versus finem suæ disputationis addunt huius rei probationem, scribentes.

„ Nec est ut obijcias, id vero ignotum esse, & controuersum an  
„ venæ fiant à venis uteri, arteriæ ab arterijs, cum alij putent à semine  
„ fieri, & à vi effctrice, quæ in semine est. Nam si vim generatiuam,  
„ ac formatiuam venarum, & arteriarum illi tribuunt semini,  
„ quod, si naturalium agentium vim, ac proprietatem spectemus,  
„ debuit potius generare semen, quam arteriam, ac venam,  
„ multo magis mihi licitum est vim generandæ arteriæ, tribuere  
„ arteriæ, & venæ generandæ, venæ. Quod argumento à Galeno  
„ relato confirmari potest. quoniam si vena vim habet ut nutria-

tur;



tur, ergo ut alimentum vertat in substantiam sibi similem, & omnino in substantiam venæ. igitur vis generandi venam, est in vena. ergo suppetente materia poterit venam generare. Itidem & arteria, & reliqua. quod manifeste sensit Gal. lib. 1. de sem. cap. 13. quum duplicem fœtui opificem in utero statuit, & seminis facultatem, & eam, quam ait esse in uteri vasis, in qua semen incidit.

Vidimus Neotericos voluisse primam seminis formationem à calore uteri fieri, & hanc esse talem, qualem describit Hipp. de genit, à psaltria emissa: hæc vero continebat, ut vidimus, venas per chorion dispersas, & unitas in vasa umbilicalia, ergo has venas à calore uteri generari ex positione illorum sequitur. nihilominus hic dicunt venas in semine generari à venis uteri, arterias ab arterijs. Nec est ut quispiam velit ipsos ab inconstantia vindicare dicendo venas, & arterias uteri gignere in semine venas, & arterias mediante præcipue calore innato venarum, & arteriarum uteri, qui & uteri ipsius potest dici calor, cum venæ, & arteriæ uteri, partes illius sint. Nam improprie dicuntur partes illius; unde aliud est dicere calorem uteri, aliud calorem venarum, & arteriarum illius. præterea vero vidimus Neotericos actionem, quam facit calor uteri in semen, externam vocasse, inferius vocabunt, ut audiemus, actionem uteri, qua generantur venæ, & arteriæ in semine, internam. adeo quod separant, & seiungunt has duas actiones, diuersas ergo illas faciunt, & non possunt in unam reduci. Vnde videntur quoque distinxisse calorem uteri à calore venarum, & arteriarum illius. Utcunque autem de hoc sit. rursus illi constituent, ut uerba eorum, quæ afferemus, testabuntur, fœtus membra à uitali spiritu, & quadam uirtute matris, qua unumquodque illius membrum est aptum sibi simile generare, fœtui per arterias uteri communicatis, procreari. quot ergo agentia fœtus perfectorum animalium? calor uteri, uasa uteri, calor per illa influens, unà cum uirtute. At dicent sunt plura agentia, sed tamen omnia à matre proueniunt, unde unicum agens, mater. Unicum agens mediatum erit mater hoc modo; sed querimus nunc unicum agens immediatum principale.

Ponderauimus primum agens fœtus perfectorum animalium  
à Neo-



## Mundini Mundinij

à Neotericis excogitatum, ponderemus etiam secundum. Volunt igitur illi non ab efficitrice uirtute, quæ in semine contineatur uenas, & arterias fœtus formari, sed à uenis, & arterijs. nam uis generandi uenam, dicunt, est in uena. Heus uiri doctissimi, in ouis, cum per aliquod tempus cubata fuerunt uisuntur uasa umbilicalia radices in utello, & albumine quoque habentia, à quo genita in illis uasa ea fuerunt? Præerant ne in ouis antequam cubari inceperint uenæ, & arteriæ? Qua ratione ergo in ouis uenæ, & arteriæ umbilicales, generantur, cur non eadem generari primas conceptus perfectorum animalium uenas, & arterias dicemus? hanc philosophandi uiam credo ego Ar. & Gal. ingressos esse. Iudicent studiosi an hoc argumentum contra Neotericos sit demonstratiuum.

Si autem dicant in ouis fieri uasa illa à calore cubantis auis, hoc remouimus supra; et si ad hoc confugiant, coguntur per ea, quæ supra diximus, fateri quemuis calorem tepidum extrinsecum, non auium tantum, habere uim formandi uasa umbilicalia. Quod si quilibet calor tepidus habet uim hæc generandi, cur ad generationem illorum in fœtibus perfectorum animalium non sufficiet primum agens Neotericorum, calor scilicet uteri? Cur inuehunt etiam uenas, & arterias illius? Porro ut diximus cap. 16. & 17. primæ partis nobilis illa architecta in seminibus contenta ideam in se omnium partium habet, quare non est mirum si ex semine, & albumine oui, & uenas, & arterias generet. Sed dicunt magis uideri quod semen generet semen, quam uenam, & arteriam. Non possum credere, quod doctissimi uiri hæc seriò protulerint, sed potius, ut de ingenijs aliorum periculum facerent. si semen ageret per formam, qua mixtum est, non per nobiliorem huic superadditam, qua animatum est, & dicitur, potius semen generaret, quam uenam, & arteriam, & alias partes: at per nobiliorem agit; ergo non semen, sed ex semine uasa illa, & alias partes generat.

Verum aliam contemplationem in medium afferamus. Ita se habent uenæ, & arteriæ fœtus, quæ uenis, & arterijs uteri matris continuantur, quòd quemadmodum uenæ, & arteriæ desinentes in materni uteri internam superficiem sunt parue, ita uenæ, & arteriæ



arteria fetus, quæ his continuantur, parvæ sunt, & eiusdem cum illis magnitudinis. hæ vero intercedente membrana chorion ita intus versus fœtum feruntur, ut quò magis recedunt ab utero, ed maiores evadant; adeo quòd illæ parvæ venæ, & arteriæ, quæ continuæ sunt uteri venis, & arterijs simul uniantur, & constituent venas, & arterias maiores. hæ similiter uniantur, & constituent alias adhuc maiores, quousque tandem in duas magnas venas, et duas magnas arterias, vasa umbilicalia nuncupatas, desinant. Hæc vero vasa umbilicalia non statim intus in fœtum ipsum feruntur, sed (loquendo in specie humana) prius circa collum infantis implicantur, vel flectuntur, ut clarè possunt conspiciere iuniores in pulcherrimis Valuerdij figuris, figura 34. tertij lib. suæ anat. statim vero ac per regionem umbilici in fœtum permeant, arteria infiguntur in ramos iliacos arteriæ magnæ descendenti, quæ postea sursum ad cor repit. venæ uniuntur in unicum ramum, et hic postea in cavam iecoris partem infigitur. Quis ex iecoris hac venarum, & arteriarum fœtus dispensatione non animadvertet, impossibile esse venas, & arterias ad uteri matris internam superficiem desinentes, venas, & arterias fœtus generare? Fateor à venis parvis posse generari venas parvas, & breves, neque in hoc contradicam Gal. 14. meth. cap. 16. & 17. Fateor ad generationem venarum, & arteriarum, quæ in chorio sunt, conferre etiã aliquid venas, & arterias uteri matris, opitulari scilicet generationi earum, quæ sunt contiguæ venis, & arterijs uteri; hoc enim fatetur quoque Gal. 1. de sem. 13. dum in prima ex semine formatione duplicem vasorum vim fabricatricem agnoscit, & seminis, & conceptaculorum uteri. Cum enim quæ generavit partes, facultas animal non destituat, ut docet idem Gal. cap. 11. eiusdem lib. quis negabit exuberante materia seminali in uteri cavitate, & adiuncta venis, & arterijs uteri, posse à facultate immutatrice illarum ipsam illis agglutinari, & assimilari? Equidem si debent nutriri, opus est, ut sanguinem convertant in semen, antequam eo nutriantur, quia ex semine ipsæ factæ sunt, cur ergo si adiunctum est illis semen, si illis adhærescit, non laborabunt illud sibi agglutinare, & assimilare? Sed quòd ea sit vis parvarum venarum, & arteriarum uteri, ut parvas primo venas, & arterias ge-

B b

nerent,



# Mundini Mundinij

nerent, mox alias maiores, deinde adhuc maiores, tandem maximas, & has longo itinere circa collum infantis producant, & postea miro artificio inserant venas in iecur, & arterias in ramos iliacos, & hos deducat in unum unitos truncum in cor, inimaginabilia omnia esse existimamus. Hæc longa, varia, artificio miro plena venarum, & arteriarum distributio, à venis, & arterijs pendebit vteri? An innumerae aliæ venæ, & arteriæ per corpus ulterius infantis miro ordine distributæ à venis, & arterijs vteri producentur? Ea vis erit ne venarum, & arteriarum vteri matris? an opificis alterius virtutis in seminibus insipientis, quæ, ut diximus in ultimo cap. secundæ partis, prudentia plena non solum valet materiam in opportuna loca pro rei usu sapientissimè distribuere, verum ex ea excavare ossa, venas, & arterias, incredibilique ferè artificio passim meatus omnes aperire, & formam quibusque partibus suam inducere?

Verum inspiciamus quomodo saltem possint Neoterici saluare, venas, & arterias, quæ non extra fætum ipsum, sed in ipso habentur, generari, licet non referatur illarum generatio in vim venarum, & arteriarum vteri, in medium adducendo Neotericorum tertium agens fætus perfectorum animalium.


Postquam ergo illi se ostendisse putarunt vasa, quæ ad vterum pertingunt continuata seminali materiæ, vasa reliqua in fœtu ex illa seminali materia generare, subiungunt. Atque horum vasorum ope vis naturalis, & insita membrorum matris, quæ unumquodque sibi simile est aptum generare, ipsi fœtui communicatur, dum ille vivit vita matris, & tanquam eius pars. Imò vero cum facultas hæc singulis membris ab vno principio derivetur, arterijs à corde, venis ab hepate, quid nam erit facultas hæc generativa similis, quàm arteriarum cordifica, venarum hepatica, ut ita loquar. Si enim facultas vitalis à corde ita in arterias derivatur, ut in eo sit tanquam in fonte, atque principio, in arterijs tanquam in riuulo, & per participationem à corde, à quo influit illis assidue facultas, ut docuit Gal. 6. de decr. cap. 7. & lib. 7. cap. 5. & lib. an. sang. in art. cont. cap. 8. cum huius facultatis munus sit conservare cor ipsum, tum calorem eius ventilando, tum etiam nutrimentum vertendo in substantiam cordi similem, illa ubi fuerit per arteriolas



Et sic figura particularis non à materia pendet, sed ab efficiente, contra Neotericos.

Quoniam vero arbitror me satis, superque opinionis Neotericorum absurditatem (cum omni illis debita reuerentia dictum sit) manifestasse, minimè laborabo in singulis, quæ in vltima oratione eorum allata continentur, aut in cæteris, quæ habentur in tota sua disputatione, refellendis. Sed huic meæ disputationi ad laudem Dei, & Virginis matris Mariæ finem imponam, studiosos hortando, & rogando, vt in Vetere Hipp. & Gal. opinione de semine à nobis declarata, & defensa persistant, & semper, veluti pestem, conclusiones his duobus auctioribus contrarias aufugiant.

F I N I S.



Taruisij, Apud Marcum de Antonio.  
M. DCIX.



THE  
LIBRARY OF THE  
MUSEUM OF NATURAL HISTORY  
AND  
ZOOLOGY  
OF THE  
CITY OF LONDON  
IN THE  
MUSEUM BUILDINGS  
LONDON  
W.C.2

2 1 1 1 1

THE  
LIBRARY OF THE  
MUSEUM OF NATURAL HISTORY  
AND  
ZOOLOGY  
OF THE  
CITY OF LONDON  
IN THE  
MUSEUM BUILDINGS  
LONDON  
W.C.2